



МАКТАБ КУТУБХОНАСИ




М. Ю. ЛЕРМОНТОВ

ЗАМОНАМИЗ ҚАҲРАМОНИ

ЎЗБЕКИСТОН ЛКСМ МАРКАЗИЙ КОМИТЕТИ
„ЁШ ГВАРДИЯ“ НАШРИЁТИ
ТОШКЕНТ – 1978

„Детгиз“нинг 1948-йилги нашридан
Одил Раҳимий таржимаси



Л 70803-140 87-78
356(06)-78

Ўзбекистон ССР давлат нашриёти, Тошкент, 1954
© Издательство „Ёш гвардия“, 1978

ЗАМОНАМИЗ ҚАҲРАМОНИ

Ҳар бир китобда сўзбоши унинг ҳам аввали, ҳам охиридир: у ё асарнинг мақсадини тушунтириб бериш ёки танқиддан ўзини оқлаш ва танқидга жавоб вазифасини ўтайди. Бироқ, одатда, ахлоқий мақсад ёки журнал танқидлари билан ўқувчиларнинг ишлари бўлмайди, шунинг учун улар сўзбошини ўқимайдилар. Афсуски, айниқса бизда шундай. Бизнинг китобхонларимиз ҳали шу қадар ёш ва сoddадилки, агар масаланинг охирида қиссадан ҳисса деган хулоса бўлмаса, унинг маъносига тушуниб етмайдилар. Улар ҳазилни билмайдилар, кинояни пайқамайдилар; тўғриси, улар ёмон тарбия кўрганлар. Улар номусли жамият ва одобли китобда ошкора ҳақоратга ўйл қўйилмаслиги кераклигини, замонамиз мәърифати ундан ҳам ўткирроқ, деярли кўзга кўринмаса ҳам, аммо хушомадгўйлик ниқоби остида ундан кўра қаттиқроқ ва омонсиэроқ зарба берадиган қурол кашф этганини ҳали билмайдилар. Бизнинг кишиларимиз бир-бирига душман бўлган икки давлатга қарашли дипломатнинг суҳбатини эшигандা, булар қалин дўст бўлганлари учун ўз ҳукуматларини алдашмоқда, деб ишонадиган провинциалга ўхшайдилар.

Бу китоб яқиндагина баъзи китобхонлар ва қисман баъзи журналларнинг ҳам баҳтиқаро ишончига сазовор бўлишидай бир баҳтисизликни бошидан кечирди. Баъзилар Замонамиз Қаҳрамонидек ахлоқсиз бир кимсани бизга ибрат қилиб кўрсатипти, деб қаттиқ хафа ҳам бўлишди; баъзилар эса бунда ёзувчи ўзининг ва ўз танишларининг портретларини тасвирлапти ҳам дейишиди... Буларнинг ҳаммаси сийқаси чиқиб, эскириб кетган ҳазил! Афтидан, Русь шундай яратилганки, унда ҳамма нарса ўзгариб, янгиланиб туради, аммо бу бемазагарчилик сира йўқолмас экан. Бизда гаройиб эртакларнинг энг гаройиби ҳам шахсни ҳақорат қилишга қаратилган бир қасд сингари таънага дучор бўлмай иложи йўқ.

Муҳтарам жаноблар, Замонамиз Қаҳрамони ҳақиқатан ҳам портрет, бироқ бир кишининг портрети эмас: бу бутун авлодимизнинг гуноҳлари тўла равишда кўрсатилган қусурларидан ясалган бир портретдир. Сиз менга инсон бунчалик бематни бўлмаса керак,

деб айтарсиз, мен эса бунга жавобан: агарда шунча фожиали ва романтик ёвуздарнинг бўлишига ишонгани бўлсангиз, нега Печориннинг борлигига ишонмайсиз, дейман. Агар сиз бундан бешбаттар даҳшатли ва беўхшов уйдирмаларга маҳлиё бўлган экансиз, нима учун бу характер,— ҳатто уйдирма бўлганда ҳам,— сизнинг шафқатингизга сазовор бўлолмайди? Сабаби асада сиз истаганингиздан ортиқроқ ҳақиқат борлиги эмасмикин?..

Сиз бундан ахлоқ фойда кўрмайди деб айтарсиз? Афв этасиз. Одамларни шунча тотли нарсалар билан боқиб келганимиз ҳам етар; бундан уларнинг меъдалари бузилди; уларга энди аччиқ-аччиқ дори, ўткир ҳақиқатлар керак. Лекин шу гапларимдан сўнг ушбу китобнинг автори бир вақтларда одамларни қусурдан даволаш ҳақида мағрур орзулар қилиб юрган киши экан, деб сира ўйламанг. Бундай нодонликдан худо сақласин! У фақат сизнинг ва ўзининг баҳтига қарши жуда кўп учратган ҳозирги замон кишисини ўзи билганича тасвир этишдан завқланарди, холос. Дарднинг қандай дард эканлигини кўрсатиб беришнинг ўзи ҳам кифоя қиласди, уни қандай шифо-лашини худо билади.

БИРИНЧИ БҮЛИМ

I

Б ә л а

Мен бекат аравасида Тифлисдан жүнаб кетмоқда әдим. Аравамнинг бор-йўқ юки кичкинагина чамадондан иборат бўлиб, унинг ҳам ярми Грузия хотиралари билан тўла. Сизнинг бахтингизга, хотираларнинг кўп қисми йўқолиб кетган, чамадоним билан бошқа нарсаларим эса, менинг толеимга, омон қолган эди.

Койшаур водийсига кириб борганимда, қуёш қорли тоғлар орқасига яширина бошлаган эди. Осетин — аравакаш қоронғи тушгунча Койшаур тоғининг тепасига етиб олиш ниятида, отларни ҳадеб қистар ва овози борича бақириб ашула айтар эди. Бу водий ғоят ажойиб жой! Ҳаммаёғи — одам оёғи тегмаган баланд-баланд тоғлар, чирмашиб ўсувчи ўт-ўланлар ва ям-яшил бахмалдек тўп-тўп чинор дарахтлари қоплаган қизғиши азамат қоялар; сув ўпириб кетган сарғиш жарлар; тепада, чўққиларда эса зар ҳошиядай товланувчи қорлар, пастликдан эса Арагва қоп-қоронғи дара тагидан ҳайқириб чиқувчи номсиз бошқа бир сой билан қулоқлашиб, худди илон тангасидай ялтираб оқади.

Койшаур тоғининг этагига етгач, духан¹ ёнида тўхтадик. Бу ерда йигирматача грузин ва тоғлилар чувиллашиб туришар эди; сал нарида туйкарвони ҳам тунаш учун қўнган. Аравамни шу лаънати тоғ устига олиб чиқиши учун ҳўқиз кира қилишим керак эди, чунки куз фасли кириб, ерлар яхлаб, сирғанчиқ бўлиб қолган, тоғнинг баландлиги эса икки чақиримча келар эди.

Ноилож олтита ҳўқиз билан бир неча осетин ёлладим. Осетинлардан бири чамадонимни елкасига кўтариб олди, қолганлари эса қий-чув билангина ҳўқизларга мадад бериб боришиди.

Менинг аравам кетидан лиммо-лим қилиб юк ортилган бошқа бир аравани тўртта ҳўқиз bemalol тортиб

келарди. Бу мени ажаблантирди. У арава кетидан кумуш қопланган кичкинагина кабардинча трубкасини чекиб әгаси келар эди. Унинг эгнида — эполетсиз офицерча сюрткүй², бошида эса черкасча пахмоқ қалпоғи бор эди. Ёши әлликларда; юзининг қорачалиги Қавказ қуёши билан күпдан бери таниш эканлигидан дарак берарди. Бевақт оқарган мўйловлари эса унинг шахдам қадам ташлашига ва бардамлигига мос тушмас эди. Мен унинг ёнига келиб, бошимни эгиб салом бердим, у менинг саломимга индамай алик олди-да, оғзидан бурқитиб тутун чиқарди.

— Афтидан, ҳамроҳга ўхшаймиз-а?

У яна индамай бош эгди.

— Ставропольга кетаётибсизми, дейман?

— Ҳа, ҳа... пошшолик нарсалари билан.

— Менга қаранг, барака топкур, нима учун сизнинг оғир юкли аравангизни тўртта ҳўқиз бемалол тортади-ю, менинг бўш аравамни, мана бу осетинлар мадад берса ҳам, олти ҳўқиз зўрга судрайди?

Ҳамроҳим муғамбirona жилмайди-да, менга маънодор назар ташлади.

— Қавказга яқинда келганмисиз, дейман?

— Бир йилча бўлди,— деб жавоб бердим мен.

У яна жилмайиб қўйди.

— Нима эди?

— Шундай, ўзим! Бу осиёлилар ўлардай айёр бўлади! Сиз улар бақириб ҳўқизларига мадад берәтири, деб ўйларсиз? Уларнинг нима деб бақиришини ким билади, дейсиз! Ҳўқизлар уларнинг тилига тушунади; йигирмата ҳўқиз қўшинг, бари бир, агар улар ўз тилида бир нима деб бақирдими, бўлди, ҳўқизлар жойидан қимирламай тураверади... Бари уччига чиққан айёр! Нима ҳам қила оласиз?.. Булар ўткинчиларнинг пулини қоқиб олиш пайида... Бу муттаҳамларни жуда ёмон ўргатиб қўйишган! Ҳали кўрарсиз, сиздан яна ароқ пули ҳам олишади. Мен буларни яхши биламан, мени алдашиб бўпти!

— Бу ерда кўпдан бери хизмат қиласизми?

— Ҳа, Алексей Петрович замонида³ ҳам хизмат қиласдим,— деб жавоб берди ҳамроҳим ғурур билан.— Алексей Петрович Линияга⁴ келганда, мен подпоручик эдим,— илова қилди у,— унинг қўли остида тоғлиларга қарши жангларда қатнашиб, мартабам икки бор ошди.

— Ҳозир-чи?..

— Ҳозир учинчи Линия батальонидаман. Үзларидан сүрасак?..

Мен ҳам айтдим.

Шу билан суҳбатимиз тугади, икковимиз индамай ёнма-ён кетавердик. Тоғ тепасига чиқсак, қор бор экан. Қуёш ботиб кетди, кун ботмай туриб, тун бостириб қелди, одатда, жанубда шундай бўлади; аммо қор оппоқ оқариб тургани учун, гарчи унча тик бўлмаса ҳам, юқорига кўтарилиб борувчи йўлни адашмай топиб борардик. Чамадонимни аравага солиб, ҳўқизларни чиқариш ва аравага от қўшишни буюрдим-да, пастга, ясланиб ётган водийга сўнгги марта кўз ташладим — тоғлар орасидан бурқисиб чиқувчи қалин туман водийни тамомила қамраб олган, у ердан бирон товуш ҳам қулоғимизга етиб келмас эди. «Осетинлар шовқин-сурон билан мени ўртага олиб, ароқ пули талаб қила бошладилар; аммо штабс-капитан уларга бир ўшқириб берган эдики, бир зумда тум-тарақай бўлиб кетишиди.

— Жуда ғалати халқ-да, булар! — деди штабс-капитан. — Рус тилида нон дейишни билмайдилар-у, «офицер ароқ пули бер!» дейишни билиб олганларига ҳайронман! Менга қолса, булардан татарлар минг чандон яхши; улар ҳеч бўлмаганда, ароқдан ҳазар қилишади-ку...

Бекатга яна бир чақиримча қолган эди. Теварак-атроф жимжит, шу қадар жимжит эдики, ҳатто чивин фингиллаб учса, унинг қайси томонга учганини билиш мумкин эди. Чап ёнимизда чуқур дара қорайиб кўринарди; унинг орқасидан ва қаршимиздан, ботиб кетган қуёшнинг сўнгги шафақлари аранг кўриниб турган оч рангли уфқ этагида қат-қат қор босган кўм-кўк тоғ чўққилари кўзга ташланар эди; қорамтири осмонда юлдузлар миллиллай бошлади, бу юлдузларнинг биэнинг шимол тарафлардагига нисбатан анча юксак кўриниши одамга ғалати туюларди. Йўлнинг икки томонида қоп-қора харсанг тошлар қаққайиб туарди: у ер-бу ерда қор тагидан буталар чиқиб туарди-ю, аммо қотиб қовжираб кетган баргларнинг биронтаси ҳам қимир этмасди, бутун табнат чуқур уйқуга кетган бундай бир вазиятда бекат аравасини тортиб борувчи учта ҳорғин отнинг пишқириши ва рус қўнғироқчасининг пасти-баланд жаранглашини эшишиб бориш ниҳоятда нашъали эди.

— Эртага ҳаво яхши бўлади! — дедим мен. Штабс-капитан менинг бу гапимга индамади-да, кўрсатгич бар-

МОҒИ билан нақ рўпарамизда қад кўтариб турган баланд тоққа ишора қилди.

— У нима? — деб сўрадим мен.

— Гуд-Тоғ.

— Гуд-Тоғ бўлса нима қипти?

— Буғланиб туришини қаранг.

Чинданам, Гуд-Тоғнинг тепаси буғланиб турар эди; тоғ теварагида енгил булутлар сузаб юрарди, чўққисида ясланиб ётган қоп-қора булат эса ҳатто қоронғи осмонда ҳам яққол кўриниб турарди.

Почта бекати⁵ ва унинг ён-веридаги саклялар⁶нинг томлари кўзга ташланди, қаршимиздан жозибали чироқлар милтиллаб кўринди; нам ва изгирин шамол туриб, дара гувиллаб, майда ёмғир ёға бошлади. Буркамни энди устимга ташлай деб турган эдимки, бирдан қор ёғиб қолди. Эҳтиром билан штабс-капитанга қарадим...

— Шу ерда тунаб қолишга тўғри келади,— деди у ўксиниб,— бундай бўронда довон ошиш қийин. Ҳай, Крестоваяга кўчки тушганми?— деб сўради аравакашдан.

— Тушгани йўқ, тақсир,— деб жавоб берди осетин аравакаш,— аммо бир талайи тушай деб турипти.

Бекатда йўловчилар қўнадиган жой бўлмагани учун бизни тутун босиб кетган бир сакляга жойлаштирилар. Мен ҳамроҳимни чойга таклиф қилдим: Қавказни кезиб юрганимда бирдан-бир овунчоғим бўлган чўян қумғоним ўзим билан бирга эди.

Саклянинг бир томони тоғ бағрига ёпишган бўлиб, әшигига учта ҳўл, тирғанчиқ зинапоя билан чиқиларди. Пайпаслаб ичкари кирдим-да, бехосдан сигирга қоқилиб кетдим (бу томонларда малайхона ҳам, оғилхона ҳам бир бўларкан). Қаёққа оёқ босищни билмай қолдим. Бир ёнимда қўйлар маърайди, бир томонимда ит ириллайди. Яхшиям бир чеккадан чироқ милтиллаб кўринди-ю, әшикка ўхшаш бир туйнукни зўр-базўр топдим. Шунда ажойиб бир манзара очилди: ис босиб кетган шифтини икки устун кўтариб турган каттагина уй одамга лиқ тўла эди. Ўртада чарсиллаб гулхан ёнарди, мўридан шамол қайтариб уриб турган қуюқ тутун ҳаммаёқни шундай ўраб олгандики, анчагача ҳеч нарсани кўролмай турдим; гулхан олдида икки кампир, бир талай болача ва уст-боши жулдор-жулдор, ориқ бир грузин ўти-парди. Ноилож биз ҳам гулхан ёнига тиқилишдик, трубка

чекишидик, бирпасдан кейин қумғонимиз ҳам пишиллай бошлади.

Қимир этмай бизга анқайиб ўтирган уй эгаларини күрсатиб, штабс-капитанга:

— Бечоралар! — дедим.

— Жуда ношуд халқ,— деб жавоб берди ҳамроҳим.— Хоҳ ишонинг, хоҳ ишонманг, қўлларидан ҳеч нарса келмайди, илм-маърифат ўрганишга сира уқувлари йўқ! Қабардин ёки чеченлар, гарчи ўғри, яланг оёқ бўлсалар ҳам, жуда жасоратли бўладилар, булар бўлса ҳатто яроғ-аслаҳанинг нималигини ҳам билмайди, биронтасида тузукроқ ханжар ҳам кўрмайсиз. Осетин деганларича бор-да!

— Чеченияда кўп турганмисиз?

— Ҳа, у ердаги қалъада ўн йилча турганман. Камен-ний Брод деган жой ёнида, биларсиз?

— Эшитганман.

— Э отахон, бу каллакесарлар роса безорижон қилишарди-да, худога шукур, ҳозир анча тинчид қолишди, илгарилари вал⁷дан юз қадам нарига силжий олмас эдик: албатта бирон ерда бирорта пахмоқ калла пойлаб ётган бўларди; сал фафлатда қолдингми, ё бўйнингга сиртмоқ тушарди, ё орқангдан ўқ ердинг. Жуда азамат халқ!..

— Бундан чиқди, кўп нарсани кўрган экансиз-да!— дедим мен, бирон қизиқ воқеа эшлиши илинжида.

— Нега кўрмай! Кўрганман...

Шундай деди-да, чап мўйловини бураб, бошини қуйи солиб, хаёлга чўмди. Мен ундан бирон воқеа эшлишини истардим, бу истак ҳамма саёҳатчи ва хотиранавис кишиларга хос бир одат. Бу орада чой ҳам қайнади; чамадонимдан иккита сафарий стаканни олиб чой қўйдим-да, биттасини унинг олдига қўйдим. Ҳамроҳим чойдан бир ҳўплаб, ўзича: «Ҳа, кўп нарса кўрганман!» деб қўйди. Унинг бу хитоби менда зўр умид туғдирди. Мен биламан, Қавказда кўпдан бери турувчилар суҳбатни, ҳикоя айтиб беришни яхши кўришади, бунга улар камдан-кам мусассар бўладилар: шундай одамлар бўладики, бирон пастқам жойда ротаси билан беш-олти йил турса ҳам, салом дейдиган одам топилмайди (чунки фельдфебель унга фақат саломат бўлинг дейди). Аммо уларнинг дилида айтадиган гаплари кўп; теварак-атрофда қизиқ, ёввойи одамлар тўлиб ётипти; ҳар куни хавф-хатар кутади;

ҳар хил қизиқ воқеалар бўлиб туради, мана шундай пайтларда бизда хотиранависларнинг кам бўлганига ачинасан.

— Чойингизга жиндеқ ром қўйиб берайми?— дедим сұхбатдошимга.— Тифлисдан олган оқ ромим бор; кун совуқроқ.

— Йўқ, раҳмат, ичмайман.

— Нега?

— Шундай. Ичмайман, деб қасам ичганман. Подпоручиклик вақтимда бир марта улфатлар билан ичишиб қолган эдим, бирдан кечаси тревога бўлиб қолди; ҳаммамиз ширакайф эдик, шу ҳолимизча сафга тизилдик, Алексей Петрович буни билиб қолиб, шунақанги адабийизни бердики, асти қўяверасиз, жуда жаҳли чиқиб кетди! Судга беришига сал қолди. Сирасини айтганда, йил бўйи биронта одамни учратмайсан, бунинг устига ароқ ичиб қолсанг борми, тамом бўлдим деявер!

Бу гапни эшитгач, умидим узилди.

— Масалан черкасларни олинг,— деб сўзида давом этди у,— тўйдами ё азадами бўзани ўлардай ичиб олишади-да, кейин бир-бирларини чавақлай кетишади. Бир марта зўрға қочиб қутулганман, бўлмаса, итоатли бир князникида⁸ меҳмонда эдим.

— Нима воқеа бўлган эди ўзи?

— Мен сизга айтсан,— ҳамсуҳбатим трубкасига та-маки тўлдирди-да, тутатиб, ҳикоясини бошлади,— у кезларда мен Терекнинг нариги соҳилидаги қалъада рота билан турардим, бунга яқинда беш йил бўлади. Куз кунларидан бирида қалъага озиқ ортган транспорт келди. У транспортда йигирма бешларга кирган бир ёш офицер ҳам бор эди. Офицер расмий формада ҳузуримга кирдида, қалъада қолиш тўғрисида буйруқ олганини билдириди. У шу қадар хипча, нозик, юзлари оппоқ, мундири шу қадар янги эдики, унинг Қавказга яқинда келганини дарҳол фаҳмладим. «Бу ерга Россиядан юборилгандирсиз?» деб сўраган эдим, у, «шундай, жаноби штабс-капитан», деб жавоб берди. Мен унинг қўлидан ушлаб: «Жуда хурсанман, жуда хурсандман. Бу ерда бир оз зерикиб ҳам қоларсиз, лекин хафа бўлманг, иноқ бўлиб яшаймиз. Мени тўғридан-тўғри Максим Максимович деяверинг, иннайкейин, расмий формада келишнинг нима ҳожати бор? Менинг олдимга келганингизда фақат фуражка

кийиб келсангиз, бас» дедим. Унга қалъадан квартира бердик, жойлашиб олди.

— Оти нима эди? — деб сүрадим, Максим Максимичдан.

— Оти... Григорий Александрович Печорин эди. Жуда яхши йигит эди, мен сизга айтсам; аммо табиати бир оз ғалатироқ эди. Масалан ёмғир демай, совуқ демай әртадан кечгача овда юрарди; ҳамма совқотиб ўлардай чарчаса, унга ҳеч нарса қилмасди. Аммо баъзида уйига кириб оларди-да, сал шамол эсди дегунча шамоллаб қолдим дерди; дарча тақиллаб кетса, бир сесканиб, ранги оппоқ оқариб кетарди; аммо түнғиз биған яккама-якка олишганини ўз кўзим билан кўрганман; баъзи вақтлар соатлаб индамас эди, аммо баъзан бирдан гапга кириб кетдими, бас, кулавериб ичакларинг узилиб кетарди... Шундай, жуда ғалати одам эди, иннакейин, ўзи ҳам жуда бадавлат бўлса керак: қимматбаҳо нарсаларининг кўплигини айтмайсизми!..

— Сиз билан кўп турдими? — деб сүрадим.

— Бир йилча турди, аммо ўша йил сира эсимдан чиқмайди; жуда кўп ташвиш орттириди бошимга, йигити тушкур! Қизиқ, дунёда шундай одамлар борки, уларнинг бошларига турли-туман ажойиб ҳангомалар тушажаги пешоналарига ёзилган бўлади.

— Ажойиб ҳангомалар? — деб хитоб қилдим, унга чой қуяр эканман қизиқсиниб.

— Мен сизга айтиб берай. Қалъадан олти чақиримча нарида итоатли бир князь туради. Унинг ўн беш яшар ўғли бўлар эди, шу бола бизнинг қалъага келиб-кетиб турадиган бўлиб қолган эди; кунда ё уни деб, ё буни деб келарди. Григорий Александрович иккимиз уни жуда әркалатиб қўйган эдик-да. Ўзи шундай абжир ва каллакесар эдики, ҳар нарсани ҳам қойил қиласди: отни чоптириб кета туриб ердаги шапкани илиб кетарди ё бўлмаса отда туриб милтиқ ҳам ота оларди. Унинг битта ёмон одати бор эди: пулга жуда ўч эди. Бир куни Григорий Александрович ҳазиллашиб, отангнинг қўрасидан энг яхши серкани ўғирлаб келсанг, бир червон бераман деб қолди; буни қарангки, эртаси куни кечаси серканинг шохидан судраб келди. Баъзан биз уни гиж-гижлатиб қолардик, шунда кўзларига қон тўлиб, қўли дарҳол ханжарга югуради. «Хой, Азамат, бир кунмас-бир кун бошингни ейсан, ишинг чатоқ бўлади!» — дердим мен.

Бир куни кекса князниң ўзи келиб, бизни түйга айтиб кетди: катта қизини узатаётган экан, биз у билан иноқ әдик, гарчи татар бўлса ҳам йўқ деб бўлмас эди. Бордик. Овулда бизни бир талай ит ҳуриб қарши олди. Хотин-халажлар бизни кўриб юзларини яширишарди; юзларини кўрганларимизни эса унча чиройли деб бўлмас эди. «Черкас аёллари жуда чиройли бўлса керак деб ўйлардим», деди Григорий Александрович. «Ошиқманг!» дедим мен кулиб. Узимниң ўйлаб қўйганим бор эди-да.

Биз борсак, князниң уйи одамга лиқ тўла экан. Осиёлиларда никоҳ-тўйга бутун кўча-кўйни чақириш одати бор. Бизни иззат-икром билан кутиб, меҳмонхонага олиб киришди. Аммо мен, ҳар эҳтимолга қарши, отларимизни қаерга боғлаб қўйганларини кўз остига олиб қўйишни унутмадим.

— Уларда тўй маросими қанақа бўларкан? — деб сўрадим штабс-капитандан.

— Одатдагича бўлади. Олдин мулла қуръондан бир нималар ўқииди, кейин келин билан куёвга, уларниң ҳамма қариндош-уруғларига тўёна берилади; овқат ейишади, бўза ичишади; кейин чавандозлик бошланади, шунда албатта оқсоқ, қирчанғи от мингандарни жулдур киймли бир киши масҳарабозлик қилиб ҳаммани кулдиди; қоронғи тушгандан кейин меҳмонхонада, бизниңча айтганда, базм бошланади. Бир бечора мўйсафид учторли чолғуни... хаҳ, оти қурсин, эсимдан ҳам чиқипти... бизниң балалайкага ўҳшаган бир чолғуни тингифлатиб ўтиради. Қизлар бир томон, йигитлар бир томон бўлиб, чапак чалиб лапар айтишади. Орадан бир қиз билан бир йигит чиқиб, оғизларига келган нарсани лапар қилиб айтишади, қолгани уларга жўр бўлади. Печорин иккимиз уйниң тўрида ўтирган әдик, бир маҳал уй эгасининг ўн олти яшар кичик қизи унинг олдига келиб лапар айтиб қолди... Нима десам экан?.. Хушомад қилиб қолди-да.

— Нима деб лапар айтиди, эсингиздами?

— «Йигитларимиз навқирон, чакмонларига кумуш қадалган, аммо ёш рус офицери эса улардан ҳам навқирон, галунлари тилладан. Йигитларимиз орасида гўё сарв; бироқ у бизниң боғимизда ўсолмайди ҳам, гулламайди ҳам» деб айтиди, шекилли. Печорин ўрнидан туриб, кафтини пешана ва кўксига қўйиб таъзим қилди-да, гапимни бунга тушунтириб беринг деб мендан илтимос

қилди; мен уларнинг тилини жуда яхши биламан. Печориннинг гапини таржима қилиб бердим.

Қиз ёнимиздан кетгач, Григорий Александровичнинг қулогига: «Хўш, қалай экан?» деб шивирладим.

«Жуда гўзал экан!— деди у:— Оти нима?» «Оти Бэла»,— деб жавоб бердим.

Қиз чиндан гўзал эди: баланд бўйли, хипчадан келган, кўзлари тоғ кийигининг кўзларидаи қоп-қора, худди юрак бағрингизга қараб тургандай. Печорин хаёлга чўмиб, ундан кўзини узолмай термилиб ўтиради, қиз ҳам унга тез-тез зимдан кўз ташлаб қўярди. Аммо қизга Печориндан бошқа маҳлиё бўлган яна бир киши бор эди: уйнинг бир бурчагида ўтдай чақнаб турган бир жуфт кўз қизга тикилиб турарди. Синчиклаб қарасам, у Қазбич деган эски танишим экан. Уни итоатли деб ҳам, итоатсиз деб ҳам бўлмас эди. Гарчи ҳеч қандай ёмонлик қилмаса ҳам, ундан шубҳамиз бор эди. Баъзан қальяга қўй ҳайдаб келиб, савдолашиб ўтирмасдан арzonга сотиб кетарди, аммо ўлдириб юборсанг ҳам айтган нархидан арzonга сотмасди. Уни одамлар, абреклар⁹ билан бирга Кубань дарёсининг нариги томонига ўтиб қароқчилик қилади, дейишарди; ростини айтганда, ҳақиқатан ҳам башараси қароқчига ўхшарди: ўзи пак-пакана, қотмадан келган, кенг яғринли йигит эди... Эпчиллигини айтмайсизми, нақ шайтоннинг ўзи дейсиз! Пешмати ҳамиша йиртиқ-ямоқ бўлса бўлардики, аммо қуроли кумушдан бўларди. Тагидаги отининг довруғи бутун Қабардага кетганди, ҳақиқатан ҳам унинг отидай от ҳеч қаерда топилмасди. Ўнга ҳамма чавандозларнинг ҳаваси келиб юрарди, кўп одамлар ўғирлаб кетишга уриниб кўриши-ю, аммо уддасидан чиқишишолмади. Ҳозир ҳам кўз олдимдан кетмайди: ўзи қоп-қора тўсадай эди, оёқлари ингичка, кўзлари Бэланинг кўзларидан қолишмасди; бақувватлигини айтмайсизми! Эллик чақирим тўхтамай чопиш чўт эмасди, эгасига шундай ўрганган эдикни, худди итдай эргашиб юрарди, ҳатто унинг овозини ҳам танирди! Қазбич уни ҳеч боғламасди ҳам. Эгасига муносиб от эди-да!..

Бу кеча Қазбич одатдагидан кўра хафароқ эди, пешмати ичидан совут кийиб олганини ҳам пайқаб қолдим. «Совут кийиб олиши бежиз бўлмаса керак, бир нияти борга ўхшайди»,— деб қўйдим ичимда.

Үй ичи жуда дим бўлиб кетган эди, бир шамоллаб

келай деб ташқари чиқдим. Тоғларни тун қамраган, далаарни туман босганди.

Отларимизга ем берилдими, ійүкми, шуни билмоқчи бўлиб бостирмага кирдим, ҳар ҳолда эҳтиёткорлик ҳеч зарар қилмайди: чунки менинг отим ҳам жуда яхши отэди, кўп кабардинлар отимга суқланиб қарап ва якши тхе, чок якши! дейишарди.

Девор тагидан ўтаётуб, бирдан икки кишининг товушини эшишиб қолдим: овозларидан бирини дарҳол танидим: у, мезбонимизнинг ўғли саёқ Азamat эди; бошқа овоз эса паст бўлиб, аҳён-аҳёнда эшитиларди. «Улар нима ҳақида гапиришаётитти экан?— деб ҳайрон бўлдим.— Тағин менинг отим тўғрисида бўлмасин?» Секин девор тагига ўтирдим-да, бошдан-оёқ эшитиш мақсадида гапларига диққат билан қулоқ солдим. Баъзан уйдан чиққан ашула ва гурунглар мени қизиқтирган суҳбатни босиб кетарди.

«Жуда ажойиб отинг бор-да,— дерди Азamat,— агар уйнинг хўжайини мен бўлсам-у, уч юзта биям бўлса эди, ярмини сенинг чопқир отингга алишардим, Казбич!»

«Э, Казбич экан-ку!»— дедим ичимда ва бирдан устидаги совути эсимга тушди.

«Рост,— деб жавоб берди Казбич, бир оз жим тургач:— бутун Кабардада бунақа отни тополмайсан, бир марта абреклар билан бирга русларнинг йилқиларини талаш учун Терекнинг нариги томонига ўтдик; омадимиз келмади, ҳаммамиз ҳар ёққа тўзғиб кетдик. Тўртта казак отда кетимдан қувиб қолди; кофирлар ҳайқиришиб менга етай деб қолганда, бирдан олдимдан қалин ўрмон чиқиб қолди. Эгарга ётиб олдим-да, ўзимни худога топшириб, умримда биринчи марта отимга қамчи урдим, отимни ҳақорат қилганим ҳам шу эди. Отим дараҳтлар орасига қушдай шўнғиб кириб кетди; дараҳтларнинг ўткир тиканлари уст-бошимни дабдала қилиб юборди, қайрағочларнинг қуруқ шохлари юзларимни тимдалади. Отим тўнкалар устидан сакраб, буталарни кўкраги билан ёриб ўтарди. Аслида, отимни ўрмон ёқасига ташлаб, ўзим ўрмон ичига яширинсам бўларди-ю, аммо отимни кўзим қиймади, шунинг учун авлиёлар қўллаб юборди дейман-да. Бошим устидан бир неча марта ўқ визиллаб ўтди; казакларнинг отдан тушиб кетимдан қувиб келишлари аниқ эшитиларди... Бирдан олдимдан чуқур зовур чиқиб қолса бўладими! Чопқирим бир лаҳза туриб қол-

ди-ю, кейин дадил сакради. Кейинги оёқлари сирғаниб кетиб, олдинги оёқлари билан зовур четига осилиб қолди. Жиловни қўйиб юбориб, ўзим жарга учиб тушдим; отимишни шу сақлаб қолди: у бир сакраб телага чиқиб олди. Қазаклар буни кўриб туар эдилар, аммо бирортаси ҳам жарга тушиб мени қидирмади; мени ўлди деб ўйлашган бўлса керак-да; отимнинг кетидан қувиб кетгандарини эшитиб ётардим. Юрак-бағрим қон бўлиб кетди; жар ёқасидаги қалин ўтлар орасидан эмаклаб кетдим, қарасам: ўрмон тугаб қолган экан, ўрмон ичидан бир неча отлиқ чиқиб келаётитти, менинг Қоракўзим ҳам худди уларнинг олдидан чиқиб қолса бўладими; ҳамма казаклар ҳайқириб унинг кетидан қувиб қолишиди; анчагача қувиб юришди, айниқса бир казакнинг отимнинг бўйнига сиртмоқ ташлаб ушлаб олишига сал қолди: титраб кетдим-да, қўзларимни чирт юмиб, дуо ўқий бошладим. Бир неча минутдан кейин кўзимни очиб қарасам: Қоракўзим думини кўтариб, худди елдай учиб юрипти, кофирлар эса йироқ даشتда ҳорғин отларини лўкиллатиб, кетма-кет чизилишиб чопишмоқда. Худо ҳақи, рост! Ярим кечагача жардан чиқмай ўтиредим. Бунисига нима дейсан, Азамат: бир маҳал қарасам, қоронгида жар ёқасида бир от кишнаб, ер тепиниб юрипти; Қоракўзимни товушидан танидим, у менинг ўша йўлдошим эди!... Ўша-ўша бир-бири миздан сира ажралмаймиз».

Казбич ўз аргумогининг ипакдай бўйнига уриб, ҳар хил нозик исмлар билан эркалатгани эшитилди.


«Мингта биям бўлганда, ҳаммасини сенинг Қоракўзингга алишардим»,— деди Азамат.

«Йўқ, алишмайман»,— деб жавоб берди Казбич, лоқайдлик билан.

«Менга қара, Казбич,— дерди Азамат, унга эркалик қилиб,— ўзинг раҳмдил одамсан, мард йигитсан, отам руслардан қўрқиб, мени тоқقا чиқармайди, отингни менга берсанг, айтганингни қиласман, отамнинг энг яхши милтифи ё қиличини ўғирлаб бераман, нима десанг — шуни келтириб бераман, отамнинг қиличи асл гурда¹⁰ қилич: дамини қўлингга теккизсанг — ботиб кетаверадиган; унинг совути олдида сенини уч пулга арзимайди».

Казбич индамасди.

«Отингни,— деб давом этарди Азамат,— остингда бурнларини кериб пишқириб ўйноқлаганини, туёқлари остидан тошлар отиб юрганини кўриб, кўнглим бир хил



бўлиб кетган эди, ўшандан бери кўзимга ҳеч нарса қўринмайди; отамнинг энг бориб турган чопқир отларига ҳам қарагим келмайди, уларни миниб чиқишга ҳам уялман, юрак-бағрим қон бўлиб кетди; юрагим қайғуга тўлганидан кун бўйи тоқقا чиқиб ҳасрат чекиб ўтираман, чиройли қадам ташлаб юрувчи, сағриси ўқ ёйидай текис чопқиринг сира кўз олдимдан нари кетмайди, худди менга бир нарса демоқчи бўлгандаш шўх кўзлари ни жавдиратиб кўзимга қараб тургандай бўлади. Қазбич, агар отингни менга сотмасанг, ўламан!» деди Азамат, титроқ товуш билан.

Товуши менга худди йиғлагандай бўлиб эшитилди: шуни ҳам айтиш керакки, Азамат жуда ўжар бола эди, кичкиналигида ҳам уни ҳеч йиғлатиб бўлмасди.

Унинг кўз ёшларига жавобан кулги эшитилди.

«Менга қара!— деди Азамат, шиддатли товуш билан,— кўриб турибсанки, мен ҳеч нарсадан тоймайман. Ҳоҳласанг, опамни олиб қочиб келтириб берай. Унинг ўйнаганини кўрсанг, ашулаларини эшитсанг! Зар билан кашта тикишларини айтмайсанми! Турк подшосининг ҳам бунағанги хотини бўлган эмас... Бўптими? Эртага кечаси дара ичидаги сой бўйида кутиб турсанг, опам билан бирга нариги овулга ўтиб кетаётган бўламан-у, опам сеники бўлади, вассалом. Наҳотки, Бэла сенинг чопқирингга арзимаса?»

Қазбич анчагача индамай турди; ахири, жавоб ўрнига қадимги бир ашулани хиргойи қила бошлади:*

Оувалимизда кўп гўзал дилдорлар,
Қора кўзларида юлдузлар порлар.
Уларни севишилик хўп яхши ишдир;
Ёшлик эркинлиги ундан ҳам хушдир.
Тўрт хотинни сотиб олади тилло,
Чопқир тулпор от-чи, эрур бебаҳо:
Унга чўл шамоли тенглаша билмас,
У ҳеч вақт алдамас, хиёнат қилмас**

Азамат анчагача Қазбични кўндиришга уринди, йиғлади — сиқтади, хушомад ҳам қилиб кўрди, онт ҳам

* Қазбичнинг менга наср билан айтиб берган ашуласини шеърга согланим учун китобхонлардан афв сўрайман; ноилож: одат — иккянчи мижоз дейдилар. (Лермонтовнинг изоҳи).

** «Замонамиз қаҳрамония»да учрайдиган шеърларни Рустам Кемилов таржима қилган.

иичиб күрди, бўлмади. охири Қазбич тоқатсизланиб, унинг сўзини кесди:

«Нари тур, тентак! Менинг отимни минишга сенга йўл бўлсин! Уч қадам босиши биланоқ, сени бир улоқтириб ташлайдики, калланг тошга тегиб, тарс ёрилади».

«Мени-я?»— газаб билан қичқирди Азамат, кейин кичкина ханжарнинг совутга тегиб жаранглагани эши-тилди. Кучли қўл уни бир итариб юборган эди, бола четан деворга бориб шундай урилдики девор лапанглаб кетди. «Тоза томоша бўладиган бўлди-ку!» дедим ичимда ва югуриб отхонага кирдим-да, отларимизни юганлаб, орқа ҳовлига етаклаб чиқдим. Икки минут ўтмасдан уй ичи остин-устин бўлиб кетди. Воқеа бундай бўлган экан, Азамат пешмати йиртилган ҳолда уйга югуриб кирипти-да, Қазбич мени сўймоқчи бўлди, деб бақирипти. Ўтирганлар ўринларидан иргиб туриб, қўлларига милтиқ олиб чиқишипти, шундан кейин тўс-тўполон бошланиб кетди! Қий-чув, милтиқбозлик бўлиб кетди; Қазбич отини миниб кўчада, одамлар ўртасида қиличини ўйнатиб, гир-гир айланарди. «Тўй азага айланиб кетмасайди,— дедим мен, Григорий Александровичнинг енгидан ушлаб,— яхшиси, вақт ғаниматда кета қолмаймизми?»

«Шошманг, оқибати нима бўларкин»,— деди у.

«Нима бўларди, ёмон бўлади; осиёлилар ҳамиша шунаقا, бўза ичиб олишдими, пичноқбозлик бошланади!» Отимизга миниб уйга қайтдик.

Мен тоқатсизланиб:

«Қазбич нима бўлди?— деб сўрадим штабс-капитандан.

— Унақанги одамга жин ҳам урмайди!— деб жавоб берди у, чойини ичиб бўлиб.— Қочиб қутилиб кетди!

— Ярадор ҳам бўлмадими?— деб сўрадим.

— Худо билади! Бу каллакесарларнинг жони қаттиқ бўлади! Жангларда уларнинг кўпини кўрганман: ҳамма ёғига найза тегиб илма-тешик бўлиб кетса ҳам, қиличини ўйнатгани-ўйнатган.— Бир мунча сукунатдан кейин штабс-капитан ер тепиниб давом этди:

— Умр бўйи бир гуноҳимни кечира олмайман; мени шайтон йўлдан урибди-ю, девор тагида ўтириб эшигтан ҳамма гапни қалъага қайтганимиздан кейин Григорий Александровичга айтиб берибман-да! У муғамбири ҳам

**бир кулиб қўйди, аммо қўнглига бир нарсани туғиб қўй-
ган экан.**

— Нимани? Айтиб беринг энди бу ёғини ҳам.

— Начора, гапни бошлагандан кейин давомини ҳам
айтиш керак.

Уч-тўрт кундан кейин қалъага Азамат келиб қолди.
У, одати бўйича, Григорий Александровичнинг олдига
кирди: Григорий Александрович уни доим хилма-хил
ширинликлар билан сийлаб тургувчи эди. Мен ҳам ўша
ерда эдим. Гап от устида борарди, Печорин Қазбичнинг
отини мақтай кетди: Қазбичнинг оти чопқир, кийикдай
чиройлик дея бошлади, хуллас, унинг гапига қараганда,
дунёда ундай от йўқ эди.

Татарваччанинг кўзлари чақнаб кетди. Печорин эса
ўзини билмасликка солди; мен гапни бошқа ёққа бурсам,
у яна Қазбичнинг отидан бошлайверди. Азамат қачон
бизниги келса, шу тўғрида гапираверди. Уч ҳафталар-
дан кейин қарасам, худди романлардаги сингари, Аза-
матнинг юzlари сарғайиб, ўзини олдириб қўйипти. Нима
бўлдийкин, деб ажабланаман...

Бу воқеани кейин пайқаб қолдим: Григорий Александрович уни шундай даражага олиб бориб қўйдикি,
бона бечора ўзини сувга ташлашдан ҳам тоймайдиган
бўлиб қолди. Бир куни Григорий Александрович унга:
«Ўша от сенга жуда ёқиб қопти-а, Азамат? Аммо унга
етишга сенга йўл бўлсин! Айт-чи, ўша отни олиб берган
одамга нима берардинг?»— деб қолди-ку.

«Хоҳлаган нарсасини»,— деб жавоб берди Азамат.

«Ундоғ бўлса, отни сенга мен олиб бераман, аммо
бунинг бир шарти бор... Бажараман, деб онт ич-
сан...»

«Онт ичаман... Сен ҳам онт ич!»

«Бўпти! Ўша от сенини бўлади, деб онт ичаман; аммо
унинг эвазига менга опанг Бэлани берасан, Қоракўз
унинг қалини бўлади».

Азамат индамай турарди.

«Хоҳлайсанми? Хоҳламасанг, майли! Мен сени йигит
десам, ёш бола экансан, от минишга ҳали ёшлик қилар
экансан...»

Азамат қип-қизариб кетди. «Отам бор-ку!»— деди у.
«Отанг ў ёқ-бу ёққа бориб-келиб турмайдими?»

«Рост-а».

«Розимисан?..»

«Розиман,— деб шивирлади Азамат, юзи бўздаи оқарби.— Қачон энди?»

«Қачон Қазбич келса — шунда; ўнта қўй ҳайдаб келаман деб ваъда берган; у ёғи менинг ишим. Аммо лафздан қайтиш йўқ. Азамат!»

Шундай қилиб икковларининг савдолари пишди... Ростини айтганда, яхши иш бўлмади! Кейинчалик мен Печоринга буни айтдим ҳам. Шунда у, ёввойи черкас қизи мендай чиройли эрга тегиб, қайтанга бахтли бўлиши керак, негаки, ҳар ҳолда мен унга эр бўламан, Қазбич эса бир қароқчи, унинг жазосини бериш керак, деди. Ўзингиз ўйлаб кўринг, мен бунга нима дея олар эдим? Аммо у вақтда мен уларнинг тил бириктирганлигидан бехабар эдим. Кунлардан бир кун Қазбич келиб қолдида, қўй, асал керакмасми, деб сўради; эртага келтир деб тайинладим. «Азамат!— деди Григорий Александрович,— эртага Қоракўз менинг қўлимда бўлади; бугун кечаси Бэла шу ерда бўлмаса — от билан хайрлаша-вер...»

«Бўпти!» деди Азамат ва овлуга от чоптириб кетди. Кечқурун Григорий Александрович қурол-яроғини тақиб қалъадан чиқиб кетди: ишни қандай битириши — билмайман, аммо ярим кечада иккови қайтиб келди. Азамат отига оёқ-қўллари боғланган, боши чодра билан ўралган бир аёлни ўнгариб келганини часовой кўрипти.

— От-чи, от нима бўлди?— деб сўрадим штабс-капитандан.

— Ҳозир, ҳозир. Эртасига эрталаб Қазбич ўнта қўй ҳайдаб келди. Отини девор ёнига боғлади-да, менинг олдимга кирди; олдига чой қўйдим, гарчи қароқчи бўлса ҳам меҳмоним эди-да.

Иккимиз у ёқ-бу ёқдан гаплашиб ўтиридик... Бирдан қарасам Қазбич бир сесканиб тушди, юзи бўздаи оқарби кетди-да, деразага отилди; бахтга қарши дераза уйнинг орқа томонига қараганди. «Сенга нима бўлди?» деб сўрадим.

«Отим!.. Отим!»— деди Қазбич титраб-қақшаб.

Чиндан ҳам, қулоғимга от дупури эшитилди. «Битта-яримта казак келгандир...» дедим.

«Йўқ! Урус ёмон, ўрус ёмон!» деб бақириб юборди Қазбич ва ташқарига қоплондай отилди. Икки ҳатлаб ҳовлига чиқди; қалъа дарвозасида турган часовой милтиқ билан йўлини тўсган эди, Қазбич милтиқ устидан

сакраб ўтди-да, йўлдан югура кетди... Йироқда чанг кўринар эди: Азамат Қоракўзни чоптириб кетмоқда эди; Қазбич йўл-йўлакай милтиғини филофидан олиб, ўқ узди. Бир минутча қимир этмай турди, кейин ўқнинг хато кетганини билиб чинқириб юборди, милтиқни тошга уриб чил-чил қилиб синдириди-да, ерга ётиб ёш боладай ҳўнграб йиғлаб юборди... Қалъадан одамлар чиқиб, атрофини ўраб олишди, аммо унинг кўзига ҳеч нарса кўринмасди; одамлар бирпас гапиришиб туриб, тарқалиб кетиши; мен қўйларнинг пулинин Қазбичнинг олдига обориб қўйинглар деб буюрдим, пулга ҳам қарамади, худди ўликдай муккасидан тушиб қимирламай ётаверди. Хоҳ ишонинг, хоҳ ишонманг, эрталабгача қимирламай ётди... Эртаси эрталаб қалъага келди-да, отимни ким ўғирлаганини айтинглар, деб ялинди. Азаматнинг отни ечиб, миниб кетганини кўриб турган часовой кўрган-билганини яширмади. Азамат номини эшитиши биланоқ Қазбичнинг кўзлари чақнаб кетди ва Азаматнинг отаси турган овулга қараб жўнади.

— Азаматнинг отаси нима бўлди?

— Бутун гап шунда-да, Қазбич унинг отасини тополмапти: у беш-олти кунга аллақаерга кетган экан, бўлмаса, Азамат опасини ўғирлаб қоча олармиди?

Отаси қайтиб келса, уйда на қизи бор ва на ўғли. Азамат жуда муғамбир бола эди. Қўлга тушса калласидан ажралишини биларди. Ъша-ӯша дом-дараксиз йўқолиб кетди, бирон абреклар шайкасига қўшилиб, Терекнингми ё Кубаннингми нариги томонида калласидан ажралгандир-да, баттар бўлсин!..

Ростини айтсан менинг ҳам бошиңга кўп савдолар тушди. Черкас қизнинг Григорий Александрович уйидалигини эшитган заҳотим, эполетларим ва қиличимни тақиб, унинг уйига чиқдим.

Григорий Александрович ўринда бир қўлини боши остига қўйиб, бир қўлида ўчиб қолган трубкасини ушлаб ётарди; ичкари уйнинг эшиги қулф, бурнида калити кўринмас эди. Буни мен бир қараашдаёқ пайқадим... Мен жўрттага йўтала бошладим, оstonани тепиб ҳам кўрдим, у ўзини эшитмаганга солиб ётаверди.

«Жаноби прапоршчик! — дедим мен, товушимни мумкин қадар шиддатлироқ қилиб.— Менинг келганимни кўрмаяпсизми?»

«Э, салом, Максим Максимич! Трубка чекасизми?»—
деди у, бошини күтартмасдан.

«Кечирасиз! Мен Максим Максимич эмас, штабс-капитанман».

«Фарқи йўқ. Чойга қалайсиз? Бошимга қандай ташвиш тушганини билсангиз эди!»

«Мен барини биламан»,— дедим каравотга яқинлашиб.

«Яна яхши, айтиб ўтиришга ҳушим йўқроқ эди».

«Жаноби прaporщик, сизнинг қилган ишингизга мен ҳам жавобгар бўлишим мумкин...»

«Қўйсангиз-чи! Шунга ҳам ота гўри қозихонами? Ахир анчадан бери ҳамма ишимиз шериклик-ку!»

«Бу ҳазилингиз нимаси? Марҳамат қилиб, қиличинизни топширинг!»

«Митъка, қилични келтир!..»

Митъка қилични келтириб берди. Мен ўз бурчимни адо этгач, каравотга ўтиридим-да:

«Менга қара, Григорий Александрович, ёмон иш қилиб қўйганингни бўйнингга ол»,— дедим.

«Қанақа ёмон иш қилибман?»

«Бэлани олиб қочганинг... Азамат ҳам муттаҳам!. Бўйнингга ол».

«Ҳа, ахир, яхши кўрсам нима қилай?..» Шундан кейин нима ҳам дея олардингиз?.. Нима дейишимни билмай қолдим. Аммо бирпас жим ўтирганимдан кейин, отаси талаб қилса қайтариб бериш кераклигини айтдим.

«Қайтариб беришнинг ҳожати йўқ!»

«Қизнинг бу ердалигини билиб қолса-чи?»

«Қаёқдан билади?»

Мен яна индаёлмай қолдим. «Менга қаранг, Максим Максимич!— деди Печорин, бошини ёстиқдан кўтариб.— Узингиздан ўтар гап йўқ, башарти қизни ваҳший отасига қайтариб берсак — ё бўғизлаб ўлдиради, ё бирорвга сотиб юборади. Бўлар иш бўлди, энди ишни бузиб ўтиришнинг нима кераги бор; қиз менда, қилич сизда қолсин...»

«Ҳеч бўлмаса, менга бир кўрсатинг ўзини»,— дедим мен.

«Анави эшикнинг орқасида ўтирипти; бугун ўзим ҳам бир кўрай деб шунча уриндим, иложи бўлмади, бир бурчакда чодрага ўралиб ўтирипти, қарамайди ҳам, гапирмайди ҳам, кийикдай ҳуркович. Духанчиннинг хотинини ёллаб бердим: у татар тилини ҳам билади, хизматини

жам қиласы, унинг меники әканлыгыни жам қулоғига қуяды, чунки мендан бошқа ҳеч кимсага теголмайды»,— деб илова қилди Печорин, мушти билан столни бир уриб. Бунга жам күндим... Нима жам қила олардим? Шундай одамлар бўларканки, уларнинг гапига рози бўлмай сира иложинг йўқ.

— У ёғи нима бўлди энди? — деб сўрадим Максим Максимичдан, — ҳақиқатан ҳам Печорин уни ўзига ўргатиб олдими ё қиз тутқунликда юртини соғина-соғина, сўлиб кетдими?

— Йўғ-е, нега юртни соғинаркан? Унинг овулидан кўринадиган тоғлар қалъадан ҳам кўриниб турарди, бу ёввойиларга шундан бошқа ҳеч нарсанинг кераги йўқ. Иннайкейин, Григорий Александрович ҳар куни унга совға бериб турарди: дастлабки кунлари қиз совғаларни назар-писанд этмай рад қиласарди, ҳаммаси духанчиннинг хотинига қоларди, бу эса унинг тилини янада бурро қиласарди. Эҳ, ҳадялар-ҳадялар! Бир парча чиройли гулдор латта деб хотин киши нималар қилмайди!.. Хайр, буни бир ёққа қўя турайлик... Григорий Александрович у билан узоқ вақт олишди, шу орада татар тилини ҳам ўрганиб олди, қиз ҳам бизнинг тилимизга тушуна бошлади. Бора-бора Григорий Александровичга кўз қирни ташлаб, зимдан қараб қўядиган бўлди, нуқул ҳасрат чекиб, ўзи билган ашулаарни хиргойи қилиб ўтиради, нариги уйда ўтириб эшитиб қолсам, менинг ҳам юрагим эзилиб кетарди. Бир ҳодиса сира эсимдан чиқмайди; уйнинг ёнидан ўтиб кета туриб, деразадан қарадим: Бэла сўрида бошини эгиб ўтиради. Григорий Александрович эса унинг қаршиисида турарди. «Менга қара, маликам,— дерди Григорий Александрович унга,— эртами, кечми, ахир менини бўлишингни ўзинг ҳам биласан-ку, нега энди мени бунчалик қийнайсан? Е бирон чеченга кўнгил қўйганимисан? Ундай бўлса, ҳозироқ уйингга қайтариб юборраман». Бэла бир сесканиб тушди-да, бошини чайқади. «Е мендан ҳазар қиласанми?»— деб давом этди Григорий Александрович. Бэла бир хўрсинди. «Ёки дининг мени севишингга йўл қўймайдими?» Бэланинг ранги ўчди, у чурқ этмай ўтиради. «Ишон гапимга, ҳамманинг худоси битта, менга сени севишга йўл қўйса, нега сенга йўл қўймас экан?» Бэла худди бу янги фикрдан ажаблангандай, унинг юзига ялт этиб қаради; қизнинг кўзларида шубҳа, шу билан бирга бу гапга ишониш истаги порлар

эди. Оҳ, у күэларни айтмайсизми! Худди бир жуфт чўфдай ёниб тураг эди.

«Менга қара, гўзалим, азизим Бэла!— деб давом этарди Печорин,— сени қанчалар севганимни кўриб турибсан: бир кулиб қарашинг учун ҳеч нарсамни аямайман; сенинг вақтингни хуш қилиш учун ҳар нарсага тайёрман, сенинг бахти бўлишингни истайман; agar сен яна қайфуга ботсанг — мен ўламан. Айт-чи, очилиб ўтирасанми?» Бэла қоп-қора кўзларини ундан узмай ўйланаб қолди, кейин эркаланиб жилмайди-да, бошини эгиб розилик билдириди. Печорин унинг қўлидан ушлаб, мени бир ўпгин деб ялина бошлади: қиз ўзини ожизлик билан ҳимоя қиласан деб туриб олди; Бэлани титроқ босиб, йиглаб юборди. «Мен сенинг чўриингман, асирингман,— дерди у,— мени зўрлашга кучинг етади, албатта»,— деб яна кўз ёши қила бошлади.

Григорий Александрович пешанасига бир мушт урдида, нариги уйга чиқиб кетди. Мен унинг олдига кирдим; у икки қўлини қовуштириб, қовоқларини солғаш ҳолда уй ичидаги кезиб юради. «Хўш, ишлар қалай отахоним?»— дедим мен унга. «Хотин эмас, иблис экан!— деб жавоб берди Печорин.— Аммо, сизга онт ичиб айтаманки, менга тегмаса — отимни бошқа қўяман». Мен бош чайқадим. «Гаров ўйнайсизми?— деди менга қараб:— бир ҳафтадан кейин!»— «Бўпти!» Қўл қисишиб ажралишдик.

Эртаси куни эрталаб Печорин ҳар хил совғалар олиб келиш учун Кизляр шаҳарига одам юборди: жуда кўп ҳар хил эрон матолари келтирилди, у молларниң сонсаноги йўқ эди.

«Қалай, Максим Максимич, осиёли гўзал мана бу нарсаларга туриш беролармикан?»— деб сўради Печорин, матоларни кўрсатиб. «Сиз черкас қизларини билмас экансиз,— дедим мен,— булар грузин қизларига ҳам, зақавказъели татар қизларига ҳам ўхшамайди, булар бутунлай бошқача. Буларнинг одатлари ҳам бошқача, бошқача тарбия кўришган». Григорий Александрович кулимсираб қўйди-да, ҳуштак билан марш чала бошлиди.

Худди менинг айтганим келди, совғалар қизга унча таъсир қилмади; қиз унга меҳрибонроқ ва ишонқираброқ қарай бошлади, холос, ундан нари ўтмади: шундан ке-

Мин Печорин энг охирги чорани қилиб күрмөкчи бўлди. Бир куни эрталаб отини эгарлатди-да, черкасча кийиниб, қуролланиб, Бэланинг олдига кирди. «Бэла!— деди қизга,— сени нақадар севишимни ўзинг яхши биласан. Мени яқиндан таниб, кейин-кейин яхши кўриб кетарсан деб, сени олиб қочиб келтирган эдим; мен янгишган эканман, хайр энди! Ҳамма бисот ва мулкимни сенга ташлаб кетдим; хоҳласанг — отангнинг уйига қайт, ихтиёр ўзингда. Сениңг олдингда гуноҳкорман, шунинг учун ўзимни жазолашим керак; хайр, мен кетдим, аммо қаергалигини ўзим ҳам билмайман! Балки, баҳтим юришиб, бирон дайди ўқ ёки қилич тифига дучор бўларман; ўшанда мени эсларсан ва гуноҳимдан ўтарсан»,— деди-да, юзини тескари ўгириб, хайрлашгани қўл узатди. Бэла унинг қўлини олмасдан, жим ўтиради. Мен эшик орқасида туриб, тирқишдан қизнинг юзини кўриб турардим: жуда раҳмим келди, чунки бечоранинг гўзал чеҳраси бўздай оқариб кетганди! Жавоб бўлмагач, Печорин эшикка қараб бир неча қадам юрди; у дир-дир титрарди — ростини айтганда ҳазил қилиб айтган гапини амалга оширишдан тоймасди ҳам. Шунақа одам эди ўзи! Энди эшик бандини ушлаган эдики, Бэла иргиб ўрнидан турди-да, ҳўнграб йиғлаб, унинг бўйнига осилди. Хоҳ ишонинг, хоҳ ишонманг, эшик орқасида туриб мен ҳам йиғлаб юбордим, йиғлаганим йўғ-у шундай...

Штабс-капитан жим қолди.

— Ростини айтсан, ҳеч қачон бирорта аёл мени шунчалик севмагани алам қилди,— деди кейин, мўйловини бураб.

— Уларнинг баҳтиёр ҳаёти узоққа чўзилдими?— деб сўрадим мен.

— Ҳа, Бэла кейин бизга, Печоринни биринчи кўрган кунимдан бошлабоқ ҳар кеча тушимга кириб чиқарди, ҳеч ким менга бунчалик ёқмаган эди, деб иқрор бўлди. Рост, улар жуда баҳтли эдилар!

— Э, бу ёғи қизиқ эмас экан-да!— деб юбордим беихтиёр. Дарҳақиқат бу воқеа фожия билан тугаса керак деб ўйлагандим, бирдан умидим пучга чиқди!..— Наҳотки, ота қизининг қалъада эканлигини пайқамади?— деб давом этдим.

— Пайқашгаю пайқаган-а, аммо бир неча кундан кейин чолни ўлдириб кетишпти, деб эшитдик. Воқеа бундай бўлади...

Яна қулоқларим диккайди.

— Шуни айтиш керакки, Казбич отимни Азамат отасининг маслаҳати билан ўғирлаган, деб ўйлаган экан, ҳар ҳолда, мени шундай деб тахмин қиласман. Бир куни Казбич овулдан уч чақиримча нарида, йўл ёқасида пойлаб ётипти; чол қизини қидира-қидира тополмай қайтиб келаётган экан; князнинг маҳрамлари орқада қолиб кетган эканлар, кеч кириб, қош қорайган пайтда князь отини секин ҳайдаб хаёлга ботиб келаётган экан, бирдан Казбич чакалакзор ичидан қоплондай иргиб чиқиб, отига мингашиб олган-у, ханжар солиб ерга йиқитгац, кейин отнинг жиловини қўлига олиб ура қочган; князь маҳрамларидан баъзилари буни тепаликдан кўриб қолиб кетидан қувишган бўлса ҳам, ета олмаганлар.

— Отининг ўрнига от олиб, кетидан ўч ҳам олиптида,— дедим мен, штабс-капитаннинг фикрини билмоқ учун.

— Албатта, уларнинг одатига қараганда, Казбич тамоман ҳақли эди,— деди штабс-капитан.

Ўзга халқлар орасида туришга мажбур бўлган рус кишисининг шу халқнинг расм-одатларига тезда ўрганиб кетиш қобилияти мени беихтиёр ҳайратда қолдирди; бу хислатнинг яхши ёки ёмон эканлигини билмайман, аммо бу хислат, русларда ғоят эпчиллик ва соғлом фикр борлигини, зарур бўлган пайтларда ва даф қилишнинг иложи бўлмаган тақдирда, ҳар қандай ёвузликни кечира олишларини кўрсатади.

Бу орада чой ҳам ичилиб бўлди; аравага қўшилган отлар анчадан бери совуқда дийдираб турар эди; ғарб томонга оғган ой анча хиракашиб қолган ва йироқдаги тоғ чўққилари тепасида худди йиртиб ташланган чодирга ўҳшаган қора булутлар орасига кирайми, кирмайми деб турар эди. Биз уйдан чиқдик. Ҳамроҳимнинг кароматига қарши, ҳаво очилиб кетди, тонг ҳам сокин бўладиган кўринарди; осмоннинг йироқ уфқидаги лак-лак юлдузлар чамандай чарақларди, беғубор қор қатламлари қамраб ётган тоғ бағирларини қизартириб, шарқ томондан шафақ ёйилган сари, юлдузлар ҳам биринкетин сўниб борар эди. Үнг ва чап томонимизда сирли ва мудҳиш жарлар қорайиб кўринарди, туман худди кун ёришишини сезган ва ундан қўрққандай, ғадир-будур қояларга илашиб, илондай буралиб-буралиб, жарликларга кириб борарди.

Эрталабки ибодат вақтида инсон қалби қандай сокин бўлса осмон ҳам, ер ҳам шундай сокин эди: аҳён-аҳёнда шарқ томондан эсган енгил шабада отларнинг қиров босган ёлларини елпид-елпид қўяр эди. Биз йўлга тушдик; беш нафар қирчанғи от аравамизни қінғир-қийшиқ йўлдан Гуд-Тоққа зўрға судраб чиқарди; ўзимиз арава кетидан пиёда борар ва отлар ҳолдан тойган пайтларда фидирик тагига тош қистириб қўяр эдик; назаримда, йўл худди осмонга чиқиб кетаётгандай туюларди, чунки қанча тикилиб қарамай, ҳамон баландга кўтарилиб борар ва охири кеча куни Гуд-Тоғ тепасида худди ўлжа кутиб ўтирган калхатга ўхшаб кўринган қоп-қора булат ичига кириб, кўздан гойиб бўлиб кетар эди; оёғимиз остида қор ғичирларди; ҳаво шу қадар сийраклашиб борар эдики, зўрға нафас олардик; қон ҳадеб бошга қуалиб келаверарди, аммо шу билан бирга, бутун томирларимга аллақандай шодлик туйғулари ёйилиб, бутун оламнинг тепасига чиқиб олганим учун вақтим хуш бўлиб кетган эди: тўғри, бу ҳис болаларга хос бўлган ҳисдир, йўқ демайман, аммо жамиятдан йироқлашган ва табиатга яқинлашганимиз сари, ўзимиз ҳам бенхтиёр болаларга ўхшаб қоламиз; дилимиздаги ҳамма ташвишлар йўқолади ва бир вақтлардагидек, яна поклашади ва келажакда ҳам шундай бўлса керак, албатта. Менга ўхшаб тоғ-тошларни кезиб ажойиб ва гаройиб манзараларни кўриб юрган, тоғлар ва даралардан анқиган ҳаётбахш ҳавони суқланиб-суқланиб ютишга ўрганган одам, менинг бу сеҳрли манзараларни айтиб беришга ва тасвирлашга бўлган ҳавасимнинг қанчалик зўр эканлигини билади, албатта. Ниҳоят, Гуд-Тоғнинг чўққисига ҳам етдик, тўхтаб атрофга назар ташладик: чўққи устида кулранг булатлар осилиб турар ва унинг муздек нафаси яқинда бўрон туришидан дарак берарди, аммо кунчиқар томон шу қадар беғубор ва ярқираб турар эдики, биз, яъни мен билан штабс-капитан уни бутунлай унутдик... Ҳа, штабс-капитан ҳам унуди, чунки табиат гўзаллиги ва улуғворлиги сезгиси биздек ҳаяжонланган ҳикоячиларнинг дилидагидан кўра содда одамларнинг дилида кучлироқ бўлади.

— Сиз бундай ажойиб манзараларни кўравериб ўрганиб қолгандирсиз? — дедим мен.

— Ҳа, ўқнинг визиллаб учишига ҳам, яъни юракнинг гупиллаб уришини яширишга ҳам ўрганиш мумкин.

— Аксинча, баъзи кекса жангчиларга бу нарса мусиқадай ёқади, деб эши туvdим.

— Истасангиз, бу ҳам түғри, ёқади; аммо юрагингиз янада қаттиқроқ ургани учун ёқади. Бир қаранг, қандай гўзал ўлка!— деб илова қилди штабс-капитан кунчиқар томонни кўрсатиб.

✓ Чиндан ҳам бундай манзарани бошқа ҳеч қаерда учратиш мумкин эмасди: тагимиизда ясланиб ётган Койшаур водийсининг ўртасини Арагва билан яна бир сой худди кумуш үқадай кесиб ўтарди; водий тепасида сузид юрган мовий туман эрта тонгнинг илиқ шуълаларидан ўзини атрофдаги дараларга олиб қочарди; ўнг ва чап томондаги қор, чангаль босган, бир-биридан баланд тоғтизмалари бир-бировини кесиб, ҳар ёққа чўзилишиб кетарди: йироқда ҳам тоғлар, аммо қояларнинг ҳеч қайсиси бир-бирига ўхшамасди,— тоғ тепаларидаги қорлар қип-қизил чўғдай товланиб шу қадар ярқираб ёнардики, уни кўриб шу ерда умрбод қолиб кетгинг келарди; тўқ кўкимтири тоғ ортидан,— бу ерларга яхши ўрганиб қолган кўзгина унинг қора булут эмаслигини ажратади.— Қуёш кўрина бошлади; лекин қуёш тепасидан ўтган қон янглиғ қип-қизил шафақ ҳамроҳимнинг диққатини жалб қилди. «Бугун ҳаво бузилади деб айтмабмидим,— деб хитоб қилди у.— Илдамроқ юрайлик, Крестовая тоғига етганимизда бўронда қолмайлик тағин». Қейин, «ҳайда!» деб қичқирди аравакашларга.

Аравалар пастликка сирғаниб кетмасин деб, гилди-ракларга занжир боғладик, отларнинг жиловидан ушлаб, пастга туша бошладик; ўнг томонимиз балаид қоя эди, чап томонимиз эса шу қадар чуқур жарлик эдики, унинг тагига жойлашган бутун бошли осетин қишлоғи худди қалдиргоч уясидек бўлиб кўринарди; иккита арава дуч келиб қолса ўтиб кета олмайдиган бу йўлдан қоронги кечаларда куръерларнинг йилига ўн мартараб шалоқ аравадан тушмай ўтишини кўз олдимга келтирган эдим, этим жимирашиб кетди. Аравакашларимизнинг бири ярославлли рус мужиги бўлиб, иккинчиси — осетин эди; осетин ўртага қўшилган отни зўр эҳтиёт билан етаклаб борарди,— бизнинг беғам русимиз эса ҳатто аравадан тушмади ҳам! Мен унга, ҳеч бўлмаса менинг чамадонимнинг ғамини есанг-чи, жарга тушиб кетса, унинг кетидан тушиб юришга тобим борми, десам, у: «Қўяверинг, хўжайин! Худо хоҳласа омон-эсон етиб оламиз; бу ерларда

кўп юрганимиз»,— деди. У ҳақли эди: ҳақиқатан, манзилга омон-эсон етиб олмаслигимиз мумкин эди-ю, аммо етиб олдик; одамлар кўпроқ мулоҳаза қилиб кўрсалар ҳаётнинг бунчалик ташвишга арзимаслигини билган бўлар эдилар...

Балки, сиз Бэла воқеасини пировардини билмоқни истарсиз? Биринчидан, мен ёзганим қисса эмас, балки йўл хотираларири; бинобарин, штабс-капитаннинг ўзи бошламагунча уни гапиришга мажбур эта олмайман. Хуллас, сабр қилингиз ёки, истасангиз, китобнинг бирнечча варанини очиб қарангиз, аммо бундай қилишни маслаҳат кўрмайман, чунки Крестовая тоғи (ёки, гамба¹¹ деган бир олимнинг айтишича, le Mont St-Christophe)дан¹² ошиш сизнинг диққатингизга арзийди. Шундай қилиб, биз Гуд-Тоғдан Чертовая водийсига ошиб тушдик... Ана бу романтик номни қаранг! Кўз олдингизга дарҳол одам оёғи тегмаган тоғлар орасидан макон тутган ёвуз жинлар уяси келгандир,— йўқ, ундаи эмас: Чертовая водийсинг номи «чорт»* деган сўздан эмас, балки «черта» деган сўздан келиб чиққан,— чунки, бир вақтлар Грузия чегараси шу ердан ўтарди. Водийни худди Саратов, Тамбов ва ватанимизнинг шунга ўхшаш азиз ерлари каби, қор уюmlари кўмиб юборган эди.

— Ана, Крестовая тоғига ҳам етдик!— деди штабс-капитан, Чертовая водийсига тушганимиздан кейин қор тагида қолиб кетган бир тепаликни кўрсатиб; тепалик чўққисида тошдан ясалган крест кўринарди, шу крест ёнидан кўзга фира-шира кўринадиган йўл ўтарди: бошқа йўлни қор кўмиб юборган кезлардагина шу йўлдан юриларди: аравакашларимиз тоғдан ҳали кўчки тушмаганини айтишди ва отларни аяб, бизни айланма йўлдан олиб кетишиди. Муюлишга етганда бешта осетинни учратдик; улар бизга ўз хизматларини таклиф этиб, ҳой-ҳувлашиб аравамизнинг филдирагидан итара бошладилар. Йўл ҳақиқатан ҳам хавфли эди: ўнг томондан, тепамиздан бир шамол кўтарилса даранинг ичига қулаб тушишга тайёр қор уюmlари осилиб туради; торгина йўлнинг бир қисмини қор кўмиб юборган, баъзи ерларда қор тиззамизгача чиқарди, баъзи ерларда эса офтоб шуълалари ва тунги совуқнинг кучи билан яхлаб қол-

* Ч о р т — шайтон, ажина. (тарж.)

** Ч е р т а — чизиқ, чегара (тарж.)

ғанди, шунинг учун биз аранг юриб борар эдик; отлар тойиб йиқиларди; чап томонимиз жуда чуқур жарлик бўлиб унинг тагидан ҳайқириб оққан дарё гоҳ муз тагига кириб кетар, гоҳ қоп-қора тошлар устидан кўпириб оқарди. Крестовая тоғини икки соатда айланаб ўтибмиз — икки соат ичиди атиги икки чақирим йўл босибмиз холос! Шу орада булутлар пастлашиб, олдин дўл, кетидан қор ёга бошлади; даралар ичига бостириб кирувчи шамол худди Соловей-Разбойник¹³ сингари бўкирар, ҳайқирав, ҳуштак чалгандай чийилларди, кўп ўтмай тош крестни шарқ томондан тўлқинланиб келувчи туман босиб, крест кўздан фойиб бўлди. Дарвоҷе, шу крест тўғрисида ғалати, аммо кенг тарқалган ривоят бор, шу ривоятга қарангда, бу крестни Петр I Қавказдан ўтиб кетаётганида қўйдирган эмиш; аммо биринчидан, Петр фақат Доғистонгача келган, иккинчидан эса, крестнинг устига, генерал Ермоловнинг амри билан қўйилган, деб катта-катта ҳарфлар билан ёзилган, демак крест 1824 йилда қўйилган бўлади. Аммо, мазкур лавҳанинг бўлишига қарамай, ривоят шу қадар сингиб кетган эдики, лавҳаларга ишон-маслигимизни назарга олганда, қайси бирига ишонишингни ҳам билмайсан киши.

Коби бекатига етиб олишимиз учун яхмалак тошлар ва юмшоқ қорлар устидан яна беш чақиримча юришимиз керак эди. Отларимиз жуда ҳолдан тойган, ўзимиз ўлардек совқотган эдик; бўрон худди ўзимизнинг шимол бўронлари сингари тобора зўрайиб борарди: фақат унинг мудҳиш ноласи ниҳоятда ғамгин ва мунгли эди. «Сен ҳам ўзингнинг бепоён кенг даштларингни соғиниб йиғларкансан, дарбадар! — деб ўйлардим мен.— У ерларда совуқ қанотларингни қанча керсанг кераверасан, бу ерда эса худди темир қафас панжараларига чинқириб қанотларини урган бургут янглиғ сиқиласан, димиқасан».

— Иш чатоқ! — деди штабс-капитан, — атрофга бир қаранг, туман билан қордан бошқа ҳеч нарса кўринмайди; фалокат босиб, жаргами ё бирон чуқургами тушиб кетмайлик; пастда Байдара қутуриб ётган бўлса — тағин ўтолмаймиз. Осиёнинг шуниси ёмон-да! Одамларига ҳам, дарёларига ҳам ишониб бўлмайди! — Аравакашларимиз пишқирган, оёқларини тираб олиб, қамчиларнинг аччиқ зарбига ҳам қарамасдан, жойларидан силжимай турган отларга бақириб, сўкина-сўкина савалардилар.

— Тақсир, бугун барибир Қобига етолмаймиз, — деб

қолди аравакашлардан бири,— рухсат этсангиз, вақт борида чапга бурилсак. Ҳов анави төг бағрида бир нарса қорайиб күринади, әхтимол, уйдир: ҳаво бузуқ кезларда йўловчилар ҳамиша ўша ерга қўнади, ановилар ароқ пули берса, бошлаб борамиз дейишаяпти,— деб илова қилди аравакаш, осетинни кўрсатиб.

— Биламан, ука, сенсиз ҳам биламан!— деди штабс-капитан,— шу йўл бошлаб борувчилар ҳам ёмон жонимга тегди-да! Ароқ пули олиш учун топган баҳоналарини қаранг-а!

— Ҳар ҳолда иқор бўлишингиз керакки, булар бўлмаганда аҳволимиз чатоқ бўларди,— дедим.

— Ҳа, тўғри, тўғри,— деб пингиллади штабс-капитан.— Уф, бу йўлбошловчилар роса жонимга тегди-да! Қаердан фойда чиқса, дарров исини билишади, гўё буларсиз йўл топилмайдигандай.

Чапга бурилдик, кўп мاشаққатлардан кейин зўрға бир манзилга етиб олдик, бу манзил харсангтошлардан ясалиб, тошеворлар билан ўраб олинган икки хоналик бир кулба эди. Жулдур-жулдур кийинган уй эгалари бизни зўр хурсандчилик билан кутиб олишди. Кейин билсам, ҳукумат бўронда қолган йўловчиларга манзил бериш шарти билан уларга ҳақ тўлар ва озиқ-овқат билан таъминлаб тураркан. «Ҳар ҳолда, жуда яхши бўлди!— дедим мен, гулхан ёнига ўтириб.— Энди Бэла воқеасининг охирини айтиб берасиз, имоним комилки, воқеа ўша билан тугамагандир».

— Нима учун имонингиз комил?— деди штабс-капитан, муғамбирлик билан кўз қисиб.

— Шунинг учунки, одатда бундай бўлмайди: ғайри табиий бошланган нарса ғайри табиий равишда тугалиши керак.

— Ҳа топдингиз-а...

— Фоят хурсандман.

— Сиз-ку хурсанд бўласиз-а, аммо менинг эсимга тушса ҳозир ҳам юрагим ачишиб кетади. Бэла жуда ажойиб қиз эди! Қейин-кейин уни худди ўз қизимдай яхши кўриб қолдим, у ҳам мени яхши кўрарди. Шуни ҳам айтишим керакки, менинг бола-чақам йўқ, сўққабош одамман; ота-онамдан хабар келмаганига ҳам 12 йилча бўлди, вақтида уйланиб ҳам олмаган эканман,— энди менга уйланиш ярашмаса керак; шунинг учун ҳам эркалатадиган овунчоқ топиб олганимдан хурсанд эдим...

Баъзан у бизга ашулалар айтиб, леэгингекага ўйнаб берар эди... Унинг ўйнаганини кўрсангиз! Ўзимизнинг губерния қизларини кўп кўрганман, бир марта, бундан 20 йилча муқаддам, Москвада аслзодалар клубида ҳам бўлганман, аммо бунинг олдида уларга йўл бўлсин. Улар иш ечомлайди!.. Григорий Александрович уни қўғирчоқдай ясантириб қўяр эди, жуда яхши парвариш қилди, ўзи ҳам бизникида туриб, шунақанги очилиб кетдик, асти қўяверинг; қуёшда қорайган юзи ва қўллари оқариб, юzlари олмадек қип-қизил бўлиб кетди... Жуда шўх бўлиб кетганди қизи тушмагур. Нуқул менга тегишгани-тегишган эди... Худо ўзи кечирсин!

— Отасининг ўлганини айтганингиздан кейин нима бўлди?

— Ўз аҳволига кўнишиб кетгунча бу сирни ундан яшириб юрдик; айтганингиздан кейин бир-икки кун йифлади-ю, кейин эсидан чиқиб кетди.

Тўрт ойча яхши туриши. Григорий Александрович овга жуда ишқивоз эди деб айтувдим, шекилли: илгарилари тўнғиз ё кийик овлаб ўрмондан чиқмас эди, энди бўлса қалъа деворидан нарига ҳам ўтмайдиган бўлиб қолди. Аммо кейин қарасам: яна хаёлга чўмиб, қўлларини орқасига қилиб, уй ичида айланиб юрадиган бўлиб қолди; кейин бир кун, ҳеч кимга айтмасдан, овга кетибди,— кун бўйи овда юрди; бир кетди, икки кетди, кейин овга бормайдиган куни қолмади... Яхши эмас, ораларига сөвуқчилик тушганга ўхшайди, деб ўйладим.

Бир куни эрталаб уларниги кириб қолдим,— бу воқеа ҳали ҳам кўз олдимдан кетмайди, қора шоҳи пешмат кийган, юzlари сўлғин Бэла караватда ўтирипти, чеҳраси ғамгин, кўриб қўрқиб кетдим.

«Печорин қани?»— деб сўрадим.

«Овда».

«Бугун кетдими?»— Бэла худди гапиришга қийналгандай, индамай ўтирарди.

«Йўқ, кеча кетган эди»,— деди у, ниҳоят, оғир хўрсиниб.

«Бирон фалокатга учраган бўлмасин тағин?»

«Кеча куни билан хаёл сурисиб ўтирдим,— деди Бэла, ийғи аралаш,— миямга минг хил хаёллар келди: гоҳ уни ёввойи тўнғиз ярадор қилдими ё чечеп тоқقا олиб қочиб кетдими, дейман... Бугун эса мени севмаса керак деб ўйлаб ўтирибман».

**«Бундан баттарроқ ңарсанни ўйлаб топмадингми, қи-
зим?!**

Бэла йиглаб юборди, сўнг бошини ғуур билинганда кўтариб давом этди:

«Агарда мени севмаса, уйимга қайтариб юборишига нима тўсқинлик қилади? Мен уни зўрламайман. Бундан бўён ҳам шундай бўлса, ўзим кетаман-кўяман: мен унинг чўриси эмасман — князъ қизи бўламан!..»

Мен уни юпата бошладим: «Менга қара, Бэла, ахир, у сенинг этагингга тикиб қўйилган эмаски, уззукун уйдан чиқмай ўтиrsa; ахир у ёш йигит бўлса, овга ишқиво з бўлса, юради, юради-да, яна қайтиб келади; ташвиш чекаверсанг, хафа бўлаверсанг қайтангга уни тезроқ зериктириб қўясан».

«Рост, рост! — деб жавоб берди Бэла,— энди хушчақ-чақ бўлиб ўтираман». Кейин кулди-да, чилдирмасини чалиб, ашула айтишга ва ўйинга тушиб, атрофимда чириллаб айланишга бошлади; аммо бу ҳам узоққа бормади, яна караватга ўзини ташлади-да, қўллари билан юзини беркитиб олди.

Нима ҳам қила олардим? Менинг хотин кишиига сира ишим тушмаган; уни қандай овутай деб ўйлаб-ўйлаб, ҳеч иложини қила олмадим: бирмунча вақт иккимиз жим қолдик... Жуда оғир аҳвол юз берди!

Ахири мен унга: «Истасанг юр, тупроққўргонни айланниб келамиз? Ҳаво жуда яхши»,— дедим. Сентябрь ойи эди. Дарҳақиқат, кун жуда яхши эди; қуёш порлаб турса ҳам, унча иссиқ эмас эди, ҳамма тоғлар худди кафтда тургандай равшан кўринарди. Биз индамасдан қалъа кўтармасини айланниб юрдик; ниҳоят Бэла чимга ўтирди, мен ҳам унинг ёнига ўтирдим. Эсимга тушса кулғим қистайди; мен худди унинг мураббиясидай кетидан эргашиб юрардим.

Қалъамиз баландликда эди, валдан жуда ажойиб манзара очиларди: бир томон — бир неча жарлик тилкалаб ташлаган кенг яланглик бўлиб, охири тоғ тизмасигача чўзилган ўрмонга бориб туташарди; ялангликнинг у ер-бу ерида тутунлар бурқиётган овуллар кўринарди, йилқилар ўтлаб юрарди; бошқа томондан эса кичкина сой оқарди, сойнинг нариги томонини Қавказнинг катта тоғларига қўшилиб кетган қирра тошли бутазорлар қоплаб ётарди. Биз Бастион¹⁴ бурчагида ўтирадик, шунинг учун икки томон ҳам яққол кўриниб туарди. Бир маҳал

қарасам, ўрмон ичидан кўк от минганд бир киши чиқиб, биз томонга отини елдириб келаверди, ниҳоят, сойнинг нариги бетига, биздан юз саржишча нарига келиб тўхтади-да, худди қутургандай, отини ўйноқлата бошлади. Бу нима қилгани, дедим ичимда... «Сен қара, Бэла ёшсан, кўзинг ўткир, у суворий ким экан, кимга томоша кўрсатгани кепти!..»— дедим.

Бэла қаради ва бирдан: «Қазбич-ку!..»— деб қичқириб юборди.

«Оббо қароқчи-е! Бизни мазах қилгани келдими?» Синчиклаб қарасам, худди Қазбичнинг ўзгинаси, афти башараси қора, уст-боши жулдур, аввалгидай ифлос, «Тагидаги от — отамнинг оти»,— деди Бэла, қўлимдан маҳкам ушлаб; ўзи худди теракнинг баргидай титрарди, кўзлари ўтдай чақнаб кетди. «Ҳа-ҳа,— дедим ичимда,— сенинг томирларингда ҳам қароқчи қони қайнаркан-ку!»

«Бери кел,— дедим мен часовойга,— милтиғингни ол, ҳов анови суворийни отдан йиқитсанг — кумуш сўлкавой оласан». «Хўп бўлади, жаноби олийлари; аммо бир жойда тек турмаяпти-да...»— деди у. «Буюр, турсин!»— дедим мен кулиб... «Ҳой, оғайни!— деб бақирди часовой, қўлини силкитиб,— бирпас тек тур, намунча гир-гир айланмасанг?» Қазбич чиндан ҳам тўхтаб қулоқ сола бошлади; музокара бошлайди деб ўйлаган бўлса керак, аммо чучварани хом санаган эди! Менинг гренадёrim¹⁵ милтиқни мўлжалга олди-да... пақ этиб отди... тегмади; фақат порохнинг чақнаб ёнгани кўринди, холос; Қазбич отини бир ниқтаган эди, от четга сакради. Қазбич оёғини узангига тираб қаддини ростлади-да, ўз тилида бир нималар деб, қамчинини ўқталиб, қочиб кетди.

— «Уят сенга!»— дедим часовойга қараб.

«Жаноби олийлари, жон бергани кетди,— деб жавоб қайтарди часовой,— бу лаънати ҳалқ ўқ еса ҳам дарров ўла қолмайди».

Чорак соатдан кейин Печорин овдан қайтди; Бэла унинг бўйнига ўзини ташлади, узоқ йўқолиб кетгани учун ундан ўпкаламади ҳам, гина ҳам қилмади... Ҳатто менинг ҳам Печориндан аччиғим чиқиб кетди. «Ҳой, менга қаранг, инсоф борми ўзингизда,— дедим унга,— ҳозирнинг ўзида Қазбич сойнинг нариги томонида эди, биз уни ўққа тутдик; йўлда дуч келиб қолса нима қилардингиз? Тоғлилар жуда қасосчи ҳалқ бўлади: отини Азамат билан тил бириктириб ўғирлаганингизни пайқамади деб

ўйлайсизми? Бошимни гаровга қўйиб айтаманки, энди Бэлани ҳам таниди. Бундан бир йил бурун Бэлани яхши кўриб юрганини биламан,— менга ўзи айтиб юрар эди,— тузукроқ қалин тўлашга кўзи етганда совчи ҳам қўйдирган бўлар эди...» Шундан кейин Печорин ўйланиб қолди. «Рост, эҳтиёт бўлиш керак... Бэла, бугундан эътиборан қалъадан ташқари чиқмаслигинг керак»,— деди.

Кечқурун у билан анчагача баҳслашиб ўтирик, бечора қизга бўлган муносабатининг ўзгарганидан жаҳлим чиққан эди; эртадан кечгача овда юришидан ташқари, Бэладан ҳам кўнгли совуган, уни камдан-кам эркалайдиган бўлиб қолган эди, Бэла бояқиш сўлий бошлаган, юзларининг қони қочган, шаҳло кўзлари ҳам сўна бошлаган эди. «Нега хўрсиндинг, Бэла хафамисан?»— деб сўрасам: «Йўқ!» — дерди. «Кўнглинг бирон нарса истайдими?» «Йўқ!» «Қариндош-уругларингни соғиндингми?» «Менинг ҳеч қанақа қариндош-уругим йўқ». Ҳатто шундай бўлардики, бутун кун бўйи ё «ҳа», ё «йўқ»дан бўлак ҳеч нарса демасди.

Печоринга мен шуларни гапириб бердим. «Менга қаранг, Максим Максимич,— деб жавоб берди у,— менинг мижозим жуда ёмон-да: тарбия орқасида шундай бўлганманми, ё худо шундай яратганими, билмайман; фақат шуни биламанки, агар бошқаларнинг бахтсизлигига сабабчи бўлсан, ўзим ҳам улар каби бахтсиз бўлиб кетаман. Шубҳасиз, бу нарса у бахтсизларга тасалли бўла олмайди, албатта,— аммо на чора ҳамма кулфат шунда. Илк ёшлигимда ота-онамнинг қаноти остидан чиққан дамдан бошлаб, пулга сотиб олиш мумкин бўлган ҳамма айш-ишратларни тотиб кўра бошладим, шубҳасиз, бу айш-ишратлар ахир бориб кўнглимга урди. Қейин жамиятнинг юқори табақасига отилдим, кўп ўтмай бу ҳам жонимга тегди; аслзода гўзалларга муҳаббат қўйдим, улар ҳам мени яхши кўришарди,— аммо уларнинг ишқи фақат менинг фикр-хаёлимни ва иззат-нафсимни қўзғатарди, холос; қалбим эса бўшлигича қолаверарди... Китобга берилдим, ўқидим — илм маърифат ҳам кўнглимга урди; шуҳратнинг ҳам, бахтнинг ҳам уларга боғлиқ әмаслигини билдим, чунки ҳаммадан бахтли нодонлар экан, шуҳрат деган нарса толенинг ўзи экан, унга эришиш учун фақат абжир бўлсанг кифоя экан. Шундан кейин, юрагим сиқилиб, дикқинафас бўла бошладим... Кўп ўтмай мени Қавказга кўчиришди; бу давр умрим-

нинг энг бахти даври эди. Мен чеченлар ўқи остида одам диққинафас бўлмаса керак деб ўйладим,— афус янгишибман; ой ўтмасдан ўқларниң визиллаб учишига ва ажал билан ёнма-ён юришга шу қадар ўрганиб кетдимки, улардан кўра чивинлар менинг диққатимни кўпроқ жалб этадиган бўлиб қолди,— илгаригидан ҳам баттар зерика бошладим, чунки энг сўнгги умидимдан ҳам ажралган эдим. Бэлани биринчи марта ўз уйимда кўриб, тиззамга олиб ўтирганимда, қоп-қора сочларидан ўпганимда мен тентак уни тақдир менга шафқат қилиб юборган фаришта деб ўйлабман. Тағин янгишибман, ваҳший қизнинг ишқи зодагон хонимнинг ишқидан сал афзал экан, биринчисининг ноз-карашмаси кўнгилга ургандек, иккинчисининг нодонлиги ва соддадиллиги ҳам кўнгилга ураг экан. Ростини айтсам, мен уни ҳозир ҳам севаман, бир неча лаззатли дамлар бахш этгани учун мен ундан жуда миннатдорман, унинг учун жонимни фидо қилишга ҳам тайёрман, аммо унинг ёнида бўлсан — зерикаман... Тентакманми, ё ёвузманми, билмайман; аммо шунисини биламанқи, мен ҳам унинг сингари ачинишга зорман, балки ундан ҳам кўпроқ зордирман; менинг руҳимни юқори муҳит бузган, фикр-хаёлим ҳамиша нотинч, қалбим сира тўймайди; менга ҳар нарса ҳам оз; лаззатга ва мазага қанча тез ўргансам, ғам-ҳасратга ҳам шунча тез кўнишиб кетавераман, турмуш кундан-кунга кўзимга маъносиз бўлиб кўринади; биргина иложим қолди: у ҳам бўлса саёҳат. Йложи бўлган куни жўнайман,— аммо Европага эмас, Европага боришдан худо сақласин!— Америкага, Арабистонга, Ҳиндистон томонларига кетаман — зора, йўлда ўлиб кетсан! Ҳар ҳолда бўронларга учрарман, ёмон йўллардан юришга тўғри келар, ишқилиб, бу сўнгги юпанчим тезда тугамаса керак деб умид қиласман». Шу таҳлитда у узоқ гапириб ўтириди, унинг ҳамма гаплари миямга қаттиқ ўрнашиб қолди, чунки бундай сўзларни 25 яшар йигитдан биринчи марта эшитишим эди, худо хоҳласа, ортиқ эшитмасман... Ажабо! Айтингчи,— деб мурожаат қилди менга штабскапитан,— сиз яқиндагина пойтахтда бўлгансиз: у ергаги ҳамма ёшлар ҳам шунақами?

Мен, худди шундай дегувчи одамлар жуда кўп, улар орасида ростгўйлари ҳам бордир; ҳамма одатлар сингари, дунёдан безиш ҳам жамиятнинг юқори табақаларидан бошланиб, энди пастки табақаларига тушди, ҳозир

Эса ҳақиқатан ҳам зерикувчи ва дунёдан безувчи одамлар бу баҳтсизликни худди бир нуқсонни яширгандай яшириб юрадилар, дедим. Штабс-капитан бу нозик нуқталарга тушумади, бошини чайқади-да, муғамбирилик билан кулимсираб:

— Зерикиш модасини французлар чиқаргандир-да? — деди.

— Йўқ, инглизлар.

— Шунақами!.. — деди у, — ие, улар ашаддий пияниста ҳалқ-ку, ахир.

Шу онда бирдан москвали хонимлардан бири эсимга тушиб кетди, у хоним Байрон — пияниста эди, шундан ортиқ ҳеч нимаси йўқ эди, дерди. Аммо штабс-капитаннинг гапини кечирса бўлади: ичкликтан ўзини тийиб юриш учун, дунёдаги ҳамма фалокатлар ичклик туфайли келиб чиқади, деб ўзини-ўзи ишонтиради.

Штабс-капитан ҳикоясини давом эттириди:

— Казбич қайтиб келмади. Аммо, нима учундир, унинг ўша сафар келиб-кетгани бежиз эмас, бир нарсага қасд қилиб юрипти, деган фикр миямдан ҳеч кетмас эди.

Кунлардан бир кун Печорин мени тўнғиз овига судраб қолди; мен олдинига тўнғизни кўрмаганманми деб, кўнмадим. Шундай бўлса ҳамки, қўймасдан олиб кетди. Енимизга бешта солдатни олиб саҳар чоғида йўлга чиқдик. Соат ўнгача тўқай ва ўрмонларда изғиб юрдик, — тўнғиз учрайвермади. «Ҳой, уйга қайтайлик, — дедим мен, — мунча ўжарлик қилмасангиз? Бугун омадимиз юрмайдиган кун экан!» Аммо, жазирама иссиқда чарчаганимизга қарамай, Григорий Александрович ўлжасиз қайтишни истамасди... Шунақанги ўжар одам эди-да: сира айтганини қилмасдан қўймасди; ёшлигида онаси эркатаңтиқ қилиб ўстирган бўлса керак... Ахiri, туш пайтига бориб, бир лаънати тўнғизни топдик: пақ-пақ ўқ узиб қолдик... тегмади, тўқайга кириб кетди... Омад келмаган кун эди-да ўзи!.. Бир оз дамимизни олиб, уйга қайтиб кетдик.

Отларнинг жиловларини қўйиб, индамасдан ёнма-ён келардик, қалъага ҳам яқин қолган эди; уни биздан фаяқат чакалакзор тўсиб турарди. Бирдан ўқ узилди... Иккимизнинг ҳам кўнглимида бир шубҳа туғилиб, бир-бirimизга ялт этиб қарадик... ўқ чиққан томонга қараб от қўйдик, бориб қарасак, тупроққўрғон тепасида бир талай солдат тўпланишиб турар ва нуқул очиқ яланглик-

ни күрсатар әдилар, ялангликда эгарга оқ бир нарсани ўнгариб олган бир отлиқ отини зўр бериб чоптириб кетмоқда эди. Григорий Александрович худди чеченга ўхшаб чинқирди-да, жилдан милтигини чиқариб, отлиқнинг кетидан қува кетди; мен ҳам унинг кетидан откўйдим.

Бахтимизга, овимиз юришмагани учун отларимиз ҳам унча чарчамаган эди: отлар елдай учиб борарди, отлиққа тобора яқинлашар эдик... Ниҳоят, отлиқни танидим, Қазбич экан, аммо отига ўнгариб кетаётган нарсасининг нималигига сира ақлим етмасди. Печоринга етиб олдим да, Қазбич экан! деб қичқирдим. У менга қараб, бошини силкиб, отига қамчи берди.

Ахири орамизда бир милтиқ отими масофа қолди; Қазбичнинг оти чарчаб қолдими ё бизникидан ёмон эдими, ҳар ҳолда қанча қистамасин, оти сира илгари силжимас эди. Шу топда ўзининг Қоракўзини минг марта эслаган бўлса керак, деб ўйлайман...

Бир маҳал қарасам, Печорин мўлжалга оляяпти... «Отманг!— деб бақирдим:— ўқни эҳтиёт қилиш керак; биз уни шундай ҳам қувиб етамиз». Ёш йигит-да: салга қони қизишиб кетади... Ўқ узилди, ўқ отнинг кейинги оёғига тегди; от яна ўн қадамча сакраб-сакраб борди-да, қоқилиб, тиз чўкиб қолди. Қазбич отдан сакраб тушди, шундагина унинг қўлида кўтариб турган нарсаси чодрага ўралган хотин эканини пайқадим... У Бэла эди. ... Бечора Бэла! Қазбич ўз тилида бизга бирнималар деб бақирди-да Бэлага ханжар ўқталди... Вақтни бой бермаслик керак эди, мен ҳам таваккал деб ўқ уздим; ўқим Қазбичнинг елкасига бориб теккан бўлса керак, негаки бирдан қўли пастига осилиб тушди. Тутун тарқалиб бўлгач, қарасак, ерда ярадор от, унинг ёнида Бэла ётипти; Қазбич бўлса милтигини ташлаб, худди мушукдай қояларга тирмашиб, тоққа қочиб чиқиб кетмоқда эди; бир ўқ билан уриб туширмоқчи бўлдим-у, бироқ тайёр ўқим йўқ экан! Отдан сакраб тушиб Бэланинг ёнига югурдик. Бечора қимир этмасдан ётарди, ярасидан шариллаб қон оқарди... Вой золим одам, ханжар урсанг юрагига урмайсанми, биратўла муродингга етардинг! Йўғ-а, елкасига урипти... Ўз оти билан босмачи-да! Бэла ҳушсиз ётарди. Чодрани йиртиб, ярасини мумкин қадар қаттиқроқ қилиб боғладик; Печорин унинг музлаб қолган лабларидан шунчак ўпса ҳамки, қиз ўзига келмасди.

Печорин отга минди; мен Бэлани ердан құтариб, бир амаллаб унинг эгариға миндириб қўйдим; Печорин унинг белидан құчоқлаб олди, қалъага қайтиб кетдик. Бир неча минутлик жимлиқдан сўнг Григорий Александрович менга: «Менга қаранг, Максим Maximich, бундай бориша тирик олиб бора олмаймиз»— деди. Мен: «Тўғри айтасиз»,— дедим, отларимизни елдай чоптириб кетдик. Қалъа дарвозаси олдида бизни бир талай одам кутиб турган эди; ярадорни авайлаб Печориннинг уйига олиб кирдик-да, докторга одам юбордик. Доктор маст бўлса ҳамки, келди; ярани кўрди-да, бир кунлик умри қолганини айтди, аммо у янгишган эди.

— Тузалиб кетдими?— деб сўрадим штабс-капитандан беихтиёр суюниб, унинг қўлидан ушлаб.

— Йўқ,— деди у,— докторнинг хатоси шу эдики, Бэла яна икки кун яшади.

— Қандай қилиб Қазбич уни олиб қочипти?

— Воқеа мана бундай бўлган: Печориннинг тақиқлашига қарамай, Бэла қалъадан чиқиб, сой бўйига борипти. Нега десангиз, кун жуда иссиқ эди; харсангтош устида оёқларини сувга солиб ўтирган экан, Қазбич билдирмасдан секин келипти. Хиппа бўғиб, чакалакзорга судрапти-да, кейин отга ўнгариб, ура қочиб қолипти. Бэла бир амаллаб бақирипти, часовойлар эшишиб қолиб, ўқ узишибди-ю аммо тегманти, худди шунинг устига биз келиб қолган эдик.

— Қазбич уни олиб қочиб нима қиларкан?

— Ана, холос! Ахир, черкасларнинг ўғри халқлиги ҳаммага маълум-ку: улар нима тўғри келса — илиб кетавради, кераксиз нарса бўлса ҳам ўғирлашаверади... бусиз туролмайди! Бунинг устига, Қазбич Бэлани анчадан бери яхши кўриб юради.

— Шундай қилиб, Бэла ўлдими?

— Ўлди, аммо жуда азоб чекиб ўлди, биз ҳам у билан бирга кўп азоб тортдик. Қечқурун соат ўнларда ўзига келгандай бўлди; биз унинг бошида ўтирас эдик; шундай кўзини очди-ю, Печорин, Печорин, деб чақираверди: «Мен шу ердаман, ёнингда ўтирибман жоним»,— деб жавоб берди Печорин қизнинг қўлидан ушлаб. Бэла: «Мен ўламан!»— деди. Биз уни юпатадик, доктор албатта тузатаман деб айтди, дедик; бечора бошини чайқаб, юзини деворга ўғирди, унинг сира ўлгиси келмасди!..



Кечаси алаҳлаб чиқди; боши ўтдай ёнарди, бутун бадани худди безгак тутгандек қалтираарди; отасини, укасини эслаб алланималар дерди: тоғларни, ўз уйини соғинган бўлса керак-да... Кейин яна Печоринни чақира бошлади, уни эркалаб ҳар хил нозик исмлар билан атар ё бўлмаса ўз жонгинангни ортиқ севмайсан, деб ўпкала-нарди...

Печорин қуи солинган бошини кафтлари орасига олиб бу гапларни индамай эшишиб ўтираарди; аммо унинг кўзларида бир томчи ҳам ёш кўрмадим; чиндан ҳам йиғлашни билмасмиди ё ўзини йифидан тийиб ўтирармиди — билмайман; менга келганда, умримда бундан кўра қайгулироқ ҳодисани кўрмаганман.

Эрталаб алаҳлаши тўхтади; бир соатча қимир этмай ётди, ранги синиқиб шу қадар ҳолдан тойган эдики, нафас олиши зўрға сезиларди, кейин бир оз тузалгандай бўлди, гапира бошлади ҳам, аммо нима тўғрисида гапиради денг?.. Бундай гаплар фақат ўлим тўшагида ётгандарнинггина эсига тушади!.. Ўзининг христиан динида бўлмаганидан, у дунёда руҳи Григорий Александрович нинг руҳи билан қовушолмаслигидан, жаннатда Григорий Александровичнинг руҳига бошқа бирон хотиннинг руҳи ёр бўлиши ҳақида сўзлаб қайфурарди. Менинг миямга, уни ўлиш олдидан чўқинтириб, христиан динига ўтказиш фикри келди, буни ўзига айтдим; у бир нима деёлмай, анчагача менга қараб ётди; кейин қайси динда туғилган бўлсам, шу динда ўламан, деди. Шу зайлда бир кун ўтди. Шу бир кун ичida унинг шу қадар ўзгариб кетганини айтмайсизми! Ранглари оппоқ оқариб, юзлари чўкиб кетди, кўзлари йириклишиб, лаблари ўтдай ёнарди. Қалбида худди қизитилган темир парча ётгандай, ўртанарди.

Иккинчи кеча кирди; биз унинг ёнидан силжимай ва мижжа қоқмай ўтирардик. Бечора жудаям қийналди, нуқул инграрди; оғриғи сал босилиши билан Григорий Александровичга аҳволим тузук, бориб ухланг дерди, унинг ўз қўлларида маҳкам ушлаб ётган қўлинин ҳадеб ўпар эди. Саҳар пайтига бориб талвасага тушиб, ҳа degанда тўлғанаверди, яранинг латтаси ечилиб, яна қон оқа бошлади. Ярасини қайтадан боғлаб қўйганимиздан кейин бир минутча жим ётди-да, Печориндан: «Мени ўп!»— деб илтимос қилди. Печорин карават олдидা тиз чўкди-да, унинг бошини ёстиқдан кўтариб, совиб бораёт-

ган лабларига лабини босди; Бэла худди шу бўса билан ўзининг жонини унга бермоқчи бўлгандай, қалтироқ қўллари билан унинг бўйнидан қаттиқ қучоқлади... Йўқ, унинг ўлиб кетгани яхши бўлди! Агар Григорий Александрович уни ташлаб кетганда, бечора нима қиларди? Аммо эртами кечми, ташлаб кетиши аниқ эди.

Эртаси куни чошгоҳгача индамасдан ётди, доктор уни ҳар хил дори-дармонлар бериб қийнаса ҳам, ғинг демади. «Қўйсангиз-чи!— дедим мен докторга,— ўлади деб ўзингиз айтдингиз-ку, нега энди дори-дармон беравериб қийнайсиз?» «Майли, Максим Максимич, ҳар ҳолда виждон тинч бўладику»,— деб жавоб берди у. Ўлсин виждон шунаقا бўлса!

Тушдан кейин Бэлани ташналиқ қийнай бошлади. Деразаларни очиб ташладик, аммо уйдан кўра ташқари баттар иссиқ эди; каравот ёнига муз келтириб қўйдик,— бу ҳам кор қилмади. Бу ташналиқнинг ўлим олдидан бўладиган ташналиқ эканлигини билардим, Печоринга ҳам шундай деб айтдим.— «Сув, сув..»— дерди бечора, хириллаган товуш билан, ёстиқдан бошини кўтариб.

Печориннинг юзи бўздай оқариб кетди, стаканга сув қуиб, Бэлага тутди. Мен икки қўлим билан кўзимни беркитиб, дуо ўқий бошладим, қанақа дуо ўқиганим эсимда йўқ... Эҳ-ҳа-а, отахоним мен умримда госпиталларда ҳам, жанг майдонларида ҳам кўп одамларнинг ўлганини кўрганман, аммо улар бунинг олдидага ҳеч гап эмас эди!.. Менинг яна бир хафа бўлган жойим шундаки, Бэла ўлиш олдидан мени бир марта ҳам тилга олмади, ҳолбуки мен уни ўз қизимдай яхши кўрардим. Хайр, майли, худо ўзи кечирсин!.. Рост-да: мен ўзим ким эдимки, ўлиш олдидан мени тилга олса!..

Сувдан ҳўплади-ю, бир оз жон киргандай бўлди, лекин уч минутлардан кейин жон берди. Лабига ойна тутиб кўрдик — ойна тип-тиниқ!.. Печоринни уйдан олиб чиқиб кетдим, тўпроққўргонга чиқдик; қўлларимизни орқага қилиб анчагача индамасдан юрдик; унинг чеҳраси ҳеч шимани ифода этмас эди, менинг кўнглим ранжиди: унинг ўрнида мен бўлсам — фам-ғуссадан ўлиб кетган бўлардим. Охири Печорин сояга ўтириб, чўл билан қумни чиза бошлади. Кўнгил учун унга тасалли бера бошлаган эдим, у бошини кўтарди-да, кулиб юборди... Шундай кулдики, этларим жимиirlаб кетди.. Мен тобубурай, деб туриб кетдим.

Ростини айтсам, бу ишни кўнглим тасалли топсин деб қилдим. Менда бир парча термалама¹⁶ бор эди, тобутни шу термалама билан қоплаттирдим-да, бир вақт Григорий Александровичнинг ўзи Бэлага олиб берган чеченча зар уқалар билан безатдим.

Эртаси куни эрталаб Бэлани қалъанинг ташқарисига, энг сўнгги марта ўтирган жойига яқин ерга, сой бўйига олиб чиқиб кўмдик; ҳозир қабрининг атрофида оқ акация ва бузиналар ўсиб ётипти. Гўрига крест ҳам қўйдирмоқчи бўлдим, кейин яхши бўлмас, ҳар ҳолда, христиан эмас эди, деб қўйдирмадим...

— Печоринга нима бўлди? — деб сўрадим.

— Печорин анчагача касал ётди, ориқлаб ҳам кетди бечора, аммо шу-шу Бэла ҳақида бир оғиз ҳам гапиришмайдиган бўлиб кетдик; бу гапнинг унга ёқмаслигини билардим, шундай экан гапириб нима қиласман? — дедим ўзимга ўзим... Уч ойлардан кейин уни Е... полкига тайинлашди, Грузияга кетиб қолди. Шундан бери кўришмаймиз... Ҳа, дарвоқи, яқинда бир киши менга уни Россияяга қайтди деб айтди, аммо корпус бўйича берилган буйруқларда бу тўғрида ҳеч нарса учратмадим. У ёғини суриштирганда, хабарлар бизга жуда кечикиб келади.

Шундан кейин Максим Максимич, қайгули хотира-ларни унумоқ учун бўлса керак, янги хабарларни бир йилдан кейин билишнинг қанчалик ёмонлиги тўғрисида гапира кетди.

Мен унинг гапини бўлмас ҳам, эшитмас ҳам эдим.

Бир соатдан кейин йўлга тушиш мумкин бўлиб қолди: бўрон босилиб, ҳаво очилиб кетди, йўлга тушдик. Йўлда кета туриб, мен яна Бэлла билан Печориндан гап очдим.

— Қазбичнинг нима бўлганини эшитмадингизми? — деб сўрадим.

— Қазбичми? Қим билади дейсиз... Үнг флангда шапсуглар¹⁷ орасида Қазбич деган жасур одам бормиш деб эшитувдим, бизникилар ўқ ёғдирганда қизил пешмат кийиб юармиш, қулоғининг тагидан ўқ визиллаб учеб ўтиб қолганда энгашиб таъзим қиласмиш, дейишади; аммо у ўша Қазбич бўлмаса керак!..

Қобида Максим Максимич билан хайрлашдик; мен бекат аравасига тушиб кетдим, у эса юки оғир бўлгани сабабли, мен билан бирга кета олмади. Биз яна кўришармиз деб ўйламаган эдик, аммо кўришдик, истасангиз

айтиб берай, бу ҳам бир катта воқеа. Аммо Максим Максимичнинг ҳурматга сазовор одам эканлигига иқрор бўларсиз!.. Агар бунга иқрор бўлсангиз, менинг фоят чўзилиб кетган ҳикоямни эшитганингиз учун мукофотланган бўламан.

II

Максим Максимич

Максим Максимичдан айрилгач, от чоптириб Терек ва Дарьял дараларидан жадал ўтиб кетдим, Казбекда нонушта қилдим, Ларсда чой ичдим-да, кечки овқатни Владикавказда қилишга шошилдим. Мен сизларга тоғлар тасвири, ҳеч нарсани ифодаламовчи ҳайқириқ ва хитоблар, ўз кўзлари билан кўрмаган одамлар учун маъносиз бўлган манзаралар, ҳеч кимнинг ўқигиси келмайдиган статистик маълумотлар ҳақида сўзлаб ўтирмайман.

Мен ҳамма йўловчилар қўнадиган меҳмонхонага тушдим, бу шундай бир меҳмонхона эдики, қирговул қовуриб ёки тузукроқ шўрва пишириб берувчи бирорта киши йўқ, чунки меҳмонхона топшириб қўйилган учта инвалид киши шу қадар бефаҳм ёки ҳамиша маст одамлар эдики, улардан сариқ чақалик фойда тегмас эди.

Менга бу ерда яна уч кунча турасиз деб айтишди, чунки Екатеринограддан ҳали «оказия» келмаган экан, шу сабабдан унинг қайтиб кетиши ҳам мумкин эмас экан. Ана бу оказия*ни қаранг! Аммо бемаъни сўз ўйини рус кишига тасалли бермайди, шунинг учун, эрмак деб Максим Максимичнинг Бэла қиссасини ёзишга киришдим, аммо бу воқеанинг кейин келадиган қатор қиссаларнинг муқаддимаси бўлажагини хаёлимга ҳам келтирмаган эдим; буни қарангки, арзимаган бир нарса баъзан қандай оғир оқибатлар келтиаркан! Балки, «оказия»нинг нималигини билмассиз? «Оказия» дегани ярим рота пиёда солдат ҳамда замбаракдан иборат бўлган ҳимоячи бир отряд бўлиб, Владикавказдан Кабарда орқали Ека-

* Сўз ўйини. Қўштироқсиз ёзиладиган оказия сўзи ишнинг чатоқлигини, ишқалликни билдиради, (тарж.)

териноградга қатнааб турувчи карвонлар шу отряд ҳимоя-
сида юради.

Дастлабки куни жуда зерикиб кетдим; эртаси куни
эрталаб ҳовлига бир арава кириб келди... Э! Максим
Максимич-ку!.. Биз эски қадрдондай күришдик. Мен уни
ўзим турган хонага таклиф этдим. У ҳам тортиниб ўти-
мади, ҳатто елкамга қоқиб, оғзи буришиб илжайгандай
ҳам бўлди. Шунақа қизиқ одам эди-да!..

Максим Максимич жуда пазанда одам: қирғовулни
жуда боплаб қовурди, устига тузланган бодринг сувидан
сепди, ростини айтсан, агар у келиб қолмаганда, куним
қуруқ нон-сувга қоларди. Бир шиша қахетин виноси ов-
қатимиз хилининг камлигини билдирамади: овқатимиз
ниҳояти бир сидра эди, холос: кейин иккимиз трубкалар-
нимизни чекиб, мен дераза тагида, у қизиб турган печка
ёнига ўтирдик; ҳаво нам ва совуқроқ эди. Иккимиз инда-
май ўтирардик. Нима тўғрисида ҳам гапиришардик?.. У
ўзи ҳақидаги ҳамма мароқли гапларни айтиб бериб бўл-
ган, менда эса айтадиган бирор нарса йўқ. Мен деразадан
қараб ўтирардим. Тобора кенгайиб борувчи Терек
бўйларида сочилиб ётган ҳисобсиз пастак уйлар дарахт-
лар орасидан милтиллаб кўринар, уларнинг орқасидаги
кунгурали кўм-кўк тоғлар ортида эса Қазбек тоғи худди
оппоқ салла ўраб тургандай кўзга ташланар эди. Мен
фикран улар билан видолашдим, чунки уларга ачинар-
дим...

Анчагача индамай ўтирдик. Қуёш муздек тоғлар ор-
тига ботиб, водийларга оқиш туман ёйила бошлаганда,
бирдан кўчадан қўнғироқнинг жаранглагани ва извош-
чиларнинг ҳай-ҳув деб бақириши эшитилди. Меҳмонхона
ҳовлисига устбоши кир-чир арманлар тушган бир неча
арава, улар кетидан бир бўш коляска кириб келди; коля-
сканинг енгил юриши, ўнғай қурилиши ва гўзаллиги
чет элдан келтирилганлигидан дарак берар эди. Коляс-
канинг кетидан мўйлови шопдай, устига венгерка кийган
ва уст-боши бинойи бир киши келарди, уни малай деса
малайга ўхшамасди; аммо трубка кулини олифталик
билан қоқишини, аравакашларга ўшқириб беришини кўр-
ган одам унинг малайлигига шубҳа қилмас эди. Унинг
бегам бойвачанинг эрка малайи эканлиги кўриниб турар-
ди, уни рус Фигароси¹⁸ деса бўларди. «Менга қара, ба-
ка топкур, бу нима, «оказия» келдими?»— деб сўрадим
деразадан. У менга бир ўқрайиб қаради-да, галстугини

түғрилаб, юзини тескари ўғирди; унинг ёнида келаётган армани кулиб, «ҳа, оказия келди, эртага эрталаб қайтиб кетади»,— деб жавоб берди. «Худога шукур-а!»— деди Максим Максимич, дераза олдига келиб.— Жуда ажойиб коляска эканми!— деб илова қилди у.— Биронта амалдор тергов иши билан Тифлисга кетаётган бўлса керак. Афтидан, биз томондаги тоғларни билмаса керак! Эҳ-ҳе, оғайни, бизнинг тоғлар билан ўйнашиб бўлмайди, бу тоғлар инглиз коляскаларининг ҳам шалоғини чиқариб юборади! Ўзи ким экан, юринг, чиқиб билайлик...» Коридорга чиқдик. Коридорнинг охиридаги уйлардан бири нинг эшиги очиқ эди. Извошли билан малай чамадонларни ўша уйга ташиб кирмоқда эдилар.

— Менга қара, иним,— деб сўради малайдан штабс-капитан,— анови ажойиб коляска кўмники, а?.. Жуда яхши коляска экан-да!..

Малай қайрилиб ҳам қарамай, чамадоннинг қайиши-ни ечар экан, бир нима деб пўнғиллади. Максим Максимичнинг жаҳли чиқиб кетди, беодоб малайнинг елкасига туртди-да: «Мен сендан сўраяпман, азизим...»— деди.

— Кимнинг коляскаси дейсизми?.. Хўжайнимники...

— Хўжайнинг ким?

— Печорин...

— А? Нима дединг? Печорин... Е парвардигор!.. Кавказда хизмат қилганми?..— деб хитоб қилди Максим Максимич, менинг енгимдан тортиб. Унинг кўзларида шодлик учқунлари чақнаб кетди.

— Хизмат қилган шекилли, мен у кишига яқинда хизматга кирганман, яхши билмайман...

— Ҳа, ҳа!.. Шунаقا дегин,.. Оти Григорий Александровичми?.. Хўжайнинг билан ошна эдик,— деб илова қилди штабс-капитан; малайнинг елкасига дўстона бир туширган эди, малай гандираклаб кетди...

— Кечирасиз, тақсир, мени ишдан қўйяпсиз,— деди малай, қовоғини солиб.

— Вой, сени қара-ю!.. Биласанми, оғайни, сенинг хўжайнинг менинг қадрдон ошнам бўлади, бирга турганмиз... Ўзи қаэрда қолди?..

Малай: «Печорин Н. деган полковникнида овқат қилгани қолди, ўша ерда турайди»,— деди...

— Кечқурун бу ерга келиб кетмайдими?— деди Максим Максимич,— ё унинг олдига бирор иш билан ўзинг боролмайсанми, барака топкур?.. Борсанг, Максим Мак-

симич шу ерда экан, деб айт, худди шундай деб айт, ўзи билади... сенга тўрт танга ароқ пули бераман...

Бундай арзимаган инъомни эшитиб, малайнинг афти буришди, аммо топшириқни адо этаман, деб Максим Максимични ишонтирди.

— Эшитса дарров югуриб келади!..— деди Максим Максимич, тантанали бир қиёфада.— Дераза олдида кутуби тураман... Эҳ, аттанг, аттанг, полковник Н. билан таниш эмасман-да...

Максим Максимич дераза олдиаги скамейкага чиқиб ўтириди, мен ўз хонамга кириб кетдим. Ростини айтсам, мен ҳам Печориннинг келишини бетоқатлик билан кутардим; гарчи штабс-капитаннинг гапларидан кейин унинг ҳақида менда яхши фикр қолмаган бўлса ҳам, унинг мижозидаги баъзи бир хислатлари, назаримда жуда яхши кўринар эди. Бир соатлардан кейин нивалид самовар билан чойнак кўтариб кирди.

— Максим Максимич, чойга тобингиз қалай?— деб қиңқиридим деразадан.

— Қуллуқ, чой ичгим йўқроқ.

— Қелинг, пича ичинг! Вақт ҳам кечиқди, совуқ тушди.

— Зарари йўқ, раҳмат...

— Ихтиёрингиз!— Мен ёлгиз ўзим чой ича бошладим: ўн минутлардан кейин чолим кириб келди. «Рост айтган экансиз, чой ичганимиз яхшироқ, мен уни келармикин деб ўтирувдим... Одами кетганига анча бўлди, бирон иш чиқиб қолган бўлса керак».

Апил-тапил бир чашка чой ичди, иккинчисига кўнмади. Аллақандай хавотирилик билан яна дарвоза олдига чиқиб кетди. Печориннинг менсимаганлиги уни ранжитгани равшан кўриниб турар эди, яқиндагина чол менга у билан дўст бўлганлигини айтган ва бир соатгина олдин отимни эшитса дарров югуриб келади деб ишониб ўтирган эди-да.

Деразани яна очиб, Максим Максимични чақириб, энди ётайлик деганимда, вақт алламаҳал бўлиб қолган, қоронғи ҳам тушган эди; Максим Максимич ўзича бир нималар деб пўнғиллади; яна чақирган эдим, индамади.

Сўридаги шамни ўчирмай, шинелга ўрайниб диванга чўзилдим, хиёл ўтмасдан мудраб ҳам кетибман, хийла вақтдан кейин Максим Максимич кириб уйғотмагандা, қотиб ухларканман. Максим Максимич трубкасини стол-

га ташлади-да, уй ичида айланиб юрди, печкани ковлаштириди, кейин ётди, анчагача йўталди, туфлади, тўлғанди...

— Қандала чақаяптими? — деб сўрадим.

— Ҳа, қандала... — деб жавоб берди у, оғир хўрси-ниб.

Эртасига барвақт уйғондим, аммо Максим Максимич мендан ҳам илгари турган экан. Чиқиб қарасам, дарвоза олдидағи скамейкада ўтирипти. «Мен комендантга бориб учрашишим керак,— деди у,— агар Печорин келиб қолса — дарров менга одам юборинг, барака топкур...»

Мен хўп дедим. Максим Максимич юргурганича кетди... Худди унинг баданига ёшлиқдаги бардамлик қайтиб, яна чақон бўлиб кетгандай эди.

Салқин ва ажойиб бир тонг пайти эди. Баланд тоғлар тепасида уюлиб ётган олтиндай булатлар худди янги тоғ силсилашлари янглиф товланарди; дарвозанинг олди кенг майдон эди, бугун якшанба куни бўлганидан, майдоннинг нариги бошидаги бозор лиц тўла одам; елкаларига бол солинган қути кўтариб олган ялангоёқ осетин болалар атрофимни ўраб олишди, мен уларни қувиб юбордим; ҳозир ўшалар кўнгилга сифармиди, меҳрибон штабс-капитаннинг ташвиши менга ҳам юққан эди.

Ўн минутча ҳам ўтмагани эдикি, майдоннинг нариги бошида биз кутган одам кўринди. У полковник Н... билан бирга келар эди, полковник Н... уни меҳмонхонагача кузатиб, у билан хайрлашди-да, қалъага қайтиб кетди. Мен дарҳол инвалидни Максим Максимичга юбордим.

Малайн Печориннинг қаршияига чиқди-да, унга ҳозир арава қўшилажагини билдириди; хўжайнинга бир қути сигара келтириб берди-да, бир мунча буйруқ олиб, шуларни бажаргани кетди. Унинг хўжайнини сигара чекиб, бир-икки марта хомузга тортиди-да, дарвозанинг нариги томонидаги скамейкага бориб ўтириди. Энди мен сизларга унинг портретини чизиб беришим керак.

У ўрта бўйли эди; хипча қадди-қомати ва кенг яғрини кўчманчи турмушда учрайдиган ҳамма қийинчилик ва машаққатларга, иқлимнинг ўзгариб туришига, пойтактҳа айш-ишратлари ва руҳий кечирмаларга бардош бера олишидан дарак берар эди: фақат иккита пастки тугмасигина қадалган, чанг боссан духоба сюртугининг тагидан кўриниб турган оппоқ пахтадек ич кўйлаги унинг покиза одамлигини билдиради эди; унинг кир қўл-

қоплари худди шу аристократ одамнинг бежирим қўлнга бичиб тикилгандай кўринарди, бир қўлидан қўлқопини ечган эди, рангиз бармоқларининг озғинлигини кўриб жуда ажабландим. Ўрганда эриниб ва қадамларини бемалол ташлаб юрарди, аммо қўлларини силкитмай юриши назаримдан қочмади,— бу эса унинг мижозининг бир даражада ёт эканлигининг аниқ шоҳиди эди. Аммо булар — ёлғиз ўзимнинг кўриб билганим асосида ҳосил этган шахсий фикрим, бунга албатта ишонишингиз керак, деб айтмайман. Скамейкага ўтирганда, худди гавдасида битта ҳам суяқ йўқдай икки букилди; бутун гавдаси худди асабий одамнинг гавдасидай заиф ва ожиз кўринарди, унинг ўтириши худди Бальзак тасвирлаган ва балда танца қиласвериб чарчаган ўттиз яшар сатанг хотин¹⁹нинг юмшоқ пар креслода ўтиришига ўхшарди. Дастрраб юзига кўзим тушганда, ёши йигирма учларда кўринди, кейин яхшилаб қараб, йўқ, ўттизларда бўлса керак, дедим ичимда. Жилмайганда худди болалардай жилмаяр эди. Бадани худди аёл кишининг баданидай нозик эди, табиатан жингалак малла соchlари унинг рангиз ва очиқ пешанасига чиройли бўлиб ёйилиб тушарди. Пешанасидаги бир-бирини кесиб ўтган иккита ингичка ажинни синчилаб қарагандагина кўриш мумкин эди, бу ажинлар фақат ғазабланган ва руҳан ташвишланган пайтлардагина аниқроқ кўринса керак. Соchlарининг малла бўлишига қарамай, мўйлови билан қошлиари қоп-қора эди,— оқ отнинг зотини қора ёли билан қора думи нишонлаб тургандай, бу ҳам кишининг зотини аниқ кўрсатиб туради. Бурнининг бир оз танқайганлиги, тишларининг оппоқ ва қўй кўзлигини айтсам — портретини тамоман чизиб берган бўламан, аммо унинг кўзлари ҳақида яна бир-икки оғиз гапириб ўтишим керак.

Аввало у кулганда, кўзлари кулмасди! Баъзи одамларда шундай фалати хислатни кўрганингиз борми?.. Бу нарса ё ёвуз табиатликнинг ёки ҳеч тарқалмайдиган чуқур ғамгинликнинг аломатидир. Кўзлари ярим ёпиқ киприклар орасидан худди фосфордай чарақлаб ёниб туради. У чарақлашни руҳий жўшқинлик ёки хаёлга берилиш нишонаси деб бўлмас эди: у чарақлаш худди силлиқ пўлатдай кўзни қамаштиради-ю, аммо совуқ эди; бирорвга қараганда қисқагина бир қараб қўярди, лекин худди баданингни тешиб ўтиб кетгудай ўткир ҳамда

вазмин қарап эди — бу худди бетамиз ва дағал бир са-
вол беріб турғандай, кишига ёқмас эди,— агар унинг
қараши бу қадар бепарво ва сокин бўлмагандай эди, уни
сурбетларча қарап деса бўларди. Бу мулоҳазаларни
балки унинг ҳаётининг баъзи тафсилотларини билганим
учун қилгандирман, унинг қиёфаси бошқа одамларда
бу туилай бошқача таъсир қолдирса эҳтимол; аммо унинг
таърифини мендан бошқа ҳеч кимдан эшитолмайсиз,
шунинг учун менинг тасвири билан кифояланиб қўя
қолишга мажбурсиз. Охирида шуни ҳам айтишим керак-
ки, у анча кўхликкина, хотин-қизларга ёқадиган соҳиб-
жамол киши эди.

Арава қўшилиб бўлган эди; дўғага боғланган қўнги-
роқ аҳён-аҳёнда жаранглаб қўярди, Печориннинг ма-
лайи хўжайиннинг олдига икки марта келиб, ҳамма нар-
са тайёрлигини билдириди, аммо Максим Максимичдан
ҳамон дарак йўқ эди. Яхшиямки, Печорин Кавказ тоғ-
ларининг кўм-кўк чўққиларига хаёлчанлик билан қараб
ўтирас ва йўлга отланишга ошиқмаётгандай кўринарди.
Мен унинг ёнига бориб:

— Агар яна бир оз кутсангиз, қадрдон дўстингизни
бир кўриб кетардингиз,— дедим.

— Аҳа, дарвоқе!— деб тез жавоб қайтарди у.— Кеча
менга айтишувди, қани ўзи?— Мен майдон томонга қай-
рилиб қараган эдим, югуриб келаётган Максим Макси-
мични кўрдим... У бир нафасда ёнимга етиб келди, у хар-
силлаб нафас оларди; юзидан дўлдай тер оқарди, ҳўл
бўлиб кетган оқ соchlари шапкаси остидан чиқиб, пеша-
насига ёпишиб қолган эди: тиззалири дир-дир титради...
Печориннинг бўйнига ўзини ташламоқчи бўлган эди, би-
роқ Печорин, гарчи суюнгандай табассум билан бўлса
ҳам, совуққина қўл узатди. Штабс-капитан бир лаҳза
қотиб қолди, кейин унинг қўлини икки қўли билан ушлаб
кўришди; харсиллаганидан тили гапга келмас эди.

— Жуда хурсандман, азизим Максим Максимич!
Хўш, соғ-саломатмисиз?— деди Печорин.

— Сен-чи?.. Сиз-чи?..— деди чол, кўзларига
ёш олиб.— Неча йиллар... неча кунлар... ҳа йўл бўл-
син?

— Эронга — ундан ҳам нарига...

— Ҳозирнинг ўзида-я?.. Ҳа, бир оз шошманг, ази-
зим!.. Наҳотки ҳозир кўришсаг-у, айрилишсак?.. Кўпдан
бери дийдор кўришмадик...

— Мен кетай энди, Максим Максимич,— деб жавоб берди Печорин.

— Ё парвардигор! Астағуриллоҳ! Ҳа, намунча шошилмасангиз? Сизга айтадиган кўп гапларим бор... Кўп нарсаларни сиздан сўрамоқчи эдим... Хўш, қалай?.. Истетьфодамисиз?.. Қалай?.. Нима ишлар қилиб юрдингиз?..

— Зерикаб юрдим!— деб жавоб берди Печорин, кулимсираб.

— Қалъада кечирган ҳаётимиз эсингиздами?.. Жуда ов бол жёйлар эди-а? Овга жудаям ишқивоз эдингиз... Бэла-чи?..

Печорининг ранги жиндек оқариб кетди, юзини ўгирди.

— Ҳа, эсимда!— деди у ва шу ондаёқ жўрттага ҳомузга торти. Максим Максимич яна бир-икки соат бирга бўлайлик деб ялни бошлади. «Бирга тушлик қиласардик, иккита қирғовулим бор,— дерди у,— бу ернинг қахетин виноси жуда яхши бўлади... албатта, Грузия виносидаи эмас-ку, аммо жуда яхши навдан... Гурунглашиб ўтирадик... Петербургда кечирган ҳаётингизни менга гапириб берардингиз... Хўпми?..»

— Гапириб берадиган ҳеч нарса йўқ, қимматли Максим Максимич... Хўп, хайр энди, мен шошиб турибман... Раҳмат, мени унутмабсиз...— деб илова қилди Печорин, чолнинг қўлидан ушлаб.

Чолнинг қовоқлари осилди... У хафа ва ранжиган эди, гарчи буни яширишга тиришса ҳам, яшира олмасди. «Унутмабсиз эмиш!— деб пўнғирлади у.— Мен-ку ҳеч нарсани унунтганим йўғ-а... Ҳа, майли, ихтиёргиз... Сиз билан бундай кўришарман деб сира ўйламаган эдим...»

— Келинг, қўйинг, хафа бўлманг!— деди Печорин, уни дўстона қучоқлаб.— Наҳотки мен ўша сиз билган Печорин бўлмасам?.. Начора... ҳар кимнинг тақдирни ҳар хил бўларкан... Яна кўришамизми, кўришмаймизми, худо билади!..— Бу гапларни айтаркан, у коляскага ўтириб, извошли ҳам тизгинини қўлига ола бошлаган эди.

— Тўхта, тўхта!— деб қичқирди бирдан Максим Максимич, колясканинг эшигини ушлаб.— Эсимдан чи-қаёзити... Сизнинг қоғозларингиз менда қолган эди, Григорий Александрович... Үзим билан бирга олиб юрибман... сизни Грузияда учратарман деб юрувдим, мана, худо бу ерда йўлиқтирди... Нима қилай ўшаларни?..

— Билганингизни қилинг! — деб жавоб берди Печорин. — Хайр!..

— Эронга кетяпсизми?.. Қачон қайтасиз?.. — деб бақириб қолди Максим Максимич унинг кетидан...

Коляска анча ерга бориб қолган эди, Печорин қўлини силкитди, буни — қайтишим маҳол! Қайтиб ҳам нима қиласман!.. — деб тушуниш мумкин эди.

Қўнғироқнинг жаранги ҳам, коляска филдиракларининг шағал йўлдан тарақлаб бориши ҳам ортиқ эши билмас эди, аммо бечора чол турган жойида ҳамон қимир этмай, чуқур хаёлга ботиб туради.

Гарчи аламдан кўзларида ёшлари ялтираб кўринса ҳам, чол ўзини бепарволикка солиб:

— Ҳа, қадрдонликка қадрдон эдиг-у, аммо ҳозирги замонда қадрдонликнинг қадри қопти дейсизми, — дерди. — Унинг учун мен ким эдим? Бадавлат бўлмасам, амалдор бўлмасам, унинг устига ёшимиз ҳам тенг эмас... Петербургга бориб дарров олифта ҳам бўлиб олипти... Коляскасини қаранг!.. Юки ҳам бир оламнинг юки!.. Малайи ҳам ўзига бино қўйган!.. — Бу сўзларни Максим Максимич кинояли кулги билан айтди. — Айтинг-чи, бу тўғрида нима ўйлайсиз? — деди, менга қараб. — Эронга бориб нима қиласкин?.. Одамнинг кулгиси қистайди, рост!.. Ишониб бўлмайдиган енгилтак одам эканлигини илгари ҳам билардим... Э аттанг, бир кун эмас бир кун ўз бошини ейди-да!.. Бундан бошқача бўлиши ҳам мумкин эмас!.. Эски дўстни унутган одам, одам эмас деб юрганим ҳақиқатан ҳам тўғри экан!.. — Шу гапларни айта туриб, ўз ҳаяжонини яширмоқ учун юзини тескари бурди-да, ҳовлида турган араваси атрофида айланниб юрди, кўзларига дам-бадам келиб турган ёшни яширмоқ учун ўзини арава филдиракларини қараётганга соларди.

— Максим Максимич, — дедим ёнига бориб, — Печорин ташлаб кетган қофозлар қанақа қофоз эди?

— Қим билади дейсиз! Аллақандай ёзувлар шекилли...

— Уни нима қиласиз?

— Нима қиласкин! Патрон ясаттираман.

— Ундан кўра, менга бера қолинг.

У менга ажабланиб қаради-да, бирнималар деб пўн-филлаб, чамадонини титкилай бошлади; чамадондан бир дафтарни олиб зарда билан ерга ирғитди; иккинчи дафтарни ҳам, учинчисини ҳам, ўнинчисини ҳам шундай қил-

ди; унинг бу қилиғида аллақандай болаларга хос инжиқлик бор эди; ҳам кулгим қистар, ҳам раҳмим келарди...

— Бари шу,— деди у,— шундай матога эга бўлишингиз билан табриклайман...

— Энди буларнинг ихтиёри мендами?

— Газетада бостирасизми, бошқа қиласизми, билганингизни қилинг. Менга нима!.. Нима, мен унинг дўстиманми ё қариндошиманми? Рост, бир бошпанада узоқ турганимиз... Нима, кимлар билан турмабман?..

Қоғозларни йифиштирдим-да, штабс-капитан яна айниб қолмасин деб қўрқиб, дарров олиб чиқиб кетдим. Кўп ўтмай, «Оказия» бир соатдан кейин жўнайди, деб билдиришди, мен аравани қўшишга буюрдим. Шапкамни кийиб турувдим ҳамки, штабс-капитан кириб келди; у сафарга чиқувчи одамга ўхшамасди, қиёфасидан қандайдир изтироб сезилар, қовоғи солиқ эди.

— Сиз-чи, Максим Максимич, кетмайсизми?

— Йўқ.

— Нега энди?

— Ҳали комендантуга учраганим йўқ, пошшоликка қарашли омонатларни топширишим керак...

— Боя бориб келдингиз-ку?

— Борувдим-у,— деди у иккиланиб,— уйида йўқ экан... кутишга вақтим бўлмади...

Унинг ҳолига тушундим: бечора чол умрида биринчи марта, расмий тил билан айтганда, шахсий зарурат юзасидан хизмат ишини ташлаган бўлса керак, бунинг эвазига қандай мукофот олди!

— Э, аттанг,— дедим мен унга,— бевақт ажралишар эканмиз-да, Максим Максимич.

— Биз илмисиз қариялар сизларга тенг бўла олармидик!.. Сизлар мағрур, димоғдор ёшларсиз, бу ерда, черкасларнинг ўқи ёғилиб турганда, бизни танийсизлар... Кейин кўришиб қолсак, биздақаларга қўл беришга ҳам ор қиласизлар.

— Мен бундай гинаға лойиқ иш қилмаган бўлсам керак, Максим Максимич.

— Гап келганда айтдим-қўйдим-да; тўғриси сизга баҳт ва оқ йўл тилайман.

Биз хийла совуқ хайрлашдик. Меҳрибон Максим Максимич бирдан ўжар ва қўрс штабс-капитанга айланиб қолди! Нима сабабдан денг? Печориннинг хаёли пари-

шонликданми ё бўлмаса бошқа сабабданми, штабс-капитан унинг бўйнидан қучоқлаб кўришаман деб турганида, фақат қўлинини бериб кўришгани учун! Ёш йигитнинг энг яхши тилак-орзуларидан жудо бўлганлигини, кишиларнинг ишлари ва туйғуларини унга гўзал қилиб кўрсатиб турган парданинг бирдан кўтарилиб кетганини кўриш одамнинг раҳмини келтиради, гарчи ўзининг эски хатолари тезда ўтиб кетишини, аммо эскисидан ҳам ширинроқ хатолар келишини билса ҳам, раҳминг келади... Аммо, Максим Максимичдай қариганингда бу хатолар ўрнини нима босади? Ноиложликдан юрагинг тошдай қотади, руҳинг беркилади...

Ёлғиз ўзим жўнаб кетдим.

ПЕЧОРИННИНГ ЖУРНАЛИ

Сўз боши

Яқинда, Печорин Эрондан қайтаётиб йўлда ўлипти, деб эшидим. Бу хабарни эшишиб мен жуда суюндим, чунки унинг ўлими менга бу хотираларни босиб чиқаришга ҳуқуқ берар эди, мен ҳам бундан фойдаланиб, бирорнинг асари тагига ўз имзомни қўйиб олдим. Бундай арзимаган қалбакилик учун китобхонлар мени айбламаса керак, деб умид қиласман.

Энди мен умримда танимаган бир кишининг юрак сирларини ошкор қилишим сабабларини очиб беришим керак. Унинг дўсти бўлганимда ҳам майли эди: чунки жонажон дўстнинг маккорларча мақтанчоқлиги ҳаммага маълумдир, аммо мен уни умримда бир мартагинага катта йўл устида кўрганман; бинобарин, менда унга нисбатан дўстлик ниқоби остига яшириниб, севган одамнинг ўлимини ёки баҳтсизликка учрашини кутувчи ва ўлгандан кейин унинг тепасида таъна, гина, ҳақорат ва афсуслар ёғдирувчи мавҳум душманлик йўқ.

Бу хотираларни қайта-қайта ўқир эканман, ўзининг ожиз ва заиф томонларини ва гуноҳларини шафқатсиз суратда фош қилган бу кишининг чиндан ҳам самимий эканлигига ишондим. Қиши руҳининг тарихи, хатто энг пасткаш киши руҳининг тарихи, агар бу тарих етук ақлнинг ўз-ўзини кузатиши натижасида ёзилган бўлса ва бирорларда рағбат ва ҳайрат уйғотиш учун ёзилмаган

бўлса, бу тарих бутун бошли бир ҳалқнинг тарихидан ҳам қизиқроқ ва фойдалироқ бўлади. Руссо Тавба-тазаруининг²⁰ энг биринчи камчилиги шундаки, олдин уни ўз дўстларига ўқиб берган.

Шундай қилиб, қўлимга тасодифан тушиб қолган журналнинг парчаларини мен фақат фойда келтирсинг деб бостиридим. Гарчи мен журналдаги исмларни ўзгартирган бўлсам-да, ўз аксларини кўрган кишилар ўзларини таниб оларлар ва, балки, бу оламдан ўтган кишининг ҳозиргача қоралаб келган қилмишларини энди оқларлар; биз ўзимиз тушунган нарсаларни деярли ҳамиша оқлаб келамиз.

Бу китобга мен Печориннинг фақат Кавказда кечирган ҳаётига оид бўлган нарсаларнигина киритдим. Қўлимда унинг яна битта қалин дафтари қолди, унда Печорин ўзининг бутун ҳаётини таърифлайди. Бу дафтарни ҳам ўқувчилар муҳокамасига ташлаш вақти келиб қоллар; аммо талайгина муҳим сабабларга кўра ҳозирча бу масъулиятни ўз зиммамга ололмайман.

Балки, баъзи китобхонлар Печориннинг характеристи ҳақида фикримни билмоқчи бўларлар? Уларга менинг жавобим ушбу китобнинг сарлавҳасидир. «Ие, бу заҳарли киноя-ку!» дерлар. Билмадим.

I

Тамань

Россиянинг денгиз бўйидаги шаҳарлари ичida энг расвоси — Тамандир. У ерда мен очимдан ўлаёзганман, бунинг устига, мени гарқ қилиб юбормоқчи ҳам бўлишган. Бекат аравасида ярим кечада шаҳарга кириб келдим. Аравакаш, уч отли аравани шаҳарга кираверишдаги яккаю ягона ғишин бино олдига келтириб тўхтатди — учала отнинг ҳам дармони қуриган эди. Қораденгизли часовий казак қўнғироқнинг жаранглашини эшишиб, каловлаб ваҳима билан: «Ким у?»— деб бақирди. Урядник билан ўнбоши чиқди. Мен уларга, офицерман, ҳукумат ишлари билан ҳаракатдаги отрядга кетаётибман, деб тушунтирдим-да, пошшолик уй талаб қилдим. Ўнбоши бизни шаҳарга бошлади. Қайси уйга бориб сўрамайлик — банд. Совуқ эди, уч кечадан бери ухламаган, жу-

да чарчаган эдим, жаҳлим чиқди. «Бирон жойга олиб бор тезроқ, муттаҳам! Жаҳаннамга бўлса ҳам майли, ишқилиб жой бўлса бўлгани!»— деб қичқирдим. «Яна битта уй бор,— деб жавоб берди ўнбоши, бўйинни қашлаб,— аммо жанобларига тўғри келмаса керак; тоза жой эмас!»— Охирги сўзнинг маъносига яхши тушунмай, бошла деб буюрдим, эски-туски чордеворлар ёнидан, аллақандай ифлос кўчалардан узоқ юриб, охири денгиз бўйидаги кичкина бир кулба олдинга етиб тўхтадик.

Тўлин ой янги бошпанамнинг қамиш томлари ва оппоқ деворларини ёритиб турарди; атрофи тош девор билан ўраб олинган қўрада яна бир уй қаққайиб турарди, буниси олдингисидан ҳам баттар эски ва кичкина эди. Уйнинг девори тикка кесиб тушган денгиз қирғоининг нақ лабига бориб тақаларди, пастда қоп-қорайиб кўринувчи тўлқинлар тинмай шовиллаб турарди. Ой бетинч, аммо ўзига итоат қилувчи денгиз сатҳига жимгина қараб турарди, унинг ёғудусида икки кемани кўриб қолдим, улар қирғоқдан анча йироқда турарди, кемаларнинг худди ўргимчак тўрига ўхшаган арқонлари фира-шира уғқ фонида қимир этмай қоп-қорайиб турарди. «Пристанда кемалар бор экан, демак, эртага Геленжикка жўйнайман»,— деб ўйлаб қўйдим.

Деншигим линияда хизмат қилувчи казак эди. Унга чамадонимни олиб, аравакашга жавоб бериб юборишни буюрдим-да, уй эгасини чақира бошладим, ҳеч ким жавоб бермади; яна тақиллатсам — яна жавоб бўлмади... Энди қандоғ бўлди? Ниҳоят, даҳлиздан ўн тўрт ёшларга кирган бир бола чиқди.

«Уйнинг эгаси ҳани?!» «Йўқ». «Нега йўқ? Бутунлай йўқми?» «Бутунлай йўқ», «Хотини-чи?!» «Хотини слободкага кетган». «Эшикни ким очиб беради?»— дедим ва эшикни бир тепган эдим, ўзи очилиб кетди: уйдан димоқ-қа рутубат ҳиди урилди. Олтингугурт чақиб, боланинг бурнига тутдим, қарасам: боланинг иккала кўзи оппоқ. Бола кўр, туғма кўр экан. Бола менинг олдимда қимир этмай турарди, мен унинг юзига синчиклаб қарай бошладим.

Ростини айтсам, ҳамма кўрлар, қийшиқлар, карлар, соқовлар, чўлоқлар, қўлсизлар, оёқсизлар, букирлар ва шуларга ўхшашларни ёмон кўраман. Кишининг ташқи қиёфаси билан рухи ўртасида аллақандай ғалати бир муносабат борлигини, бирон аъзодан ажралган киши-

нинг руҳи ҳам ўзининг бирон сезгисини йўқотишини пай-қаганман.

Шундай қилиб кўр боланинг юзига тикилиб қарай бошладим, аммо кўэсиз юздан нимани уқиб билиш мумкин?.. Унинг бетига беихтиёр ачиниб қараб турган эдим, бирдан юпқа лабларида билинар-билинмас табассум кўриниб кетди, нима учундир бу табассум менда қандайдир ёмон бир таассурот қолдириди. Миямда бу кўр бола унча кўрга ўхшамайди деган шубҳа туғилди, аммо кўзини сунъий равишда парда бостириб олмаган бўлса керак, чунки нима учун бундай қиласи деб ўзимни-ўзим қанча ишонтирсан ҳам, ҳеч ишонгим келмасди. Аммо наилож? Мен кўп нарсага шубҳа билан қарайдиган одамман...

«Уй эгасининг ўғлимисан?»— деб сўрадим, ниҳоят. «Иўқ». «Бўлмаса кимсан?» «Етимчаман» «Хўжайкангнинг болалари борми?» «Иўқ; битта қизи бор эди, татар билан бирга денгизнинг нарёғига қочиб кетган». «Қанақа татар билан?» «Ким билади! Бир қрим татари билан, у керчли қайиқчи эди».

Уйга кирдим; уйнинг бутун анжоми икки скамейка, стол ва печка ёнида турган каттакон сандиқдан иборат эди. Деворда битта ҳам образ²¹ кўринмас эди — бу ёмон аломат! Ойнаси синиқ деразадан денгиз шамоли фириллаб уриб турарди. Чамадонимдан сўхта шам олиб ёқдим-да, буюмларимни жойлаштира бошладим, қиличим билан милтиғимни бурчакка тираб, пистолетимни стол устига қўйдим, буркамни скамейкага ёздим, казак эса буркасини бошқа скамейкага ёзи; ўн минутлардан кейин казагим хуррак торта бошлади, аммо мен сира ухлаётмадим; қоп-қоронги уйда ётарканман, оқ кўзли бола сира кўз ўнгимдан кетмас эди.

Шу зайлда бир соатча ўтди. Деразадан мўралаб турган ой шуъласи уйнинг саҳнида жилва қиласиди. Бирдан уй саҳнига лентадай тушиб турган ой шуъласига бир кўланка тушди-ю, лип этиб ўтиб кетди. Қаддимни кўтариб, деразадан қарадим; кимдир яна дераза ёнидан югуриб ўтди-да, фойиб бўлди. Бу кимсанинг тик қирғоқдан пастга тушиб кетганига кўзим етмас эди; ундоғ деса унинг борадиган бошқа жойи ҳам йўқ эди. Үрнимдан турдим-да, пешматимни кийдим, белимга ханжаримни тақиб, секин уйдан чиқдим, бирдан олдимдан кўр бола чиқиб қолди. Ўзимни дарров девор панасига олдим, бола

Йўлдан адашмасдан, аммо эҳтиётлик билан қадам ташлаб, ёнимдан ўтиб кетди. Қўлтиғига бир тугунча қистириб олган эди; бола пристан томонга бурилди-да, тикка кесиб тушган сўқмоқ йўлдан пастга қараб кетди. «Шу куни соқовлар тилга киради, кўрлар кўрадиган бўлади»,— деб ўйладим-да, болани кўздан йўқотмаслик учун, қорама-қора боравердим.

Шу орада ойни булат қоплаб, денгиздан туман кўтарила бошлади; яқин жойда турган кеманинг орқа томонидаги фонус ғира-шира милтиллаб турарди; кемани ғарқ эттираман дегувчи тўлқинлар қирғоқ бўйида кўпиривиб ялтиради. Тепадан зўрға пастга тушиб бораётиб қарасам, кўр бола бир оз тўхтаб турди-да, кейин ўнг томонга бурилиб кетди; бола сув лабига шундай яқин юриб борардики, назаримда, ҳозир уни тўлқин тортиб кетадигандай туюларди. Аммо унинг тошдан-тошга бемалол сакраб, ўнқир-чўнқир жойларни айланиб ўтишидан унинг бу ерлардан кўп юргани кўриниб турарди. Ахирни бир ерга бориб тўхтаб, нимагадир қулоқ солгандай бўлиб турди, кейин ерга ўтириб, тугунини ёнига қўйди. Мен қирғоқнинг денгизга туртиб чиқсан жойида туриб, унинг бутун ҳаракатларини кузатиб турардим. Бир неча минутдан кейин нариги томондан оқ кийган бир кимса кўринди-да, кўр боланинг ёнига келиб ўтиради. Уларнинг гапини баъзан шамол мен томонга учирив келтиради.

«Нима дейсан, кўр, бўрон турди-ю,— деди хотин кишининг товуши.— Янко келмайди». «Янко бўрондан қўрқмайди»,— деб жавоб берди бола. «Туман қуюқлашмоқда»,— деб эътиroz билдири хотин, ғамгин товуш билан.

«Соқчи кемалар ёнидан туманда ўтиш қайтанга осонроқ бўлади»,— деб жавоб берди кўр бола. «Чўкиб кетса-чи!» «Чўкиб кетса, якшанба куни черковга янги лента тақмай борасан-да».

Жим бўлишди, бир нарса мени ҳайратда қолдири: кўр бола мен билан Малороссия лаҳжаси²²да гаплашган эди, ҳозир бўлса соф рус тилида гапирав эди.

«Ана, кўрдингми, айтганим рост чиқди,— деди кўр, чапак чалиб.— Янко денгиздан ҳам, шамолдан ҳам, тумандан ҳам, қирғоқ соқчиларидан ҳам қўрқмайди; қулоқ сол, бу — сувнинг шовиллаши эмас, мени алдаб бўпсан, бу — унинг узун эшкакларининг овози».

Хотин иргиб ўрнидан турди-да, нотинчлик билан йироқларга тикила бошлади.

«Довдирапясан, күр,— деди у,— ҳеч нарса кўринмайди-ку».

Йқорман, қайиққа ўхшаган бирон нарса кўринармик ин деб олисга шунча тикилиб қарасам ҳам, ҳеч нарса кўринмасди. Шу зайлда яна ўн минутча вақт ўтди, кейин бирдан тоғдай-тоғдай баланд тўлқинлар орасида бир қора нуқта кўринди, нуқта гоҳ катта бўлиб кўринарди, гоҳ яна кичрайиб кетарди. Қайиқ тўлқин устига се-кин-аста кўтарилауди-да, яна бирдан пастга учиб тушиб, қирғоқ томон яқинлашиб келарди. Бундай кечада йигирма чақиримча келадиган бўғоздан ўтишга ботинган қайиқчи жуда довюрак, уни бундай қилишга мажбур этган сабаб ҳам жуда муҳим бўлса керак! Шундай деб ўйларканман, юрагим гупиллаб уриб, кичкина қайиққа қараб турардим; аммо қайиқ худди ўрдакдай шўнғиб кетар, кейин худди қанот қоққандай, эшқакларини кўтариб яна кўпирис турган тўлқинлар орасидан чиқиб қоларди; мен, қайиқ келиб ўзини қирғоққа уради-ю, чилчил бўлиб синиб кетади деб ўйладим, бироқ у эпчиллик билан бир ёнга бурилди-да, кичкинагина бухтачага омон-эсон кириб олди. Қайиқдан ўрта бўйли, қўй терисидан тикилган татарча қалпоқ кийган бир киши чиқди-да, қўли билан имлаб буларни чақирди, учовлашиб қайиқдаги нарсаларни тушира бошладилар, юк шу қадар катта эдик, нега қайиқ чўкиб кетмаганига ҳали ҳам ажабланаман. Улар елкаларига биттадан тугун кўтариб, қирғоқ бўйлаб кетдилар-да, салдан кейин кўздан фойиб бўлдилар. Мен уйга қайтдим; аммо иқор бўлишим керакки, бу ажойиб нарсалар мени хавотирга солиб қўйган эди, зўрга тонг оттирдим.

Казагим уйғонди ва менинг кийинганимни кўриб ҳайрон бўлди; бироқ, унга бунинг сабабини айтмадим. Парча-парча булутлар сузиб юрган кўм-кўк осмонни, йироқдан бинафша ранг ҳошиядай кўриниб турган Қрим соҳилини, соҳилнинг орқасидаги баланд қояни, унинг тепасидаги маёқ минорасини деразадан бирпас тамоша қилиб турдим-да, комендантдан Геленжикка кетиш вақтимни билиб келай деб, Фанагория қалъасига жўнадим.

Афсус! Комендант қатъий бир нарса деёлмади. Пристанда турган кемаларнинг бариси ё соқчи кемалар, ё ҳали юклари ортилмаган савдо кемалари экан. «Балки,

уч-түрт кундан кейин почта кемаси келиб қолар, ўшанда бирор чора кўрармиз!»— деди комендант. Уйга жиғи-бийроним чиқиб қайтдим. Остонада казагим кутиб турар эди, юзида қўрқинч акс этарди.

— Иш чатоқ, жаноби олийлари!— деди у.

— Шундай, оғайни, қачон кетишнимизни худо билади!— Буни эшишиб, казагимнинг хавотирлиги баттар ошиб кетди, менга энгашиб туриб шивирлай бошлади. «Бу ер расво жой экан! Боя Қораденгизли урядникни учратдим; у менинг танишим, бултур отрядимизда хизмат қилган эди; мен унга тушган жойнимизни айтган эдим, у бирдан менга: «У ёмон жой, оғайни, одамлари ярамайди!..»— деб қолди. Ростданам, у қанақа кўр бола! Ҳар ерда ёлғиз юрса, бозорга ҳам ёлғиз борса, ионни ҳам, сувни ҳам ўзи ташиса... бу ердагилар унга ўрганиб қолганга ўхшайди».

— Ҳа, нима бўпти, ҳеч бўлмаса уй эгаси кўриндими?!

— Боя сиз ўйғингизда бир кампир қизи билан бирга келди.

«Қанақа қиз? Унинг қизи йўқ». «Қизи бўлмаса, худо билади, кими экан; ана, кампир шу топда уйда ўтирипти».

Мен кулбага кирдим. Гулдираб ёнаётган печкада овқат қайнамоқда, аммо назаримда, бу овқат камбағал оила учун анча қиммат кўринди. Кампирдан нима сўрамай, нуқул, қулоғим кар, эшифтмайди, деб жавоб бераверди. Нима қилиш мумкин? Ундан гап чиқавермаганидан кейин, печкага шоҳ ташлаб ўтирган кўр болага мурожаат қилдим. «Қани, айт-чи, кўр шайтон,— дедим қулоғидан чўзиб,— кечаси тугун кўтариб қаёққа бординг?» Бола йиғлаб юборди, оҳ-воҳ қилиб қичқира бошлади: «Қаёққа борибман?.. Ҳеч қаёққа борганим йўқ... Тугун билан? Қанақа тугун билан?» Бу сафар кампирнинг қулоғи очилиб: «Етимча болага тұхмат қилишнинг нима кераги бор! Нега унга азоб берасиз? Нима ёмонлик қилди сизга?!»— деб пўнгирлади. Бу гаплар жонимга тегди-да, бу сирларнинг калитини албатта топишга аҳд қилиб, уйдан чиқдим.

Буркамга ўраниб, девор тагида ётган харсангтошда олисларни тамоша қилиб ўтирдим; олдимда тунги бўрон қутуртирган бепоён денгиз ясланиб ётарди, унинг уйқуга кетувчи шаҳар шивир-шивирига ўхшаган бир хил шовқини ўтмиш йилларимни эслатди, хаёлимни шимол то-

монларга, совуқ пойтахтимизга олиб кетди. Чуқур хаёлга кетиб, ўзимни унугибман... Шу алғозда бир соатча, балки ундан ҳам күпроқ вақт ўтгандир... Бирдан қулоғимга ашулага ўхшаган бир нарса чалинди. Рост, у ҳақиқатан ҳам ашула эди, хотин кишининг қўнғироқдай овози эшитиларди, аммо қаердан келаяпти?.. Қулоқ солдим, ашуланинг оҳангি жуда ғалати туюлди: гоҳ чўзиқ ва ғамгин, гоҳ тез ва шўх эди. Атрофга қарасам — ҳеч зоғ кўринмади; яна қулоқ солдим, ашула худди осмондан эшитилаётгандай туюлди. Бошимни кўтариб қарасам: мен турган ўйнинг томида йўл-йўл кўйлакли, сочлари ёйилган бир қиз турипти, худди сув париси дейсиз. Қиз кафти билан кўзларини офтобдан пана қилиб, йироқларга тикилиб қаарди, гоҳ кулар ва ўз-ўзи билан гапиришар, гоҳ яна ашуласини айтарди,

Унинг бутун ашуласи эсимда:

Мовий денгиз кўксидা
Эркин-эркин осуда —
Оқ елканли кемалар
Қаторлашиб еларлар.
Шу кемалар ичидা
Бордир менинг қайиқчам,
Кўш эшкаги бор унинг,
Елкани бўлмаса ҳам.
Кўзғолгандা зўр шамол —
Эски кемалар дарҳол
Елканларин очади,
Ҳар томонга қочади.
Денгизга ёлвораман
Оҳиста товуш билан:
«Шафқатсиз денгиз, тегма,
Севикли қайиқчамга:
Чунки у олиб келар
Кимматбаҳо нарсалар,
Тунда уни довюрак
Бир баҳодир бошқарар»

Бирдан миямга, бу овоз кечаси эшитилган овозга ўхшайди-ку, деган фикр келди, бир нафас ўйланиб қолдим, кейин яна бошимни кўтариб қарасам, томда қиз йўқ эди. Бирдан у бошқа бир ашулани айтиб, ёнимдан югуриб ўтиб қолди ва бармоқларини қирсиллатиб, кампирнинг ёнига кирди, улар ўртасида баҳс бошланиб кетди. Кампирнинг жаҳли чиқар, қиз эса хахолаб куларди. Бир маҳалдан кейин менинг ундинам²³ яна сакраб-сакраб чиқди; олдимга келиб тўхтади-да, менинг шу ердалигимга

ажаблангандай, күзларимга тикилиб қаради; кейин бепарво қайрилиб, секин юриб пристан томонга кетди. Аммо воқеа бу билан тугамади; у кечгача уйим атрофида сакраб, ашула айтиб юрди. Жуда ғалати қиз! Башарасида жиннилик аломати күринмас эди; аксинча, күзлари менга жавдираб тикилиб-тикилиб боқарди, улар қандайдир жозибали кучга тұлғандай ва ҳар сафар менга қараганда: «Ха, нима демоқчисан!» деб турғандай туюларди. Бироқ, энди гап бошлашим билан қиз мұғамбираңа жилмайыб, қочиб кетарди...

Умримда бунақанги хотинни сира күрган әмасман. Уни айтарлы гүзәл деб бўлмасди, аммо гўзаллик ҳақида менинг бошқача фикрим бор. Унда наслдорлик аломатлари кўп эди... отлардаги наслдорлик сингари, хотинларда ҳам наслдорлик муҳим ўрин тутади; буни ёш Франция кашф этган; у, яъни ёш Франция әмас, балки наслдорлик, кўпинча қадам ташлашдан, қўл ва оёқдан билиниб турди; айниқса буруннинг аҳамияти катта. Россияда кичкина оёқдан кўра алифдай бурун камроқ учрайди. Менинг ашулачим кўп бўлса ўн саккизларда эди. Қадди-қоматининг ғоятда хипчалиги, фақат унинг ўзигагина хос бўлган бош эгиб туришлари, узун сарғиш соchlари, офтобда сал қорайган бўйин ва елкаларининг олтиндай товланиб туриши ва айниқса хушбичим бурни — буларнинг ҳаммаси мени ниҳоятда мафтун этди. Гарчи унинг менга зимдан боқишиларидан ваҳшийлик ва шубҳали нарсалар уқсам-да, гарчи унинг табассумларида нотайнинг бўлса-да, барибир хусусий фикрга эга бўлишнинг өқибати — шу қизнинг хушбичим бурнини кўриб, ҳузур-ҳаловатимни йўқотдим; мен, Гётенинг Минъонасини²⁴, яъни немисларга хос хаёлат асосида яратган сиймосини топдим деб ўйлабман; дарҳақиқат, улар бир-бирига жуда ўхшаш кетарди; ғоят зўр ҳаяжонланишдан бирдан сокин бир ҳолатга ўтиб қолиш, ўша тагдор гаплар, ўша сакраб юришлар, ўша ғалати қўшиқлар...

Кечки пайт қизни эшик олдида тўхтатиб, гапга солдим:

«Айт-чи, гўзалим,— деб сўрадим,— бугун томда нима қилиб юрувдинг?» «Шамол қайси томондан келаяти деб қарадим». «Буни нима қиласан?» «Шамол келган томондан баҳт ҳам келади». «Ажабо, баҳтни ашула билан чақирмоқчимидинг?» «Ашула бор жойда баҳт ҳам бор». «Ашула баҳтсизлик келтирса-чи?» «Келтирса ни-

ма қипти? Яхшилик бўлмаган жойда ёмонлик бўлади, аммо ёмонлик ёнида яхшилик ҳам бўлади». «Бу ашулани сенга ким ўргатди?» «Ҳеч ким, хоҳласам айтавераман, керак одам эшитади, керакмас одам тушунмайди». «Отинг нима, қўшиқчим?» «Отимни от қўйган одам билади». «Отингни ким қўйган?» «Мен қайдан билай?» «Жуда ичимдан топ экансан-ку! Аммо сенинг тўғрингда баъзи нарсаларни билиб олдим». Гўё гапимнинг унга сира алоқаси йўқдай, унинг юзида ҳеч нарса акс этмади, лабини ҳам қимирилатмади. «Кечак кечаси қирғоқ бўйига борганингни билиб олдим». Шундан кейин мен, ҳамма кўрган нарсаларимни унга бирма-бир айтиб бердим, буни эштиб хижолат бўлармикин десам, чурқ ҳам этмади! Овозининг борича хаҳолаб кулиб юборди. «Кўп кўрган бўлсангиз ҳам, оз билибсиз: билганингизни ичингида сақланг». «Коменданга маълум қилсан-чи!»— буни жуда жиддий чеҳра билан айтдим. Қиз бирдан ашула айтди-да, худди чакалакзордан ҳуркиб чиққан қушдай, сакраб-сакраб қочиб кетди. Кейинги гапларим ножӯя бўлди: айтилган гапнинг қандай оқибатга олиб келишини билмаган эканман, кейин анча пушаймон бўлишга тўғри келди.

Кеч кириб, қош қорайди, казакка чой қўйинши буюрдим-да, шам ёқиб, стол ёнида сафар трублакни чекиб ўтиредим. Энди икки стакан чой ичиб бўлувдим ҳамки, бирдан эшик фижирлади-ю, орқасидан нафис кўйлакнинг шитирлаши ва оёқ товуши эштилди; бир сесканиб, орқамга қарасам — менинг ўша ундинам! У секин рўпарамга келиб ўтириди-да, кўзларини менга тикди, нима учунлигини билмадим-у, аммо бу қараши, назаримда ниҳоятда латиф кўриниб кетди: бу боқиши ёшлик чоғларимда мени нари обориб, бери олиб келган боқишилардан бирини эслатди. Қиз худди мендан савол кутиб тургандай қараб ўтиради, аммо мен ўзим тушунолмаган ҳолда хижолат тортиб индамай ўтирадим. Қизнинг сал оқаринкираган юзи унинг руҳий ҳаяжонланишини кўрсатар эди; қўли стол устини мақсадсиз тимирскиларди: қўлининг титраётганини пайқадим, кўкраги гоҳ кўтарилилар, гоҳ нафас олмай тургандай бўларди. Бу майнавозчилик жонимга тега бошлади, сукунатни мен энг оддий гап билан, яъни унга бир стакан чой таклиф этиш билан бузмоқчи бўлиб турувдим, бирдан қиз лип этиб ўрнидан турди-да, бўйнимдан қаттиқ қучоқлади, нам, оташин бир

ўпиш лабларимда чўпиллади. Кўзларим тиниб, бошим айланиб кетди, йигитлик эҳтиросининг барча шиддати билан бағримга босиб сиққан эдим, қиз қучогимдан худди илондай сурғилиб чиқиб, қулоғимга: «Бугун кечаси, ҳамма ухлаганда, денгиз бўйига чиқ»,— деб шивирладида, уйдан лип этиб чиқиб кетди. У даҳлизда чойнакни ва ерда турган шамни ағдариб кетди. «Вой шайтон қиз-еъ», деб бақирди, қолган чойга умид боғлаб похолда ётган казак. Шундан кейингина ўзимга келибман.

Икки соатлардан кейин, бутун пристанни жимлик босгач, казагимни уйғотдим. «Тўппончадан ўқ узганимни эшитсांг, денгиз бўйига югур»,— дедим унга. Казак кўзларини бақрайтириб, ихтиёrsиз: «Бош устига, жаноби олийлари!» деб жавоб берди. Белимга пистолет қистириб чиқдим. Қиз мени пастга тушадиган жойда кутиб турган экан; устидаги кийими енгилгина, белига кичкина рўмолча боғлаб олган эди.

«Кетимдан юринг!» деди у қўлимдан ушлаб, иккимиз пастга туша бошладик. Бўйним остимда қолмаганига ҳайронман; пастга тушиб ўнгга бурилдик-да, кеча кечаси мен кўр боланинг кетидан борган йўлдан кетдик. Ҳали ой чиқмаганди, фақат икки дона юлдуз худди нажоткор икки маёқдай, тим қоронғи осмонда чақнаб турарди. Бир текисда бир-бирининг устига бостириб келувчи катта-катта тўлқинлар қирғоқ бўйида турган ёлғиз қайиқни кўтариб-кўтариб ташларди. «Қайиқقا тушамиз»,— деди ҳамроҳим. Мен иккиланиб қолдим — денгизда ҳиссий саёҳат қилишга ҳавасим йўқ эди, аммо қайтишнинг ҳам вақти эмасди. Қиз қайиқка сакраб тушди, кетидан мен ҳам тушдим, бир маҳал ўзимга келиб қарасам, бир пасда сузиб ҳам кетибмиз. «Бу нима қилганинг?»— дедим. жаҳлим чиқиб. «Бу мен сени севаман деганим бўлади»,— деди у, мени скамейкага ўтқазиб, белимдан қуҷоқлар экан; юзини юзимга қўйиб ўтирди, унинг ўтдай нафаси юзимга уриб турарди. Қайиқдан бир нарса шалоп этиб сувга тушиб кетди, белимни ушлаб қарасам — тўппончам йўқ. Бирдан кўнглимда даҳшатли шубҳа туғилди. Қон бошимга урилди! Орқамга қарасам — қирғоқдан эллик саржинча нарига бориб қолибмиз, мен эса сузишни билмайман! Қизни итариб юборай десам, кийимларимга худди мушукдай ёпишиб олди, шу онда қайиқقا даҳшатли бир зарба тегди, денгизга ағдарилиб тушишимга сал қолди. Қайиқ чайқала бошлади, аммо

мен ўзимни ўнглаб олдим, ўртамизда қаттиқ кураш бошланди; ғазабим кучимга куч құшди, аммо душманимнинг мендан анча әпчил эканини сездим... «Нима қилмоқчи-сан?»— деб бақирдим, кичкина құлларини қаттиқ қисиб; унинг бармоқлари қирсиллаб кетди, аммо шундай бўлса ҳам чурқ этмади; унинг илон табиати бу синовга ҳам бардош берди.

«Сен кўрибсан, энди бориб айтасан!»— деб жавоб берди қиз ва ғайри табиий куч билан мени қайиқнинг четига йиқитди; иккимиз ҳам белимизгача сувга осилиб турибмиз; унинг соchlари сувга тегиб турарди; жуда қалтис бир пайт эди. Тиззами қайиқнинг остига тираб бир қўлим билан сочидан, бир қўлим билан ҳалқумидан ушлаб олган эдим, кийимимни қўйиб юборди, шу ондаёқ мен уни тўлқинлар ичига улоқтирдим.

Тун анча қоронгилашиб қолганди; денгиз кўпиклари ичидан бир-икки марта боши кўринди-ю, кейин кўздан ғойиб бўлди...

Қайиқ тагидан яримта эски эшкак топдим, кўп маشاқатлардан сўнг бир амаллаб пристанга аранг етиб олдим. Қирғоқ бўйлаб қайтиб келарканман, кеча кечаси кўр бола билан қиз тунги қайиқчини пойлаб ўтирган томонга беихтиёр кўз ташлаб қўярдим; осмонда ой сузиб юради, назаримда, қирғоқ бўйида оқ кийинган бир одам ўтиргандай туюлди; унинг кимлигини билишга қизиқиб, аста-секин бордим-да, баланд қирғоқ тепасидаги майса орасида писиб ётдим; бошимни кўтариб қарасам, пастьда бўлаётган ҳамма нарса бемалол кўринарди, сув парими кўриб ажабланмадим, балки, деярли хурсанд ҳам бўлдим. Қиз узун соchlаридан сувни сиқар эди; ҳўл кўйлаги ингичка нозик қадди-қоматига ва баланд кўкракларига ёпишиб, уларни яққол кўрсатиб турарди. Бир-пастдан кейин йироқдан қайиқ кўринди, у тезда қирғоқ-қа етиб келди; кечаги сафаргидек, қайиқдан татарча қалпоқ кийган бир киши тушди, аммо, соchlари казакча қилиб қирқилган, камарига каттакон пичноқ қистирилган эди. «Янко, ишимиз чатоқ!»— деди қиз. Сўнгра улар шу қадар секин гапириша бошладиларки, ҳеч нарса эшита олмадим. «Кўр қани?»— деди ахири Янко, овозини кўтариб.— «Мен уни юбордим»,— деган жавоб эшитилди. Бир неча минутдан кейин кўр бола қоп орқалаб келди, қопни қайиқقا жойлашди.

«Менга қара, кўр!— деди Янко,— анови жойга кўз-

қулоқ бўлиб тур... Биласан-ку? У ерда қимматбаҳо моллар бор... айтиб қўй (кимгалигини эшитолмай қолдим), сен билан ортиқ ишламас эмиш де: ишимизнинг мазаси қочди, мен энди қайтиб келмайман, энди ишлаш хавфли бўлиб қолди; бошқа жойга бориб иш қидирмасам бўлмайди, аммо у мендай жасур одамни тополмайди. Янко, хизматимга яраша яхши ҳақ тўлаганда кетмасдим деб айтди, дегин; мен ҳар ерда йўлимни топиб кетаман, шамол фириллаб, денгиз шовиллайдиган жойда ишимни тўғрилаб кетавераман!». Бирпас жим тургач, Янко яна давом этди: «Бу мен билан бирга кетади; бу ерда қололмайди; кампирга бориб энди жуда қариб қолдинг, энди ўлсанг ҳам бўлади, инсоф ҳам бўлиши керак-да, деб айт. Биз энди қайтиб келмаймиз».

«Мен-чи?»— деди кўр ҳазин товуш билан.

«Сени бошимга ураманми?»— деган жавоб эшитилди.

Шу орада менинг ундинам қайиққа сакраб тушди-да, йўлдошига қўл силкитди; йўлдоши кўрнинг қўлига бир нарса бериб: «Ma, ширин кулча олиб ейсан»,— деди. «Атиги шуми?»— деди кўр. «Ma, бўлмаса, буни ҳам ол»,— тошга тушган танга жаранглаб кетди. Кўр уни олмади. Янко қайиққа тушди: шамол қирғоқ томондан уради, улар кичкина елканни кўтаришди-да, елдай сузуб кетишиди. Қоп-қора тўлқинлар орқасидан елкан ой ёруғида анчагача милтираб кўриниб турди; кўр ҳамон денгиз лабида ўтиради, қулоғимга худди ҳўнграшга ўхшаш товуш эшитилгандай бўлди; чиндан ҳам кўр бола анча вақтгача ҳўнграб йиглаб ўтириди... Юрагим ачишиб кетди. Нима учун тақдир мени ҳалол контрабандист²⁵-ларнинг тинчгина муҳитига ирғитди экан, деб ўйладим. Худди тип-тинч булоққа ташланган тошдай, уларнинг тинчлигини буздим, ўзим ҳам тошдай чўкиб кетаёздим!

Уйга қайтдим. Даҳлизда ёғоч ликопчага кўндирилган шам ёниб бўлаёзган эди, казагим, тайнинлаб кетишимга қарамасдан, милтигини икки қўллаб ушлаган ҳолда қотиб ухларди. Унга тегмадим-да, шамни олиб, ичкарига кирдим. Ҳайҳот! Сандиқчам, кумуш сопли қиличим, бир ўртоғим совға қилган доғистон ханжарим — бари йўқолган эди. Лаънати кўрнинг қайиққа нима орқалаб борганини энди билдим. Қазакни қаттиқ туртиб уйғотдим, ўлгудек сўкдим, жаҳлим чиқди, аммо бундан нима фойда! Бошлиқларга бориб, кўр бола нарсаларимни ўғирлаб

кетди, ўзимни ўн саккиз яшар бир қиз сувга ғарқ қилиб юбормоқчи бўлди, деб арз қилиш уят бўлмасмиди? Худога шукурки, эрталаб жўнаб кетиш имкони туғилди, Тамандан кетдим. Қампир билан бечора кўрнинг тақдири нима бўлди, билмайман. Одамларнинг шодлиги билан, қайфу-аламлари билан менинг — пошшолик ишлари билан сафарларда юрувчи бир офицернинг қанчалик иши бўлсин!..

Биринчи бўлимнинг охири

ИККИНЧИ БҮЛİM

(Печорин журналининг охири)

II

Княжна Мери

II- мац

Кечаки Пятигорскка келдим, шаҳарнинг чеккасидаги энг баланд жойдан, Маъшуқ тоғининг этагидан квартира ижара олдим; момақалдироқ бўлганда, булатлар уйимнинг томигача тушиб турарди. Бугун эрталаб соат бешда деразани очиб юборган эдим, уй олдидаги кичкина боғчада ўсиб ётган гулларнинг иси бутун уйни тўлдириди. Барқ уриб гуллаган гилос шохлари деразамдан мўралаб турди, баъзан шамол ёзув столимга гилос гулларини сочиб кетади. Уч тарафим фоят гўзал манзара. Кунботар томонда худди «Тинган бўроннинг сўнгги булат парчаси»²⁶ дай беш чўққили Бештов кўм-кўк бўлиб кўриниб турди; шимол томонда худди эронийларнинг паҳмоқ қалпогидай кўтарилиб турган Маъшуқ тоғи осмоннинг ўша қисмини тўсиб турди; кунчиқар томон ундан ҳам гўзал; пастликда, худди уйимнинг рўпарасида топ-тоза, яп-янги шаҳарча ранг-баранг товланиб ётади, шифобахш булоқлар шилдирайди, ҳар хил тилда гапирувчи одамларнинг ғовур-ғувури эшитилиб турди,— ундан нарида мовий ва туманли тоғлар бир-биридан юксалиб боради, уфқ четида эса Қазбекдан бошланиб, то қўш чўққили Эльбрус тоғи билан туговчи кумушдай қорли тоғлар тизмаси чўзилиб ётади... Шундай жойда яшаш нақадар роҳат! Томирларимда қандайдир севинчли туйғулар оқади. Бу ернинг ҳавоси худди гўдак бўсасидай пок ва бегубор: офтоб порлайди, осмон кўм-кўк нилдай — бундан ортиқ яна нима керак? Эҳтирос, истак ва қайғуришларга ўрин борми?.. Бироқ, вақт бўлди. Елизавета булогига борай, чунки барча сувга келганлар ҳар куни эрталаб ўша ерга тўплланар эмиш.

Шаҳар марказигача тушиб, бульвар бўйлаб кетдим, бу ерда секин тоққа чиқиб борувчи бир неча ғамгин тўдаларни учратдим: уларнинг аксари қисми помешчикларнинг оилалари эди; буни эркакларнинг сузилиб кетган, эски модада тикилган сюртукларидан, хотин-қиз-

ларнинг эса зийнатли кийимларидан дарҳол пайқаш мумкин эди; улар сув шифосига келган ёшларнинг ҳаммасини яхши билишса керак, чунки менга жуда қизиқсиниб қарар әдилар: менинг петербургча тиктирган сюртугим уларни янглиштириди, бироқ аскарий эполетларимни кўриб, нафрат билан юзларини ўгирниб олишди.

Маҳаллий маъмурларнинг хотинлари, яъни шифобахш сувларнинг эгалари улардан кўра илтифотлироқ әдилар; уларда лорнетлар бор, улар мундирга камроқ аҳамият беришди, улар Кавказда номерли тугма остида оташин қалб, оқ фуражка тагида ақл борлигига ўрганиб қолишган. Бу аёллар жуда дилкаш, узоқ вақтгача дилкаш бўладилар. Уларнинг жазманлари ҳар йили янгилашиб туради, балки уларнинг сўнмас дилкашликларининг сири ҳам шундадир. Тор сўқмоқ йўлдан Елизавета булогига чиқиб бораётуб, бир тўда гражданча ва ҳарбийча кийинган эркаклардан ўтиб кетдим, кейин билсам, улар сув давосига ҳавас қилиб келганлар орасида алоҳида бир тоифа экан. Улар ичишаркан, аммо сув эмас: онда-сонда сайр қилишаркан, хотин-қизларга ҳам тўғри келиб қолгандагина эргашишаркан, нуқул қимор ўйнашаркан ва зеркишдан нолишаркан. Улар ўтакетган олифта одамлар: тўр билан қопланган стаканларини кислород сувли қудуққа ботирган чоғда кеккайиб туришади; гражданлар оч ҳаво ранг галстук тақишидаи, ҳарбийлар эса ёқаларини чиқариб юришади. Уларнинг ҳаммаси оддий ҳамда провинциал уйларга нафрат билан қарайдилар ва пойттахтнинг аристократ меҳмонхоналари доғида юрадилар, аммо уларни у ерга киритмайдилар.

Ниҳоят қудуққа ҳам етдим... Қудуқ ёнидаги майдончага кичкинагина уйча, қизил томли ваннахона, ундан сал нарига эса галерея қурилган, ёғингарчилик вақтларида одамлар шу ерда сайр қиласидилар. Скамейкада бир неча ярадор офицерлар қўлтиқтаёқларини йиғишириб ўтирадилар, уларнинг юзлари сўлгин ва ғамгин. Бир неча хонимлар сувнинг таъсирини кутиб, майдончада у ёқдан-бу ёққа тез-тез юриб туради. Улар ичида бир-иккита чиройиллари ҳам бор эди. Маъшуқ ёнбағирларини қоплаган ишкомлар ичида баъзан жазмани билан танҳо кезишини яхши кўрувчи хонимларнинг ранг-баранг шляпалари кўриниб қоларди, чунки бундай шляпа ёнида албатта ё ҳарбийча фуражка, ё бўлмаса кўримсиз думалоқ шляпа кўриниб қоларди. Эола арфаси²⁷ деб атал-

миш павильон қурилган тик қоя тепасида манзара иш-қивозлари телескоп билан Эльбрусни томоша қилиб туришарди, улар орасида ширинча касалидан шифолаш учун олиб келингган болаларни етаклаган икки мураббий ҳам бор эди.

Үпкам шишиб, тоғ этагида түхтадим, бир уйнинг бурчагига суюниб, теварак-атрофдаги гўзал манзарани томоша қилиб турган эдим, бирдан орқамдан:

— Печорин! Қачон келдинг? — деган таниш овозни эшитиб қолдим.

Қайрилиб қарадим: Грушницкий! Қучоқлашиб кўришдик. У билан ҳаракатдаги отрядда танишган эдим. У оёғидан ўқ еб, сув шифосига мендан бир ҳафтача илгари келган эди.

Грушницкий — юнкер, Ҳарбий хизматга кирганига атиги бир йил бўлган, ўзига хос олифтагарчилик билан солдатлар киядиган қалин шинель кийиб юради. Солдатларга бериладиган Георгий крести ҳам бор. Қаддиқомати келингган, қорачадан келган, соchlари ҳам қора; ёши 21 га етмаган бўлса-да, афтига қараб 25 ларда деб ўйлаш мумкин. Гапирганда бошини орқага ташлаб гапиради, ўнг қўли билан қўлтиқтаёққа суюниб тургани учун, чап қўли билан минут сайин мўйловларини бурайди. Гапирганда тез ва ҳашамдор қилиб гапиради; у, ҳар бир ҳодисага тантанали жавоблар ҳозирлаб қўювчи, содда, гўзал нарсалар ҳам таъсир этмайдиган, ўзларини фавқулодда туйғулар ва юксак ҳисларга тўлган, мислсиз азоблар чекиб юрган одам қилиб кўрсатишни яхши кўрувчилар тоифасидан. Бирорни қойил қолдириш уларга завқ беради; улар провинцияли романтик хонимларга ўлардек ёқадилар. Улар қариганларида ё мўмин-қобил помешчик бўлишади, ё бўлмаса пияниста, баъзан у ҳам, бу ҳам бўлишади. Уларнинг дилида яхши ҳислар кўп бўлади, аммо поэзиядан тариқча ҳам бўлмайди. Грушницкий ҳамма нарсадан кўра гап сотишни яхши кўради: гап оддий мавзулар доирасидан ташқари чиқдими, бўлди, гапиравериб миянгизни қоқиб қўлингизга беради; мен у билан сира баҳслаша олмасдим. У сизнинг эътиrozларингизга жавоб ҳам бермайди, гапингизни ҳам эшиitmайди. Гапириб бўлишингиз биланоқ узундан-узоқ гапириб кетади, унинг гапи ҳозир сиз айтиб турган гапларга алоқаси бордай кўринса-да, аслида ўзининг боя бошлаб қўйган гапининг давоми бўлиб чиқади.

Тили анча бийрон: эпиграмма²⁸лари күпинча қизиқ бўлади-ю, аммо ҳеч нишонга бориб тегмайди ва узиб ололмайди; у бир сўз билан ҳеч кимни ўлдира олмайди; у одамларни, уларнинг заиф жойларини билмайди, чунки бутун умрини ўзига бино қўйишга сарфлаган. Унинг бутун фикри-зикри — роман қаҳрамони бўлиш. Ўзининг бу дунё учун яратилмагани, аллақандай сирли жафоларга дучор бўлиб юргани тўғрисида бошқаларни ишонтиришга уринавериб охири ўзи ҳам шунга ишонаётган. Шунинг учун ҳам солдатча қалин шинелини кибр билан кийиб юради. Мен унинг бунақалигини пайқаб қолдим, шунинг учун ҳам, қалин дўстдай бўлиб кўринишимизга қарамай, у мени ёмон кўради. Грушницкий жасурликда ном чиқарган, мен буни амалда кўрганман; у қўлида қилич ўйнатиб, ҳайқириб, кўзларини чирт юмиб олдинга отиласди. Аммо бу — русларга хос жасорат эмас!..

Мен ҳам уни ёқтирмайман: бир кунмас-бир кун тор бир йўлда учрашиб қолишимизни ва иккимиздан бири-мизнинг бошимизни ейишимизни сезиб юраман.

Кавказга келишининг сабаби ҳам унинг романтик хаёлпарастлигида; имоним комил: отасининг қишлоғидан жўнаб кетиш олдида ўзини қайғули қилиб кўрсатиб, биронта чиройликкина қўшни қизга «мен армияга хизмат важидан эмас, балки ўлим ахтариб кетаётиман...» деган ва гапнинг шу ерига келганда кўзларини қўли билан беркитиб: «Йўқ, сиз (ёки сен) буни билмаслигингиз керак. Сизнинг пок дилингиз титраб кетади! Билиб ҳам нима қилардингиз! Мен сизга ким эдимки... Дардимга тушуна олармидингиз?..» ва ҳоказолар дегани аниқ.

У, К. полкига киришимнинг сабабини ўзим биламан-у, худо билади, дер эди.

Аммо Грушницкий юзидағи жафокашлик ниқобини олиб ташлаган пайтларда жуда хушфеъл ва мулојим йигит бўлади. Уни хотинлар ёнида бўлганини кўрсам жуда мароқланаман: роса ўлиб-тирилса керак!

Биз эски қадрдонлардек кўришдик. Мен ундан сув шифосига келганларнинг юриш-туришлари ва диққатга лойиқ одамлар ҳақида сўрай бошладим.

— Соддагина ҳаёт кечирамиз,— деди у хўрсиниб,— эрталаб сув ичувчилар ҳамма касаллар сингари хомуш, кечқурун вино ичувчилар эса ҳамма соғлом одамлар сингари bemаза ва бетамиз бўлиб кетадилар. Хотинлар



жамияти бор, аммо улардан фойда кам: улар нуқул вист²⁹ ўйнашгани-ўйнашган, хунук кийинишади, француз тилини бузиб гапиришади. Бу йил Москвадан фақат княгина Лиговская билан қизи келган; лекин мен улар билан таниш эмасман, устимдаги мана бу солдатча ши-нелим лаънат тамғасига ўхшайди. Шинељим дилларда қўзғатган ачиниш ҳисси эса менга берилган садақага ўхшайди.

Шу пайт ёнимиздан қудуқ томонга икки хотин ўтди: бирин кексароқ, иккинчиси — ёшгина, қадди-қомати анча келишгандигина. Юзларини шляпа сояронлари тўсиб тургани сабабли яхши кўролмадим, аммо кийимлари олижаноб, дид билан тикилган, ортиқча ҳеч нима йўқ, бежиримгина эди. Уларнинг кичиги енг ва ёқаларни берк gris de perles³⁰ кийган, нозик бўйнида шаффоф шойи рўмол ҳилпилларди, couleur russe³¹ ботинкалари нозиккина оёқларининг тўпиқларини шундай чиройли сиқиб турардики, ҳатто гўзалликнинг нималигини билмаган одам ҳам кўрганда ҳайратланиб «оҳ» деб қоларди. Унинг енгилгина, аммо виқор билан ташлаган қадамларида ифратли қизларгагина хос бир нарса акс этарди, буни сира таърифлаб бўлмайди-ю, аммо кўрган одам дарров пайқайди. Ёнимиздан ўтиб кетаётганида атрофга таърифлаб бўлмайдиган даражада ёқимли бўй тараалдик, одатда жононлар ёзган мактубларидан шундай ҳид келиб туради.

— Княгина Лиговская деганим шу,— деди Грушницкий,— ёнидагиси қизи Мери. Онаси қизига инглизларга тақлид қилиб шундай от қўйган, уларнинг келганига атиги уч кун бўлди.

— Ие, дарровдан отини ҳам билиб олибсан-а!

— Ҳа, тасодифан эшитиб қолдим,— деди Грушницкий қизарип.— Аммо, ростини айтсам, улар билан танишмоқчи эмасман. Бу мағрур зотлар биз ҳарбийларга худди ваҳшийларга қарагандай қарашади. Номерли фуражка остида ақл, қалин шинель остида қалб бор-йўқлиги билан уларнинг нима ишлари бор?

— Бечора шинель,— дедим мен кулиб,— уларнинг ёнига келиб мулоғимат билан стакан тутаётган киши ким?

— О! Раевич деган москвали олифта! Қиморвоз: ҳаво ранг желеткасида осилиб турган каттакон тилла занжиридан маълум. Қўлидаги йўғон ҳассасини айтмай-

санми, худди Робинзон Крузонинг ҳассасига ўхшайди!
Соқоли ҳам, тараниши ҳам á la moujír³²,

— Нима бало, бутун одамзодга қарши ғазаблангац-
мисан дейман?

— Сабаби бор-да...

— Йўғ-е, ҳали шундай дегин?

Шу орада хотинлар қудуқдан қайтиб, бизга яқинлаш-
дилар. Грушницкий қўлтиқтаёфини ушлаб, драматик
ҳолатда туриб олди-да, овозини баланд қилиб, менга
французча жавоб берди:

—Mon cher, je hais les hommes pour ne pas les
mèpriser, car autrement la vie serait une farce trop dégoûtante³³.

Кўҳликкина княжна қайрилиб қаради-да, гапиравчи-
га узоқ ва мароқли назар ташлади. Бу боқишинг маъ-
носини билиш жуда қийин эди, аммо уни истеҳзоли
қараш деб бўлмасди, шунинг учун Грушницкийни ичим-
да табриклаб қўйдим.

— Княжна Мери деганинг жуда танноз экан,— де-
дим мен унга.— Кўзлари бахмалдай экан, худди бахмал-
нинг ўзи дейсан; унинг кўзлари ҳақида гапирганингда
шу иборани ишлатгин демоқчиман: пастки ва юқориги
киприклари шу қадар узунки, қуёш нурлари кўз қора-
чиғида акс этмас экан. Мен шунаقا ялтирамайдиган
кўзларни яхши кўраман; улар шу қадар майнинки, худди
сени силаб-сийпаб тургандай бўлади. Аммо унинг чеҳ-
расида чиройли нарса шугинага ўхшайди... Қалай, тиши-
лари оппоқинами? Бу жуда муҳим нарса. Аттанг,
сенинг бояги ҳашаматли сўзингга бир жилмайиб қўйма-
ди-да.

— Чиройликкина хотин тўғрисида худди инглиз оти
тўғрисида гапиргандай гапирасан-а,— деди Грушницкий
ғазабланиб.

— Mon cher,—деб жавоб бердим мен, унинг төву-
шига ҳамоҳанг бўлишга тиришиб,— Je mèprise les
femmes pour ne pas les aimer, caraurement la vie serait
un mèlodrame trop ridicule³⁴.

Мен ўгирилиб, унинг ёнидан кетдим. Ишкомлар, оҳак-
тошли қоялар ва уларда ўсиб ётган буталар орасида
ярим соатча сайр қилиб юрдим. Кун қизий бошлиши би-
лан уйга қайтиб кетдим. Минерал сувли булоқ ёнидан
ўтаётуб, усти ёпиқ галереяда нафасимни ростламоқчи
бўлиб тўхтаган эдим, беихтиёр жуда қизиқ бир ҳодиса-

ининг гувоҳи бўлдим. Бу манзаранинг иштирокчилари мана бундай вазиятда эдилар. Княгиня билан москвалик олифта ёпиқ галереяда ўтирас эдилар, афтидан икковилари бир нарса тўғрисида жиддий сұхбатлашмоқда эдилар. Княжна сўнгги стакан сувни ичиб бўлган бўлса керак, хаёлга чўмиб қудуқ атрофида айланиб юрарди, Грушницкий эса қудуқнинг ёнгинасида турарди; майдончада бошқа ҳеч ким йўқ эди.

Мен яқинроқ бориб, секин галереянинг бурчагига беркиниб турдим. Шу замон Грушницкий қўлидаги стаканни қумга тушириб юборди, энгашиб олмоқчи бўлди-ю, аммо оёғи майиблиги сабабли энгашолмасди. Шўринг қурғур қўлтиқтаёғига таяниб шунча уринса ҳам беҳуда эди. Унинг маънодор юзи ҳақиқатан ҳам азобни ифода этарди.

Бунинг ҳаммасини княжна Мери мендан кўра яхшироқ кўриб турарди.

У Грушницкийнинг ёнига худди қушдай учиб келдида, энгашиб стаканни ердан олди-ю, сира таърифлаб бўлмайдиган гўзал тан ҳаракати билан унга узатди; сўнгра қип-қизариб, галерея томонга қаради, онасининг ҳеч нарса кўрмаганини пайқаб, дарров ўзини ўнглаб олди. Грушницкий ташаккур билдириш учун оғзини очганда, у анча нарига кетиб қолганди. Бирпастдан сўнг онаси ва олифта киши билан бирга галереядан чиқди, бироқ Грушницкийнинг ёнидан шу қадар кибр-ҳаво билан ўтдики, ҳатто унга қайрилиб ҳам қарамади, унинг эҳтиросли боқишларига назар ҳам солмади, ҳолбуки Грушницкий, у тепаликдан тушиб, бульвардаги аргувон дараҳтлари орасида кўздан йўқолгунча кетидан қараб турар эди... Бироқ, бирпастдан кейин княжнанинг шляпаси кўчанинг нариги бетида яна бир бор ялт этиб қўринди-ю, сўнг Пятигорскдаги энг данғиллама иморатлардан бирининг дарвозасига кириб кетди. Унинг кетидан княгиня ҳам кира туриб, Раевич билан хайрлашди.

Шундан кейингина эҳтиросли юнкер бечора мени кўриб қолди.

— Кўрдингми? — деди у, қўлимни қаттиқ қисиб.— Малак дейсан, малак.

— Нимаси малак? — деб сўрадим мен, ўзимни соддаликка солиб.

— Кўрмадингми?

— Йўқ, кўрдим, стаканингни ердан олиб берди. Ўша

вақтда қоровул турганда, у ҳам олиб берган бўларди, ароқ пули чиқармикин деб, қайтангга тезроқ олиб берган бўларди. Ҳа, нимасини айтасан, унинг сенга ачиниши равшан: ўқ еган оёғингни босганингда башарангни шу қадар буриштирдингки...

— Уша онда юзида қалбининг жилваланганини кўриб ҳеч таъсирланмадингми?

— Йўқ.

Мен ёлғон гапирдим: унинг жигига тегмоқчи эдим. Менинг қайсарагим ўзим билан бир кунда туғилган бўлса керак; бутун умрим қалбимга ёки ақлимга қарши қайгули ва муваффақиятсиз қайсараглик қилиш билан ўтди. Ёнимда бирон серғайрат ва жўшқин одамни кўрсам худди устимдан бир челак сув қуйилгандай бўламан, аксинча, бирон ланж одам билан тез-тез учрашиб турсам, балки эҳтиросли хаёлпараст бўлиб кетармидим. Яна шуни ҳам эътироф этаманки, шу он кўнглимни ўзимга таниш, аммо қандайдир ҳунук билан ҳис чERTIB ўтди, бу ҳис ҳасад эди: мен «ҳасад» сўзини дадил айтибман, чунки ҳар нарсани эътироф қилишга ўзимни ўргатиб олганман; бирон гўзалга кўнгил қўйган йигит ўша хотиннинг бошқа билан бўлмаган кишига майл кўрсатганини кўриб қолса (албатта, йигит олий жамиятда яшаб, ўз иззат-нафсини эркалааб ўстирган бўлса), бунга чидаб туролмайди ва чидайдиган одам бўлмаса ҳам керак.

Грушницкий иккимиз индамасдан пастликка тушдикда, бульвардан юриб, гўзалимиз кириб кетган уй деразалари ёнидан ўтдик. У дераза олдида ўтирган экан. Грушницкий енгимдан ушлаб тортди-да, хотинларга камдан-кам таъсир қиласидиган хумор назарлардан бирини ташлади. Мен княжнага лорнет билан қараган эдим, унинг Грушницкийнинг боқишига жилмайиб қараб турганини, менинг лорнет билан қарашимдан жуда жаҳли чиқиб кетганини кўрдим. Дарҳақиқат, Кавказ армиясида хизмат қилувчи оддий бир кишининг москвалик княжнага ойна орқали қарашга қандай ҳадди сигади?..

13- май

Бугун эрталаб уйимга доктор келди; унинг фамилияси Вернер бўлса ҳам, ўзи рус. Бунинг қандай ажабланадиган жойи бор? Мен Иванов фамилияли бир немисни билардим.

Вернер кўп жиҳатдан ажойиб одам. У ҳамма медиклар сингари скептик³⁵ ва материалист³⁶, шу билан бирга шоир ҳам, шоир бўлганда ҳам жиддий шоир — гарчи умрида бир мисра шеър ёзмаган бўлса-да, ўз ишида ҳар вақт, сўзда эса кўп вақт шоир. Мурда томирларини қанча ўргансалар, инсон қалбининг ҳамма торларини ҳам у шунчалик ўрганиб олган, аммо у, ўзининг бу билганларидан сира фойдалана олмас эди; ахир, баъзан жуда уста анатомия олими ҳам оддий безгакни тузата олмайди-ку! Одатда, Вернер ўзи даволайдиган касаллар устидан мийифида кулиб юради; аммо бир марта, жон берадётган солдат тепасида йиглаб ўтирганини ўз кўзим билан кўрганман... Узи камбағал эди, миллион-миллион бойликларни хаёл қилиб юради-ю, аммо пул топиш йўлида қўлни қўлга урмас эди; бир куни менга, дўстдан кўра душманга яхшилик қилганим яхши, чунки дўстга яхшилик қилиш хайр-садақа қилиш билан баравар, аммо душман қанчалик олийжаноб бўлса, нафратинг ҳам шунча ошади, деди. Унинг тили жуда заҳарли эди: у кўпгина туппа-тузук одамлар ҳақида эпиграммалар тўқиб, уларни расво қиласади. Унинг рақиблари, яъни сувларда даволовчи ҳасадчи медиклар, у ўз касалларини карикатура қиласмиш деган гап тарқатишган экан, касаллар хафа бўлиб деярли ҳаммаси ундан воз кечипти. Унинг дўстлари, яъни Қавказда хизмат қилувчи деярли барча виждонли кишилар унинг обрўсини яна кўтаришга шунча уринишса ҳам иложи бўлмади.

Унинг ташқи қиёфаси биринчи кўришда одамга ёқмас эди, аммо кейинчалик, унинг хунук юзида кўп синаланган ва олийжаноб руҳий куч ифодаси акс этганини кўргач, одамга жуда ёқиб қолар эди. Хотинларнинг бундай кишиларнинг эс-ҳушдан ажralгундай яхши кўришлари ва уларнинг хунуклигини энг гўзал, энг нозик кишиларнинг чиройига ҳам алишмаслик каби ҳоллар кўп бўлган; хотинларга ҳам тан бериш керак: уларда руҳий гўзалликни сезувчи туйғу бор; шунинг учун Вернерга ўхшаган одамлар хотинларни шу қадар зўр эҳтирос билан севса керак.

Вернер пакана ва худди ёш боладай озғин ва нимжон эди; Байроннинг оёғига ўхшаб бир оёғи сал калтароқ эди; калласи бўйига нисбатан жуда катта кўринарди; сочини калта қирқтиарди, шунинг учун бош суюгининг очилиб қолган ўнқир-чўнқирларини френолог³⁷ кўрса

ҳайратда қоларди. Унинг ҳамиша жавдираб турган қопқора ва кичкина кўзлари дилингиздаги ҳамма нарсани билишга ошиққандай кўринарди. Кийим танлашда диди борлиги кўзга ташланарди: ортиқ пайлари кўриниб турган кичкина қўлларидан оч-сариқ қўлқоп сира тушмасди. Ҳамиша қора сюртук, қора галстук ва қора желетка кийгувчи эди. Ёш-яланглар уни Мефистофель³⁸ деб атарди. Вернер бундан жаҳли чиққандай бўларди-ю, аммо аслида бу гап унинг иззат-нафсини қондирарди. Биз бирпасда бир-биrimiz билан топишиб, ошна бўлиб олдик, чунки менда дўстликка мойиллик йўқ: гарчи икки дўст бир-бирига иқрор бўлмаса-да, бири иккинчисининг қули бўлиб қолади; мен қул бўла олмайман, аммо бировга амр бериш ҳам ниҳоятда малолли иш, чунки амр бериш билан бирга алдаш ҳам керак бўлади, ундан ташқари, ўзимнинг малайларим ҳам бор, пулим ҳам бор! Бизнинг ошна бўлишимизнинг тарихи бундай бўлди: мен Вернерни С. да, бир талай ҳушчақчақ ёшлар орасида учратдим; ўтиришнинг охири гап метафизик фалсафа³⁹ устида кетди; эътиқод ҳақида сўз борди; ҳар кимнинг эътиқоди ҳар турли эди.

— Мен эса фақат бир нарсағагина эътиқод қиламан...— деди доктор.

— Нимага?— дедим мен, шу маҳалгача индамай ўтирган бу кишининг фикрини билиш мақсадида.

— Бир кунмас-бир кун албатта ўлиб кетишимга.

— Мен сиздан бойроқ эканман,— дедим мен,— сиз айтган эътиқоддан бошқа менда яна бир эътиқод бор, у ҳам бўлса — кунлардан бир кун бу дунёга келиш каби баҳтсизликка учраганман.

Ўтирганларнинг ҳаммаси бизни сафсата сотаётисизлар деди-ю, аммо ҳеч бири бизникидан маънолироқ гап айта олмади. Шу-шу бир-биrimизни кўпчилик ичидан ажратса бошладик. Биз тез-тез учрашиб турардик, мавҳум масалалар ҳақида жиддий суратда гап талашар ва ахири бир-биrimизнинг миямизни қотираётганимизни сезиб, тўхтардик. Шунда, Цицерон⁴⁰ таъриф қилган Рим авгурлари⁴¹ сингари, бир-биrimизга кўз қисишиб, хахолаб кулиб юборардик, тўйгунимизча кулиб, кечадан мамнун ҳолда тарқалишардик.

Вернер кириб келганда мен диванда қўлларимни бoshim остига қўйиб, шифтга тикилиб ётган эдим. У креслога ўтирди, ҳассасини бурчакка тираб қўйиб, ҳомузга

тортди-да, кун исиб кетганини билдириди. Мен пашшадан безор бўлдим, дедим, шундан кейин иккимиз ҳам жим қолдик.

— Ҳурматли доктор, шуни билиб қўйингки, аҳмоқлар бўлмаганда, бу дунёнинг сира қизифи қолмас эди...— дедим.— Мана, ўзингиз бир қаранг: биз икки ақлли одам ўтирибмиз; ҳар хил масалалар тўғрисида тинмай баҳслашиш мумкинлигини олдиндан биламиз, шунинг учун ҳам баҳслашмай ўтирибмиз; бир-биримизнинг энг пинҳоний сирларимизни ҳам биламиз; ёлғиз гапнинг ўзи биз учун катта бир тарих; ҳар бир ҳиссимишинг мағзини уч қават пўст тагидан ҳам кўриб турамиз. Қайгули нарсалар бизга кулгили бўлиб кўринади, кулгили нарсалар эса қайгули бўлиб кўринади, аммо тагини суриштириб қарасангиз, ўзимиздан бўлак ҳеч бир нарса билан ишимиз йўқ, бепарвомиз. Хуллас, фикр ва туйгуларимизни бир-биримизга айтиб ўтиришимизнинг ҳожати йўқ: бир-биримизнинг ипимиздан игнамизгача биламиз, бундан ортиғини билишни истамаймиз; шундай экан, янги ҳабарлардан гапириб ўтиришдан бошقا иложимиш йўқ. Қани, менга қандай янгиликлардан айтиб берасиз?

Узоқ гапириб юборганимдан чарчабман, шекилли, кўзларимни юмиб, эсналим.

Вернер бир оз ўйлаб ўтириб:

— Сизнинг бу сафсатангизда идея борга ўхшайди,— деди.

— Иккита!— деб жавоб бердим.

— Биринчисини айтинг, иккинчисини мен айтиб бераман.

— Хўп бошланг!— дедим, шифтни томоша қилишда давом этарканмай ичимда кулиб.

— Сувга келгаплардан бири ҳақида баъзи тафсилотларни билмоқчисиз, ким тўғрисида ўйлаганингизни ҳам билиб турибман, чунки у ерда сизни сўрашди.

— Доктор! Орамизда сира гап қолмапти: бир-биримизнинг дилимиздаги ҳамма нарсаларни биларканмиз.

— Энди иккинчиси...

— Иккинчи идеям бундай эди: мен сизга бирон нарса айтмоқчи эдим; нега десангиз, биринчидан, эшитаётган одам унча чарчамайди; иккинчидан, оғзидан биронта ножӯя гап чиқиб кетмайди; учинчидан, бирорнинг сирини билиб олиш мумкин; тўртинчиси шуки, сиз каби доно кишилар ҳикоячилардан кўра тингловчиларни кўпроқ

яхши кўришади. Энди мақсадга ўтайлик: княгиня Лиговская менинг тўғримда нималар деди?

— Княжна эмас-у, княгиня гапирганига... амниимисиз?

— Шак-шубҳасиз.

— Сабаб?

— Сабаби шуки, княжна Грушницкий ҳақида сўра-ган.

— Ўзингиз ҳам жуда топағон одам экансиз-да. Княжна, солдат шинели кийган ёш йигитнинг дуэль туфайли солдатлика туширилганига ишонади...

— Унинг бу лаззатли хатосидан маҳрум этмагандир-сиз...

— Шубҳасиз...

— Воқеанинг бошланиши жойида!— деб қичқириб юбордим мен, суюниб.— Бу комедиянинг охирини энди ўзимиз ечамиз. Толедан ўргилай, мени зериктириб қўй-майдиганга ўхшайди.

— Шўрлик Грушницкийнинг қўлингизда қурбон бў-лишини сезиб турибман...— деди доктор.

— У ёғини гапиринг, доктор...

— Княгиня, сизни танигандайман, деди. Мен унга, балки Петербургда, олий жамиятда учратгандирсиз, дедим... Исмингизни айтдим... Исмингизни билар экан. Саргузаштингизнинг у ерда довруғи кетганга ўхшайди.. Княгиня сизнинг саргузаштингизни гапириб берди, афтидағ, олий жамиятларда бўлган ғийбатларга ўзидан ҳам қўшди, шекилли... Қизи зўр иштиёқ билан тинглаб ўтириди. Унинг хаёлида сиз янги дидда ёзилган роман қаҳрамони бўлиб кўриндингиз. Княгиня кўп бемаъни нарсалар гапириди, аммо мен индамай ўтиравердим.

— Асл дўстим экансиз!— дедим мен, унга қўлнимни узатиб. Доктор қўлнимни самимий сиқди-да, сўзида давом этди:

— Истасангиз танишириб қўяман...

— Асло!— дедим мен, ажабланиб.— Қаҳрамонларни ҳам танишириб бўладими, ахир? Қаҳрамонлар танишса фақат ўз жононларини ўлимдан қутқариш йўли билан танишади...

— Чиндан ҳам княжнанинг кетидан судралмоқчими-сиз?..

— Аксинча, тамоман аксинча!.. Доктор, ахирини мен сизни енгдим-а: менинг мақсадимни тополмадингиз!.. Аммо ростини айтсан, бунга хафаман,— деб сўзимда да-

вом этдим, бир оз жим ётганимдан кейин,— мен ўз сирилни ҳеч қаочон ўзим очиб бермайман, аксинча сирилни бошқалар пайқаб олишсін дейман, нега десангиз шундай қылсам, мавриди келганды тонишім мүмкін. Аммо, сиз менга опаси билан қызини таърифлаб беришингиз керак. Улар ким, қандай одамлар?

— Аввало княгиня қирқ бешларга бориб қолган хотин,— деб жавоб берди Вернер,— меъдаси жуда жойида әкан-у, аммо қони бузилган; юзида қызыл доғлари бор. Үмрининг ярмини Москвада ўтказипти, ұзур-ҳаловатда яшаб семириб кетипти. Қириқ-қириқ латифаларни яхши күраркан, баъзан, ёнида қызы бўлмаса, ўзи ҳам беҳаёй нарсаларни гапириб беради. Менга, қызим фариштадай пок, дейди. Буни менга нима даҳли бор... Мен унга, бир кўнглим, хотирингиз жам бўлсин, бу гапни ҳеч кимга айтмайман демоқчи ҳам бўлдим. Княгиня бод касалидан шифолангани келибди, қызининг қандай касали борлигини худо билади; мен уларга кунда икки стакандан кислосерали сув ичиш ва ҳафтада икки марта оддий сульфид аралаштирилган сувда чўмилишни буюрдим. Княгиня, назаримда, амр қилишга ўрганмаган хотин кўринади; қызининг ақли ва билимини ҳурмат қиласди, негакч, қызы Байронни инглиз тилида ўқиркан, алгебрани ҳам биларкан; Москва қизлари олимликка берилиб ёмон қилишмапти, назаримда! Бизнинг эркакларимиз шу қадар беандиша, бетамиз бўладики, ақлли хотин учун уларга ноз-карашма қилиш ниҳоятда оғир бўлса керак, дейман. Княгиня ўшларни жуда яхши кўраркан; княжна эса уларни назар-писанд қилмас экан; москваликларнинг одати шунақа-да! Уларга қирқ ўшга кирган бийронлар бўлса бас.

— Москвада бўлганмисиз, доктор?

— Ҳа, у ерда бир оз ишлаганман.

— Давом этинг.

— Ҳамма гапимни гапириб бўлдим, шекилли... Ҳа, яна бир гапим қолибди: княжна, назаримда, ҳиссиётлар, өхтирослар ва шунга ўхшашлар тўғрисида муҳокама юритишни яхши кўрса керак... Бир қиши Петербургда турган экан, ёқмабди, айниқса Петербург одамлари ёқмабди; тузукроқ кутиб олишмаган бўлсалар керак-да.

— Уларникуга бугун борганингизда ҳеч ким йўқмиди?

— Аксинча: бир адъютант, кеккайган бир гвардияни

ва яқинда келган бир жувон бор эди, жувон княгиняниң әрининг қариндоши бұлса керак, ўзи жуда чиройли экану, аммо қаттиқ бетоб күринади... Қудуқ бошида учратмадингизми? Үрта бўйли, соchlари сариқ, чеҳраси гўзал, силбашара, ўнг юзида битта холи бор; чеҳраси шу қадар ифодалики, кўриб ҳайрон қолдим.

— Холи бор?— дедим мен, тишим орасидан,— нахотки...

Доктор юзимга қаради-да, қўлини кўкрагимга қўйиб, тантанали суратда:

— Сиз буни таниркансиз!..— деди.

Дарҳақиқат юрагим ҳаддан ортиқ гупиллаб уради.

— Энди сиз ютдингиз!— дедим.— Аммо, мен сизга қаттиқ ишонғанман: менга хиёнат қилмайсиз. Мен уни ҳали кўрганим йўқ, аммо сизнинг таърифингиздан, бир вақтлар яхши кўриб юрганим бир жувонни танигандай бўлиб турибман... Менинг тўғримда унга ҳеч нима деманг: башарти, ўзи сўраб қолса, мени ёмонлайверинг.

— Майлинигиз!— деди Вернер, кифт қоқиб.

У чиқиб кетгандан кейин юрагимни қайғу босди. Иккимизни тақдир яна Қавказда учраштиридимикин ё бўлмаса менинг шу ердалигимни билиб, атайин келдимикин? Кўришсак ҳам қандай кўришамиз? Ўзи ўшамикин?.. Лекин менинг олддан билувчи ҳиссим мени ҳеч алдамайди. Менчалик ўтмишнинг қули бўлиб қолган киши дунёда топилмаса керак. Ўтмишнинг қайғули ёки ширин дамлари эсимга тушса, кўнглим озор топади ва яна ўша фарёдларни қўзғатади... Мен аҳмоқона яратилган бўлсан керак; ҳеч нарсани унутмайман, ҳеч нарсани!

Обеддан сўнг соат олтиларда бульварга чиқдим: бульвар тўла одам; скамейкада ўтирган княгиня билан княжна атрофида тўпланган бир талай ёшлар бир-бirlарига гал бермай, уларга хушомад қилиб туришар эди. Мен улардан сал наридаги скамейкага бориб ўтирдимда, Д. офицерларидан иккни танишимни тўхтатиб, алланималарни ҳикоя қила бошладим, ҳикоям жуда қизиқ бўлса керак, улар қотиб-қотиб кулишди. Княжнани ўраб турганлардан баъзилари қизиқиб менинг ёнимга келишиди; қолганлари ҳам бирин-кетин уни ташлаб, менинг даврамга қўшилишди. Мен гапиравердим: айтиб бераётган латифаларим ғоятда ажойиб эди, ўтган-кетганлар устидан қилган мазахларим жуда аччиқ эди... Кун ботгунча атрофимдагиларни кулдириб ўтирдим. Княжна она-

си билан құлтиқлашиб, бир неча марта ёнимиздан ўтди, ёнларидан бир чўлоқ киши ҳам бор эди: княжна бир неча марта менга қараб-қараб қўйди, ўзини қанча бепарво тутишга тиришса ҳам, алам қилганлиги сезилиб турарди...

Одоб юзасидан ёнига қайтиб борган ёшларнинг биридан:

— Нималарни айтиб берди? — деб сўради княжна. — Ажойиб-гаройиб нарсаларни, ўзининг жангларда кўрсатган қаҳрамонликларини айтиб бергандир-да?.. — Бу гапни жўрттага менга эшиитириб айтди, у мени санчиб олмоқчи бўлса керак. «Э-ҳа, чинакам жаҳлингиз чиқпти-ку, жонон княжна, шошманг, ҳали буниси ҳолва!» — дедим ичимда.

Грушницкий худди йиртқич ҳайвондай ундан кўзини узмайди; гаров ўйнайманки, эртага албатта бирор кимсага княгиня билан танишириб қўйинг, деб ялиниади. Княгиня жон дейди, чунки ўзи зерикиб юрибди.

16- мај

Иккى кун мобайнинда ишларим жуда юришиб кетди. Княжнанинг менинг кўрарга кўзи йўқ; менинг тўғримда тўқинган бир-икки заҳарли, аммо иззат-нафсимни қондирувчи эпиграммаларини менга етказишиди. Яхши улфатлар билан юришга ўрганган ва унинг Петербургдаги хола ва холаваччалари билан яқиндан таниш бўла туриб, у билан танишишни истамаганим уни foят даражада ажаблантирарди. Биз кунда қудуқ ёнида ёки бульварда кўришиб турамиз; мен унинг ёнидаги хушторларини, ясанган-туссанган адъютантларни, рангпар москваликлар ва бошқаларни ундан айнитиб, ўз томонимга тортиш учун бутун кучимни сарфламоқдаман ва бунга деярли ҳамма вақт эришмоқдаман. Мен меҳмон кутишни жуда ёмон кўрардим; ҳозир бўлса худонинг берган куни уйим тўла меҳмон, тушликка келишади, кечки овқатга келишади, қарта ўйнашади,— қарангки, унинг оҳанрабодай жозибали кўзларидан менинг шампанское вином устун келмоқда!

Кеча уни Челахов магазининда кўриб қолдим; жуда қулинг ўргилсин эрон гиламига харидор бўлиб турган экан. Княжна онасига пулни аяманг, кабинетимизни жуда ҳуснини очадиган гилам экан, деб ялиниб турган экан... 40 сўм ортиқ тўлаб гиламни олиб кетдим; бунинг

эвазига княжна менга ғазаб-ла ёнган күзлари билан бир қараб қўйди. Тушликдан сал олдинроқ бояги гиламни черкас отимнинг устиға ёптиридим-да, жўрттага унинг деразаси ёнидан етаклаб ўтишни буордим. Шу маҳал Вернер уларникида экан, кейин менга, бу манзаранинг княжнага ниҳоятда қаттиқ таъсир этганини айтиб берди. Княжна менга қарши уруш эълон қилмоқчи эмиш; ҳатто ёнидаги адъютантлардан иккитасининг, гарчи кунда менинида тушлик қилсалар ҳам, мен билан муомалалари совий бошлаганини сездим.

Грушницкийнинг қиёфаси сирли бўлиб қолди: қўлларини орқасига қилиб юради, ҳеч кимни танимайди, бирдан оёғи ҳам тузалиб кетди, оқсоқланиши ҳам билинмай қолди. Пайтини топиб туриб княгиня билан танишиб олибди, княжнага бир-икки оғиз хушомад ҳам қилганга ўҳшайди; княжна яхши-ёмонни унча ажратада билмаса керак: у билан танишганидан бери, унинг таъзимиға латиф табассум билан жавоб қайтаради.

— Лиговскаялар билан асло танишмоқчи эмасмисан?— деди кеча Грушницкий менга.

— Асло.

— Қўйсангчи-е! Сувлардаги энг дилкаш уй — шуларники-ку! Бу ернинг энг мўътабар кишилари...

— Дўстим, бу ердагиларгина эмас, ҳатто бошқа ердагилар ҳам жонимга теккаш. Ўзинг бориб турасанми?

— Йўқ ҳали: княжна билан атиги бир-икки марта гапиришдим, холос. Мен сенга айтсам, гарчи бу ерда уят ҳисобланмаса ҳам бирорнинг уйига ялиниб бориш нокулайроқ... Эполет тақсам — бошқа гап эди...

— Қизиқ экансан! Шу туришинг минг марта кўркамроқ-ку! Ўзингнинг қулай вазиятингдан фойдаланишни билмас экансан... Устингдаги солдат шинели юраги сал нарсага эриб кетадиган ҳар қандай қизнинг назарида сени жафокаш қаҳрамон қилиб кўрсатади.

Грушницкий ўзидан мамнун бўлиб илжайди-да:

— Бўлмаган гап!— деди.

— Княжна аллақачон сенга ошиқи беқарор бўлиб қолганига аминман,— деб сўзимда давом этдим мен.

Грушницкий қулоқларигача қип-қизариб кетди-да, қовоғини солди.

— Эй худбинлик! Архимед⁴² ер шарини кўтармоқчи бўлган пишанг сенинг ўзингсан!..

— Ҳеч ҳазилингни қўймас экансан-да!— деди у, ўзи-

ни ранжиганга солиб.— Биринчидан княжна мени яхши танимайды...

— Хотинлар фақат танимаган кишиларинингина яхши кўришади.

— Ҳа, мен унга ёқмоқчи эмасман: мен фақат яхши бир қиз билан танишай дейман, бошқа бирор муддойим бўлса кулги бўлар эди... Мана, сизларнинг йўруқларинг бошқа!— Сенга ўхшаган Петербурглик олифталар бир қарашда ҳар қандай хотинни қўлга оласизлар. Печорин, княжнанинг сенинг тўғрингда нима деганини беласанми?

— Нима? Сенга менинг тўғримда гапирди ҳамми?

— Лекин қувонмай тура тур. Бир куни қудуқ ёнида у билан тасодифан кўришиб, гаплашиб қолдим; оғзидаи чиққан учинчи гапи шу бўлди: «Анови жаноб ким, одамга бирам хўмрайиб қарайдикি... сиз билан бирга эди-ку, ўша куни...» Княжна қип-қизариб кетди, ўзининг жонона ҳаракатини эслади-ю, аммо кунини айтмади.— Кунини айтмасангиз ҳам бўлади,— дедим унга,— у кун ўлгунча эсимдан чиқмайди... Дўстим Печорин! Ҳолинг хароб, сенинг тўғрингда у ёмон фикрда... Жуда ачинаман сенга! Чунки, Мери жуда латофатли қиз!..

Шуни ҳам айтиб қўяйки, Грушницкий сал-пал таниш ва ўзига ёқиб қолган хотинлар тўғрисида гапирганда *менинг Мерим, менинг Sophie*т дейдиганлар тоифасидан.

Мен жиддий туриб:

— Тўғри, у чакки қиз эмас...— деб жавоб бердим.— Аммо эҳтиёт бўл, Грушницкий! Рус қизлари кўпинча Афлотун муҳаббати билан яшайдилар. Уларда эрга тегиш нияти ҳам бўлмайди: у жуда серташвиш муҳаббат бўлади. Княжна кўнгил очишини яхши кўрадиган нозкарамали аёллардан кўринади; агар ёнингда бир-икки марта зерикиб қолса борми, иш тамом, ҳалок бўлдим деявер: сукутинг унда қизиқиши қондирмаслиги лозим; сен уни дам ўтмай қизиқтириб туришинг керак, сени деб у ўн марта бўлса ҳам одамларнинг гап-сўзини менсимай қўяди, буни ўзи томонидан қилинган фидокорлик деб атайди, аммо бунинг эвазига ўзини мукофотлаш учун, сени қийнайди, азоблайди, кейин боради-да сени кўргани тоқати йўқлигини шартта бетингга айтади-қўяди. Башарти, сен ундан устун келолмасанг, бўлди, сени бир марта ўпгани сенга иккинчи марта ўпиш учун ҳуқуқ бермайди;

күнгли тўйгунича ноз-карашма қилиб юради-ю, икки йилдан кейин ойисининг гапига кириб, бирон рўданога тегади-кетади, сўнгра баҳти қора эканман, умримда фақат бир кишини, яъни сени севардим, аммо тақдир менга ўгай экан, бошимизни қовуштириб қўймади, чунки устингда солдатча шинелинг бор эди, гарчи қалин ва кулранг шинель остида оташин ва олийжаноб қалб уриб турган бўлса-да, тақдир бизни қўшиб қўймади деб, ўзи-ни-ўзи ишонтириб юрадиган бўлади...

Грушницкий столин бир урди-да, уй ичидаги ёқдан-бу ёққа юра бошлади.

Мен ичимда куладим, ҳатто бир-икки марта жилмайиб ҳам юбордим, аммо, баҳтимга, у буни сезмади. Унинг ошиқи шайдолиги равшан эди, чунки илгаригига қараганда дили анча очилиб кетган эди, ҳатто бармоғида шу ерда ясалган қора кўзли кумуш узук ҳам пайдо бўлиб қолган эди; шу узук мени шубҳага солиб қўйди... Узукка диққат билан тикилиб қарадим, қараб нимани кўрдим денг?.. Узукнинг ички томонига майдага ҳарфлар билан Мери деган сўз, унинг ёнинг Мерининг машҳур стаканинни ердан олиб берган куннингчисоси ўйиб ёзилган эди. Бу кашфиётимни ўзига билдирамадим, мен ўзи иқрор бўлишини истамайман; мен шуни истайманки, ўз сирларини менга ўзи очиб берсин, ана шунда лаззатланаман...

Бугун кеч турдим; қудуқ бошига борсам — ҳамма тарқалиб кетибди. Қун исий бошлаганди; қорли тоғлар тепасидан елиб-югуриб келувчи оппоқ паҳмоқ булувлар момақалдироқ бўлишидан дарак берарди. Маъшуқнинг чўққиси худди ўчган машъалдай тутаб ётарди; парча-парча кул ранг булувлар унинг теварак атрофида илондай жилпанглаб сузиб юрар ва тоғ тепасидаги буталарга илиниб, секинлашгандай туюлар эди... Фор томонга чўзилиб кетган ишкомга кириб кетдим; юрагимни қандайдир бир фам босгандай эди. Мен, доктор айтган, юзида холи бор жувон ҳақида ўйлардим... Нега келдийкин бу ерга? Ӯшамикин? Нега энди буни худди ўша жувон деб ўйлайман? Нега мен худди ўщанинг ўзи эканлигига бунча қаттиқ ишонаман? Дунёда юзида холи бор хотин озми?— Шундай хаёлларга ботиб, форга яқинлашдим. Қарасам: салқин форнинг ичидаги тош скамъяда бошига похол шляпа кийиб, устидан қора шол рўмол ўраган бир хотин

бошини қуйи солиб ўтирибди: шляпаси юзини түсіб тұрарди. Унинг хаёлини қочирмай деб, энди қайтиб кетмоқчи бўлиб турувдим, бирдан бошини кўтариб, менга қараб қолди.

— Вера!— деб қичқириб юбордим беҳосдан.

У бир сесканиб тушди-да, ранги оппоқ оқариб кетди. «Сизнинг шу ердалигинги зни билардим», деди. Ёнига бориб ўтиридим, қўлини ушладим. Бу ёқимли товушни, эшитишим билан бутун борлиғимни кўпдан унутилган бир титроқ босди. У ўзининг тиниқ ва сокин кўзлари билан кўзимга тикилди; у кўзларда ҳам шубҳа, ҳам ўп-каланиш сезиларди.

— Кўпдан бери кўришмадик,— дедим мен.

— Кўп бўлди, иккаламиз ҳам анча ўзгариб кетдик!

— Бундан чиқди, мени ортиқ севмас экансан-да?

— Эрга чиқдим!..— деди у.

— Тағин-а? Аммо бундан бир неча йил илгари ҳам шу важ бор эди, аммо шунга қарамай...

У қўлини тортиб олди, юзлари қип-қизариб кетди.

— Балки иккинчи эрингни севарсан?..

У индамади-да, тескари қараб ўтириди.

— Ё жуда рашкими?

Яна индамади.

— Нега индамайсан? Эринг ёшdir, чиройлидир, жуда давлатмандир, балки қўрқарсан...— Унинг юзига қараб, қўрқиб кетдим: юзларида чуқур умидсизлик акс этар, кўзлари жиққа ёшга тўлган эди.

— Менга айт-чи,— деди у ниҳоят, шивирлаб,— мени қийинашдан лаззатланасанми?.. Аслида, мен сендан нафратланишим керак эди. Бир-биримизни таниган кунимиздан бери менга азобдан бўлак ҳеч нарса берганинг йўқ...— Унинг товуши титраб кетди, бўйинни әгди-да, кўксимга бош қўйди.

«Балки мени шунинг учун севгандирсан, чунки шодлик унутилса унутиладики, қайғу сира унутилмайди...» деб ўйладим ичимда.

Мен уни бағримга қаттиқ босдим, узоқ вақт шундай ўтиридик. Ниҳоят, лабларимиз бир-бирини топди ва иссиқ ширин ўпиш-ла бирлашди; қўллари муздек совуқ, боши ловиллаб ёнар эди. Икки ўртамизда шундай суҳбат бошланиб кетдики, бу суҳбатни сира қофозда ифодалаб бўлмайди, такрорлаб ҳам бўлмайди, эсда ҳам сақлаб бўлмайди: итальян операларидағи каби, бундай суҳбатда

сўз ўрнини товушлар босади ва сўз маъноларини тўлдиради.

Вера эри билан танишишимни спра истамади; бир куни бульварда кўзим тушган чўлоқ чол унинг эри экан, фарзанд кўриш учун тегибди. Эри жуда бадавлат бўлиб, бод касалига мубтало экан. Уни масхаралайдиган бирор гап айтмадим: Вера уни ўз отасидай ҳурмат қиларкан-у, аммо эридай алдаркан... Инсон қалби, айниқса хотин кишининг қалби жуда ғалати нарса!

Веранинг эри Семён Васильевич Г..в княгина Лиговскаянинг узоқ қариндоши бўлиб, уйлари ёнма-ён, Вера княгинянинг уйига тез-тез чиқиб туаркан; Верага Лиговскаялар билан албатта танишаман ва кишилар диққатини сендан чалғитиш учун, жўрттага княжна кетидан судраламан деб ваъда бердим. Шундай қилиб, менинг ўйлаб қўйган планларим ҳам бузилмайди, хушчақчақ бўлиб яшайман!..

Хушчақчақлик!. Тўғри, қалбим фақат баҳт ахтариб, бирор кишини зўр эҳтирос билан севишга ошиққан даврлар ўтди; энди мен бошқалар томонидан севилишни истайман, шунда ҳам озгина кишилар томонидан севилишни истайман! Ҳатто баъзан мени фақат биргина киши севса-ю, сира бевафолик қилмаса, деб орзу қиласман: шўринг қурғур юракнинг одати шу-да!..

Аммо мен ҳамиша бир нарсага ҳайрон бўлиб юрадим: мен ҳеч қачон маъшуқамга қул бўлган эмасман; аксинча, мен ҳар доим уларнинг иродаси ва қалбига ҳоким бўлардим. Нима учун шундайкини?— Мен умримда бирон нарсанинг қули бўлишни истамаганлигим ва мени қўлдан чиқариб юборишдан қўрққанлари учунми ё бўлмаса, кучли ироданинг ўзига тортувчи таъсирили кучимикин? Ё шу маҳалгача биронта мустаҳкам иродали ўжар хотинни учратмаганим учунми?

Эътироф этишим керакки, ҳақиқатан ҳам мен иродали хотинларни ёқтиромайман; иродали бўлиш уларнинг иши эмас!..

Ҳа, энди эсимга тушди: умримда бир марта, фақат бир мартагина мустаҳкам иродали хотинни яхши кўрганман ва уни сира енголмаганман... Биз бир-биrimизга душман бўлиб ажралишганимиз, агар мен уни беш йилча кейинроқ учратганимда, балки бошқача ажралишармидик...

Вера касал, қаттиқ касал, аммо бунга ўзи иқрор бўл-

майди: силми деб қўрқаман,— ёки *fiévre lente*⁴³ касалига йўлиққан бўлмасин, аслида бу рус касали эмас, бизнинг тилимизда унинг ҳатто номи ҳам йўқ.

Момақалдироқ бизни форда ярим соатча тутиб қолди. Вера мендан вафодорлик ҳақида онт ҳам талаб қилмади, ўтган сафар ажралишиб кетганимиздан кейин бошқа хотинни яхши кўрганмисан деб ҳам сўрамади. Илгарилар ўзини менга қандай ишониб топшириб қўйган бўлса, ҳозир ҳам шундай ишонди,— мен ҳам уни алдамайман: дунёда мен фақат биргина хотинни алдай олмайман, у ҳам бўлса — Вера. Мен биламан, яқинда биз яна ажралишиб кетамиз, балки абадий ажралишиб кетармиз, иккимиз ҳам ўлим тўшагига ҳар хил йўлдан борамиз!— аммо унинг хотираси қалбимда абадий сақланади, мен буни ўзинга кўп марта айтганман, гарчи ишонмайман деса ҳам, ишонади.

Ахири хайрлашдик: шляпаси бута ва қоялар орқасида кўздан ғойиб бўлгунча кетидан қараб турдим. Юрагим эзилди, биринчи марта ажралишганимизда ҳам худди ана шундай бўлган эдим. О, бу туйғу мени шу қадар қувонтирдик! Ажабо, бу — ҳаётбахш, жўшқин ёшлигимнинг танамга қайтиб келишими ё ўша ёшлигимнинг сўнгги боқиши, менга совға қилиб кетмоқчи бўлган ҳадясими? Аммо, афтимдан ҳали жуда ёш кўринаман; юзларим гарчанд раигпар бўлса ҳам, ёшларнинг юзидаи бегубор; аъзоларим эпчил ва келишган, қалин соchlарим жингалак, кўзларим чарақлаб ёнади, қоним қайноқ...

Үйга қайтгач, от миниб даштга чиқиб кетдим; мен баланд-баланд майса ўтлар орасидан от чоптириб юришини яхши кўраман, қаршимдан дашт шамоли fir-fir уриб турари; кўкрагим хушбўй мусаффо ҳавога тўлиб кетади, кўзимни мовий олисларга тикиб, минут сайин яқинлашиб келувчи нарсаларни кўришга тиришаман. Юрагимда қандай дард-аламлар бўлмасин, нималарни ўйлаб диққат бўлмай, бари бирпасда тарқаб кетади; жоним ором олади, танам чарчаб, миямдаги ташвишни енгади. Жануб қуёши ёритиб турган кунгурадор тоғларни, кўм-кўк осмонни кўрсам ё тошдан-тошга ҳайқириб оқиб тушувчи дарё шовқинини эшиксам — бас, ҳар қандай хотин сиймосини ҳам дарров унутаман.

Менимча, ўз *минораларида* зерикиб ўтирган казаклар⁴⁴ менинг мақсадсиз бекордан-бекорга от чоптириб юришимни кўриб, тозаям ажабланишса керак, чунки

менинг уст-бошимдан улар мени черкас деб ўйлайдилар. Даржақиқат, күп одамлар менга, черкасча кийим кийсанғыз кабардинга шу қадар ўхшаб кетасизки, ҳатто ҳақиқиіт кабардинлардан ажратиб ҳам бўлмайди, дейишади. Рост, бу олийжаноб жанговар кийимни кийсам жуда олифта бўлиб кетаман: бу кийимнинг битта ҳам ортиқча заррин жияги йўқ, жўн кўринса ҳам, қимматбаҳо яроқ тақаман, қалпоғимнинг қундузи узун ҳам эмас, калта ҳам эмас, ўртача, болдирга киядиган кийимим билан поїафзалим оёғимга қуйиб қўйгандаи, пешматим оқ, черкаскам эса қора. Тоғлиларнинг от минишини ўрганиш учун анча вақтим кетди; менга ҳеч нарса ёқмаса ҳам, фақат одамларнинг кавказча от минишимга қойил қолиб мақташлари ёқади. Менинг тўртта отим бор: биттаси ўзим учун, учтасини далама-дала ёлғиз ўзим кезиб зерикмай деб, ўртоқларимга атаб олганман; ўртоқларим отларимни жон деб минишади-ю, аммо ҳеч вақт мен билан бирга юришмайди. Тушлик қилиш кераклиги эсимга тушганда, соат олти бўлган эди; отим ўлгудек чарчаган эди; Пятигорскдан немислар колониясига қараб кетадиган йўлга чиқдим,— сув давосига келганлар у ердан еп риқенепе⁴⁵ га тез-тез бориб туришар эди. Йўл чакалакзор оралаб, баланд-баланд майса ўтлар орасидан шилдираб сой оқувчи кичик-кичик жарлар орқали илон изидай бўлиб боради: теварак-атрофни Бештов, Змеиная, Железнная ва Лисая деган баланд-баланд кўм-кўк тоғлар ўраб олган. Маҳаллий шевада балка⁴⁶ дейиладиган шундай жарлардан бирига тушдим-да, отимни сугориб олай деб тўхтадим; шу пайтда йўлдан шовқин-сурон билан келаётган бир талай ясанган-тусанган отлиқлар кўринди. Хонимлар эгнида қора ва кўк амазонка⁴⁷, кавалерлар эса ярим черкасча ва ярим *нижегородча* кийинган эдилар, энг олдинда Грушницкий билан княжна Мери келар эди.

Шифоли сувга келувчи хонимлар черкасларнинг куппа-кундузи босқинчилик қилишларига ҳали ҳам ишона-дилар; шунинг учун бўлса керак, Грушницкий солдатча шинелининг устидан қилич ва иккита тўппонча тақиб олган эди; унинг бунчалик жанговар кийинганини кўрган киши ўзини кулгидан тиёлмас эди. Мен баланд бута орқасида турардим, аммо унинг барглари орасидан ҳамма нарса бемалол кўриниб турарди, уларнинг юзларидан гапларининг ҳиссий бир мазмунда эканини пайқадим. Ниҳоят, улар пастга тушадиган жойга етиб келишди;

Грушницкий княжна отининг жиловидан ушлади, ана шунда мен суҳбатларининг охирини эшитиб қолдим.

— Кавказда бутунлай қолиб кетмоқчимисиз? — дерди княжна.

— Россия менга нима? — деб жавоб берарди кавалери.— Россия шундай бир мамлакатки, у ернинг минглаб одамлари мендан бадавлатроқ бўлганлари учун мени менсимайдилар, ҳолбуки, бу ерда устимдаги мана бу қалин шинелим ҳам сиз билан танишишимга тўсқинлик қилмади...

— Аксинча... — деди княжна ва қизариб кетди.

Грушницкийнинг юзида мамнуният акс этди. У давом этарди:

— Бу ерда умрим жўшқин ўтади, ёввойилар ўқи остида умримнинг тез ўтганини ҳам сезмай қоламан ва агар тангрим ҳар йили фақат бир мартағина хотин табассумини мендан дариф тутмаса ва бу табассум...

Шу замон улар менга яқин келиб қолиши; мен отимга қамчи бериб, чакалакзордан чиқдим...

— Mon dieu, un curcassien!..⁴⁸ — деб қичқириб юборди княжна, қўрқиб.

Унинг янглишганини билдиromoқ учун бир оз энгалиб, мен ҳам французчалаб жавоб бердим:

— Ne craignez, rien, madame, — Je ne suis pas plaisir dangereux que votre cavalier!⁴⁹

Княжна изза бўлди,— аммо нимадан? — Ўзининг хато қилиб қўйганиданми ёки менинг жавобимни одобсиз деб топгани учунми? Менга қолса, кейингисининг тўғри чиқишини истардим. Грушницкий менга ранжигандай қарди.

Кечаси, яъни соат ўн бирларда бульварнинг арғувон даражатлари билан ўралган хиёбонига сайд қилгани чиқдим. Шаҳар уйқуда, фақат онда-сонда деразалардан милтиллаган чироқлар кўриниб қоларди. Уч тарафдан қояларнинг кунгурулари, Маъшуқ тогининг тармоқлари қорайиб кўринарди; тоғ тепасида бир парча машъум қора булут осилиб турарди; шарқ томондан ой кўтарилиб келмоқда; йироқдаги қорли тоғлар худди кумуш жиякка ўхшаб кўринарди. Кечаси очиб юборилган иссиқ булоқларнинг шариллаши орасидан часавойларнинг ҳайқириги эшитилиб қоларди. Аҳён-аҳёнда кўчадан от туёқларининг гурсиллаши, нўғай араванинг ғижирлаши, татарча чўзиқ ашула эшитилиб қоларди. Мен скамейкага ўтириб

хаёлга ботдим... Бирор киши билан дилкашлик қилиб, дилимдаги ҳамма дардларимни ўртоқлашгим, юрагимни бўшатгим келди... аммо ким билан дилкашлик қиласай? «Шу топда Вера нима қилаётганикин?» деб ўйладим.. Шу онда унинг қўлини бир марта қисиш учун ярим давлатимни берардим.

Тўсатдан бироннинг тез гандираклаб келаётгани эшилди. Грушницкийга ўхшатдим... Ўша экан!

— Қаердан келяпсан?

— Княгиня Лиговскаяникидан,— деди Грушницкий, ғурур билан.— Мери роса ашула айтаркан-да!

— Биласанми?— дедим мен унга.— Гаров ўйнайманки, юнкерлигингдан унинг хабари йўқ: у сени солдатликка туширилган офицер деб ўйлади...

— Бўлса бордир! Менинг нима ишим бор!..— деди Грушницкий, парищонхотирлик билан.

— Шунчаки айтдим-қўйдим-да...

— Биласанми, бугун унинг жуда жаҳлини чиқардинг? Қилифингни мисли кўрилмаган беодоблиқ деб топди; мен, йўқ, у жуда яхши тарбия кўрган, одобли йигит, сизни хафа қилиш кўнглига ҳам келмаган бўлса керак деб зўрға ишонтирудим; у одамга сурбетларча қарапкан, жуда ўзига бино қўйган бўлса керак, дейди.

— Тўғри айтибди... Сен уни ўз ҳимоянгга олмоқчимисан дейман?

— Минг афсуски, ҳозирча бундай ҳуқуққа эга эмасман...

«Э-ҳа! Бу ҳали умидвор ҳам бўлиб юрганга ўхшайди...» деб ўйладим.

— Қайтангга ўзингга ёмон-да,— деб давом этди Грушницкий,— энди улар билан танишишинг қийин бўлади, аттанг! Мен билган ҳамма уйлар ичida энг яхшиси шу...

Мен ичимда кулиб қўйдим.

— Эндиликда менинг учун энг яхши уй — ўзимнинг уйим,— деб, эснадим-да, кетмоқчи бўлиб ўрнимдан турдим.

— Бўйнингга ол, пушаймон бўлаётгандирсан-а?

— Бўлмаган гап! Агар истасам эртага кечқурун княгиняникида бўламан...

— Қўрамиз...

— Ҳатто, сени хурсанд қилиш учун, княжнанинг орасидан ҳам юраман...

- Майли, агар сен билан гаплашишни истаса...
- Мен фақат сенинг суҳбатингдан безор бўлишини кутаман... Хайр!..
- Мен яна сайр қилиб юраман, энди сираям уйқум келмайди... Менга қара, яххиси — юр, ресторанга борамиз, қиморнинг айни қизиган пайти... бугун қоним қайнаб тошмаса бўлмайдиганга ўхшайди...
- Ютқизинингни тилайман...
- Уйга кетдим.

21- май

Қарийб бир ҳафта ўтди, лекин ҳанузгача Лиговскаялар билан танишганим йўқ. Қулай пайт пойлаб юрибман. Грушницкий княжнанинг орқасидан ҳар ерда худди соясидай эргашиб юрибди; улар ҳеч гаплашиб тўйишмайди; у қачон княжнанинг жонига тегаркин?.. Онаси уларнинг гапига ҳам эътибор бермайди, чунки Грушницкий қизининг қайлиғи эмас-да. Ана оналарнинг мантиқи! Княжнанинг Грушницкийга бир-икки марта кўз сузуб қараганини кўриб қолдим,— бунга хотима бериш керак.

Қудуқ бошига Вера кеча биринчи марта келди... Форда кўришганимиздан бери уйдан чиқиши ҳам шу экан. Иккимиз ҳам стаканимизни қудуққа баравар ботирдик, Вера энгашиб, секин қулоғимга шивирлади:

— Лиговскаялар билан танишмаётисан!.. Биз фақат ўшаларникидағина учрашишимиз мумкин...

Яна ўпка!.. Зерикиш! Аммо, мен бу ўпкаланишга лоийқман...

Дарвоқе, эртага ресторация⁵⁰ залида солма бал бўлади, ана ўшандада княжна билан мазуркага тушаман.

22- май

Ресторация аслзодалар жамияти залига айланиб кетибди. Соат тўқизда ҳамма тўпланиб бўлди. Княгиня қизи билан ҳаммадан кейин келди; кўп хонимлар унга ҳасад ва ичи қоралик билан қараб қолишиди, чунки княжна Мери жуда чиройли ва дид билан кийинади. Узларини шу ернинг аристократи деб юрувчи хонимлар ўз ҳасадларини яшириб, княжнага қўшилишиди. Наилож? Хотинлар жамияти бор жойда дарҳол юқори ва қуйи доиралар пайдо бўлади... Грушницкий дераза ёнида тўпланиб турган одамлар орасида юзини ойнага тираб, ўз

малагидан күзини узмай, тикилиб турарди. Княжна эса унинг ёнидан ўтиб кета туриб билинар-билинмас бош силкитибгина қўя қолди. Грушницкийнинг юзи қўёшдай порлаб кетди... Танца полька⁵¹ билан бошланди; кейин вальс чалинди. Шпорлар жаранглаб, сюртукларнинг этаклари пир-пирай кетди.

Мен бошига пушти ранг патлар тақпб келган семиз бир хотиннинг орқасида турардим; кийимларининг зебзиннати фижма⁵²лар расм бўлган даврни, ғадир-будур терисининг олачипорлиги эса машҳур қора холлар даврини эслатарди. У бўйинидағи энг катта сўгалини маржон билан беркитиб олган эди. Хоним ўз кавалери бўлмиш драгун капитанига:

— Шу княжна Лиговская жуда одобсиз қиз экан! Қараңгки, мени тутиб юбориб, афв ҳам сўрамади, яна ўгирилиб лорнет биман бетимга қарайди денг... C'est imprayable!⁵³... Нимасига бунча бино қўяди? Унинг бир адабини бериб қўйиш керак...— деди.

— Бу бизга чўт эмас!— деб жавоб берди, хизматга тайёр турган капитан ва нариги хонага чиқиб кетди.

Шу заҳоти мен княжнанинг ёнинг бориб, уни вальсга таклиф қилдим; бу ернинг одати шунаقا: таниш бўлмаган одамлар билан ҳам танца тушиш мумкин.

У ўзини жилмайишдан зўрга тийди, менинг устимдан қилган тантанасини ҳам зўрга яширди; аммо дарҳол мени менсимагандай бир қиёфа олди. Қўлини истар-истамас елкамга ташлади-да, бошини ёнга сал эгди, иккимиз танца тушиб кетдик. Бунақангни нозик баданни умримда кўрган эмасман! Унинг ёнгил нафаси юзимни елпиб турарди; чирпирак бўлиб айланганда шерикларидан ажралиб чиққан бир тутам жингалак зулфи ўтдай ёниб турган юзимни қитиқлаб кетарди... Зални уч марта айланиб чиқдик. (У вальсга жуда яхши тушаркан). Княжна жуда халлослаб қолди, кўзларни тиниб кетди, салгина очилиб турган лаблари одатда айтилиши керак бўлган: «merci, monsieur»⁵⁴ни ҳам зўрга шивирлаб айтди.

Бир неча минут жим турганимиздан кейин мен, ниҳоятда ювош одамдай сўрадим:

— Княжна, сиз билан таниш бўлмай туриб, ғазабингизга дучор бўлишдай катта бахтсизликка учраганимни эшитиб қолдим... Мени одобсиз деб топган эмишсиз... Наҳотки, шу гап рост бўлса!

— Ҳали ҳам мени шу фикрда қолдирмоқчимисиз?

деб жавоб берди княжна, истеҳзо билан лабларини буриб; унинг бу қилифи шўх юзига жуда ярашарди.

— Агар мен одобсиэлик қилиб, бирон нарса билан сизни ҳақорат қилган бўлсам, рухсат этинг, ундан ҳам каттароқ беодоблик қилиб, сиздан афв сўрай... Рост, мен тўғримда хато ўйлаганингизни исбот этишни истар эдим...

— Сиз учун бу жуда қийин бўлса керак...

— Нима учун?

— Шунинг учунки, бизникига келмайсиз, бунақсанги баллар эса тез-тез бўлиб турмайди.

Бундан чиқди, уларнинг эшиги мен учун абадий берк экан-да, деб ўйладим.

— Биласизми, княжна,— дедим бир оз афсуслангандай бўлиб, — жиноятчи тавба қилса, тавбасини асло қайтариб бўлмайди; у жонидан тўйиб, бешбаттар жиноятчи бўлиб кетиши мумкин... ана шунда...

Атрофимизда турган одамларнинг бирдан хаҳолаши ва шинвир-шинвири сўзимни бўлиб, қайрилиб қарашга мажбур этди: мендан бир неча қадам нарида бир тўда эркаклар туради, улар орасида боя менинг княжнамга қарши уруш бошламоқчи бўлиб турган драгун капитани ҳам бор эди; афтидан, у, бир нарсадан жуда хурсанд кўринарди, қўлларини бир-бирига ишқалар, нуқул хаҳолаб кулар ва ўртоқлари билан кўз қисишар эди. Бирдан улар орасидан фрак кийган, мўйлови шопдай, юзлари қинп-қизил бир киши чиқди-да, гандираклаганича княжнага қараб келаверди; у маст эди, саросимада қолган княжнанинг олдига келгач, қўлларини орқасига қилиб турди-да, маст кўзларини унга тикиб, хириллаган ингичка товуш билан деди:

— Пермете⁵⁵... Ҳа, хулласи калом!.. Гапнинг пўс калласи: Мен сизни мазуркага таклиф этаман...

— Нима истайсиз?— деди княжна, товуши титраб кетиб, нажот излаб атрофга термилди. Эвоҳ! Онаси йироқда туар, ёнида эса биронта таниш кавалери йўқ эди: бир адъютант буни кўриб турган экан шекилли, бироқ можарога аралашмаслик учун одамлар орқасига беркиниб олди.

— Хўш, нима дейсиз?— деди маст, турли имо-ишоралар билан далда бериб турган драгун капитанига кўзини қисиб.— Ё хоҳламайсизми?.. Мен сизни яна roug masure⁵⁶га таклиф этиш шарафига эгаман... Балки, ме-

ни маст деб ўйларсиз? Майли, бунинг аҳамияти йўқ...
Қайтангга bemalolroq бўлади...

Мен княжнанинг қўрқув ва ғазабдан беҳуш бўлиб
йиқилишига сал қолганини кўрдим.

Маст кишининг олдига бордим, қўлини қаттиқ қисиб
кўзига тикилдим-да, жўнанг ҳозир, йўқолинг бу ердан,
чунки княжна мазуркани мен билан тушишга ваъда қил-
ган, дедим.

— Майли, чорамиз йўқ!.. Бошқа сафар!— деди маст
кулиб ва хижолатда қолган ўртоқларининг ёнига қайт-
ди, ўртоқлари уни дарров бошқа уйга олиб чиқиб ке-
тишиди.

Княжна менга миннатдорлик билан узоқ тикилиб, та-
шаккур билдириди.

Княжна онасининг олдига бориб, ҳамма воқеани унга
гапириб берди; онаси мени ахтариб топиб, миннатдорчи-
лик билдириди. Кейин онамни таниганини ва олти-еттита
холам билан яқин эканлигини айтди.

— Ҳайронман, нима учун шу маҳалгача танишмадик,— деб илова қилди княгиня,— ростингизни айтинг,
бунга фақат сиз айбдорсиз, ҳаммадан ётсирайсиз, бун-
дай қилиш ярамайди! Меҳмонхонамнинг ҳавоси кайфин-
гизни очиб юборар деган умиддаман... Шундай эмасми?

Мен шундай пайтларда айтиш керак бўлган гаплар-
дан бирини айтдим.

Кадриль⁵⁷ жуда узоқ чўзилиб кетди.

Ниҳоят, тепадан мазурка янгради; княжна иккимиз
ўтиридик.

Мен бояги маст киши ҳақида ҳам, илгариги қилиқла-
рим тўғрисида ҳам, Грушницкий ҳақида ҳам ҳеч нарса
демадим. Бояги кўнгилсиз воқеанинг таъсири бора-бора
тарқалиб, княжнанинг чеҳраси очилиб кетди; чиройли-
чиройли ҳазиллар қилиб ўтириди; гаплари эркин, ўткир
ва бийрон эди; баъзи мулоҳазалари чуқур маъноли бў-
ларди... Гапни чалкаштириб туриб, уни кўпдан бери ёқ-
тириб юрганимни билдиридим. Княжна бошини эгди, сал
қизарди.

— Жуда ғалати одам экансиз!— деди, баҳмалдай
кўзларини менга тиккан ҳолда зўраки кулиб.

— Сиз билан танишиш кўнглимда йўқ эди,— деб да-
вом этдим мен,— чунки ённингизда бир талай мухлислар-
ингиз борки, улар орасида кўринмай кетаманни деб
қўрқдим.

— Бекор қўрқибсиз! Ҳаммаси диққинафас қиладиган одамлар...

— Ҳаммаси? Наҳотки, ҳаммаси шунаقا диққинафас қиладиган бўлса?

Княжна худди бир нарсани эсламоқчи бўлгандай, менга тикилиб қаради, кейин яна қизариб кетди-да, ниҳоят қатъий равиша: ҳаммаси! — деди.

— Ҳатто менинг дўстим Грушницкий ҳамми?

— Грушницкий сизнинг дўстингизми? — деди княжна, ишонқирамай.

— Ҳа.

— У диққинафас қиладиган одамлар сирасига кирмайди, албатта.

— Аммо бахтсизлар сирасига киради! — дедим кулиб.

— Албатта. Нега куласиз? Унинг ўрнида сиз бўлингизни истардим...

— Нима бўлибди? Мен ҳам бир вақтлар юнкер эдим, ростини айтсам, умримнинг энг яхши даври — ўша юнкерлик даврим эди!

— У юнкерми?!.. — шошиб сўради княжна ва илова қилди. — Мен ўйловдимки...

— Нима деб ўйловдингиз?

— Ҳеч нима!.. Анови хоним ким?

Шундан кейин гап бошқа томонга бурилиб, ортиқ бу мавзуга қайтмади.

Мазурка ҳам тугади, биз хайрлашдик. Хонимлар тарқалишиб бўлди... Мен кечки овқатни қилгани бориб, Вернерни учратдим.

— Э, баракалла! — деди у. — Ҳали шунаقا экансизда! Княжна билан танишсам — ўлимдан қутқариб танишман, деб ким айтган эди?

— Ундан ҳам яхшироғини қилдим, — деб жавоб бердим мен, — балда уни ҳушдан кетишдан сақлаб қолдим!.

— Ростми? Қани, эшитайлик!..

— Йўқ, ўзингиз топинг, доктор; дунёда сиз топмайдиган ҳеч нарса йўқ-ку?

23 май

Кечқурун соат еттиларда бульварда сайд қилиб юрдим. Грушницкий мени узоқдан кўриб, ёнимга келди: унинг кўзларида аллақандай кулгили севинч порларди.

Қўлимни қаттиқ сиқиб кўришди-да фожиали товуш билан:

— Ташаккур сенга, Печорин... Гапимга тушунгандирсан?.. — деди.

— Иўқ; аммо тушунсам ҳам, тушунмасам ҳам, ташаккурга арзимайди,— деб жавоб бердим мен, ўзимнинг нима яхшилик қилганимни билмай.

— Йўғ-ей? Кечаги-чи? Унутдингми?.. Мери менга ҳамма гапни айтиб берди...

— Шунақами? Ҳамма нарса ўртада бўлиб кетди дегин? Ҳатто ташаккурингиз ҳам-а?..

— Менга қара,— деди Грушницкий, ғоятда мағурланиб,— илтимос қиласман сендан, агар менинг дўстим бўлиб қолишни истасанг, менинг севгимни масхаралаб кулма... Ўзинг кўриб турисан: мен уни жон-дилимдан севаман... Ўйлайман, умид қиласманки, у ҳам мени севади... Сендан битта илтимосим бор: бугун кечқурун уларникига борасан; ҳамма нарсани кўз остига олиб ўтирасанг; мен биламан, бу ишларда сенинг тажрибанг катта, хотинларни мендан яхшироқ биласан... Хотинлар! Хотинлар! Уларни ким тушуна олади? Хотинларнинг табассумлари бир нарса деб турса, кўзлари унинг аксини айтиб туради, гаплари ваъда берса, ўзига тортса, товушлари кўкрагингдан итариб туради... Баъзан энг сир сақлаган фикрларимизни бир пасда билиб оладилар, гоҳида эса равшан ишораларимизга тушунишмайди... Мана, масалан, княжнани олсак; кечагина кўзлари эҳтирос ўти билан ёнар эди, бугун бўлса кўзлари сўнган, совуқ қарайди...

— Балки, сувнинг таъсири ургандир,— деб жавоб бердим.

— Сен ҳар бир нарсанинг ёмон томонини кўрасан... материалистсан!— деб илова қилди Грушницкий, аччиғи келиб.— Кел, материяни ўзгартирайлик,— деди ва ўзининг бу сийқаси чиқиб кетган ўхшатишидан хурсанд бўлиб, кайфи очилиб кетди.

Соат саккиздан ошгач, иккимиз княгиняни котди.

Веранинг уйи ёнидан ўтиб кета туриб, дераза олдида уни кўриб қолдим. Бир-биримиз билан кўз уришириб олдик. Салдан кейин у ҳам Лиговскаяларнинг меҳмонхонасига кириб келди. Қнягиня уни қариндошим деб менга таништириди. Чой ичдик; талайгина меҳмонлар

бор эди; суҳбат умумий тарзда эди. Мен княгиняга ёқиши-
га тиришдим, қизиқ-қизиқ гаплар билан уни бир-икки
марта роса кулдирдим ҳам; княжнанинг ҳам бир неча
марта кулгиси қистади-ю, бироқ ўз ролидан чиқмаслик
учун ўзини тийиб ўтирди; унинг фикрича, унга вазмин-
лик ярашармиш, эҳтимол тўғридир. Менинг қизиқ гап-
ларим унга таъсир этмаганидан Грушницкий ўзида йўқ
хурсанд.

Чойдан кейин ҳаммамиз залга чиқдиқ.

— Итоаткорлигимдан хурсандмисан, Вера? — дедим
мен, унинг ёнидан ўтиб кета туриб.

У менга севги ва миннатдорчилик билан тўлиқ нигоҳ
ташлади. Бундай нигоҳларга ўрганиб қолганман; бир
вақтлар шундай нигоҳлар жонимнинг ороми эди. Княги-
ния қизини фортепъяно ёнига ўтқазди; ҳамма ундан би-
рорта ашула айтиб беришни илтмос қила бошлади, мен
инدامадим, гала-ғовурдан фойдаланиб, Вера иккимиз
дераза ёнига бориб турдик, Вера ҳар иккаламиз учун ҳам
муҳим бир гап айтмоқчи эди. Билсам, беҳуда гап экан...

Ўзимни бепарво тутишим княжнани ранжитиби, бу-
ни унинг бир мартагина менга хўмрайиб қарашидан пай-
қадим: унинг кўзлари чараклаб кетди... О, мен бунақан-
ги сўзсиз, аммо маънодор, қисқа, аммо кучли суҳбатлар-
ни жуда яхши тушунаман!..

Княжна ашула айта бошлади... овози ёмон эмас
екан-у, бироқ ашулани яхши айтолмас экан... ростини
айтсам, ашуласига қулоқ солмадим ҳам. Аммо Груш-
ницкий унинг рўпарасига келиб, роялга суюнган ҳолда
уни кўзи билан еб қўйгудай тикилар ва ҳар лаҳзада:
«chartmant delicieux!»⁵⁸ — деб пичирларди.

— Менга қара,— деди Вера,— эрим билан таниши-
шингни истамайман, аммо княгиняга албатта ёқишинг
керак; бу сенга осон, сен айтганингни қила оладиган
одамсан. Биз фақат шу ердагина кўришиб турдимиз, хо-
лос...

— Фақат?..

Вера қип-қизариб кетди-да, сўзида давом этди:

— Биласан-ку, мен сенинг қулингман; қаршилик кўр-
сата олмайман... бунинг жазосини ҳам тортарман: бир
кун эмас, бир кун мендан совиб ҳам кетарсан! Ҳеч бўл-
маганда, ўз обрўйимни сақлаб қолай дейман-да... шунда
ҳам ўзим учун эмас: ким учунлигини ўзинг яхши била-
сан!.. О, ўтинаман сендан: аввалгидаи бекорчи шубҳа-

лар, сунъий совуққонликлар билан мени қийнама, эҳтимол, тез орада ўлиб кетарман, кундан-кунга путурдан кетаётганимни ўзим сезиб юрибман... шундай бўлса ҳами, келажак ҳаётимни эмас, балки сени ўйлайман... Сиз эркаклар бир боқишнинг қандай роҳатбахш, қўл сиқишининг қанчалик лаззатли эканини англамайсизлар... Менчи? Онт ичиб айтаманки, сенинг овозингни эшитсан, қалбим шундай чуқур ором оладики, бунинг ўрнини мингта оташин бўсалар ҳам босолмайди.

Шу орада княжна ашуласини тугатди. Атрофдан мақтов ёғилиб кетди; унинг ёнига ҳаммадан кейин бордимда, овози ҳақида қўполгина бир гап айтдим.

Княжна настки лабини буриштириб, масхара билан таъзим қилиб, ўрнига ўтириди.

— Ашуlamни эшитмаган бўлсангиз ҳам, мақтовингиздан миннатдорман,— деди у,— балки умуман музикани ёқтирамассиз?

— Аксинча... Музикани, айниқса кечки овқатдан кейин яхши кўраман.

— Грушницкий сизни жуда дағал дидли одам деб тўғри айтган экан... Музикани гастрономик нуқтаи назардан яхши кўрар экансиз...

— Яна хато қилдингиз: мен гастроном эмасман, меъдам жуда расво. Аммо кечки овқатдан кейин музика уйқу келтиради, кечки овқатдан кейинги уйқу эса тани соғлиқ учун яхши, бинобарин, музикани медицина нуқтаи назаридан яхши кўраман. Кечқурун эса, аксинча, музика жуда асабларимни қитиқлайди: ҳаддан ортиқ қайгу босади, ё шўхлигим тутиб кетади. Агар қайфуришнинг ё шўхликнинг ижобий сабаби бўлмаса, униси ҳам, буниси ҳам одамни чарчатади, шуниси ҳам борки, жамиятда қайфуриб ўтиранг — кулги бўласан, ҳаддан ортиқ шўхлик қилсанг одобсилизик бўлади.

Княжна гапимни охиригача эшитмай, Грушницкийнинг ёнига бориб ўтириди, икковлари ўртасида сентиментал суҳбат бошланди: княжна, Грушницкийнинг гапини диққат билан тинглаётганини кўрсатишга тиришса ҳам, унинг доно гапларини паришонлик билан тинглар ва пойма-пой жавоб берарди. Грушницкий эса княжнанинг бесаранжом боқишлиарида акс этувчи ҳаяжон сабабини билмоқ учун унга таажжуб билан қараб-қараб қўярди...

Аммо мен ҳамма сирингизни билиб олдим, княжна, энди эҳтиёт бўлинг! Менга ҳам ўшандай муомала қилиб,

иззат-нафсимни ерга урмоқчи бўласиз, аммо бунга эришолмайсиз! Агар менга уруш эълон қилсангиз, мен ҳам жуда шафқатсиз бўламан.

Кечада давомида жўрттага уларнинг суҳбатига бир неча марта аралашдим, аммо княжна менинг гапимга қуруққина жавоб қайтариб қўя қоларди, охири мен алам қилгандай бўлиб, улардан узоқлашдим. Княжна тантана қиллар эди. Грушницкий ҳам. Суюнинглар, дўстларим, ошиқингиз... Севинчингиз узоқча чўзилмас!.. Нима қилай? Мен ҳар доим ҳар нарсани олддан сезиб юраман... Бирон хотин билан танишсам, унинг мени яхши ёки ёмон кўришини олдиндан пайқаб келганман...

Кечанинг қолган қисмини Веранинг ёнида ўтказдим, тўйгунимизча ўтмишни эслалиб ўтиридик... У менинг нишамни яхши кўраркин, ўзим ҳам билмайман! Менинг бутун сиримни, ҳамма заиф томонларимни ва ёмон эҳтиросларимни билиб олган бирдан-бир хотин ёлғиз шу Вера... Наҳотки, ёмонлик шу қадар жозибали бўлса?..

Кўчага Грушницкий билан бирга чиқдик; кўчада у мени кўлтиқлади-да, узоқ жимликдан кейин:

— Хўш қалай?— деди.

«Аҳмоқ экансан» демоқчи бўлдим-у, бироқ тилимни тийдим, кифт қоқиб қўя қолдим.

29 мај

Шу кунлар давомида тутган йўлимдан сира оғишмадим. Энди менинг гапларим княжнага ёقا бошлади; бoshimdan ўтган бир неча ғалати воқеаларни айтиб бердим, шундан кейин у мени ғайри табиий, ғалати одам деб ўйлай бошлади. Оламдаги ҳамма нарсани, айниқса ҳисларни масхара қилиб куламан, бундан у чўчиди. Менинг олдимда у энди Грушницкий билан сентиментал суҳбат қилишга журъат этолмайди, унинг қилиқларига бир неча марта истеҳзо билан кулиб жавоб қилди, аммо мен ҳар сафар Грушницкий унинг олдига келганда ювощ бўламан-да, икковини ёлғиз қолдириб кетаман; олдинги сафар княжна бундан мамнун бўлди, ҳар ҳолда мамнун бўлганини кўрсатишга тиришди; иккинчи сафар мендан хафа бўлди; учинчи сафар эса Грушницкийдан хафа бўлди.

— Сизда иззат-нафс деган нарса йўқ экан!— деди княжна менга кеча.— Нега Грушницкийни менга ёқади деб ўйлайсиз?

Мен, ўз бахтимни дўстим учун қурбон қилишга тайёр эканимни билдиридим...

— Менинг бахтимни ҳам,— деб қўшиб қўйди у.

Мен унга тикилдим-да, сипо бўлиб ўтиридим. Кейин кечгача у билан гаплашмадим... Кечқурун у ўйчан эди, бугун эрталаб қудуқ ёнида янада хаёлчанроқ кўринди. Ёнига борганимда, у Грушницкийнинг гапини эътиборсизлик билан тинглар, Грушницкий эса, афтидан, табиат манзараларини завқ билан мақтаб турарди; княжна мени кўриши билан ўзини кўрмаганга солиб, хаҳолаб кула бошлади (бу мутлақо ўринисиз эди). Мен сал нарига бордим-да, сездирмасдан қараб турдим: у ўз ҳам-суҳбатидан юз ўғирди-да, икки марта эснаб қўйди. Грушницкийдан безор бўлгани аниқ эди. Княжна билан яна икки кун гаплашмай юраман.

'З июнь

Мен кўпинча нега энди ёшгина бир қизнинг муҳабатига сазовор бўлиш учун ўлиб-тириламан, ахир, мен уни алдаб кетмоқчи ҳам, унга уйланмоқчи ҳам эмасманку, деб сўрайман ўзимдан. Аёлларга хос ноз-карашмани менга ким қўйибди? Башарти княжна мени севган тақдирда ҳам, барибир, Верача севомайди; агар княжна сира ҳам таслим бўлмайдиган нозанин бўлиб кўрингандা эди, балки унга эришишнинг қийинлиги мени қизиқти-рармиди...

Аммо, ундан деб ҳам бўлмайди! Бинобарин, бу нарсани сизни илк ёшлик даврларда қийнаб, азоблаб юрувчи, то биз биронта ўжар хотинни топмагунимизча бир аёлдан иккинчи аёлга юргутирувчи севги деб бўлмайди; шундай ўжар ва қайсар аёлни топдикми, бас, бизнинг вафодорлигимиз, ҳақиқий ва туганмас эҳтиросли муҳабатимиз бошланади, уни математика тили билан айтганда, бир нуқтадан бўшлиққа тушиб қолган чизиқ дейиш мумкин; бу туганмас эҳтироснинг сири мақсадга, яъни охиригача етишнинг иложи йўқлигига.

Шундай экан, нега жон куйдирман? Грушницкийга ҳасад қилганим учунми? Бечора Грушницкий! У бундай туйғуга сазовор эмас. Ё бўлмаса бу, яқин кишимиз ҳамма умидидан маҳрум бўлиб, энди нима қўларини, қайси бир нарсага ишонарини билмай қайғураётган бир пайтда унга:

— Дўстим, бу нарса менинг ҳам бошимга тушган! Мана, кўриб турибсанки, шунга қарамай, тушлигимни ҳам, кечки овқатимни ҳам канда қилмайман, тинч уйқумдан ҳам қолмайман, ўйлайманки, ўлганимда ҳам кўз ёши тўкмасдан, дод-войсиз ўлиб кетарман!— деган гап билан унинг totли хатоларини пучга чиқаришга мажбур этадиган расво, аммо сира енгиб бўлмас ҳис оқибатимикин?

Аммо, бамисоли энди очила бошлаган гул ғунчасидай ёшгина қизга эга бўлишнинг битмас-туганмас нашъаси бор! У бир гулки, ўзининг энг яхши, энг нозик ҳидларини энди чиқиб келаётган қўёшнинг илк нурларига сочади; уни худди шу дамда узиб олиш кераг-у, тўйгунча ҳидлаб-ҳидлаб, ерга ташлаб кетавериш керак, балки бирон ўткинчи уни ердан олар! Мен ҳам ўзимда шундай аўр, ҳеч қониб тўймайдиган, ўз йўлида нима учраса барини ҳазм қилиб кета оладиган ташналик сезаман; ўзгаларнинг бахтсизлиги ёки севинчига, менинг руҳий кучимга озиқ бўлармикин деган нуқтаи назардан қарайман. Ўзим эса ортиқ эҳтирос таъсири остида жиннилик қилишга қодир эмасман; иззат-нафсимни муҳит поймол этиб юборган, аммо у бошқа бир шаклда намоён бўлди, чунки иззат-нафснинг ўзи нима?— ҳар кимдан устун туришга интилиш деган бир гап, менинг энг катта завқ манбам атрофдагиларни ўз иродамга бўйсундиришdir; ўзимга нисбатан бошқаларда севги, садоқат ва қўрқув ҳисси туғдириш, шу устунликнинг белгиси ва энг катта тантанаси эмасми? Ҳеч қандай ҳуқуқقا эга бўлмасдан туриб, бировларнинг азоб ёки шодлигига сабабчи бўлиш — фуруримизнинг энг ширин озури эмасми? Бахт нима? Тўйган фурур. Агар мен ўзимни оламдаги ҳамма одамлардан яхшироқман, қудратлиман деяолсам — баҳтли бўлардим: агар мени ҳамма севгандада эди, ўзимда йўқ битмас-туганмас севги манбаларини топган бўлардим. Ёмонликдан ёмонлик келиб чиқади; биринчи марта кечирган азобинг бошқаларни азоблаш завқини туғдиради; ёвузлик идеяси, уни амалда ишлатиб кўрилмаса ақлга келмайди... кимдир идеялар органик бир нарса деган экан; уларнинг дунёга келиши уларга шакл беради, шакл эса амалнинг ўзгинасидир; кимнинг миясида кўпроқ идея турилган бўлса, ўша одам бошқалардан кўпроқ ҳаракат қиласи; шунинг учун ҳам бирон амал столига борланиб қолган гений худди бутун умрини ўти-

риб ўтказиб, апоплексия⁵⁹ касалидан ўлиб кетган забардаст одамдай, ё ўлиб кетиши ё ақлдан озиши керак.

Эҳтирос — худди энди тараққий топиб келаётган идеяларнинг ўзгинасиdir; у — ёш қалбга хос нарса; умр бўйи эҳтирос билан яшамоқчи бўлган одам — аҳмоқ; кўп сокин дарёлар зўр шалолалардан бошлансаларда, аммо биронтаси денгизгача шундай қутуриб, кўпиреб бормайди. Аммо бундай сокинлик кўпинча, гарчи яширин бўлса ҳам, аслида улуғ кучнинг аломатидир; фикр ва туйғулар чуқур ва тўлиб тошиб турса одамни қутуртирмайди: азобланувчи ва роҳатланувчи қалб ҳамиша ўзини тийиб туради ва худди шундай бўлиши кераклигига ишонади; у, агар момақалдироқ бўлиб турмаса, қуёшнинг муттасил жазирамасида қуриб кетишини билади: ўзи билан овора бўлади, ўз ғамини ейди; худди ёш болани эркалатгандай ўзини-ўзи эркалайди, ўзини-ўзи жазолайди. Инсон ўзини ана шундай юксак дарражада тушунганидагина тангри адолатининг қадрига ета олади.

Шу бетни ўқиб кўрсам, мавзудан четга чиқиб кетибман... Аммо, бунинг нима зарари бор?.. Ахир, бу журнални мен фақат ўзим учун ёзаман, бинобарин, бу журналимга киритилган ҳар бир нарса келажакда мен учун қимматли бир хотира бўлиб қолади.

Грушницкий келиб бўйнимга осилиб олди,— у офицерлик мартабасига кўтарилибди. Иккимиз шампанское ичдик. Унинг кетидан доктор Вернер кириб келди.

— Мен сизни қутламайман,— деди у Грушницкийга.

— Нима учун?

— Шунинг учунки, солдат шинели сизга жуда ярашади, бу ерда тикилган пиёда аскарий мундирнинг сизга ярашмаслигига ўзингиз ҳам иқорор бўлишингиз керак... Гап шундаки, ҳозиргача сиз бошқалардан ажралиб турардингиз, энди бўлса кўпчиликнинг бири бўлиб қоласиз.

— Гапиринг, гапиринг, доктор! Минг гапирсангиз ҳам шодлигимга тўқсин бўлолмайсиз. Ёлғиз эполетларнинг ўзи менга қанча умидлар бағишилаганини бу киши билмайди, — деб илова қилди Грушницкий қулоғимга шивирлаб.— Эҳ, эполетлар, эполетлар! Юлдузларингиз, ўйл кўрсатувчи юлдузларингиз... Йўғ-е, менинг бахтим энди очилиб кетади.

— Биз билан бирга довонга сайдага борасанми? — деб сүрадим мен.

— Менми? Мундирим тайёр бўлмагунча, ўлсам ҳам княжнанинг кўзига кўринмайман.

— Севинчингни унга айтсан бўладими?

— Йўқ, зинҳор айтма, оғайни... Мен уни ҳайратда қолдирмоқчиман...

— Айт-чи, у билан ҳозир алоқаларинг қалай?

Грушницкий хижолат бўлиб, ўйланиб қолди; ёлғоняшик билан мақтангуси келди-ю, аммо уяди, шунингдек, ростини айтишдан ҳам уяларди.

— Узингча, қандай: у сени яхши кўрадими?

— Қўйсанг-чи, Печорин, жуда қизиқ, гапларни гапи-расан-а!.. Бирданига яхши кўриш мумкинми?.. Башарти яхши кўрганда ҳам, ундай андишали хотин ҳеч вақт айтмайди...

— Хўп. Бундан чиқди, сенингча, андишали хотин ўз ҳисларини ҳам яшириб юриши керакми?..

— Эҳ, оғайни, оғайни! Ҳар нарсанинг ўз меъёри бўлади; кўп нарсалар гапирилмайди, кўнгил билан ҳис қилинади.

— Бў гапинг тўғри... Аммо, кўздан пайқалган муҳаббат хотин кишига ҳеч қандай мажбурият юкламайди, ҳолбуки сўз билан изҳор этилган муҳаббат эса... Эҳтиёт бўл, Грушницкий, княжна сени алдаб кетади...

— Княжна-я? — деди у кўзларини кўкка тикиб ва ўзидан мамнун ҳолда кулиб.— Сенга раҳмим келади, Печорин!..

У чиқиб кетди.

Кечқурун бир талай одам довонга пиёда жўнади.

Маҳаллий олимларнинг фикрича, Маъшуқ тогининг ён бағрида, шаҳардан бир чақиримча нарида жойлашган довон — сўниб қолган ёнартогнинг оғзидан бошқа нарса эмас. Унга буталар ва қоялар орасида қолиб кетган торгина сўқмоқ йўлдан борилади; тоқقا чиқаётганимизда княжнага қўлимни узатдим, у сайдага охиригача қўлимни қўйиб юбормади.

Суҳбат фийбатдан бошланди: мен ёнимиздаги ва биз билан бирга бўлмаганларни ёмонлайвердим, олдининг уларнинг кулгили томонларини айтиб бердим, кейин эса бузуқ томонларни ҳам қолмади. Ғазабим қайнади, олдинига ҳазил-мутонба билан бошланган гапим кейин ҳа-

қиқиң ғазабга айланиб кетди. Княжна олдинига кулди, аммо кейин қўрқиб кетди.

— Сиз хавфли одам экансиз! — деди менга. — Сиз нинг тилингизга рўпара бўлишдан кўра ўрмонда қароқчининг пичоғига рўпара бўлишни афзал кўрадим... Сиздан жиддий илтимос қиласман: мени ёмонлаб гапирмоқчи бўлсангиз, яхшиси пичноқни олинг-у, сўйиб қўя қолинг — сиз учун бу унча қийин эмас.

— Наҳотки мен қотилга ўхшасам?..

— Ундан ҳам баттарсиз...

Бир минутча ўйланиб турдим-да, ғоятда таъсирланган қиёфада дедим:

— Тўғри, болалигимдан бери тақдирим шунаقا! Ҳамма одам юзимдан ёмон аломатлар топарди, аслида эса юзимда ундаи аломатлар йўқ эди, аммо одамлар бор деявергандан кейин, пайдо бўлди. Мен жуда камтар эдим, мени муғамбирликда айбладилар, шундан кейин писмиқ бўлиб қолдим. Яхшилик билан ёмонликни жуда яхши ажратабилардим; мени ҳеч ким эркаламасди, си slab-сийпамасди, аксинча ҳамма мени хўрларди; мен кекчи бўлиб қолдим; бошқа болалар ҳамиша хушвақт ва сергап бўлса, мен камгап, қовоғим солиқ юрардим; мен ўзимни улардан афзалман деб ҳис қилардим, аммо мени улардан паст қўйишарди, — натижада баҳил бўлиб қолдим. Мен бутун оламни севишга тайёр эдим, — аммо мени ҳеч ким англамади, шундан кейин ҳамма нарсани ёмон кўришга ўргандим. Менинг шум ёшлигим ўзим ва бутун муҳитга қарши кураш билан ўтди, масхара бўлишдан қўрқиб, ўзимнинг энг чуқур жойларига яширдим, улар ўша ерда ҳалок бўлиб кетди. Мен тўғри гапирсам менга ишонишмасди: шундан кейин алдамчи бўлдим; дунёнинг борди-келдисини ва жамиятнинг сирларини билиб олиб, турмуш деган илмнинг тагига етдим, аммо бу илмдан сира хабарлари бўлмаган одамларнинг мен ўлиб-тирилиб эришмоқчи бўлган манфаатлардан бекорга фойдаланиб, баҳтли бўлиб юришларини кўрдим. Шундан кейин қалбимда умидсизлик туғилди, аммо бу тўппонча ўқи билан бартараф қилинадиган умидсизлик эмас, балки антиша ва мулоийм табассум ниқоби остида одамни эзиб юборадиган бир умидсизлик эди. Мен руҳан ногирон бўлиб қолдим: кўнглимнинг ярми қуриб хазон бўлган эди, уни кесиб ташладим, ана шундан кейин иккинчи ярми

тебранди, ҳар кимсанинг хизмати учун жонланди, бироқ буни ҳеч ким сезмади, чунки унинг ярмининг ҳалок бўлиб кетганидан ҳеч кимнинг хабари йўқ эди; мана сиз ҳозир уни эсимга туширдингиз, мен сизга унинг эпитафия⁶⁰ сини ўқиб бердим. Эпитафия деган нарса кўп одамларга кулгили кўринади, менга эса, айниқса эпитафия остида дафн этилганлар эсимга тушса, сира кулгили кўринмайди. Мен сизга, менинг фикримга шерик бўлинг демайман: менинг қилиғим сизга кулгили кўринса — марҳамат, кулинг, аммо огоҳлантириб қўяйки, бу нарса мени заррача ҳам хафа қилмайди.

Шу онда унинг кўзларига кўзим тушиб қолди: кўзлари жиққа ёшга тўлган эди; қўлимни ушлаб турган қўли титрарди; юзлари ловиллаб ёнарди: менга раҳми келган эди! Барча хотинларга тезда таъсир этувчи шафқат ҳисси унинг тажрибасиз қалбига ҳам ўз чангалини солган эди. Сайр давомида хаёли паришон бўлиб юрди, ҳеч ким билан йўнашмади, бу эса буюк аломат!

Довонга етиб келдик; хонимлар кавалерларини қолдирдилар, аммо княжна ҳамон қўлимни қўймасди. Шу ерлик олифталарнинг сўзамоллиги ҳам уни кулдирмасди; чоҳ ёқасида турган ойимқизлар чоҳнинг тикилигини кўриб, кўрқанларидан фарёд чекиб кўзларини юмиб олсалар ҳам, у қўрқмасдан тураверди.

Қайтишда ғамгин суҳбатни ортиқ давом эттирамадим; аммо княжна менинг бекорчи савол ва ҳазилларимга паришонхотирлик билан қисқа-қисқа жавоб берарди-қўярди.

— Ҳеч кимни севганимисиз? — деб сўрадим, ниҳоят.

Княжна менга тикилиб қаради-да, бошини чайқаб, яна хаёлга ботди; унинг бир гап айтмоқчи бўлгани, аммо нимадан бошлишини билмай тургани аниқ эди; қўкраги ҳаяжондан кўтарилиб тушарди... Начора! Нафис кўйлакнинг енги тўсқинлик қилолмас экан: қўлимнинг электр учқуни унинг қўлига ҳам ўтди; деярли ҳамма эҳтирослар шу билан бошланади; кўпинча биз, хотинлар жисмоний ёки руҳий хислатларимиз учун бизни яхши кўради деб ўзимизни ўзимиз алдаб юрамиз, албатта бу хислатлар хотин қалбини муқаддас ўтни қабул қилишга ҳозирлайди, аммо ҳамма нарсани баданинг биринчи марта тегиши ҳал қиласди.

Сайрдан қайтиб келганимиздан кейин, княжна зўраки бир табассум билан:

— Мен бугун ўзимни роса мулдйим тутдимми? —
деди.

Биз ажралишдик.

У ўзидан норози; у ўзини совуқликда айблайди... О, биринчи ва энг катта ғалаба шу-да! Эртага албатта мени мукофотлаш орзусига тушади. Буни мен олдиндан биламан — мана шуниси одамни зериктиради!

4 июнь

Бугун Верани кўрдим. У раشك қилавериб мени роса қийнади. Княжна унга ўз қалб сирларини айтганга ўхшайди, агар шундай бўлса, тоза одамини топиб айтибди.

— Бунинг оқибати нима бўлишини билиб юрибман,—
деди Вера,— яхшиси, уни севаман деб қўя қол.

— Севмасам-чи?

— Севмасанг, нега уни таъқиб этасан, кетидан юрасан, хаёlinи қочириб ҳаяжонга соласан?.. О, мен сени яхши биламан! Менга қара, агар менга ишонсин десанг, бир ҳафтадан кейин Кисловодскка борасан; индинга Кисловодскка кўчиб кетамиз. Княгиня бу ерда яна бир мунча вақт туради. Бизнинг ёнимиздан квартира ижара ол; биз булоқ ёнидаги катта уйнинг болохонасида яшаймиз; пастига княгиня Лиговская кўчиб боради, ўша бинонинг ёнида битта бўш уй бор, у ҳам бизнинг уй эгасига қарайди... Борасанми?..

Мен бораман деб ваъда қилдим-да, ўша куниёқ, уйни ижарага олиш учун одам юбордим.

Кечқурун соат олтида Грушницкий келди ва мундирининг эртага, нақ бал кунига тайёр бўлишини билдириди.

— Ниҳоят, княжна билан туни бўйи танца қиламан..
Тўйгунимча гапиришаман! — деб илова қилди.

— Бал қачон?

— Эртага, эртага! Ҳали хабаринг йўқми? Жуда катта базм бўлади, маҳаллий маъмурлар ўтказмоқчи...

— Юр, бульварга...

— Сира-сира чиқмайман! Шу расво шинелда...

— Ие, шинелни ёмон кўриб қолибсанми?..

Бульварга ёлғиз ўзим чиқдим, княжнани учратиб, мазуркага таклиф қилдим. Княжна севингандай ва ажаблангандай бўлди.

— Утган сафаргидаи, сиз фақат заруратдан танца

қиларсиз деб ўйловдим,— деди княжна, латиф табассум билан; у Грушницкийнинг йўқлигини бутунлай сезмади, назаримда.

— Эртага бир нарсани кўриб, жуда ажабланасиз,— дедим мен.

— Нимани?

— Бу сир... балда ўзингиз кўрасиз.

Кунни княгиняникида кеч қилдим; Верадан ва бир ғалати чолдан бошқа меҳмон йўқ эди. Қайфим жойида эди, ҳар хил олди-қочди воқеаларни гапириб бериб ўтиредим; княжна рўпарамда ўтиради, менинг сафсатала-римни шу қадар диққат ва ҳаяжон билан тинглардики, ҳатто ўзим ҳам уялиб кетдим. Унинг шўхликлари, нозкарашмалари, қизик-қизиқ инжиқликлари, кеккайишлари, истеҳзоли кулишлари, паришонликлари қайга кетди?

Вера буларнинг ҳаммасини пайқади: унинг касалманд чеҳрасида чуқур қайғу акс этди; у дераза тагидаги чуқур креслода ўтиради... Унга раҳмим келиб кетди...

Шундан кейин мен, бизнинг танишганимиз, икки ўртадаги муҳаббатимиз тарихини айтиб бердим, буни шубҳасиз, бошқа одамларнинг номлари билан ниқоблаб, сўзлаб бердим.

Мен ўзимнинг унга бўлган муҳаббатим, ташвиш ва севинчларимни жонли бир суратда ҳикоя қилиб бердим; унинг қилиқларини, характеристерини шундай мақтаб таърифладимки, Вера ноилож менинг княжна билан юрганимни кечиришга мажбур бўлди.

Ўрнидан туриб, ёнимизга келиб ўтиреди, жонланиб кетди... докторларнинг соат ўн бирда ётиб ухлаш керак, деган насиҳати соат иккida эсимизга келиби.

5 шоњъ

Балга ярим соат қолганда, Грушницкий пиёда армия мундирини кийиб келди. Учинчи тугмасига бронза занжир, занжирга икки қават лорнет тақиб олибди; ҳаддан ортиқ катта эполетлари худди амур⁶¹ қанотидай тепага қайриб қўйилган; этикларининг гарчи оламни бузади, чап қўлида жигарранг чарм қўлқоп билан фуражкаси, ўнг қўли эса жингалак қилиб таралган соchlарини дам ўтмай силаш билан банд. Афтидан, ўзидан мамнун ва шу билан бир қаторда, қандайдир беқарор бўлиб турганлиги кўриниб турарди; унинг ясан-тусани, кеккайиб

юришларини кўриб, кулиб юборишимга сал қолди, аммо кулсам бўлмасди, чунки режам бузиларди.

Фуражкаси билан қўлқопларини столга ташлади-да, ойна олдига бориб, этикларининг қўнжини тортиб, ўзига оро бера бошлади. Энгагини тираб турган баҳайбат ёқаси ичидан тақилган каттакон қора рўмолчанинг ярми ёқаси устидан ярим вершокча чиқиб туради, назарида бу ҳам оз кўринди шекилли, рўмолчани қулоғигача тортиб қўйди; бу сермашаққат ишдан юzlари қип-қизариб кетди, чунки мундириининг ёқаси жуда тор эди.

— Кейинги кунларда менинг княжнамга жуда осилиб юрганишсан?— деди у, менга қарамасдан бепарво бир оҳангда.

Унинг бу галига мен, бир замонлар ўтган ва Пушкин томонидан тасвирланган энг ўткир бир хотинбознинг яхши кўрган мақоли билан жавоб бердим.

— Биз аҳмоқларга чой насиб қилибдими?

— Айт-чи, мундирим ярашилтими?.. Вой лаънати жуҳуд-еъ!.. Қўлтиғимнинг тагини жуда тор қилиб қўйипти-ку!.. Атиринг борми?

— Яна атир сепиб нима қиласан? Ҳамма ёғингдан атир ҳиди анқиб туритти-ку...

— Майли. Беравер...

Галстугининг орқасига, дастрўмолига, енгларига ярим шишача атир қўйди.

— Танца қиласанми?— деб сўради мендан.

— Билмайман.

— Княжна билан мазурка бошламасам деб қўрқаман,— деярли бирорта фигурани ҳам билмайман...

— Сен уни мазуркага таклиф этдингми?

— Ҳали таклиф этганим йўқ...

— Эҳтиёт бўл, бошқа одам сендан олдин таклиф этиб қўймасин.

— Ростми?— деди у, пешанасига бир уриб.— Яхши қол... Бориб уни эшик олдида кутиб тураман.— У фуражкасини олди-да, югуриб чиқиб кетди.

Ярим соатдан кейин мён ҳам жўнадим. Қўча қоронги ва кимсасиз эди; клуб дейсизми, қовоқхона дейсизми, барибир, ишқилиб, бино олдида одам тирбанд; деразалардан ёруғ тушиб туритти; оқшом шамоли қулоғимга полк оркестрининг овозини учирив келтирарди. Мен сеқин-секин борардим; таъбим хира эди... Наҳотки менинг бу дунёдаги бирдан-бир вазифам ўзгаларни умиддан

маҳрум қилиш бўлса?— деб ўйлардим. Дунёга келганимдан бери тақдир мени ўзгаларнинг савдосини ҳал қилишга чорлайди, гўё ҳеч ким менсиз ўлолмайдиган, менсиз умидсизлана олмайдигандай! Мен бешинчи пардада иштирок этувчи сиймо бўлиб қолдим; мен ихтиёrsиз рawiда жаллод ёки хон ролини ўйнаб келаман. Тақдирнинг мақсади нима?.. Тақдир мени мешчанлар учун трагедия ёки оилавий романлар ёзишга, ё бўлмаса қиссалар босиб чиқарувчи, масалан, «Ўқиш китоблар кутубхонаси» учун қиссалар бериб турувчи ходим қилишни мўлжаллаб қўйганмикан?.. Ким билади?.. Уз ҳаётлари бошида Буюк Александр⁶² ёки лорд Байрон⁶³ бўлиб ўлишни орзу қилган, аммо умр бўйи титуляр советник⁶⁴ бўлиб ўлиб кетган одамлар камми?

Залга киргач, эркаклар тўпи орасига беркиниб, атрофни кузата бошладим. Грушницкий княжнанинг ёнида туриб, зўр ҳаяжон билан унга алланималар дер эди; княжна унинг гапини паришонхотирлик билан тинглар, елпуғичини лабига қўйиб, нуқул атрофга қаради; чеҳрасида тоқатсизлик аломати акс этарди, кўзлари бирорни изларди; уларнинг гапини эшитай деб, секин орқала-рига бориб турдим.

— Мени жуда қийнаяпсиз, княжна!— дерди Грушницкий:— Сизни кўрмаганимдан бери жуда ўзгариб кетибсиз...

— Сиз ҳам ўзгариб кетибсиз,— деб жавоб берди княжна, унга ялт этиб қараб; Грушницкий унинг бу боқишида яширин истехзо борлигини сезмади.

— Мен-а? Мен ўзгарибманми?.. О, ҳеч бир-да! Бундай бўлиши мумкин эмаслигини ўзингиз яхши биласиз! Сизни бир марта кўрган одам тўзал жамолингизни ўла-ўлгунича унутмайди...

— Қўйсангиз-чи...

— Яқиндагина тез-тез эшитиб турган гапларни нега энди эшитгингиз келмайди?...

— Чунки бир нарсани қайта-қайта эшитишни ёмон кўраман,— деди княжна кулиб...

— О, мен аччиқ хато қилган эканман!.. Мен телба, жуда бўлмаса мана бу эполетларим умид боғлаш ҳуқуқини берар деб ўйлаб юрган эканман... Йўқ-а, ўша лаънати солдатча шинелимда абадий қолсам бўлмас эканми... сизнинг менга бунчалик илтифот қилишингиз-ниңг сабабчиси ўша шинель эди-ку...

— Рост, шинель сизга күпроқ ярашади...

Шу пайт мен улар олдига келдим-да, княжнага таъзим қилдим; княжна бىр оз қизарди ва шошиб деди:

— Рост-а, мсъе Печорин, мсъе Грушницкийга кулранг шинель күпроқ ярашади?..

— Фикрингизга қўшилмайман,— деб жавоб бердим мен,— мундирда бу янада ёшроқ кўринади.

Бу зарбага Грушницкий бардош беролмади ҳамма ёш болалар каби у ҳам ўзини катта қилиб кўрсатишни яхши кўради; у юзидаги чуқур эҳтирос излари ёшлик аломатини билдиради деб юради. Менга ўқрайиб қарди-да, ер тепиниб, ёнимдан кетди.

— Ростингизни айтинг,— дедим мен, княжнага қараб,— гарчи Грушницкий ҳамиша кулгили одам бўлса-ҳам, яқиндагина кул ранг шинель кийиб юрганида... сизга анча жозибадор бўлиб кўринарди, а?..

Княжна ерга боқиб, индамади.

Бутун кеча Грушницкий княжнанинг кетидан эргашиб юрди, у билан ўйинга тушарди, ё бўлмаса *vis-a-vis*⁶⁵ танца қилганда кўзлари билан еб қўйгундай бўларди, оҳ тортарди, ниҳоят, ўзининг оҳ-фигонлари билан княжна-ни безорижон қилди. Учинчи кадрилдан кейин княжна ундан нафратлана бошлади.

— Сендан буни кутмаган эдим,— деди Грушницкий, ёнимга келиб қўлимдан ушлаб.

— Нимани?

— У билан мазуркага тушармишсан-а?— деб сўра-ди, тантанали бир оҳангда.— Менга ўзи айтди...

— Нима қилиби, айтса?.. Буни бирор сир деганими-ди?

— Албатта-ку-я... Қиз боладан... бу нозли қиздан шуни кутишим керак эди... Бир ўчимни оламан-ку!

— Ўзингнинг шинелингдан ё эполетларингдан ўпка-ла, нега айбни унга тўнкайсан?..

— Бўлмаса, нега умидвор қилади?

— Нега ўзинг умидвор бўлдинг? Бирон нарсанни ор-зу қилиш ва унга эришиш бошқа гап-у, умидворлик де-ган нарса бутунлай бошқа нарса.

— Гаровда сен ютдинг, аммо бутунлай эмас,— деди у заҳарханда билан.

Мазурка бошланди. Грушницкий фақат княжнани танлади, бошқа кавалерлар эса княжнани дам ўтмай танлаб тураг әдилар: бунинг менга қарши тузилган бир

қасд эканлиги равшан эди; бу қайтанга яхши: княжна мен билан сұхбатлашиш орзусында, аммо унга ҳалал берішмоқда, натижада унинг орзусы янада кучаяди.

Бир-икки марта құлыми секин қисиб қўйдим; иккinci марта қисганимда құлими тортиб олди-ю, аммо индамади.

— Бу кеча яхши ухлолмай чиқаман,— деди княжна, мазурка тугагандан кейин.

— Бунга Грушницкий айбдор.

— Ҳеч бир-да!— Унинг юзи шу қадар ғамгин, шу қадар хаёлчан бир тус олдики, «шу кеча қўлидан албатта ўпаман», деб онт ичиб қўйдим.

Меҳмонлар тарқалиша бошлади. Княжнани каретага ўтқаза туриб, тезгина нозик қўлчасини лабимга босдим. Қоронғи эди, ҳеч ким кўрмади.

Ўзимдан мамнун бўлиб залга қайтдим.

Катта стол теварагида ёшлар кечки овқат қилиб ўтиришарди, улар ичиди Грушницкий ҳам бор эди. Мен киришим билан ҳаммалари жим бўлиб қолишибди: гап менинг устимда кетаётган бўлса керак. Ўтган сафарги балдан кейин кўплар, айниқса драгун капитани мендан хафа эди, эндиликда Грушницкий бошчилигида менга қарши шайка тузилётганлиги аниқ кўринарди. Унинг важоҳати зўр, гердайган кўринади...

Жуда соз, христианчасига бўлмаса ҳам, ҳар ҳолда ўз душманларимни яхши кўраман, улар менга эрмак бўладилар, қонимни қайнатадилар. Ҳамиша кўз-қулоқ бўлиб туриш, ҳар қараш, ҳар сўзнинг мағзини чақиш, душман ниятларини билиб олиш, фитналарини пучга чиқариш, ўзингни алданганликка солиб, ҳар хил ҳийланайранглар ва орзу-ниятлардан қурилган улкан бинони қулатиб юбориш — ҳаётнинг завқи деб мен мана шуни атайман.

Кечки овқат тамом бўлгунча Грушницкий драгун капитани билан шивирлашиб, кўз қисишиб ўтириди.

6 июнь

Бугун эрталаб Вера эри билан Кисловодскка жўнаб кетди. Княгиня Лиговскаяникига бора туриб, уларнинг кареталарини кўриб қолдим. Вера менга бошини силкитиб қўйди: кўзларида ўпкаланиш акс этарди.

Айб кимда? Нега ўзи мен билан танҳо учрашишни

истамайди? Севги ҳам бамисоли ўт, қалаб турilmаса ўчиб қолади. Балки менинг ялиниб-ёлворишларим ба-жаролмаган ишни энди рашк бажарар.

Княгиняникида бир соатча ўтиридим. Мери чиқмади — бетоб эмиш. Кечқурун бульварга ҳам чиқмади. Лорнет тутган янги шайка ҳақиқатан ҳам даҳшатли қиёфага кирди.— Княжнанинг бетоблигидан хурсандман: бетоб бўлмаганда, унга бирор беодоблик қилган бўлардилар. Грушницийнинг соchlари паҳмайған, жуда хит кўрина-ди; чинакам хафа бўлганга ўхшайди, айниқса иззат-наф-си таҳқир этилган кўринади; аммо шундай одамлар ҳам бўладики, улар ҳатто жиги-бийронлари чиқиб турганида ҳам кулгили кўринадилар!

Уйга қайтгач, худди бир нарсам камдай туюлди.

Мен уни кўрмадим! У касал! Ростдан ҳам уни яхши кўриб қолдимикин? Бўлмаган гап!

7 июнь

Эрталаб соат ўн бирда,— княгиня Лиговскаянинг одатда Ермолов ваннасида терлаб ётадиган вақтида,— уларнинг уйлари ёнидан ўтдим. Княжна дераза олдида хаёл суриб ўтирганди; мени кўриб ўрнидан иргиб турди.

Даҳлизга кирдим; хизматкорлар ҳеч бири йўқ экан, бу ердаги расм-одатларнинг эркинлигидан фойдаланиб, хабар қилмасданоқ тўғри меҳмонхонага кириб бордим.

Княжнанинг ёқимли чеҳраси рангсиз ва сўлғин эди. У фортельяно олдида бир қўли билан креслонинг суюн-чиғига суюниб турарди: суюнган қўли титради; мен унинг олдига секин бордим-да:

— Мендан хафамисиз? — дедим.

Княжна чуқур ва ҳорғин кўзлари билан менга тикилди-да, бош чайқади; лаблари бир нарса демоқчи эди-ю, аммо айтмади; кўзлари ёшга тўлди; креслога ўтирди-да, қўллари билан юзини яширди.

— Нима бўлди сизга? — дедим, қўлидан ушлаб.

— Сиз мени ҳурмат қилмайсиз!.. О, қўйинг мени!..

Мен бир неча қадам юрдим. У ўтирган ерида қаддини ростлади, кўзлари чақнаб кетди.

Мен эшик қабзасини ушлаб тўхтадим-да:

— Кечиринг мени, княжна! — дедим.— Мен телба-лардай иш қилдим... Бу ортиқ такрорланмайди; бундай қилмаслик чорасини кўраман... Шу маҳалгача менинг

қалбимда нималар бўлганини билиб нима қиласиз? Буни сиз ҳеч вақт билолмайсиз, билмаганингиз тағин яхши. Хайр энди.

Чиқиб кета туриб, унинг йигисини эшитгандай бўлдим.

Кечгача Маъшуқ атрофида пиёда айланиб юрдим, ўлгудай чарчадим, уйга қайдим-да, ўзимни ўринга таппа ташладим.

Вернер келди.

— Княжна Лиговскаяга уйланармишсиз, ростми? — деб сўради мендан.

— Нима қилди?

— Бутун шаҳарда дув-дув гап, мен даволаётган ҳамма касаллар ҳам шу янги гап билан машғул, бу касаллардан ҳеч гап қочиб қутулмайди!

«Бу Грушницкийнинг найранги!» деб ўйладим.

— Доктор, бу овозаларнинг ёлғонлигини исбот этиш учун, қулоғингизга секин айтиб қўяй: эртага Кисловодска жўнаб кетаман...

— Княжна ҳамми?..

— Йўқ: княжна яна бир ҳафта шу ерда қолади...

— Демак уйланмаслигингиз рост?..

— Доктор, доктор! Менга бир қаранг: мен сира уйланадиган одамга ўхшайманми?

— Мен ўхшайсиз деяётганим йўқ... Аммо, ўзингиз биласиз, шундай ҳоллар бўладики... — деб илова қилди доктор муғамбирона кулиб, — шундай ҳоллар бўладики, олижаноб одам албатта уйланиши керак бўлиб қолади; ундан кейин бундай ҳолларнинг жўрттага олдини олмайдиган онлар ҳам бўлади... Хуллас, дўстингиз сифатида, эҳтиёт бўлиб юришин тавсия этмоқчиман. Бу ернинг ҳавоси жуда хавфли: ўзи баҳтиёр бўлишга лойиқ-ку, аммо бу ердан уйланиб кетган қанча-қанча ёшларни кўрганман... Ишонасизми, ҳатто мени ҳам уйлантироқчи бўлишган! Айниқса, қайси бир уездли она ранги чиқмай юрган қизини менга бермоқчи бўлиб жуда қистади. Баҳтсизликни қарангки, мен унга қизингизнинг ранги эрга теккандан кейин очилиб кетади деб қўйибман-да! Айтдим-у, балога қолдим: йиғлай-йиғлай миннатдорчилек билдириб, қизини ва бутун мол-мулкини менга инъом қилиб ўтирипти,— мулкида элликтача олам бўлса керак. Аммо мен, бу иш қўлимдан келмайди деб, зўрга қутулдим...

Вернер, мени бир балодан қутқардим деб ишонгани ҳолда чиқиб кетди.

Унинг гапидан мен, ўзим ва княжна ҳақида шаҳарда ҳар хил bemаза гаплар тарқалганини англадим: бу Грушницкийга арzonга тушмайди!

10 июнь

Кисловодскка келганимга уч кун бўлди. Верани ҳар куни қудуқ бошида ё сайргоҳда кўраман. Эрталаб тураман-да, дераза олдига ўтириб, лорнет билан унинг балконига қарайман; у аллақачон кийиниб, менинг ишорамни кутиб турган бўлади; биз, уйларимиздан бошлиниб то қудуқчача чўзилиб кетган боғда тўсатдан кўришиб қолгандай учрашамиз. Ҳаётбахш тог ҳавоси унга яна куч багишлаб, ранг-рўйини қайтарди. Нарзанни баҳодир булоқ деб аташлари ҳам бежиз эмас. Шу ернинг кишилари Кисловодск ҳавоси ишқ-муҳаббатга чорлайди, Маъшуқ этагида бошланган ҳамма романлар шу ерга келиб анжомига етади, дейишади. Дарҳақиқат, бу ерда танҳо юришга қулай жойлар жуда кўп эди, бу ернинг ҳамма нарсаси,— аргувон хиёбонларнинг тангадай офтоб тушмайдиган соялари ҳам, уларнинг тагидан тошдан-тошга сакраб шариллаб оқувчи ва ям-яшил тоғлар орасидан ўзига йўл солиб кетувчи сой ҳам, жимжит ва қоп-қоронги даралар ҳам, уларнинг ҳар томонга тизилиб кетган тармоқлари ҳам, баланд-баланд жануб кўкатлари ва оқ акацияларнинг ҳиди билан тўлган хушбўй шабадалар ҳам, водийнинг охирига етиб олдинма-кетин чопиб борувчи ва Подкумокка қуюловчи муздек сойларнинг ҳамиша лаззатли аллалаб туриши ҳам — бари одамга аллақандай сирли туюлади. Бу томонга келиб дара анча кенгаяди ва ям-яшил жарга айланади; жарлик тагидан қинғир-қийшиқ чангли йўл ўтади. Ҳар сафар бу йўлга қараганимда, назаримда, карета келаётгандай ва карета деразасидан қизил гулдай чеҳра қараб тургандай туюлади. Бу ердан кўп кареталар ўтди-ю, бироқ ундан ҳамон дарак йўқ эди. Қалъа ортидаги слободка ижаракилар билан лиқ тўлди, менинг квартирамдан сал наридаги тепаликка қурилган ресторациянинг чироқлари кечалари икки қатор тераклар орасидан милтиллаб туради. У ердан ярим кечагача одамларнинг ғовур-ғувури, стаканларнинг жаранглаши эшитилиб турди.

Кахетин виноси билан минерал сув ҳеч қаерда бунчалик күп ичилмаса керак.

Бу икки касбни қўшишга кўпdir талабгор.

Мен-чи, улар жумласидан эмасман зинҳор*.

Грушницкий ҳар куни ўз шайкаси билан бирга қовоқ-хонадан чиқмайди, мен билан деярли саломлашмайди ҳам.

Бу ерга кечагина келган бўлса ҳам, ҳалитдан учта кекса одам билан уришилти: улар ваннага ундан илгари тушмоқчи бўлишган экан; афтидан, бошига тушган фалокат унинг жасоратини ошириб юборганга ўхшайди.

11 июнь

Ниҳоят, улар келишди. Мен дераза олдида ўтирган эдим, бирдан кареталарнинг дукури эшитилди: юрагим гупиллаб ура бошлади... Бу қандай бўлди? Наҳотки ошиқ бўлиб қолган бўлсам?. Мен шундай тентак одамманки, шундай бўлиши ҳам ажаб эмас.

Тушки овқатни уларницида қилдим. Княгиня менга жуда меҳрибонлик билан қарайди, қизининг ёнидан асло нари силжимайди... иш чатоқ! Бунинг устига, Вера княжнадан рашк қиласди: орттирган ҳаловатим шу бўлди. Хотин киши ўз рақибасини хафа қиласман деса қўлидан ҳар нарса келади! Эсимда бор, бир хотин мени бошқа бир хотинни яхши кўрганим учун севарди. Хотинлар ақлидан кўра ғалатироқ нарса бўлмаса керак: уларни бирон нарсага сира ишонтириб бўлмайди, уларни шундай қилиш керакки, ўzlари ўzlарини ишонтиrsин: ўzlарининг илгариги фикрларини рад қилиш учун ишлатадиган исбот ва далиллари ниҳоятда қизиқ бўлади; уларнинг диалектика⁶⁶сини ўрганиб олиш учун, мактабда ўтилган ҳамма логика⁶⁷ қоидаларини миядан чиқариб ташлаш керак. Масалан, энг оддий усул:

Бу одам мени севади; аммо менинг эрим бор: бинобарин мен уни севмаслигим керак.

Хотинлар қоидаси:

Мен уни севмаслигим керак, чунки менинг эрим бор; аммо у мени яхши кўради, бинобарин...

Бунинг кетидан бир неча қатор нуқта келади, чунки буёғи ақлдан чиқмайди, бу ёғини тил, кўз ва, улардан кейин, агар бўлса, қалб гапиради.

* А. С. Грибоедовнинг «Ақл балоси» комедиясидан (Ред.)

Бир кун эмас, бир кун шу хотираларим хотинларнинг қўлига тушиб қолса нима бўлади? Улар нафрат билан:— Тұхмат бу!— деб қичқиришади.

Шоирлар дунёга келиб шеър ёза бошлаган ва бу шеърларни хотинлар ўқий бошлагандан бери (бунинг учун уларга минг раҳмат), шоирлар уларни минг-минг марта фаришта деб аташадики, улар содда дил бўлганликлари учун бу хушомадга ишонадилар, аммо шу билан бирга, ўша шоирларнинг пул учун Неронни ярим худо даражасига кўтарғанликларини унутадилар...

Менга, дунёда улардан бошқа ҳеч бир нарсани севмаган, ўзининг ҳузур-ҳаловати, иззат-нафси, ҳаётини уларга фидо қилишга тайёр бўлган мендай одамга, улар ҳақида бунчалик аччиқ гапириш ярамаса керак... Аммо мен уларнинг юзидан, фақат ўрганган кўзгина кўра оладиган сеҳрли пардани олиб ташларканман, буни мен алам қилгандан ё бўлмаса иззат-нафсим таҳқирлагани учун қилаётганим йўқ. Улар ҳақида ҳамма гапларим:

Ақлнинг совуқ кузатишлари
Ва дилда қайғунинг излари*

оқибати, холос.

Хотинлар шунга эришмоқлари керакки, ҳамма эркаклар ҳам уларни менчалик яхши кўрадиган бўлсин, чунки улардан қўрқмайдиган бўлганим, уларнинг ҳамма заиф томонларини билиб олганимдан кейин, уларни минг марта ортиқроқ севадиган бўлдим.

Дарвоқе: яқинда Вернер, хотинларни Тасса⁶⁸нинг «Озод этилган Қуддус» деган китобида тасвир этилган тилсимили ўрмонга ўхшатди. «Ўрмонга оёқ қўйдингми, бас,— деган эди у,— ҳар томонингдан бурч, кибр, одоб, умум фикри, масхаралаш, нафрат сингари қўрқинчли нарсалар бостириб келаверади... Фақат, уларга қарамасдан, тўғрига қараб кетавериш керак: шундай қилсанг даҳшатли нарсалар аста-секин ўзидан ўзи йўқолиб кетади-да, қаршингда жимжит ва ёрқин бир майдон очилади. Майдоннинг ўртасида ҳамиша ям-яшил ўсадиган мирт дарахти гуллаб турган бўлади. Аммо биринчи қадам босишингдаёқ юрагинг бардош беролмай, орқангта қайрилиб қарадингми—тамом бўласан!»

12 июнь

* А. С. Пушкиннинг «Евгений Онегин»идан.

Бугун оқшомда жуда күп воқеалар бўлиб ўтди. Кисловодскдан уч чақиримча нарида, Подкумок оқиб ўтадиган дара ичида, *Халқа* деган бир қоя бор; бу қоя — табиат томонидан барпо этилган бир дарвоза; дарвоза жуда баландга кўтарилади, ботиб борувчи қуёш шу тешикқоя орасидан оламга ўзининг энг сўнгги ва оташин назарини ташлаб ўтади. Бир талай отлиқлар билан бирга тош ром орқали офтоб ботишини томоша қилгани жўнадик. Ростини айтганда, ҳеч ким офтобни томоша қилишни ўйламасди. Мен княжнанинг ёнида борардим, уйга қайтишда Подкумок дарёсини кечиб ўтишга тўғри келди. Тоғдан оқиб тушувчи кичик-кичик саёз сойлар шунинг учун хавфли бўладики, тўлқинларнинг таъсири остида уларнинг таги ҳар доим ўзгариб турди: кеча тош ётган жойда бугун бирдан чуқур пайдо бўлиб қолади. Мен княжна отининг жиловидан ушладим-да, сувга етаклаб тушдим, сув отнинг тиззасидан келарди; биз сув оқимиға қарши секин-секин қиялаб ўта бошладик. Маълумки, тез оқар сойлардан ўтганда сира сувга қарамаслик керак, чунки қарасанг дарров бошинг айланиб кетади. Бу ҳақда княжна Мерини огоҳлантириб қўйишни унугланган эканман.

Сойнинг ўртасига, энг тез оқадиган ерига етганимизда княжна бирдан эгарда гандираклаб кетди. «Мазам қочди!» — деди, ожиз бир товуш билан... Мен дарров энгашдим-да, унинг хипча белидан қуchoқлаб олдим.

— Юқорига қаранг! — деб шивирладим қулоғига.— Ҳеч нима қилмайди, қўрқманг; ёнингизда мен борман.

Анча ўзига келди; қучофимдан чиқмоқчи бўлган эди, бироқ мен унинг юмшоқ ва нозик белидан янада маҳкамроқ сиқиб олдим: юзим унинг юзига деярли тегиб турарди; юзи ловуллаб ёнарди.

— Бу нима қилганингиз?.. Ё раббий!..

Мен унинг титрашига, уялишига қарамай, лабимни латиф юзига босдим; у бир сесканиб тушди-ю, бироқ индамади; биз ҳаммадан орқада борардик: ҳеч ким кўрмади. Қирғоққа чиққач, ҳамма отларни чоптириб кетди. Княжна отини секин юргизди, мен ҳам унинг ёнида қолдим; менинг индамай боришим уни хавотирга солиб қўйганлиги равшан эди, аммо мен нима бўларкан деб жўрттага сукут сақлашга қарор бердим. Унинг бу мушкул аҳволдан қандай чиқишини кўрмоқчи эдим.

— Сиз мендан ё ҳазар қиласиз, ёки жуда ҳам сева-

сиз,— деди, ниҳоят княжна йигламсираб,— балки, мени мазах қилиб, юрагимни ҳаяжонга солиб, кейин ташлаб кетиш ниятидадирсиз... Бундай қилиш шундай пасткашлик, шундай қабиҳлик бўлардики, бу тўғрида ўйлашнинг ўзи... О, йўқ! Ростини айтинг,— деб илова қилди у, нозик ишонч билан,— ростини айтинг, менга ҳурмат назари билан қаравашингизга халал берувчи бирон нарсам йўғ-а, ростми? Сизнинг бояги одобсиз қилиғингизни... кечиришим керак, чунки унга ўзим йўл қўйдим.. Жавоб беринг, гапириング, овозингизни эшитай...— Унинг сўнгги сўзларида аёлларга хос бўлган шундай бетоқатлик сезилардики, ҳатто беихтиёр кулиб қўйдим; бахтимга, анча қоронги тушиб қолган эди... Мен индамадим.

— Индамайсиз,— деб сўзида давом этди у.— Балки олдин менинг муҳаббат изҳор этишимни истарсиз?

Мен индамай кетавердим...

— Шуни хоҳлайсизми?— деб давом этди у, менинг юзимга ялт этиб қараб... Унинг қатъий қаравиша ва қатъий овозида қандайдир даҳшат сезиларди...

— Нима учун? — дедим мен, кифт қоқиб.

Княжна отига қамчи берди-да, торгина ва хатарли йўлдан чоптириб кетди; бу ҳодиса шу қадар тез юз бердики, мен зўрға кетидан етиб олдим, шунда ҳам, бошқаларга қўшилгандан кейин; у уйга боргунча тинмай гапириб ва кулиб борди. Унинг ҳаракатларида қандайдир асабийлик сезиларди: менга бир марта ҳам қайрилиб қарамади. Бу гайри табиий кайфи чоғлиқни ҳамма сезди. Княгиня ҳам қизига қараб, ичидан севи нарди; қизининг эса асаблари қўзғаб кетган эди: кечаси билан ухламай йиглаб чиқиши аниқ. Шуни ўйлар-канман бениҳоя севинаман; баъзан шундай дамлар бўладики, Вампир⁶⁹га қўшиламан... Яна мен, меҳрибон йигит деган ном чиқаришни, шу номга эришишни истайман!

Отдан тушган, хонимлар княгинанинг уйига кириди; бутун вужудимни ҳаяжон босганди, миямни қамраб ётган фикр-хаёлларни тарқатиб келай деб отимни тоқ-қа қараб чоптириб кетдим. Шабнамли кеча, ниҳоятда киши нашъасини очувчи шабада билан нафас оларди. Қоп-қорайиб турган тоғ чўққилари ортидан ой кўтарилиб келмоқда эди. Тақаланмаган отимнинг ҳар қадами жимжит даралар сукунатида бўғиқ эшитиларди: шало-

ла ёнида отимни сугордим, жануб тунининг шабадали ҳавосидан бир-икки марта тўйиб-тўйиб ютдим-да, орқамга қайтдим. Қайтишда слободкадан ўтиб келдим. Деразалардан кўриниб турган чироқлар бирин-кетин сўна бошлаган эди; тупроқ қўргондаги часовойлар ва атроф-теваракда соқчиликда турган казаклар овозларини чўзиб-чўзиб бир-бирларига товуш берардилар...

Слободканинг жар ёқасига қурилган уйларидан бирининг деразалари жуда равшан эди; ҳар замон-ҳар замонда у ердан пойма-пой гаплар ва ҳарбийлар қурган базмдан дарак берувчи қийқириқлар эшитиларди. Отдан тушдим-да, секин дераза тагига бориб турдим: зичлаб ёпилмаган дарча тирқиши базм қурганларни кўришга ва уларнинг гапларини эшитишга имкон беради. Гап менинг устимда борар эди.

Винодан қизишиб кетган драгун капитани мушти билан столни бир урди-да, ҳамманинг жим бўлишини талаб қилди.

— Жаноблар! — деди у,— бунга ортиқ чидаб бўлмайди. Печориннинг бир адабини бериб қўйиш керак! Бу Петербургдан келган учирма қушлар то тумшуғига бир туширмагунча, керилишини ташламайди! Ҳамиша озода қўлқоп, тозаланган этик кийдим, шунинг учун олий жамиятни мендан бошқа одам кўргани йўқ деб ўйласа керак!

— Унинг такаббур кулишларини айтмайсизми? Шундай бўлса ҳам, унинг қўрқоқлигига аминман, у қўрқоқ!

— Мен ҳам шундай деб ўйлайман,— деди Грушницкий.— Нуқул ҳазил билан қутулиб кетмоқчи бўлади. Бир марта унга шунақанги гапларни айтдимки, унинг ўринида бошқа одам бўлганда, ўша ернинг ўзида мени чавақлаб ташларди, Печорин бўлса ҳамма гапни ҳазилга буриб юборди. Албатта, мен уни дуэлга чақириб ўтирамадим, чунки бу унинг иши эди; иннайкейин ўзим ҳам қўлимни булғашни истамадим...

— Печорин княжнани ўзига оғдириб олгани учун Грушницкий унга қарши кек сақлаб юрипти,— деди аллаким.

— Бўлмаган гап! Тўғри, княжнанинг кетидан бир оз судралиб юрдим, аммо дарҳол бас қилдим, чунки менда уйланиш нияти йўқ эди, қизнинг номини булғаш — менинг одатим эмас.

— Ишонтириб айтаманки, у ўта кетган қўрқоқ, яъни Грушницкий эмас, Печорин,— Грушницкий азамат йигит, бунинг устига, менинг энг қадрдон дўстим ҳам! — деди драгун капитани, яна гапга аралашиб.— Жаноблар! Орамизда уни ҳимоя қилувчилар борми? Бўлмаса яна яхши! Унинг ботирлигини синааб кўришни истамай-сизларми? Бу сизларга роса эрмак бўларди-да..

— Истаймиз; аммо, қандай қилиб?

— Қулоқ солинглар: ҳаммадан кўра Грушницкий ундан хафа, биринчи роль шуники: Грушницкий бирон арзимаган нарсани баҳона қилиб, Печоринни дуэлга чақиради... Шошмай туринглар; бутун гап мана шунда... Хўш, дуэлга чақиради. Бутун бу ишлар — дуэлга чақириш ҳам, унга ҳозирлик кўриш ҳам, дуэль шартла-ри ҳам, ҳаммаси мумкин қадар тантанали ва даҳшатли бўлиши керак,— буни мен ўз зиммамга оламан; мен ўзим сенинг секундантинг бўламан, бечора дўстим! Яхши! Аммо бунинг найранги шундаки, тўппончага ўқ солмаймиз. Аминманки, Печорин қўрқади,— ахир, мен олти қадам масофага турғазиб қўяман-да! Хўпми, жа-ноблар?

— Жуда соз! Бўпти! Нега бўлмас экан! — деган садолар эштилди теварак-атрофдан.

— Сен-чи, Грушницкий?

Мен Грушницкийнинг жавобини ҳаяжон билан кутардим; агар буни тасодифан билиб қолмаганимда, бу аҳмоқларга тоза майна бўларканман деган фикрдан ғазабим қайнаб кетди. Агар Грушницкий розилик билдиримаганда, ўзимни дарҳол унинг қучоfigа ташлардим. Аммо у бир оз индамай ўтиргач, ўрнидан турди-да, капитанга қўлини узатиб, гоят кеккайиб туриб: «Бўпти, мен розиман»,— деди.

Улфатларнинг нақадар шод-хуррам бўлиб кетган-никларини тасвирлашга ожизлик қиласман.

Вужудим икки хил ҳислар билан тўлиб-тошган ҳолда уйимга қайтдим. Биринчи ҳиссиёт — қайгу ҳисси эди. Нима учун улар мени бунча ёмон кўришади, деб ўйлардим. Нима учун? Ё биронтасини ҳафа қилдимми? Иўқ. Наҳотки мен, афт-башараларининг ўзиёқ совуқлик туғдирадиган одамлар қаторига кирсам? Бутун вужудимни аламли ғазаб ўти қамраб бораётганини пайқадим. «Эҳтиёт бўлинг, жаноби Грушницкий! — дердим мен, уй ичини кезиб.— Мен билан бунаقا ҳа-

зиллаша кўрманг. Тентак ўртоқларингизнинг маслаҳати сизга қимматга тушиши мумкин. Мен сизга ўйинчоқ эмасман!»

Шу кечада мижжа қоқмай чиқдим. Эрталаб юзим заъфарондай сарғайиб кетган эди.

Эрталаб қудуқ бошида княжнани учратдим.

— Тобингиз йўқми? — деб сўради менга тикилиб.

— Кечаси ухламай чиқдим.

— Мен ҳам... Сизни айбладим... балки янгишгандирман? Гапиринг, балки ҳамма қилмишингизни кечи-рарман...

— Ҳаммасини кечириб бўлармикин?..

— Ҳаммасини зинҳор, ростини айтинг... Фақат тезроқ, бўлинг... бўлинг... сизнинг қилифингизни тушунай, кечирай деб кўп ўйладим; балки, ота-онамнинг тўсқинлик қилишидан қўрқарсиз... Қўрқманг... улар билгандан кейин... (княжнанинг овози титраб кетди) уларни мен ўзим рози қиласман. Ё сизнинг вазиятингиз... аммо, шуни билингки, мен севган одамим учун ҳамма нарсадан ҳам кечишга тайёрман... о, тезроқ, жавоб беринг, раҳм қилинг... Сиз мендан ҳазар қилмайсиз-а, тўғрими?

Княжна қўлимдан ушлаб олди.

Княгиня Веранинг эри билан бирга бизнинг олдимизда борар эди, шунинг учун улар ҳеч нарсани кўрмасди; аммо атрофда сайр қилиб юрувчи касаллар қўриб қолиши мумкин эди,— фийбатчиларнинг фийбатчиси ўшалар бўлади,— шунинг учун мен княжнанинг қаттиқ, ҳаяжон ичидаги сиқиб турган қўлидан қўлимни тортиб олдим.

— Мен сизга бор ҳақиқатни айтиб бераман,— деб жавоб бердим княжнага.— Мен ўзимни оқлаб ҳам ўти-майман, қилмишларимнинг сабабини ҳам айтиб ўти-майман: мен сизни севмайман.

Унинг лаблари билинг-билинмас оқариб кетди...

— Боринг,— деди эшитилар-эшитилмас.

Мен кифтимни қисдим-да, қайрилиб кетдим.

14 июнь

Мен баъзан ўзимдан нафратланаман... бошқалардан ҳам нафратланишимнинг сабаби шу эмасмикин?... Олижаноб ва юксак ҳисларга лаёқатим қолмади; ўзимга ўзим кулги бўлишдан қўрқаман. Менинг ўрнимда бошқа одам бўлганда, княжнага son coeur et sa fortune⁷⁰

таклиф қилған бўларди, аммо уйланиш деган сўз мени қандайдир сеҳрли куч билан қаттиқ ушлаб туради: хотин кишини қанчалик зўр эҳтирос билан севмайин, аммо у уйланишим кераклигига шама қилдими, тамом, ишқ-муҳаббатимдан ном-нишон ҳам қолмайди! Юрагим тошга айланиб кетади ва уни ҳеч бир нарса юмшата олмайди. Мен ҳар қанақа фидокорликка тайёрман, аммо уйланишдан худо сақласин; ҳаётимни, ҳатто номусимни йигирма марта десам ҳам гаровга қўйишим мумкин... аммо эркимни сотмайман. Нима учун мен ўз эркимни шунча азиз тутаман? Менга ундан нима фойда бор?.. Истиқболим надир?.. Келажақдан нималарни кутаман?.. Рост, ҳеч нарса кутмайман. Бу ҳеч тушуниб бўлмайдиган бир ҳис туғилганимдан бери юрагимга тушиб қолган қўрқув ҳисси бўлса керак... Ҳеч бир сабабсиз ўргимчаклардан, суварақлардан, сичқонлардан қўрқадиган одамлар ҳам бор-ку, ахир... Ростиши айтайми!.. Болалигимда онам бир кампирга мени фол очирган экан: у кампир мени ёмон хотин қўлида ўлади деган экан: ўша вақтда бу гап менга ниҳоятда чуқур таъсир этган эди: ўша вақтдаёқ, дилимда уйланиш деган нарсага қарши аллақандай нафрат пайдо бўлганди... Аммо шу билан бирга нимадир кампирнинг гапи бир кунмас-бир кун тўғри чиқажагини айтиб туради; ҳар холда, бунинг мумкин қадар кейинроқ юз бериши учун тиришаман.

15 июнь

Кеча бу ерга Апфельбаум деган фокусчи келди. Ресторация эшигига узун афиша пайдо бўлди, унда мазкур ажойиб фокусчи, акробат, химик ва оптикнинг бугун кечқурун соат саккизда, олий наслаблар клубида (бошқача қилиб айтганда, ресторацияда) ажойиб томоша кўрсатажаги ҳақида муҳтарам томошабинларга хабар қилинарди; билет баҳоси икки ярим сўмдан.

Ажойиб фокусчининг томошасига ҳамма бормоқчи; ҳатто княгиня Лиговская ҳам қизининг бетоблигига қарамасдан, ўзига билет олдирибди.

Бугун тушки овқатдан кейин Веранинг деразалари ёнидаи ўтиб қолдим; балконда ёлғиз ўзи ўтирган экан; оёғим тагига кичкина хат тушди:

«Бугун кечқурун соат тўққиздан кейин катта зинадан чиқ; эрим Пятигорска кетди, эртага эрта билан

қайтади. Хизматкор ва ходимларим уйда бўлмайди: уларга ва княгиняниң одамлари билет улашдим. Сени кутаман, албатта кел».

«Айтмадимми!— деб ўйладим мен.— Ахир, менинг айтганим бўлди».

Соат саккизда фокусчининг ўйинини кўргани бордим. Соат тўққизда одамлар тўпланиб бўлди. Томоша бошланди. Вера билан княгиняниң малай ва оқсочларини кўрдим, улар энг орқа қатордаги стулларда ўтиришган экан. Танишларимнинг бари шу ерда эди. Грушницкий биринчи қаторда қўлида лорнет тутиб ўтиради. Фокусчига дастрўмол, соат, узук ва шу каби нарсалар керак бўлганда, ҳар сафар унга мурожаат қиласди.

Анчадан берп Грушницкий мен билан саломлашмайди, бугун бўлса бир-икки марта менга ўқрайиб ҳам қўйди. Ҳисоб-китоб қилиш вақти келганда буларнинг ҳаммасини эсига соламан.

Соат ўнларда ўрнимдан туриб, чиқиб кетдим.

Ташқари қоп-қоронғи, кўз олдингдаги нарсани кўриб бўлмасди. Атрофдаги тоғ чўққиларида қуюқ ва совуқ булатлар ётарди: тиниб борувчи шамол ресторация теварагидаги тераклар учини аҳён-аҳёнда шитирлатиб кетарди: ресторация деразалари олдида одам тирбанд. Тоғдан пастга тушдим-да, дарвоза томонга бурилиб, илдам юриб кетдим. Бирдан, назаримда, орқамдан бирор келаётганга ўхшади. Тўхтаб, ён-веримга қарадим. Қоронғида ҳеч нарсани кўролмадим; аммо шундай бўлса ҳам, эҳтиётдан, саир қилиб юрган одамдай уй атрофи ни бир марта айланиб чиқдим. Княжна деразалари ёнидан ўта туриб, яна орқамдан оёқ товушини эшилдим; ёнимдан шинелга ўралган бир одам чопиб ўтди. Хавотирландим; шундай бўлса ҳам, секин эшик олдига келдим-да, қоп-қоронғи зинадан югуриб чиқдим. Эшик очилди-ю, кичкина қўлча қўлимдан ушлади...

— Ҳеч ким кўрмадими?— шивирлаб сўради Вера, менга ёпишиб,

— Ҳеч ким!

— Сени яхши кўрганимга энди ишонасанми? О, мен кўп иккиландим, кўп қийналдим... аммо сен мени нима қиласанг қилаяпсан.

Унинг юраги гуп-гуп уради, қўллари муздек совуқ, эди. Рашклар, ўпкаланишлар, нолишлар бошланди,— у

мендан ҳамма гапни очиқ гапириб беришимни талаб этди, хиёнат қилган бўлсам ҳам чидай олишни билдири, чунки фақат сенинг баҳтли бўлишингни истайман, деди. Мен бунга у қадар ишонмадим-у, аммо онт ичиб, ваъдлар бериб, охири тинчитдим.

— Демак, Мерига уйланмайсанми? Уни севмайсанми?.. У ўйлаб юрибдикни... биласанми, сени ниҳоятда яхши кўриб қолган, шўрлик!..

Кечаси соат иккilarга яқин деразани очиб, иккита шол рўмолни бир-бирига боғлаб, устинга осила-осила юқори балкондан қўйисига тушдим. Княжнанинг уйида чироқ ёқиғлиқ эди. Нима ҳам бўлди-ю, деразасидан қарадим-да. Деразанинг пардаси чала тортилган экан, бўлма ичини бемалол кўриш мумкин эди. Мери ўз каравотида тиззаларини қучиб ўтиради; қалин соchlарини тўр солиб тикилган тунги чепчик билан танғиб олган, оппоққина елкаларини каттакон қизил рўмол билан ўраб олган, кичкинагина бежирим оёқларига ранг-баранг эрон кавуши кийиб олганди. Бошини кўксига солиб, қимир этмай ўтиради; унинг олдидаги столчада бир китоб очиқ туарди, аммо хаёли аллақаерларда юргандай, қимир этмовчи ва қандайдир билиб бўлмайдиган ғам-ҳасрат-ла тўлган кўзлари бир саҳифани юзинчи марта ўқиб чиқаётгандай кўринарди...

Шу замон чакалак орасида бир нарса шитирлаб кетди. Балкондан чим устига сакраб тушдим. Фойибдан келиб қолган бир қўл елкамдан маҳкам ушлаб олди. «Ҳа-ҳа!— деди қўпол бир товуш,— қўлга тушдингми! Кечалари княжналарникига келиб юришни бир кўрсатиб қўяй сенга!...»

— Маҳкам ушла!— деб бақирди бурчакдан югуриб чиқиб қолган иккичи бир киши.

Улар — Грушницкий билан драгун капитани эди.

Драгун капитанининг бошига бир мушт солган эдим, ерга ағдарилиб тушди, ўзим буталар орасига отилдим. Ўйимиз олдидаги бутун нишабликни қоплаган боғнинг ҳамма сўқмоқ йўллари менга маълум эди.

— Ўғри кетди, ўғри кетди! Ушла ўғрини!..— деб бақириб қолди улгр кетимдан; милтиқ отилди: милтиқ пилтаси оёғимнинг тагига келиб тушди.

Бир минутдан кейин уйимга етиб олдим-да, ечиниб

ётдим. Малайим эшикни энди беркитар-беркитмас, бирдан Грушницкий билан капитан эшикни қоңа бошлаши.

— Печорин! Ухладингизми? Бормисиз? — деб бақири капитан.

— Ухлаяпман! — деб жавоб бердим мен, жаҳл билан.

— Туринг! Үфри келди... Черкаслар...

— Тумов бўлиб ётибман, шамоллаб қолишдан қўрқаман,— деб жавоб қилдим мен.

Улар кетиши. Бекорга овоз берган эканман: бўлмаса мени яна бир соатча боғдан излаб юрган бўлишарди. Шу орада ҳаммаёқни ваҳима босиб кетди. Қалъадан бир казак от чоптириб келди. Ҳамма ҳовлиқиб қолди; черкаслар қидирилмаган биронта ҳам бута қолмади,— бало топилмади, албатта. Аммо кўп одамлар, гарнizon ботирлик кўрсатгандা ва эпчилроқ бўлгандা, кам деганда йигирматача ваҳшийнинг ўлиги шу ерда қоларди, деган қатъий фикрда қолди.

16 июнь

Бугун эрталаб қудук бошида дув-дув гап, ҳамма кечаси черкасларнинг бостириб келгани ҳақида гапиравди. Белгиланган миқдорда нарзан ичдим-да, узундан-узун арғувон хиёбонини ўн мартача айланиб, Веранинг эрини учратдим. У Пятигорскдан энди келиб турган экан. У билан қўлтиқлашиб, ресторацияга нонушта қилгани кетдик; у хотини тўғрисида роса хавотирланяпти. «Бугун кечаси қўрққанидан юраги ёрилай депти,— дерди у.— Бу воқеанинг нақ мен йўғимда бўлишини қаранг-а». Биз бурчакдаги хонага кирадиган эшик олдидаги столдан жой олдик, ичкаридаги хонада ўнтача ёш-яланглар ўтиради, улар орасида Грушницкий ҳам бор эди. Тақдир менга яна бир марта ҳиммат қилди: мен Грушницкийнинг тақдирини ҳал қилувчи суҳбатни эшитиб қолдим. У мени кўрмасди, бинобарин, мен уни қасдан гапираётитти деб гумон қиломасдим; аммо бу нарса менинг олдимда унинг гуноҳини янада оғирлаштиради.

— Ростдан черкаслар эканми, а?— деди аллаким.— Бирор киши ўз кўзи билан кўриптими?

— Бор ҳақиқатни айтиб берай,— деб жавоб берди Грушницкий,—аммо ҳеч кимга мени айтди демайсизлар; воқеа бундай бўлди; кеча бир киши,— отини сизларга айтмайман,— менинг уйимга келиб, соат тўққизлардан

ошганда Лиговскаяларнинг уйига бирор киргандай бўлди, деб айтиб қолди. Шуни ҳам айтиб қўяйки, княгиня-нинг ўзи ўша вақтда шу ерда эди, княжна эса уйида эди. Шундай қилиб, биз ҳалиги келган одам билан бирга баҳтири одам ким экан, кўрайлик деб, деразанинг тагига бориб турдик.

Суҳбатдошим овқат билан банд бўлишига қарамай, қўрқиб кетдим: агар Грушницкий ростдан ҳам бўлиб ўтган воқеанинг тагига етган бўлса, суҳбатдошим ўзи учун бир мунча кўнгилсиз бўлган гапларни эшишиб қолиши мумкин эди; аммо рашқдан кўр бўлган Грушницкий бу ҳақда гумон ҳам қилмасди.

— Шундай қилиб,— деб давом этарди Грушницкий,— қўлимизга милтиқ олиб жўнаб қолдик, биз уни қўрқитмоқчи бўлиб, милтиқни паҳтаванд ўқ билан ўқлаб олгандик. Соат иккигача боғда пойлаб ётдик. Ахири пайдо бўлди, аммо қаердан пайдо бўлиб қолганини сезмай қолдик, ҳар ҳолда деразадан тушгани йўқ, чунки дераза очилмади, устун олдидаги ойнаванд эшикдан чиққан бўлса керак: хуллас, қарасак, кимдир балкондан тушиб келаётпи... Княжнанинг шоввозлигини қаранглара! Москва ойимқизлари ҳам шунаقا бўларкан-да, а? Шундан кейин кимга ҳам ишониб бўлади? Биз уни ушлаб олмоқчи бўлган эдик, бироқ қўлдан чиқиб, худди қуён сингари буталар орасига қочиб кириб кетди; шундан кейин кетидан милтиқ отиб қолдим.

Грушницкийнинг атрофида ўтирганлар ишонқирамай, ғовур-ғувур қилишди.

— Ишонмайсизларми?— деб давом этди Грушницкий.— Виждоним билан онт ичаман: бутун айтганларим рост, буни исботлаш учун ҳатто у жанобанинг отини ҳам айтишим мумкин.

— Айт, айт, ким экан?— деган нидолар эшитилди ҳар томондан.

— Печорин,—деди Грушницкий.

Шу замон Грушницкий бошини кўтарди,— мен эшикнинг олдига, нақ унинг рўпарасида турардим; у қипқизариб кетди. Мен унинг ёнига бордим-да, секин, аммо дона-дона қилиб дедим:

— Энг қабиҳ тухматингизни исботлаш учун номусингиз билан онт ичиб бўлганингиздан кейин кириб қолганинга афсусланаман. Мен шу ерда бўлганимда, сиз яна бир қабиҳ разилликдан қутулган бўлардингиз.

Грушницкий ўрнидан иргиб туриб кетди-да, қизишмоқчи бўлди.

— Илтимос қиламан: айтган гапингизни дарҳол қайтиб олинг,— деб давом этдим мен, ҳамон ўша оҳангда.— Гапингизнинг уйдирма эканлигини ўзингиз жуда яхши биласиз. Бир хотин сизнинг бундай порлоқ хислатларингизни назар-писанд қилмай қўйғанлиги сизнинг ундан бу хилда қасд олишингизга асос бўла олмаса керак деб ўйлайман. Яхшилаб ўйлаб кўринг, ўз фикрингизни кувватлашингиз билан олижаноб одам деган номингизни йўқотган бўласиз ва ҳаётингизни таълика остига солиб қўясиз.

Грушницкий менинг олдимда кўзларини ерга тикиб, зўр ҳаяжон ичидаги турарди. Аммо виждон билан иззатнафс ўртасида борган кураш узоқ давом этмади. Ёнида ўтирган драгун капитани тирсаги билан уни бир туртиб қўйди. Грушницкий бир сесканди-да, бошини кўтармай шошиб жавоб берди:

— Муҳтарам жаноб, мен ҳамиша гапимни ўйлаб гапираман, яна такрорлашга тайёрман... Мен сизнинг дўқингиздан қўрқмайман ва ҳар нарсага тайёрман.

— Тайёр эканлигинизни бир марта исбот этдингиз,— дедим мен совуққина ва драгун капитанини қўлтиқлаб, ташқари чиқдим.

— Ҳўш, хизмат?— деб сўради капитан.

— Сиз Грушницкийнинг ошнасисиз, балки унга секундант ҳам бўларсиз?

Капитан кеккайнб таъзим қилди.

— Тўғри айтдингиз,— деб жавоб берди у,— унга секундант бўлишга мажбурман ҳам, нега десангиз, унга теккан ҳақорат менга ҳам тегади, кеча кечаси мен ҳам у билан бирга эдим,— деб илов қилди у, букчайган қаддини ростлаб.

— Э! Бошига ноқулай мушт туширган одамим сизмидингиз?..

Капитан қизариб-бўзариб кетди: шу маҳалгача беркитиб келган ғазаби қиёфасида акс этди.

Мен, ўзимни унинг қутурганини кўрмаганга солиб, ниҳоятда эҳтиром билан таъзим қилдим-да:

— Мен буғуноқ ўз секундантимни ҳузурингизга юбориши шарафига мусассар бўламан,— дедим.

Ресторация эшигига Веранинг эрини учратдим. У, мени кутиб турган бўлса керак.

Севина-севина қўлимдан ушлаб олди.

— Олижаноб йигит экансиз!—деди қўзига ёш олиб.— Ҳамма гапни эшидим. Қандай аплаҳ, кўрнамак одам экан!.. Шундай қилишгандан кейин уларни дуруст уйларга қандай киритиб бўлади! Худога минг шукурки, қизим йўқ! Аммо, сиз ўз ҳаётингизни тиккан қиз сизни мукофотлайди. Амин бўлинг, вақти-соати келгунча бу гапларни ҳеч кимга айтмайман,— деб сўзида давом этарди у.— Мен ўзим ҳам ёш бўлганман, ҳарбий хизматда ҳам бўлганману бунақанги ишларга аралашмаслик кераклигини биламан. Хайр энди.

«Бечора! Қизим йўқ деб севиниб юрипти...»

Тўғри Вернернига бордим, у уйида экан, ҳамма гапни—Вера ва княжнага нисбатан бўлган муносабатимни гапириб бердим, тасодифан эшитиб қолган гапларимни ҳам, бу жанобларнинг пахтаванд ўқ отиб меня майна қилмоқчи бўлганларини ҳам гапириб бердим. Аммо энди бутун иш ҳазилдан чинга айланиб кетган эди, можаронинг бундай бўлиб чиқишини улар кутмаган эди-да.

Доктор менга секундант бўлишга рози бўлди; дуэль шартлари ҳақида мен унга бир неча йўл-йўриқ бердим: у, душманларимни дуэлнинг маҳфий суратда ўтишига кўндириши керак, чунки шахсан мен ўлимга ҳар доим тайёр турсам-да, аммо бу дунёдаги истиқболимга путур етказиш мутлақо ниятимда йўқ эди.

Шундан кейин уйимга қайтдим. Бир соатдан кейин доктор саёҳатдан қайтди.

— Сизга қарши фитна уюштирилгани рост экан,— деди у,— Грушницкийнига борсам, драгун капитани билан яна бир киши ўтирган экан, фамилияси эсимда йўқ. Калошимни ечай деб даҳлизда бир оз туриб қолдим. Улар орасида катта баҳс бораётган экан... «Бунга ўлсам ҳам кўнмайман!— дерди Грушницкий.— У мени ҳамманинг олдида ҳақорат қилди, бундай бўлмаганда, майли эди...» «Сенинг нима ишинг бор?— деб жавоб берди капитан,— ҳамма нарсани ўзим тўғрилайман. Мен бешта дуэлда секундант бўлганман, йўлини биламан, ҳаммасини ўйлаб қўйганман. Фақат мэнга халал бермасанг бас. уни бир қўрқитиб қўйиш ҳеч зарар қилмайди. Зарурат бўлмагандан кейин ўз жонингни таҳликага солиб ўтиришингнинг нима кераги бор?..»— Шу замон мен кириб бордим. Улар бирдан жим бўлишди. Музокарамиз жуда узоққа

чүзилиб кетди; охири шундай қарорга келишдик: бу ердан беш чақиремча нарида жуда хилват бир дара бор, улар эртага эрталаб соат түрттәдә ўша ерга бориб туришади, улардан ярим соат кейин биз жұнайдиган бўлдик; олти қадам масофадан туриб отишасизлар,— буни Грушницкийнинг ўзи талаб қилди. Ўлдирилган одамни черкаслар ўлдириб кетди дейилади. Энди менда бир шубҳа туғилиб қолди; яъни улар—унинг секундантлари, ўзларининг олдинги режаларидан қайтиб қолганга ўхшайдилар, фақат Грушницкийнинг тўппончасини ўқламоқчи бўлишса керак. Бу бир оз қатлга ўхшайди-ю, аммо уруш вақтида ва айниқса Осиё урушида ҳийла найрангларга йўл қўйилади; аммо, назаримда, Грушницкий ўз ўртоқларига нисбатан анча виждонлироқ кўринади. Сиз нима дейсиз? Уларнинг ҳийласини билганимизни билдиришимиз керакми, ё йўқми?

— Зинҳор, доктор! Хотирингиз жам бўлсин, мен уларнинг тузогига илинадиган одам эмасман.

— Нима қилмоқчисиз?

— Бу менинг сирим.

— Эҳтиёт бўлинг, яна илиниб қолманг... Ахир, олти қадамдан отишасиз-а!

— Доктор, мен сизни эртага эрталаб соат түртта кутаман; отлар эгарлоғлиқ туради... Хайр, энди.

Үйимнинг ичидан беркитиб, кечгача ҳеч қаерга чиқмай ўтирдим. Малай мени княгиняникига таклиф этгани келган эди, касал экан дегин деб, қайтариб юбордим.

Кечаси соат икки, уйқу йўқ... Ҳолбуки, эртага қўл титрамаслиги учун албатта пича ухлаб олиш керак эди. Үндай деса, олти қадам наридан отган ўқнинг бекор кетиши қийин. Ҳа, жаноби Грушницкий, ҳийла-найрангингиз фойда бермайди... биз ролимизни алишдик: энди мен сизнинг қонсиз юзингиздан қўрқув аломатларини ахтаражакман. Нега ўзингиз маъшум олти қадамни тайин этдингиз?--- Сиз, пешанасини бекорга тутиб беради деб ўйларсиз... Йўқ, биз чек ташлаймиз!.. Ана шунда... ана шунда... борди-ю, унинг баҳти устун келса-чи? Борди-ю, менинг юлдузим бу сафар мендан юз ўгирса-чи?.. Юз ўгирса ҳам ажаб эмас: шу маҳалгача менинг орзу-ларимни бажариб келди.

Нима қилибди, ўлсам ўлиб кетарман! Дунё учун бу айтарлик жудолик эмас: яшаш ўзимнинг ҳам ўлардай

жонимга тегди. Мен базмда зерикиб, эснаб ўтирган ~~ва~~
уйга кетиб ухлай деса—ҳали каретаси етиб келмаган
одамга ўхшайман... Лекин, карета тайёр... яхши қолинг-
лар!..

Бутун ўтмишимни хаёлимдан кечирарканман, беихти-
ёр равишда ўзимдан: нима учун яшадим, бу дунёга нима
мақсад билан келдим?..— деб сурайман. Аммо, сирасини
айтганда, шундай мақсад бўлган, менга юксак вазифалар
юкланган, чунки қалбимда бениҳоя зўр куч мавжуд
эканини сезаман... Аммо мен у вазифани пайқаб олол-
мадим, бекорчи, арзимаган ва пуч эҳтиросларга алдан-
дим; бу эҳтирослар қозонида қайнаб, пўлатдай қаттиқ
ва совуқ бўлиб чиқдим, тобланиб чиқдим-у, бироқ ҳаёт-
нинг энг яхши гули бўлмиш олижаноб ва юксак инти-
лиш ўтини йўқотдим. Шундан бери мен неча мартараб
тақдир-қўлида болта ролини ўйнаб келаман! Маҳкум
қурбонлар бошига қатл қуроли бўлиб тушаман, тушга-
нимда ҳам кўпинча бегазаб, аммо ҳамиша бешафқат
қурол бўлиб тушаман... Менинг муҳаббатим ҳеч кимни
баҳтли қилмади, чунки севган кишиларим учун ҳеч нар-
самни қурбон этмадим, уларни мен фақат ўзим учун, ўз
роҳатим учун севардим; мен фақат севган кишиларим-
нинг ҳисларини, уларнинг латофатини, шодлик ва ҳас-
ратларини ўзимга сингдириб, қалбимнинг ғалати эҳти-
ёжларини қондирап эдим, аммо ҳеч тўймас эдим.
Ўлардай очқаб, мадори кетиб ухлаб қолган одам худди
шундай бўлади: тушида хилма-хил ноз-пеъматларни, кў-
пириб турган виноларни кўради; ҳаёлида минг хил ши-
рин-ширин таомларни очкўзлик билан ейди, шундан ке-
йин ўзини анча енгил тортгандай ҳис қиласди; аммо
уйғониши билан гул хаёли пучга чиқади... Қорни баттар
очиб, умидсизлиги яна ошади!

Ким билади, балки эртага ўлиб кетарман!.. Бутун ер
юзида менинг кимлигимни охиригача тушунган, билган
бирон киши қолмайди. Баъзилар мени яхши дейди,
баъзилар ёмон дейди... Баъзилар: яхши йигит эди деса,
бошқалар абраҳ одам эди дейди. Аммо униси ҳам, буни-
си ҳам тўғри бўлмайди. Шундай экан, яшашнинг нима
ҳожати бор? Лекин қизиқиш, ҳавас орқасида яшайсан,
янги нарса кутасан... Ҳам кулгинг, ҳам йиғлагинг кела-
ди!

Бир ярим ойдан бери N. деган қалъада турман;

Максим Максимич овга кетди... **Үзим** ёлғиз қолдим, дөразанинг олдида ўтирибман; тоғларнинг этагигача қора булатлар қамраб олган; туман ортидан кўринган офтоб худди сап-сариқ доф сингари кўринади. Кун совуқ; чийилаб эсган шамол дераза дарпárдаларини ҳилпиратади. Жуда зерикib кетдим!.. Орада қизиқ воқеалар бўлиб ўтгани сабабли тўхталиб қолган журналимни давом эттираман.

Сўнгги саҳифани ўқиб чиқдим: қизиқ! **Ўлишни ўйлабман**, аммо мумкин эмас, чунки мен азоб-уқубат косасини ҳали ичиб тугатганим йўқ, энди яна узоқ вақт яшаяжагимни сезаман.

Бошимдан ўтган нарса хаёлимда жуда чуқур жойлашиб қолган. Замон битта чизифини ҳам, битта бўёғини ҳам ўчирмабди!

Эсимда, эртага дуэль бўладиган куни кечаси мижжа қоқмай чиқдим, узоқ ўтириб ёзолмадим ҳам, қандайдир сирли бир хавотирлик вужудимни қамраб олганди. Бир соатча уй ичидаги аланиб юрдим, сўнгра стол ёнига ўтиридим-да, Вальтер Скотт⁷²нинг стол устида ётган «Шотландия пуританлари» деган романини очдим; олдинига ўзими зўрлаб ўқиб ўтиридим, кейин-кейин романнинг ажойиб сюжетига қизиқиб; ҳамма нарсани унутибман...

Ниҳоят тонг ёришди. Асабларим тинчиди. Ойнага қарадим: кечаси билан ухламаганим учун чехрам анча сўлғин эди; атрофи кўкариб турган бўлса-да, аммо кўзларим фурур ва қатъийлик билан чақнарди. **Ўзимдан мамнун бўлдим.**

Отларни эгарлаб қўйишни буюрдим-да, кийиниб, чўмилгани кетдим. Муздек нарзанга тушарканман, жисмоний ва руҳий кучим яна ўзимга қайта бошлаганини сездим. Ваннадан худди балга отланган одамдай анча енгил тортиб, бардам бўлиб чиқдим. Ана шундан кейин руҳнинг танга алоқаси йўқ деб кўринг-чи!..

Қайтиб келсам—доктор келиб ўтирган экан. Эгнида кул ранг шим, орқалик бошида эса черкасча папоқ. Докторнинг каттакон бароқ папоги остида қолиб кетган пак-пакана бўйини кўриб, бехосдан кулиб юбордим; афтидан, уни ҳеч ким жангга кетаётган одам деб ўйламасди, ҳозир эса юзи одатдагига қараганда янада чўзиқроқ бўлиб кўринарди.

— Нега бунча хафа кўринасиз, “доктор?— дедим мен.—Юзлаб одамни у дунёга узатганингизда бунчалик

хафа бўлмай узатгандирсиз? Мени сариқ касалига мубтало бўлган одам деб фараз қилинг-қўйинг, тузалиб кетишим ҳам мумкин, ўлиб кетишим ҳам; униси ҳам, буниси ҳам табиий бир ҳол; мени касали ҳали аниқланмаган бир хаста одам деб билаверинг,— шундай қилсангиз, рағбатингиз беҳад ошади; ҳозир сиз менинг устимда бир неча физиологик⁷³ тажриба қилиб кўришингиз ҳам мумкин... Мажбурий ўлимни кутишнинг ўзи ҳам бир хасталик эмасми?

Бу фикр докторни ниҳоятда ажаблантириди, шундан кейин кайфи ҳам очилиб кетди.

Отга миндик: Вернер жиловни икки қўллаб ушлаб олди, йўлга тушдик,— бир пасда қалъя ёнидан, слободкадан ўтдик-да, дарага тушиб кетдик. Дара ичиди ўт бошиб ётган торгина йўл бўлиб, уни ҳар қадамда тоғдан оқиб тушувчи сой кесиб ўтарди, бу сойларни отда кечиб ўтишга тўғри келарди, бу эса докторни кўп хуноб қиласарди, чунки ҳар сафар сувга тушганда оти сойнинг ўртасига бориб тўхтаб қоларди.

Умримда бунақангич мовий ва салқин тонгни кўрган эмасман! Ям-яшил тоғлар орасидан энди кўтарилиб келаётган қуёш шуълалари илик иссиғининг салқин туннинг сўниб борувчи шабадаси билан қўшилиши бутун аъзойи-баданга ором бағишлиарди; янги туғилган куннинг ҳаётбахш ёғдуси ҳали даранинг ичига тушганича йўқ, у фақат, икки томонимиздан осилиб турган қоя тепалари-нигина зарга чўмилтириарди; чуқур-чуқур жарликларда ўсиб ётган қалин баргли бутоқлар шамолнинг секин-секин нафас олиши биланоқ устимизга кумуш томчилар ёғдириарди. Табнатни шу сафар ҳар қачонгидаи ҳам кўпроқ севганим ҳали-ҳали эсимда. Токларнинг япалоқ барглари қалтираб, товланиб, миллион-миллион ёғдуларни ўзида акслантириб турган шудринг томчисига суқланиб-суқланиб қарадим; туман босган олисликларга қараб тўймасдим! Бу ерга етгач, йўл янада тораяр, қоялар янада кўкимтироқ ва даҳшатлироқ бўлиб кўринарди, назаримда, улар бориб-бориб қалин деворга айланаб кетаётгандай бўларди. Биз индамай бораардик.

— Васият ёзиб қолдирдингизми?— бирдан сўраб қолди Вернер.

— Йўқ.

— Башарти, ўлдирилсангиз-чи?..

— Меросхўрларнинг ўзи топилади.

— Наҳотки, алвидо дейишиңгизни кутган бирон дүстингиз бўлмаса?..

Мен бош чайқадим.

— Наҳотки бутун оламда бирор хотира қолдиришингизга умид боғлаган биронта хотин бўлмаса?

— Мен сизга дилимдагини очиб гапириб берайми, доктор, истайсизми?— деб жавоб бердим.— Мен сизга айтсан, ўз севгилисинг номини тилга олиб туриб ё бўлмаса атир сепилган, ё атир сепилмаган бир сиқим сочини дўстига васият қолдириб жон берувчи одамлар ёшидан ўтиб қолганман. Ажалим етгани ва ўлиб кетишм мумкинлиги тўғрисида ўйларканман, фақат ўзимни ўйлайман; бошқалар шуни ҳам қилишмайди. Эртагаёқ менинг унтиб юборадиган ва ундан ҳам ёмонроғи—менинг устимга мингта бўлар-бўлмас бўҳтон тўқувчи дўстларни, ўзга эркак қучоғида ётиб, ўлиб кетган одамга нисбатан унда рашк ўйғотмаслик учун мени масхара қилиб куловчи хотинларни айтасизми?— Худо олсин уларни! Ҳаёт бўронидан мен фақат бир неча идеягина олиб чиқдим, аммо биронта ҳис топмадим. Қалбим билан эмас, балки ақлим билан яшай бошлаганимга анча бўлди. Мен ўз қилмиш ва эҳтиросларимни қизиқиш билан таҳлил этаман-у, аммо аслида улар билан ўзим қизиқмайман. Менда икки шахс бор, бири яшайди, туради, иккинчиси эса ўйлайди, биринчисини таҳлил қиласди; биринчиси балки бирон соатдан кейин сиз билан ҳам, олам билан ҳам абадий видолашиб кетар, иккинчиси эса... иккинчиси... бир қаранг, доктор: ҳов анови ўнг томондаги қоя тепасида уч кишининг қорасини кўраяпсизми? Улар бизнинг рақибларимиз бўлса керак?..

От қўйдик.

Қоя этагидаги чакалакзор ичига учта от боғлаб қўйилганди, биз ҳам отимизни шу ерга олиб кириб боғладик-да, сўқмоқ ўйлдан юриб майдончага чиқдик, у ерда бизни Грушницкий, драгун капитани ва Иван Игнатьевич деган яна бир секундант кутиб туришган экан; иккинчи секундантнинг фамилиясини ҳеч эшитмаганман.

— Сизларни анчадан бери кутиб турибмиз,— деди драгун капитани, кинояли бир кулги билан.

Мен соатимни олиб кўрсатдим.

Капитан, соатининг олдин кетганини айтиб узр сўради.

Уртага чўккан оғир сукунат бир неча минут давом эт-

ди; ниҳоят доктор Грушницкийга мурожаат қилиб, сүкунатни бузди:

— Жаноблар, менимча, иккингиз ҳам урушишга тайёр эканлигингизни кўрсатиб, ўз номус бурчингизни адо этдингиз, энди ўзаро муросага келишсангиз ҳам бўлар дейман?— деди.

— Мен тайёрман,— дедим.

Капитан Грушницкийга имо қилиб қўйди, Грушницкий эса мени қўрқди деб ўйлаган бўлса керак: гарчанд шу онгача юзида қон асари бўлмаса ҳамки, гердайиб туриб олди. Биз етиб келганимиздан бери биринчи марта бошини кўтариб юзимга қаради; аммо юзида акс этиб турган хавотирлик қалбида зўр руҳий кураш бораётганинган дарак берар эди.

— Шартингизни айтинг,— деди у,— амин бўлингки, қўллимдан келган ҳамма нарсани...

— Менинг шартим шу, қилган туҳматларингизни шу бугуноқ одамлар олдида қайтиб оласиз ва мендан афв сўрайсиз...

— Марҳаматли жаноб, бундай нарсаларни менга таклиф этишга қандай журъат этганингизга ҳайронман...

— Бундан бўлак қандай таклиф эта олардим?..

— Отишамиз.

Мен кифтимни қисиб қўя қолдим.

— Майли, аммо, шуни билингки, иккимииздан биришимиз албатта ўлишимиз керак.

— Мен сизнинг ўлишингизни истардим...

— Мен эсам сизнинг ўлишингизга аминман...

Грушницкий хижолат тортиб, қизариб кетди, кейин зўраки равиша хахолаб кулди.

Капитан уни қўлтиқлаб, бир четга олиб чиқди, улар анчагача бир-бирлари билан шивирлашиб туришди. Мен бу ерга ярашиб кетармиз деган хаёл билан келган эдим, аммо бу гаплардан кейин ғазабим қайнай бошлади.

Ёнимга доктор келди.

— Менга қаранг,— деди у; унинг чуқур хавотирга тушгани равшан эди.— Уларнинг сизга қарши тузган фитнасини унуганингиз йўқми?.. Мен тўппонча ўқлашни билмайман. Бу аҳволда... Жуда қизиқ одам экансиз! Ниятларингни биламан деб ўзларига айтинг, қани шундан кейин ҳам қилиб кўришсин-чи!.. Нима зарур сизга! Бир қушни отиб ўлдиргандай ўлдириб кетишаверади-да...

— Ўти наман сиздан, доктор, хавотир олманг, бир оз

шошмай туринг... Ишни шундай боплайки, улар төмөнди-да ҳеч қандай манфаат бўлмайди. Қўйинг, тўйгунича шивирлашиб олсин...

— Жаноблар! Қачонгача кутамиз ахир!— дедим мен овозимни баланд кўтариб.— Отишсак — тезроқ отишайлик; гапларинг бўлса кеча ҳам талай вақтларингиз бор эди...

— Биз тайёрмиз,— деб жавоб берди капитан.— Қани, жойингизга турингиз, жаноблар!.. Доктор, марҳамат қилиб, олти қадам ўлчанг...

— Жойингизга турингиз!— деб такрор этди Иван Игнатьевич, ингичка овоз билан.

— Шошмай туринг,— дедим мен.— Менинг яна бир шартим бор: модомики, биз бир-биримизни отиб ўлдирмоқ учун отишар эканмиз, буни мумкин қадар ҳеч ким билмаслик чорасини кўршишимиз ва секундантларимиз устига бунинг ҳеч қандай масъулияти тушмаслик йўлини топишимиш керак. Розимисизлар?..

— Тамомила розимиз.

— Мен бунинг чорасини топиб қўйдим. Ҳов, ўнг томонда осилиб турган қоянинг тепасидаги торгина майдончани кўряпсизми? Ўша ердан пастгача кам деганда ўттиз саржинча келади, балки ундан ҳам кўпроқдир. Пастда ҳаммаёкни қиррали ва учли тошлар босиб ётипти. Ҳар биримиз ўша майдончанинг энг четига бориб турамиз; шундай қилсак, ҳатто энг кичик яра ҳам одамни ўлдирмай қўймайди: бу сизларнинг хоҳишлиарингга мос келса керак, чунки олти қадам жойдан туриб отишни ўзларингиз айтдингиз. Ким ярадор бўлса муқаррар пастга қулаб, тилка-тилка бўлиб кетади; ярадаги ўқни доктор чиқариб олади, ана шундай қилсак, бевақт ўлиб кетган кишини ножӯя сакрайман деб ўлди деган баҳона топишга осон бўлади. Кимнинг олдин отишини аниқлаш учун чек ташлаймиз. Энг охирида шуни айтиб қўяйки, шу шартим қабул қилинса—отишаман, бўлмаса йўқ.

— Бўлти,—деди капитан ва Грушницкийга маъноли қараган эди, Грушницкий ҳам майли деб бош тебратди. Грушницкийнинг чеҳраси минут сайин ўзгариб турарди, мен уни жуда мушкул аҳволга солиб қўйгандим. Оддий вазиятда отишсак, ё оёғимни мўлжаллаб отиши ё бўлмаса енгил ярадор қилиб ўчини олган бўларди ва вижидони ҳам қийналмас эди; аммо ҳозир эса ё ўқни осмонга узиши, ё қотил бўлиши, ё бўлмаса ўзининг жирканч ния-

тидан қайтиб, мен билан барабар ўзи ҳам таҳлика остида қолиши керак эди. Шу онда мен унинг ўрнида бўлишни истамасдим. У капитанни бир четга олиб чиқди-да, ҳаяжон билан унга бир нималар дея бошлади; кўм-кўк кўкариб кетган лабларининг дир-дир титраши яққол кўриниб турарди; бироқ капитан ундан нафратланиб, истеҳзо билан кулди-да, юзини ўгирди. «Аҳмоқ экансан!— деди у Грушницкийга, овозини баланд кўтариб,— бефаҳм одам экансан! Қани, кетдик, жаноблар!»

Буталар орасидан кетган торгина сўқмоқ йўл тепаликка олиб чиқарди; бу табиий зинанинг қимирлаб турган поғоналари харсангошлардан иборат эди. Ҳаммадан олдинда Грушницкий, унинг кетидан секундантлари, уларнинг кетидан доктор иккаламиз борардик.

— Сизга қараб жуда ҳайрон бўламан,— деди доктор, қўлимни қаттиқ сиқиб.— Қани, томирингизни бир кўрай!. Эҳ-ҳе! Жуда қаттиқ уряпти-ку... Аммо чеҳрангиздан сира билинмайди... Фақат кўзларингиз одатдан ташқари порлайди, холос.

Бирдан оёғимиз тагига шалдираб майдан тошлар тўкилди. Нима бўлдийкин? Грушницкий қоқилиб кетипти; ушлаган навдаси синиб кетибди, агар секундантлари ушлаб қолмаганда, жарга чалқанча ағдарилиб тушган бўларкан.

— Эҳтиёт бўлинг!— деб қичқирдим унга.— Барвақт йиқилманг; бунинг хосияти ёмон. Юлий Цезарь⁷⁴ни эсланг!

Ниҳоят пастга осилиб турган қояннинг чўққисига чиқдик, гўё дуэлга атаб тайёрлаб қўйилгандай майдончанинг усти қумлоқ эди. Теварак атрофдаги зарҳал туманда беркиниб турган тоғ чўққилари худди сон-саноқсиз подага ўхшарди, жануб томондан кўринган Эльбурс музли тоғлар орасида ҳайбатли оппоқ қаддини тик кўтариб турарди, бу тоғлар орасида эса кунчиқар томондан қувлашиб келган пахмоқ булувлар сузид юрарди. Майдончанинг лабига бориб, пастга қараган эдим, бошим айланниб кетишига сал қолди: пастлик худди гўрдай қоронги ва совуқ эди: у ерда момақалдироқлар ва асрлар қулатган кўм-кўк кўкариб кетган қиррали харсангошлар ўз ўлжасини кутиб ётарди.

Биз отишадиган майдонча уч бурчакли туморга ўхшарди. Четга туртиб чиқиб турган бурчакдан олти қадам ўлчадик-да, рақибнинг ўқини қарши оловчи киши шу

бурчак четига бориб, жарликка орқа ўгириб туради ва агар ўлдирилмаса жойларини алмаштирадилар деган қарорга келдик.

Мен Грушницкийга ҳамма имтиёзни бермоқчи бўлдим: уни синааб кўрмоқчи эдим, қалбида биронта олижаноблик учқуни пайдо бўлса, можаромиз тинчлик билан тугаб, бости-бости бўлиб кетар, деб ўйлардим; аммо киши мижозининг иззат-нафси ва ожизлиги тантана қилиши керак эди... Агар тақдир мени омон сақлаб қолса, унга нисбатан заррача раҳм-шафқат қилмаслик учун ўзимга тўла ҳуқуқ бермоқ истардим. Ким ўз вижданони билан шундай муросасозлик қилмаган?..

— Доктор, чек ташланг!— деди капитан.

Доктор чўнтагидан танга олиб, баланд кўтарди.

Грушницкий, худди дўстона туртишдан ўйғониб кетган одамдай шошиб,

— Решётка!— деб қичқирди.

— Орёл!— дедим мен.

Танга осмонга пириллаб учеб чиқди-да, ерга жаранглаб тушди: ҳамма танга тушган жойга югурди.

— Бахти эканси,— дедим Грушницкийга,—олдин сиз отасиз! Аммо эсингизда бўлсин: мени отиб ўлдирмасангиз, менинг ўқум хато кетмайди, вижданон айтаман.

Грушницкий қизариб кетди, қуролсиз одамни ўлдиришга ўялар эди: мен унга тикилиб турадим; бир нафасгина мен, ҳозир оёғимга йиқилади, авф сўрайди деб ўйладим ҳам, аммо, бундай қабиҳ ният қилганига қандай иқрор бўла оларди?.. Унинг осмонга қаратиб отишдан бошқа иложи қолмаганди; унинг албатта осмонга отишига қаттиқ ишонган эдим! Фақат биргина мулоҳаза, яъни дуэлни такрорлаш керак деган талаб қўйишим мумкинлиги унинг осмонга отишига халал бериши мумкин эди.

— Бўлди энди!— деб шивирлади доктор, енгимдан тортиб, уларнинг ниятидан хабардор эканимизни ҳозир ўзларига айтмасангиз иш пачава бўлади. Қаранг, тўп-пончани ўқлай бошлади... Сиз айтмасангиз, ўзим айтаман...

— Зинҳор айтманг, доктор!— дедим мен, унинг қўлини ушлаб. — Ҳамма ишни бузасиз; халал бермасликка сўз бергансиз... Сизнинг нима ишингиз бор? Балки, ўлишни истарман?

Доктор ҳайрон бўлиб юзимга қаради-да:

— О, бу бошқа ғап! Аммо, у дунёда мендан хафа бўлиб юрманг...

Шу орада капитан тўппончаларни ўқлаб бўлиб, биттасини Грушницкийга бераркан, қулоғига бир нималар деб илжайиб шивирлади, иккинчисини менга берди.

Мен майдончанинг четига бориб, чап оёғимни тошга тираб, енгил яралансам орқамга йиқилмай, деб гавдами сал олдинга ташлаб турдим.

Грушницкий рўпарамга келиб турди, ишора берилиши билан тўппончасини кўтара бошлади. Унинг тиззалири дир-дир титрарди. Тўғри пешанамни мўлжалга олди...

Қалбимда сира тушуниб бўлмайдиган ғазаб ва нафрат ўти қайнаб кетди.

Ў бирдан тўппончани тушириб юборди-да, юзи докадай оқариб секундантига қаради.

— Отолмайман,— деди бўғиқ товуш билан.

— Қўрқоқ экансан!— деб жавоб берди капитан. Ўқ, узилди. Ўқ тиззамни тимдалаб ўтиб кетди. Майдонча четидан узоқлашиш учун бир печа қадам олдинга ташландим.

— Э биродар Грушницкий, ўқинг хато кетди!— деди капитан. — Энди сенинг навбатинг, тур жойингга! Қел, олдин қучоқлашиб олайлик; бу сўнгги қўришишимиз!— Улар қучоқлашли; капитан ўзини зўрға кулгидан тийиб турарди. — Қўрқма,— деб илова қилди у, Грушницкийга муғамбirona назар ташлаб,— бу дунёдаги нарсалар уч пулга қиммат. Табиат— тентак бир нарса, тақдир— пуч нарса, ҳаёт эса бир тийин!

Капитан, бу фожиали гапларни салобат билан айтиб бўлгач, ўз жойига бориб турди; Иван Игнатьевич ҳам йиғлай-йиғлай Грушницкий билан қучоқлашиб хайрлашли, ниҳоят, Грушницкий рўпарамда ёлғиз ўзи қолди. Уша онда қалбимда қандай ҳислар қайнаганини ҳали ҳам аниқлашга уринаман: у ҳислар таҳқирланиш алами, нафрат ва ғазаб ҳисси бўлиб — буни ҳозир менинг бетимга гердайиб, хотиржамлик билан қараб турган киши бундан икки минутча бурун мени итдай отиб ўлдирмоқчи эди, деган фикр туғдирарди, чунки оёғимдан қаттиқроқ яралансам, муқаррар қоядан пастга қулав тушган бўлардим.

Унинг юзида пушаймонлик аломати топилмасмикан

деб бирнече минут тикилиб турдим. Аммо назаримда, у кулимсираб тургандай туюлди.

— Ўлимингиздан олдин бир ибодат қилиб олишинизни маслаҳат бераман,— дедим мен шунда.

— Менинг руҳим ҳақида ғам ейишдан кўра ўз руҳингизнинг ғамини есангизчи. Илтимос қиласман, отинг тезроқ.

— Ҳали ҳам туҳматингизни қайтиб олмайсизми? Мендан авф сўрамайсизми?.. Яхшилаб ўйлаб кўринг; виждоҳингиз сизга ҳеч нима демаяптими?

— Жаноби Печорин!— деб бақириб юборди драгун капитани.— Сиз бу ерга бироннинг тавбасини эшитгани келганингиз йўқ-ку... Тезроқ тугатайлик энди; дарадан битта-яримта ўтиб қолгудай бўлса, кўриб қолади.

— Яхши. Доктор, буёққа қаранг.

Доктор ёнимга келди. Бечора доктор! Бундан ўн минутча олдин Грушницкийнинг ранги қандай оқариб кетган бўлса, докторнинг ранги ҳозир уникидан бешбаттар оқариб кетганди.

Бундан кейинги гапларимни худди қатл этиш тўғрисида чиқарилган ҳукмни ўқигандай, дона-дона қилиб баланд товуш билан дедим:

— Доктор, бу жаноблар шошилиш орқасида тўппончамини ўқлашни унуглан бўлсалар керак, илтимос қиласман, қайтадан яхшилаб ўқлаб беринг!

— Ундай бўлиши мумкин эмас!— деб бақириб юборди капитан.— Ундай бўлиши мумкин эмас! Мен иккала тўппончани ҳам ўқлаганман, балки сизникининг ўқи тушиб қолгандир... Бу менинг айбим эмас! Қайтадан ўқлашга эса ҳақингиз йўқ... мутлақо ҳақингиз йўқ... бу қоидага хилоф; мен бунга йўл қўймайман...

— Маъқул!— дедим мен капитанга.— Бундай бўлса, худди шу шарт билан сиз билан ҳам отишаман...

Капитан иккиланиб қолди.

Грушницкий хижолат тортиб, қовоқларини солган ҳолда бошини эгиг турарди.

Капитан докторнинг қўлидан тўппончамини тортиб олмоқчи бўлган эди, Грушницкий унга қараб:

— Қўй тегма!— деди.— Уларнинг ҳақли эканликларини ўзинг яхши биласан-ку.

Капитан унга шунча имо-ишора қилса ҳам бўлмади. Грушницкий унга қарамас эди.

Шу орада доктор тўппончани ўқлаб берди.

Буни кўрган капитан туфлаб, ер тепинди: «Роса ахмоқ экансан, оғайни,— деди,— ўтакетган аҳмоқ экансан!.. Менга ишониб қўйганингдан кейин, индамай туравермайсанми!.. Энди баттар бўл! Менга деса ҳаром ўл!..» Кейин орқасига ўгирилиб, «қонунга хилоф» деб пўнфирлаб қўйди.

— Грушницкий!— дедим мен.— Ҳали фурсат бор: туҳматингдан қайт, ҳамма гуноҳингни кечаман. Мени аҳмоқ қилолмадинг, менинг иззат-нафсим ҳам қонди; билласан, бир вақтлар дўст эдик.

Грушницкий қип-қизарди, кўзлари чақнаб кетди.

— Отинг!— деб жавоб берди у.— Мен ўзимдан нафраланаман, сизни эса кўришга кўзим йўқ. Ҳозир мени отиб ўлдирмасангиз, бир кунмас бир кун орқангиздан келиб сўйиб кетаман. Бу дунёда иккаламиз учун ўрин йўқ...

Мен отдим...

Тутун тарқалиб кетганда, Грушницкий майдончада йўқ эди. Фақат жар ёқасидан енгилгина чанг кўтириларди холос.

Ҳамма бирдан қичқириб юборди.

— Finite la commedia,⁷⁵— дедим мен докторга қараб.

Доктор индамай, даҳшат ичиде тескари қаради.

Мен кифт қоқдим-да, Грушницкийнинг секундантларига таъзим қилиб, хайрлашдим.

Сўқмоқ, йўлдан пастга тушиб кета туриб, тошлар орасида қонга беланиб ётган Грушницкийнинг жасадини кўрдим, унга қаролмай, кўзимни юмиб ўтиб кетдим...

Отивни ечиб, аста уйга қайтдим. Қалбимни оғир бир тош босиб тургандай эди. Қуёш ҳам кўзимга хира кўринар, шуъллари ҳам мени иситмас эди.

Слободкага етмасдан отивни ўнг томонга буриб, даранинг ичига кириб кетдим. Кўзимга одам боласи кўринимаса дердим: танҳо қолишни истардим. Отинг жиловини қўйиб юбордим, бошимни қуи солиб анча вақтгача кезиб юрдим, бир маҳал қарасам, мутлақо танимаган жойларга бориб қолибман; отинг бошини буриб, йўл қидириб кетдим; ўлгидай чарчаб, отни ҳам чарчатиб, Кисловодска кириб келганимда кун ботиб кетган эди.

Малайим, Вернер келиб кетди деди-да, қўлимга иккита хат берди: бири докторнинг хати, иккинчиси... Верадан эди.

Олдин бириңчисини очиб ўқидим; хат қуидаги мазмунда эди.

«Ҳамма иш саранжом қилинди: дабдаласи чиқиб кетгән жасад келтирилди, күкрагидан ўқ ҳам чиқариб олинди. Унинг бахтсиз ҳодиса қурбони эканига ҳамма ишонди: фақат комендант ўртангиздаги можародан хабари бўлса керак,— бошини чайқаб қўйди, аммо ҳеч нарса демади. Сизга қарши биронта исбот, далолат йўқ, бемалол ётиб ухлайверасиз... агар ухлай олсангиз. Хайр...»

Иккинчи хатни анчагача очишга журъат этолмай турдим... Вера менга нималарни ёзиши мумкин? Юрагимни аллақандай оғир бир ҳис эза бошлади.

Мана, ҳар бир сўзи абадий эсимда қолган хат бу мазмунда эди:

«Ушбу хатни ортиқ сира кўришмаслигимизга қатъий ишонганим ҳолда ёзмоқдаман, бундан бир неча йил илгари сен билан айрилиш вақтида ҳам худди шундай деб ўйлаган эдим; бироқ тангри мени яна бир карра синааб кўрмоқчи бўлди; мен бу синовга бардош беролмадим, менинг ожиз қалбим таниш овозга яна қул бўлди... бунинг учун сен мендан нафратланмайсан-а, тўғрими? Ушбу хатим ҳам менинг сен билан видолашув ва тавба-тазарруйим бўлади: қалбим сенга муҳаббат қўйгандан бери унда тўлиб қолган ҳамма дардларни сенга изҳор этишга мажбурман. Мен сени ҳеч бир айбламайман: сен қилган муоммалангни ҳар бир эркак ҳам қиласади; сен мени ўзингнинг хусусий мулкинг қаторида, бири кетидан бири келиб турувчи шодлик, ташвиш ва ғам-ғуссаларнинг манбай қаторида яхши кўрадинг,— ахир, булар бўлмаса ҳаёт ҳам бўлмайди, кишини зериктириб юборади. Мен буни бошда билган, сезган эдим... Аммо сен бахтсиз эдинг, шунинг учун ахир бир кун фидокорлигимни биларсан, қадрига етарсан ва ҳеч қандай шароитга боғли бўлмай сенга қилган самимий дилдорлигимни англарсан деб, ўзимни сенга фидо этган эдим. Ўшандан бери кўп вақтлар ўтди: мен сенинг кўнгил сирларингга ошно бўлдим... Қарасам, беҳуда умид боғлаган эканман. Менга жуда алам қилди! Бироқ, сенга бўлган муҳаббатим жоним билан бирлашиб кетган эди, севгим қорайди-ю, аммо сўнмади!

Энди абадий кўришмаймиз; аммо амин бўлки, сен-

дан бошқа ҳеч кимсани севмаяжакман, қалбим ўзининг бутун хазинасини, ҳамма кўз ёши ва умидларини сенга сарф қилиб битирди. Сенга бир марта кўнгил қўйган хотин бошқа эркакларга нафратсиз қарай олмайди, сенинг уларга нисбатан яхшироқ бўлганилигинг учун эмас, йўқ! Аммо сенинг мижозингда фақат сенинг ўзингагина хос, ўзингагина ярашган, сирли ва мағрур бир хосият бор; қандай сўз гапирма, овозингда енгиб бўлмайдиган бир куч бор; ҳеч кимса сендеқ доим севишлишни орзу қилолмайди; ҳеч кимсанинг қўзлари сеникideк жозибали бўлолмайди; ҳеч кимсанинг қўзлари сеникideк ором ва лаззат беролмайди; ўз имтиёзларидан сендеқ яхши фойдаланувчи киши топилмайди; ҳақиқатан ҳам сен каби баҳтсиз одам йўқ дунёда, чунки ҳеч кимса ўзини сенчалик баҳтли қилиб кўрсата олмайди.

Энди сенга, нима учун тўсатдан жўнаб кетишимнинг сабабини айтай; бу сабаб сенга аҳамиятсиз кўринар, чунки бунинг ёлғиз менгагина даҳли бор, холос.

Бугун эрталаб эрим менинг олдимга кирди-да, Грушницкий билан сенинг ўртангда бўлган жанжални гапириб берди. Юзим жуда ўзгариб, бир хил бўлиб кетган бўлсам керак, эрим анчагача қўзларимга тикилиб қолди; шу бугун дуэль қилишингни ва ўлиб кетишинг мумкинлигини ва бунинг айбдори мен эканлигимни ўйлаган эдим, беҳуш бўлиб йиқилишимга сал қолди; жинни бўлиб қоламан деб қўрқиб кетдим... Бироқ ҳозир фикрим жойига келиб, ўзимни босиб олганимдан кейин, сенинг тирик қолишингга ишондим: сенинг менсиз ўлиб кетишинг мумкин эмас, асло! Эрим анчагача уй ичидагиланиб юрди: унинг менга нималар деганини билмайман, берган жавобларим ҳам эсимда йўқ... Афтидан, сени севишимни айтган бўлсам керак... Гапнинг пиравардидаги эрим мени ёмон сўз билан ҳақорат қилиб чиқиб кетганини биламан, холос. Карета қўшишни буюрганини эшиздим... Мана, уч соатдан бери дераза ёнида қайтишингни кутиб ўтирибман... Йўқ, сен саломатсан, сенинг ўлишинг мумкин эмас!.. Карета тайёр бўлиб қолди... Яхши қол, алвидо... Мен ҳалок бўлдим, аммо бунинг зарари йўқ! Агар ҳамиша ёдингда сақлай олишингга,— севишингга демайман,— ёдингда сақлай олишингга ишонсам эдим... яхши қол, келишяяпти... хатни бекитишм керак...

Мерини яхши кўрмаслигинг рост-а? Унга уйланмай-

санми?— Менга қара, сен менга шуни қурбон қилишинг керак: сени деб мен ҳамма нарсамдан айрилдим...»

Мен худди телба одамдай эшикка югуриб чиқдим-да, ҳовлида хизматкорларим совутиб юрган Черкасинг миниб, Пятигорскка қараб чоптириб кетдим. Тош йўлдан чопиб кетаётган отимнинг ҳорғинлигига қарамай, аямасдан қамчилардим.

Қуёш фарб томондаги тоғлар тепасида дам олиб ётувчи булут орасига беркина бошлаганди; даранинг ичи-коронфилашиб, намлик гуша бошлаганди. Тошлар устидан сакраб-сакраб оқувчи Подкумок сойи бир оҳангда ҳайқириб оқарди. Мен ҳамон тоқатсизланиб, отимни елдай учирив борарадим. Пятигорскдан кетиб қолган бўлса-я, деган фикр юрагимга худди ханжардай қадаларди. Бир минутгина, яна бир лаҳзагина кўрсам, хайрлашсам, қўлини сиқсам... мен нола қиласдим, лаънатлар ўқирдим, йиғлардим, кулардим... йўғ-а, менинг юрагимда қайнаб тошган ташвишни, умидсизлигимни сира таърифлаб бўлмайди!.. Миямга умрбод жудо бўлиш фикри келиши билан Вера дунёдаги ҳамма нарсадан—ҳаётимдан ҳам, баҳтимдан ҳам қимматроқ кўриниб кетди! Миямга қандай ғалати ва машъум ҳаёллар келганини ўзим биламан-у, худо билади... Ҳамон отимни шафқатсиз равишда чоптириб борарадим. Бир маҳал қарасам, отим ҳарсиллаб қолди, текис йўлдан кета туриб, бир-икки марта қоқилиб ҳам кетди... Есентуки деган казаклар станциясигача беш чақиримча қолган эди,— у ердан бошқа от миниб олишим мумкин эди.

Агар отим яна ўн минутча чида берса, муродимга етардим. Бироқ тоғ орқасидаги кичкина бир жарликдан кўтарилаётуб, тик йўл муюлишида отим бирдан ерга гурс этиб йиқилди. Мен дарҳол сакраб тушдим, увалло жиловидан тортиб турғизаман дейманки, сира турмайди, гириҳ бўлиб қолган тишлари орасидан эшитилар—эшитилмас инграш эшитилди; бир неча минутдан кейин жон берди; энг сўнгги умидимдан ҳам маҳрум бўлиб, дашти биёбонда ёлғиз ўзим қолдим; пиёда юриб кўрган эдим, оёқларим майнишиб кетди: бутун куни бўйи тортган ташвишларим ва уйқусизлик натижасида нам майса устига йиқилдим-да, худди ёш бола каби ўқраб йиглаб юбордим.

Анча вақтгача қимиirlамай ҳўнг-ҳўнг йиғлаб ётдим; кўз ёшларимни ва аламларимни ўз ихтиёрига қўйиб

бөрдим; юрак бағрим эзилиб кетди, бутун иродам, совуққонлигим бир зумда тутундай тарқалиб кетди; руҳим түшиб, эс-хушим сұнди. Агар шұ пайтда мени бирор күриш қолса, мендан нафратланиб, юзини тескари үгериб кетарди.

Тун шабнами, тоғ шамоли ўртаниб турған бошимни совутиб, эс-хушим ўзимга келгач, құлдан кетган баҳт қуши кетидан қувишининг фойдасиз ва телбалик экан-лигини англадим. Мен яна нимани истайман? Уни күришними? Нима учун? Икки орамизда ҳамма нарса ғитгани равшан эмасми? Биттагина охирги — айрилиш бұсаси менинг хотирамни бойитолмайды, балки айрилишишимизни қайтага янада оғирлаштириб юборади.

Шундай бўлишига қарамай, мен ҳам йиғлаёлар-канман деб суюндим! Балки бунга сабаб — асабларимнинг бузилиши, уйқусиз кеча, икки минут тўппонча қаршисида туришим ва қорнимнинг очлигидир.

Қайтангга яхши бўлди! Бу янги азоб, ҳарбий термин билан айтганда, менинг учун баҳтли бир диверсия вужудга келганди. Йиғлаш соғлиқ учун яхши, иннай-кейин, от чоптирганимда ва ўн беш чақирим йўлни пиёда босмаганимда, балки бу кеча ҳам ухламай чиқармидим.

Кисловодска саҳар соат бешда қайтиб келдим, ўзимни ўринга таппа ташладим-да, Наполеоннинг Ватерлоо⁷⁶дан кейинги уйқуси билан ухлаб қолдим.

Үйғонсам — қоронғи тушипти. Очиқ дераза олдига келиб, орқалигимнинг тұгмаларини ечиб ташладим, тоғ шамоли чуқур уйқудан кейин ҳам ором топмаган күкрагимни елпиди. Йироқдан, қалин арғувон дараҳтлари орасидан қалъа ва слободка чироқлари бамисоли оқиб борувчи дарәдай бўлиб кўринарди. Ҳовлимиз жимжит, княгиняниңг уйи қоп-қоронғи эди.

Доктор кириб келди; қовоғи солиқ: одатда мен билан қўй бериб кўришарди, бу сафар қўлини ҳам узатмади.

— Қаердан келяпсиз, доктор?

— Княгиня Лиговскаяникида эдим; қизи бетоб ётиби — асаб касали. Аммо гап унда эмас, гап бошқа ёқда: бошлиқлар билиб қолганга ўхшайды, гарчы исбот этадиган ҳеч қандай далил бўлмаса-да, ўзингизни эҳтиётлаб юринг, демоқчиман. Княгиня боя менга сизнинг ўз қизи туфайли отишганингизни айтди, билар

экан. Бу гапларни ўша чол гапириб берипти, хаҳ... оти нима эди?.. Ресторацияда Грушницкий билан икки ўрталарингда жанжал чиққанини кўрган экан. Мен сизни огоҳлантириб қўйяй деб келдим. Хайр энди. Балки энди бир умр кўришмасмиз: сизни бошқа ёқса жўна-тишса керак.

У остоңада тўхтади. Назаримда, қўлимни сиқиб хайрлашмоқчи бўлди... агар менда шундай истак борлигини билдирганимда, ўзини бўйнимга ташларди; бироқ мен тошдай қотиб туравердим, у чиқиб кетди.

Одамларни қаранг! Ҳаммаси шунаقا: қиладиган ишларингнинг ҳамма ёмон томонларини олдиндан била туриб, сенга ёрдам қилишади, маслаҳатлар беришади, ҳатто бошқа илож йўқлигини билиб, маъқуллашади ҳам — иш битгандан кейин эса қўлларини ювиб қўлтиқча уришади, бутун масъулиятни ўз устига олган кишидан юзларини тескари ўгириб кетишади. Ҳамма одамлар, ҳатто энг меҳрибонлари ҳам, энг до-нолар ҳам шунаقا!..

Эртаси куни эрталаб олий қўмондонликдан N. деган қалъага жўнаш тўғрисида буйруқ олгач, княгиня билан хайрлашгани кирдим.

Унинг, менга бирон муҳим гап айтмоқчимисиз, деган саволига сизга баҳт тилайман ва ҳоказо деб жавоб берган эдим, ҳайрон бўлди.

— Сиз билан жуда жиддий гаплашадиган гапим бор.

Мен индамай ўтирдим.

Гапни нимадан бошлашни билмай ўтирганилиги равшан эди: юзлари қизариб кетди, семиз бармоқлари столни чертарди, ахири, тутила-тутила гап бошлиди:

— Менга қаранг, мсьё Печорин, мен сизни олижаноб бир киши деб биламан.

Мен таъзим қилдим.

— Гарчи ҳатти-ҳаракатларингиз бир оз шубҳали бўлса ҳам, бари бир бунга аминман,— деб давом этди княгиня.— Аммо дилингизда фақат ўзингизгагина маълум бўлган сабаблар бўлиши мумкин, менга уларни айтишингиз керак. Менинг қизимни туҳматдан ҳимоя қилдингиз, уни деб отишдингиз, бинобарин, ҳаётингизни таҳлика остига қўйдингиз... Гапирманг, биламан, бунга сира иқор бўлмайсиз, чунки Грушницкий ўлиб кетди (княгиня чўқиниб олди). Гуноҳи бўлса худо кечирсан,

сизникини ҳам кечирар деб ишонаман!.. Бу билан менинг ишим йўқ... Мен сизни қоралаёлмайман, чунки менинг қизим гуноҳсиз бўлса ҳам, бунга сабаб бўлди. У менга ҳамма гапни айтиб берди... Ҳамма гапни айтди деб ўйлайман: сиз унга севингизни изҳор этибсиз, у ҳам сизни севаман депти (шу ерга келганда княгиня оғир хўрсинди). Аммо қизим бетоб ётипти, аминманки, унинг касали оддий касаллардан эмас! Қандайдир сирли бир дард уни азобламоқда; нималигини айтмайди, аммо бунинг сабаби сиздалигига имоним комил... Менга қаранг: сиз мени балки амал ёки давлат излайди деб ўйларсиз,— бу фикрингиздан қайтинг: мен фақат қизимнинг баҳт-саодатли бўлишини истайман, холос. Сизнинг ҳозирги аҳволингиз одамлар ҳавас қиласидиган аҳволлардан эмас, аммо кейин-кейин яхши бўлиб кетиши мумкин: давлатингиз бор; қизим сизни севади, у шундай тарбия топганки, ўз эрини баҳт-саодатли қилиш қўлидан келади. Менинг ҳам давлатим катта, у менинг биттаю битта қизим... Айтинг-чи, сизни нима тутиб турибди?.. Кўриб турибсизки, бу гапларнинг мендан чиқиши лозим эмас эди, аммо мен сизнинг қалбингизга, лафзингизга инониб туриб айтдим, пешанамда ёлғиз шу биргина қизим эканлигини унутманг....

Княгиня йиғлаб юборди.

— Княгиня,— дедим мен,— мен сизга ҳеч нарса дёёлмайман: рухсат этсангиз, қизингиз билан танҳо гапиришсам...

— Ҳеч бир! — деб қичқириб юборди княгиня, зўр ҳаяжон билан ўрнидан туриб.

— Ихтиёeringиз,— дедим мен ва кетишга чоғландим.

Княгиня бир оз ўйланиб қолди-да, бирпас туринг дегандай қўли билан ишора қилиб, уйдан чиқди.

Орадан беш минутча вақт ўтди; юрагим гуп-гуп уриб турса ҳам, фикрим равшан, ақли ҳушим жойида эди: қалбимдан бечора Мерига нисбатан заррача севги учқуни топилармикин дейман, сира топилмайди.

Ана, эшик очилди-ю, у кириб келди. Ё раббий! Кейинги сафар кўрганимдан бери жуда ўзгариб кетипти — кўрганимга кўп бўлдими?

Уйнинг ўртасига келиб, бирдан гандираклаб кетди: иргиб ўрнимдан турдим-да, қўлнимни бериб, креслога олиб келдим.

Ўзим унинг рўпарасига келиб турдим. Анчагача га-

пиролмай турдик, унинг таърифлаб бўлмайдиган алла-қандай қайғу-ҳасратли шаҳло кўзлари умид ва нажот излаб менинг кўзларимга боқарди: оппоқ оқариб кетган лаблари табассум қилмоқчи бўларди-ю, бироқ бунга ожиз эди; тиззаларига қўйиб ўтирган нозик қўллари шу қадар ориқлаб кетган эдики, бечорага раҳмим келиб кетди.

— Княжна,— дедим,— мен сизни мазах қилиб юрганимни биласизми?.. Сиз мендан нафратланишингиз керак.

Юзларида хасталарга хос қизиллик пайдо бўлди.

Мен давом этдим:

— Бинобарин, сиз мени севолмайсиз...

Княжна юзини қўли билан тўсиб тескари ўгирилдида, столга суюнди, кўзларидан ёш чиққандай туюлди.

— Ё раббий!— деб пичирлади у.

Бунга ортиқ чидаб туриш қийин эди: бу ҳол яна бирлаҳза давом этса, ўзимни унинг оёқларига ташлардим.

— Ўзингиз ҳам кўриб турибсизки,— мен мумкин қадар қатъий оҳангда, зўраки кулги билан сўзимда давом этдим,— ўзингиз ҳам кўриб турибсизки, мен сизга уйла-наолмайман. Агар шу гаплардан кейин ҳам буни хоҳласангиз, кейин ўзингиз пушаймон бўласиз. Сизга бу гапларни шу қадар очиқ ва шу қадар қўпол гапиришимга онангиз билан қилган суҳбатим мажбур этди: онангиз хато қилгандир деган умиддаман, унинг бу фикридан қайтариш сизнинг қўлингиздан келади. Кўриб турибсизки, қўзингиз олдида энг хунук ва энг қабиҳ роль ўйна-моқдаман, ҳатто бунга ўзим ҳам иқрор бўлиб турибман; сиз учун қўлимдан келган нарса шу. Менинг ҳақимда қандай ёмон фикрда бўлманг, ҳаммасига розиман... Кўрдингизми, мен сизнинг олдингизда бир разил одамман... Агар мени севганингизда ҳам, ҳозирдан эътиборан мендан нафратланишингиз керак, шундай эмасми?..

Княжна докадай оқариб кетган юзини менга ўгириди, фақат кўзлари ажойиб бир суратда чарақларди.

— Сизни кўришга кўзим йўқ...— деди.

Мен ташаккур айтиб, ҳурмат билан таъзим қилдимда, чиқиб кетдим.

Бир соатдан кейин уч отли куръер каретаси мени Кисловодскдан олиб кетди. Есентукига бир неча чақирим қолганда, йўл бўйида чопқир отимнинг ўлигини кўрдим; устидаги эгари йўқ эди, бирон ўткинчи казак олиб

кетган бўлса керак, эгар ўрнида иккита қарға ўтиради.
Бир хўрсиндим-да, юзимни тескари ўгирдим...

Мана энди диққинафас қалъада ўтириб, ўтмишни эслар эканман, нима сабабдан тақдир менга очиб берган бу йўлга киришни истамадим, ахир шундай қилсам мени ҳузур-ҳаловат, руҳий сокинлик кутарди-ку?.. деб ўзимдан ўзим сўрайман. Йўқ, бу қисматга мен чидаб туролмас эдим! Мен, қароқчилар кемасида туғилиб ўсган матросга ўхшайман: унинг қалби бўрон ва жангларга ўрганиб қолган, агар қирғоққа чиқиб қолса, серсоя ўрмонлар уни қанча ўзига тортмасин, қуёш унга ўз ёғдусини қанча мўл сочмасин, бари бир унинг юраги сиқилади, диққинафас бўлади; эртадан кечгача қумлоқ қирғоқларда қезиб, елиб-югуриб келувчи тўлқинларнинг салмоқдор товушларига қулоқ солиб, йироқдан кўм-кўк тўлқинларни қора булутлардан ажратиб турган уфқ ортидан олдин балиқчи қуш қанотига ўхшаш, кейин-кейин тўлқин кўпикларидан ажralиб, кимсасиз пристанга елиб келувчи елкан кўринмасмикни деб, туман босган одислардан кўзини узмай юраверади...

III

Фаталист

Бир вақт чап флангдаги казак станицасида икки ҳафта туриб қолишга тўғри келди: станицада яна бир батальон пиёда аскар ҳам турарди; офицерлар бир-бирлариникида галма-гал тўпланишиб, кечалари қарта ўйнап эдилар.

Бир куни майор С*** деганникида бостон⁷⁷ ўйнай-ўйнай зерикиб, қартани стёл тагига ирғитдик-да, анчагача суҳбатлашиб ўтиредик; суҳбатимиз одатдаги суҳбатларга қарагандা жуда қизиқ эди. Гап, ҳар кимнинг тақдирни пешанасига битилган деган мусулмонлар эътиқодига орамизда кўп одамлар ишонармиш деган нарсадан кетди; ҳар ким буни исбот қилиш ёинки қоралаш учун ҳар хил гайри табний воқеаларни айтиб берарди.

— Бу гаплар ҳеч нарсанни исбот этолмайди, жаноблар,— деди кекса майор,— ахир, фикрларингизни исботлаш учун айтиб берган воқеаларни ҳеч бирингиз ўз кўзингиз билан кўрмагансиз-ку?

— Албатта ҳеч ким кўрмаган,— деди кўпчилик,— аммо кўрмаган бўлсак ҳам ишончли одамлардан эшиганимиз...

— Бари беҳуда гап!— деди аллаким.— Ажалимиз етган вақт-соатни кўрсатувчи рўйхатни кўрган ўша ишончли одамлар ким экан, қани улар? Хўп, башарти, тақдир деган нарса бор экан, унда ирода, ақл деган нарсалар бизга нима учун берилган? Нима учун биз ўзимизнинг ҳар бир ишимиз, ҳар бир хатти-ҳаракатимиздан ҳисоб беришимиз керак?

Шу онда уйнинг бир бурчагида ўтирган бир офицер ўрнидан турди-да, стол ёнига келиб, ҳаммага тантанали ва хотиржам назар ташлади. Уйнинг миллати серб эканлиги фамилиясидан маълум эди.

Поручик Вуличнинг ташқи қиёфаси уйнинг характерига тамомила мос тушганди. Баланд қомати, қоп-қора соchlари, буғдой ранги, қоп-қора ва ўткир кўзлари, ўз миллатига хос бўлган каттагина, аммо хушбичим бурни, лабидан сира аримайдиган ғамгин ва совуқ табассуми,— уни бошқача, тақдир томонидан ёру дўст қилиб тайин этилган кишилар билан ўзининг фикр ва ҳисларини ўртоқлашмайдиган бир одам қилиб кўрсатарди.

Узи жуда мард, камгап, аммо гапирганда жиддий гапирадиган одам эди: ўзининг руҳий ва оиласвий сирларини ҳеч кимга очиб айтмасди; винони бутунлай оғзига олмасди, ўз кўзи билан кўрмаган одам уларнинг нақадар гўзал эканликларини тасаввур эта олмайдиган ёш казак қизлари кетидан судралиб юрмасди. Аммо, полковнигизнинг хотини уйнинг маънодор кўзларига хуштор эмиш деган гаплар юрарди; лекин одамлар бу ҳақда гап очса, Вуличнинг чапақай жаҳли чиқиб кетарди.

Уйнинг ҳеч кимдан яширмайдиган биттагина эҳтироси бор эди,— у ҳам бўлса қартавозлик эди. Яшил стол⁷⁸ ёнига ўтиrsa, дунёда кўзига ҳеч нарса кўринмасди, одатда ютқизиб юрарди: аммо қанча ютқизса, шунча ўжарлашарди. Бир воқеани ҳикоя қилиб беришди: экспедиция вақтида, кечаси ёстиқ устида банк ўйнашибди; бу сафар Вуличнинг жуда омади келиб турган экан. Бирдан отишма бошланиб тревога бўлиб қолибди-да, ҳамма ўрнидан туриб қуролга югурипти. «Ва-банк»⁷⁹ деб қичқирибди Вулич, моҳир қартавозлардан бирига ўрнидан ҳам турмасдан, «еттилик кетди», деб жавоб берибди у, югуриб

ташқарига чиқиб кета туриб. Тұс-тұполон бўлиб туриши-
га қарамай, Вулич қартан очипти, банкини ютқазипти.

Ўз қисми жойлашган ерга етиб борса, тарақа-туруқ
отишма қизиб кетганды экан. Вулич ўқларни ҳам, чечен-
ларнинг қиличини ҳам писанд қилмай, баҳтиёр қартавоз-
ни излаб кетипти.

Евни ўрмон ичидан сиқиб чиқара бошлаган ўқчилар
қаторидан ахир қидириб топипти-да: «Еттилик ютди!»
деб бақирипти ва унинг ёнига бориб, бу ерда ҳисоб-ки-
тобнинг ўрни йўқ дейишга ҳам қарамасдан, ёnidan ҳам-
ёнини чиқариб берипти. Кўнгилсиз қарзни узиб бўлган-
дан кейингина жангга отилиб, кетидан солдатларни
эргаштириб кетипти, то жанг тамом бўлгунча чеченлар
билан отишити.

Поручик Вулич стол ёнига келиши билан, у яна қан-
дай янги ҳунар кўрсатаркин, деб ҳамма жим бўлди.

— Жаноблар,— деди у, унинг овози одатдагидан сал
пастроқ бўлса-да, аммо хотиржам эди,— жаноблар, беҳу-
да баҳсдан нима фойда? Ислот керак десаларингиз, мен
одам ўз ҳаётининг ҳақиқий эгасими ёки ҳар бирнлизнинг
вақт-соатимиз олдиндан битиб қўйилганми деган нарса-
ни ҳар ким ўзида синаб кўришини таклиф этаман... ким
хоҳлади?

— Мен хоҳламайман, мен хоҳламайман!— деган
овозлар эшитилди ҳар тарафдан.— Вой тентаг-ей! Ўйлаб
топган нарсасини қаранг-а!..

— Гаров бойлашамиз,—дедим мен, ҳазиллашиб.

— Нимадан?

— Тақдир деган нарса йўқ,— дедим мен ва ёнимдаги
бор пулимни олиб стол устига ташладим; ҳаммаси бўлиб
йигирма червон экан.

— Бўпти,— деди Вулич бўғиқ товуш билан.— Майор,
сиз бизга ҳакам бўласиз; мана ўн беш червон, ўзингиз
мендан беш червон қарзсиз, бир дўстлик қилиб шуни
қўшиб қўйсангиз.

— Хўп бўлади,—деди майор,—аммо, тўғрисини айт-
сан, мен ҳеч нарсага тушунолмай қолдим, баҳсни қан-
дай ҳал қиласизлар?

Вулич индамасдан майорнинг ётоғига кириб кетди;
кетидан биз ҳам кирдик. Вулич яроғ-аслаҳа осиб қўйил-
ган девор тагига бориб, қозиқдаги ҳар хил калибрли
тўппончалардан тўғри келганини олди. Биз ҳали ҳам
унинг нима қилмәқчилигини билмай турардик; аммо

түппонча тепкисини тортиб, ичига порох солиши билан күплар бирдан ҳай-ҳайлаб унинг қўлидан ушлашди.

— Нима қилмоқчисан? Ҳой, жинни бўлдингми?—деб қичқиришди.

— Жаноблар!—деди Вулич, секин қўлини бўшатиб.— Мен учун ким йигирма червон тўлайди?

Ҳамма жим бўлиб, четга чиқиб турди.

Вулич нариги уйга чиқиб, стол ёнига бориб ўтирди; унинг кетидан биз ҳам чиқдик. Вулич атрофимга ўти-ринглар деб ишора қилди. Биз индамасдан атрофига ўтирдик: шу онда у ҳаммамизнинг устимииздан қандайдир сирли бир кучга эга бўлгандай эди. Мен унинг кўзларига тикилдим, аммо у менинг бу боқишимни дадил ва хотиржам қарши олди, оппоқ оқариб кетган лабларига табассум югурди, аммо совуққонлик билан ўтиришига қарамай, сўлғин юзида ажал аломати борлигини сезгандек бўлдим. Бир неча соатдан кейин ўладиган одамларнинг чеҳрасида машъум тақдирнинг қандайдир фалати бир нишонаси пайдо бўлганини ўз кўзим билан кўрганман, кўп кекса жангчилар ҳам шундай дейдилар: ўрганиб қолган кўз асло хато қилмайди.

— Сиз бугун ўласиз!—дедим мен, Вуличга. У менга ялт этиб қаради-ю, бироқ сокин бир вазиятда:

— Эҳтимол ўларман, эҳтимол ўлмасман...—деб жавоб берди. Сўнгра майорга қараб: Тўппонча ўқланганими?—деб сўради. Майор шошиб қолгандан ўқланган ёки ўқланмаганини яхши эслаёлмади.

— Қўйсангиз-чи, Вулич!—деб қичқирди аллаким.— Бош томонда осиғлиқ тургандан кейин албатта ўқланган бўлади-да, бу нима ҳазил!..

— Аҳмоқона ҳазил!—деди яна бирор.

— Беш сўмга қарши эллик сўм қўйиб гаров ўйнайманки тўппонча ўқланмаган!—деб қичқирди учинчи бир киши.

Яна бир гаров ортди.

Бу чўзилиб кетган моросим жонимга тегди. «Менга қаранг,— дедим Вуличга,— ё ўзингизни отинг, ё бўлмаса тўппончани жойига илиб қўйинг, бориб ётайлик».

— Тўғри,— деб қичқирди кўплар,— бориб ухлайлик.

— Жаноблар, жойларингиздан қўзғалмай ўтиришин-гизни сўрайман!— деди Вулич тўппончани пешанасига тираб. Ҳамма тошдай қотиб қолди.— Жаноб Печорин,— деб илова қилди у,— битта қартани олиб, осмонга отинг.

Эсимда: стол устидан топпон тузни олиб, юқорига иргитдим: ҳамманинг нафаси оғзига тиқилиб қолди; қўрқув босган кўзлар гоҳ тўппончага, гоҳ чирпирак бўлиб тушаётган қартага жавдираб қаарарди; қарта энди столга келиб тушиши биланоқ, Вулич тепкини босди... тўппонча отилмади!

— Худога шукур-е,— деб қичқириб юборди одамлар,— ўқланмаган экан...

— Яна бир отиб кўрайлик-чи,— деди Вулич. Тепкини яна тортиб дераза тепасида осиғлиқ турган фуражкани нишонга олди; тўппонча отилиб, уйнинг ичи тутунга тўлди; тутун тарқалиб кетгандан кейин қарасак, ўқ фуражканинг қоқ ўртасидан тешиб, деворнинг ичига кириб кеттипи.

Ҳамма уч минутгача тошдай қотиб қолди; Вулич индамасдан менинг червонларимни йифиштириб ҳамёнига солиб олди.

Нима учун тўппонча олдинги сафар отилмагани устида гап кетди; баъзилар балки тўппончанинг ичи ифлосланиб қолгандир дерди, баъзилар эса олдинги сафар порох кам эди, кейинги сафар Вулич янги порох солди, шунинг учун отилмаган бўлса керак, деб шивирлади; аммо мен кейинги тахминнинг нотўғрилигини тасдиқладим, чунки мен тўппончадан кўзимни узмай қараб турган эдим.

— Қиморда бахтли экансиз!—дедим мен Вуличга қараб.

— Умримда биринчи марта омад келиши,— деди Вулич ўзидан мамнун ҳолда кулиб.— Ванкдан ҳам, штоссдан⁸⁰ ҳам шуниси яхши экан.

— Шунда-ю, аммо хатарлироқ-да.

— Хўш, энди тақдирга ишонасизми?

— Ишонмайман; аммо бир нарсага тушунолмай турибман: нима учундир бугун албатта ўласиз деб ўйлагандим...

Боягина пешанасига хотиржамлик билан тўппонча тираб турган одам энди бирдан қип-қизариб, хижолат тортиди.

— Бўлди, тамом қилайлик,— деди Вулич ўрнидан туриб,— баҳсимиз тугади, энди ҳар қандай мулоҳаза ортиқчадир, деб ўйлайман.

Вулич шапкасини олиб чиқиб кетди. Бу менга ғала-

тироқ туюлди—лекин ғалатироқ туюлиши ҳам бежиз әмас экан.

Бирпасдан кейин ҳаммамиз Вуличнинг қизиқ қилиқлари ҳақида гапиришиб, уй-уйимизга тарқалишдик, ҳамма бир оғиздан менга: ўзини ўзи отиб ўлдирмоқчи бўлган одам билан гаров бойлашдингиз, худбин экансиз, деди; гёй мен бўлмаганимда, Вулич қулай пайт тополмайдигандай!..

Станицанинг хилват кўчаларидан уйимга қайтиб борардим; уйларнинг кунгурасимон томлари орқасидан худди ёнғин алангасидай қип-қизил тўлин ой кўринарди; қоп-қора осмонда юлдузлар чаракларди, бир замонлар одамларнинг бир қарич ер учун ёки аллақандай қалбаки ҳуқуқлари учун олиб борган арзимаган баҳслярига осмон сайдерлари ҳам иштирок этади дегувчи билимдонлар хаёлимга келиб, кулгум қистаб кетди. Негаки, ўша донишманлар фақат инсонларнинг жанглари ва тантаналарини ёритиб туриш учун ёқилган деб ўйлаган осмон машъаллари ҳозир ҳам аввалгидек чараклаб ёнарди, уларнинг эҳтирос ва тилаклари эса бирон ўткинчи томонидан ўрмон ёқасига ёқилган гулхан каби ўзлари билан бирга сўниб кетган. Аммо осмондаги юлдузларнинг хайриҳоҳлик билан боқиб туришининг ўзиёқ уларга қанча куч, ирова ва ишонч бағишлиган!.. Уларнинг nochor авлодлари бўлган бизлар эсак ер юзида эътиқодсиз ва ғуурсиз, завқ ва қўрқувсиз кезиб юрамиз, ўлим муҳаққақ экани ёдимизга келганда, юрагимизни беихтиёр эзувчи қўрқувдан бошқа на инсониятнинг фаровонлиги учун ва на ўз баҳтимиз учун ҳам катта-катта қурбон беришга қодир эмасмиз, чунки дунёда баҳт йўқлигини биламиз, ота-боболаримиз бир хатодан қутулиб, иккинчисига тутилганлари каби, биз ҳам бир шубҳадан қутулиб, бошқа шубҳага тутиламиз, ота-боболаримиз сингари биронта орзу-умидимиз ҳам йўқ, ҳатто одамлар билан ё бўлмаса тақдир билан бўлган курашда қалб эришадиган кучли, аммо номаълум завқга ҳам эга бўла олмаймиз...

Миямга бундан бошқа яна талай хаёллар келди; мен уларга қаршилик қилдим, чунки мавҳум фикрлар устида бош қотиришни ёмон кўраман; бундан нима фойда?.. Мен илк ёшлигимда хаёлпараст эдим; бесаранжом ва сира тўймайдиган хаёлларим яратган гоҳ мудҳиш, гоҳ ёрқин образларни ардоқлардим, сурдим. Аммо бундан менга

німа қолди? Худди кечаси арвоҳлар билан олишгандан кейин ҳис этиладиган ҳорғынлик, афсус-надоматлар билан тұла хотираларгина қолди, холос. Бу беҳуда курашда бутун қалбим ўттні ва ҳақиқиеттің учун керак бўлган иродам кучини сарфладим; бу ҳаётга фикран ҳамма нарсани бошимдан кечириб бўлибгина қадам қўйдим, шундан сўнг мен худди bemaza тақлид қилинган китобни ўқиб зериккан кишидай зерикиб, беҳузур бўлдим.

Бу кеча юз берган воқеа менга қаттиқ таъсир қилди, асабларимни қўзғатиб юборди. Тақдир деган нарсага ҳозир ишонаманми, йўқми, буни аниқ айттолмайман, аммо шу кеча қаттиқ ишонгандим: далил ғоятда зўр эди, шунинг учун мен ўз ота-боболаримиз ва улар хизмат қилиб келган вафодор астрология⁸¹ни масхара қилиб келган бўлсам-да, беихтиёр уларнинг йўлига тушдим, аммо бу хавф-хатарли йўлдан вақти ғаниматда ўзимни тўхтатиб қолдим ва ҳеч бир нарсага кўр-кўронга ишонмайдиган қондага амал қилишим учун метафизикани бир четга йиғиштириб қўйдим-да, оёғимнинг тагига қараб юрдим. Бундай эҳтиёткорлик жуда ўринлик чиқди: йўғон ва юмшоқ, афтидан, жонсиз ётган бир нарсага қоқилиб кетиб, йиқилишимга сал қолди. Ой йўлни сутдай ёритиб турарди; нима экан деб энгашиб қарасам — қилич билан икки бўлиб ташланган чўчқа экан... Ҳали бошимни кўтарганим ҳам йўқ эдики, бирдан дукур-дукур товуш эшитилди: тор кўчадан икки казак югуриб чиқиб келмоқда эди; улардан бири ёнимга келди-да, чўчқа қувиб юрган маст казакни кўрмадингизми, деб сўради. Мен кўрмадим дедим-да, мастинг бемаъни мардлиги қурбони бўлмиш бечора чўчқани кўрсатдим.

— Вой каллакесар-ей,— деди иккинчи казак,— чихир⁸² ичіб олдими, бўлди, йўлида нима учраса чопиб ташлайверади. Юр, Еремеич, топиб қўл-оёғини боғлайлик, бўлмаса...

Улар кетишли, мен ҳам зўр эҳтиёткорлик билан ўз йўлимдан кетдим, ниҳоят квартирамга омон-эсон етиб олдим.

Мен бир кекса урядникникида турардим; уни яхши кўрардим, чунки жуда меҳрибон одам эди; аммо ундан ҳам Настя деган дилрабо қизини яхши кўрардим.

Одатдагидек, Настя пўстинга ўралиб, мени дарвоза олдида кутиб ўтирган экан; тун совуғидан кўкариб кетган лабларини ой ёритиб турарди. Мени кўриб, жилмай-

ди, бироқ бугун у күнглигінде сиғмасди. «Яхши қол, Настя!» дедім мен ёнідан ўтиб кетаётіб. У менга бир нима демоқчи бўлди-ю, бироқ индамади, фақат хўрсиниб қўяқолди.

Үйимга кириб эшикни ичидан беркитдим-да, шам ёқиб, ўзимни ўринга ташладим; аммо бу сафар уйқу ҳадеб келавермади. Осмоннинг шарқ томони қизара бошлагандагина кўзим уйқуга кетибди, бироқ бугун уйқуга тўймаслик пешанамга битилган экан. Саҳар соат тўртларда икки мушт деразамни қоқа бошлади. Иргиб ўрнимдан турдим: «Нима гап?» деб сўрадим... «Тур, кийин!» деб қичқирди бир неча киши. Апир-шапир кийиниб чиқдим. «Юз берган ҳодисадан хабаринг борми?»—деди мени излаб келган уч офицер баравардан; уларнинг юзлари докадай оқариб кетганди.

— Нима бўлди?

— Вулични ўлдириб кетишипти.

Мен тошдай қотиб қолдим.

— Ҳа, рост!— деб давом этди улар.— Юр тезроқ.

— Қаёққа?

— Йўлда биласан.

Қетдик. Улар бўлиб ўтган воқеага Вуличнинг ўлимидан ярим соатгина олдин тақдир уни бир ўлимдан сақлаб қолгани ҳақида ўз мулоҳазаларини қўшиб гапириб бердилар. Вулич қоронғи кўчадан ёлғиз ўзи кетаётган экан; бирдан чўчқани чопиб ташлаган маст казакка дуч келипти-да, тўхтаб: «Кимни излаб юрибсан, оғайни?»—депти. Шуни демаганда-ку, балки казак ўз йўлидан кетавериши мумкин экан, бироқ казак тўхтапти-да, «Сени!» депти-ю, қилич солиб елкасидан то юрагигача бўлиб ташлабдй... Шу ерда менга йўлиққан ва қотил кетидан қувган икки казак келиб қолиб, ярадорни ердан кўтаришипти, у жон берай деб турган экан, фақат, «у ҳақли!» деган икки оғиз сўзни айтипти-ю, ўлипти.

Бу сўзларнинг сирли маъносини ёлғиз мен билардим: у сўзларни менга қаратиб айтган эди; у бечорага қисматинг шунаقا бўлади деб бехосдан айтиб қўйган эдим; инстинкт⁸³им мени алдамади, унинг ўзгариб кетган юзидан ажали етиб турганини аниқ кўрган эдим.

Қотил станицанинг четидаги бир бўш уйга кириб беркиниб олган экан, биз ўша ерга қараб югурдик. Бир талай хотин-халаж ҳам йиғлаб-сиқтаб ўша томонга қараб югуради: баъзан кеч қолган казаклар уйларидан

югуриб чиқар, йўл-йўлакай ханжарларини тақиб, югуриб биздан ўтиј кетишарди. Даҳшатли ғала-ғовур кўтарилиди.

Ниҳоят етиб бордик; қарасак, уй олдида бир талай одам тўпланиб туриби, уйнинг эшик ва деразалари ичидан берк. Офицерлар ва казаклар ўзаро қизғин баҳслашиб турадилар; хотинлар қий-чув қилиб йиглашарди. Улар орасида кўзлари телба одамнинг кўзига ўхшаган бир кампир дикқатимни жалб қилди. Қампир хода устида тирсагини тиззасига тираб, қўллари билан бошини ушлаб ўтиради, у қотилнинг онаси экан. Лаблари бир нималар деб пичирларди... У лаблари дуо ўқирмиди ё ўғлига лаънат?

Бирон қарорга келиб жиноятчини ушлаш керак эди. Аммо уйга бостириб киришга ҳеч кимнинг юраги дов бермасди.

Дераза ёнига бориб, тирқишдан қарадим: қотил ранглари оппоқ оқариб, ўнг қўлида тўппонча ушлаб ерда ётарди; қонга беланган қиличи ёнида ётарди. Маънодор кўзлари атрофга жавдираб қаради; аҳён-аҳёнда сесканиб тушарди-да, худди кечаси бўлиб ўтган воқеани сал хотирлагандай, бошини ушларди. Унинг бу бесаранжом боқишиларида мардлик аломуватларини кўрмадим ва майорга қараб, бекорга эшикни буздирмаяпсиз, эшикни бузиб, казаклар ичкарига бостириб кириши керак, буни ҳозир қилмасангиз кейин қийин бўлади, чунки у ўзига келади, дедим.

Шу замон эшик олдига кекса бир ясовул келди-да, қотилнинг отини айтиб чақирди; у овоз берди.

— Гуноҳни қилишга қилдинг, Ефимич ука, энди таслим бўл, бошқа иложинг йўқ! — деди ясовул.

— Таслим бўлмайман — деб жавоб берди казак.

— Худодан қўрқ! Ахир, сен бир кофир чечен эмассан, христиансан-ку. Ҳа майли энди, гуноҳ қилиб қўйибсан, пешанангга тушганини кўрасан-да!

— Таслим бўлмайман! — деб бўкирди казак даҳшатли бир овоз билан ва тепкини шарақлатиб тортиб қўйгани эшитилди.

— Ҳой хола, — деди ясовул, кампирга қараб: — ўғлинг билан гаплашиб кўр, балки сенинг гапингга кирав... Худонинг ғазабига учрайди, ахир. Ана, қара, жаноблар, ҳам икки соатдан берни кутиб туришипти.

Кампир унга тикилиб, бош чайқади.

— Василий Петрович!—деди ясовул, майорнинг олдига келиб.—У гапга қулоқ солмайди, мен уни биламан; эшикни бузсак кўп одамларни нобуд қиласди. Яхшиси, отиб ташлай қолайлик. Дарпарданинг катта тешиги бор.

Шу онда менинг миямга ғалати бир фикр келди: Вулич сингари мен ҳам ўз тақдиримни синаб кўрмоқчи бўлдим.

— Шошмай туриң,—дедим майорга.—Мен уни тириклиайн ушлайман.—Ясовулга қотилни гапга солиб тур деб буюрдим, эшикка учта казак қўйилсан, мен ишора қилишим биланоқ дарпардан бузиб менга ёрдам беришин деб буюрдим-да, уйни айланиб машъум дераза олдига келдим. Юрагим гул-гуп уради.

— Ҳой, имонсиз кофир!—деб бақиради ясовул.—Сен бизни майна қиляпсанми? Е тутиб ололмайди деб ўйлайсанми?—Кейин кучининг борича эшикни қоқа бошлиди, мен дераза тирқишидан казакнинг нима қилишини қузатиб турадим, у бу томондан ҳужум бўлишини кутмасди,—кейин бирдан деразани уриб туширдим-да, уй ичига шўнғиб тушдим. Нақ қулогим ёнидан визиллаб учиб ўтган ўқ эполетимни учирив кетди. Аммо уй ичини тутун босиб кетгани учун душманим ёнида ётган қиличини тополмади. Қўлидан маҳкам ушлаб олдим; казаклар бостириб киришди-да, уч минутда жиноятчининг қўл-оёғини боғлаб, конвой билан олиб кетишли. Халқ тарқалди, офицерлар мени табриклашди—бу йш ҳақиқатан ҳам табрикка сазовор эди.

Шундан кейин ҳам фаталист⁸⁴ бўлмайдими киши? Аммо бир нарсанинг бўлиш-бўлмаслигига ким муқаррар ишона олади?.. Кўпинча янглиш ҳис ёки эътиқодимизнинг алданишини эътқод деб қабул қиласми!.. Мен ҳар нарсага ҳам шубҳа билан қарайдиган одамман, бу нарса характеримнинг кескинлигига халал бермайди, аксинча, мени нима кутаётганини билмаганимда ҳамиша дадилроқ олға босаман. Ахир, ўлимдан баттар ҳеч нарса йўқ, ўлимдан эса қутулиб бўлмайди!

Қалъага қайтиб келгач, бошимдан ўтган ва ўз кўзим билан кўрган ҳамма воқеаларни Максим Максимичга батафсил гапириб бердим-да, тақдир ҳақида унинг фикрини билмоқчи бўлдим. У олдинига бу гапнинг маъносига тушунмади, аммо қўлимдан келганича тушунтириб берганимдан кейин, бошини маънодор чайқади-да, деди:

— Ҳа, албатта... Бу жуда нозик масала!.. У ёғини

сурыштирганингизда, агар Осиё тўппончаларининг тепкилари мойланмаган бўлса ёки қаттиқроқ босмасанг, кўпинча отилмай ҳам қолади. Ростини айтсам, черкесларнинг милтигини ҳам ёқтирмайман; бизларга негадир ярашмайди: қўндоғи калта, бурнингни куйдириб қўяди... Аммо, қиличларига келганда, қойил қолишдан бошқа чорам йўқ!

Сўнгра бир оз жим қолди-да, деди:

— Бечора бекорга нобуд бўлиб кетипти-да... Кечаси маст билан гаплашишга шайтон ундаган-да! Ҳа, майли, пешанасига битилгани шу экан!..

Уни ортиқ ҳеч гапга сололмадим: у умуман метафизик мулоҳазаларни ёмон кўради.

ИЗОХЛАР

1. *Духан* — дўкон сўзишинг Кавказда айтилиши; одатда, духан қовоқхоналик вазифасини ҳам ўтайди.
2. *Сюртук* — этаги тиззагача тушадиган эрлар кийими.
3. *Алексей Петрович Ермолов* — Кавказни забт этишда рус қўшинларига қўймондоилик қилган рус генерали.
4. *Линия* — бу ерда қатор қурилган ҳарбий истеҳкомлар маъносида; чор қўшинлари шу истеҳкомлардан Кавказга ҳужум бошланалар.
5. *Почта бекати* — темир йўл қурилмасдан бурун Россияда кирага от-арава берувчи станция; бундай бекатлар деярли ҳар ерда бўлар эди.
6. *Сакля* — кавказлилар уйи.
7. *Вал* — қалъа теврагидаги түпроққўргон, кўтарма.
8. *Итоатли князь* — Россия ҳокимлигини таниган, унга бўйсунган князъ.
9. *Абреклар* — довюраклиги билан донг чиқарган тоглилар.
10. *Гурда қилич* — Шарқ мамлакатларида ишланадиган асл пўлат қилич.
11. *Гамба, Жан-Франсуа* (1763—1833) — француз сайёхи, 1824 йилда «Жанубий Россия саёҳатномаси» деган китоб чиқарган.
12. *Ze mont st. Christophe* (франц.) — Христофор авлиё тоги.
13. *Соловей-Разбойник* — рус эртакларидан бирининг қаҳрамони.
14. *Бастион* — беш бурчак шаклида қурилган истеҳком.
15. *Гренадёр* — махсус қўшин составида хизмат қилувчи солдат.
16. *Термалама* — ипакли қалин мато.
17. *Шапсуглар* — тоглиларнинг жаҳонгашта қабилаларидан бири.
18. *Фигаро* — француз ёзувчиси Бомаршенинг (1732—1790) «Севилья сартароши» ва «Фигаронинг уйланиши» деган комедиялари қаҳрамони. Нихоятда уддабурон, чақон ва гапдон малай.
19. *Бальзак сатанги* — машхур француз ёзувчиси Оноре де Бальзак (1799—1850)нинг «Ўттиз ёшли жувон» деган романни чиққанидан кейин пайдо бўлган ибора.
20. *Руссонинг «Тавба»си* — машхур француз ёзувчиси ва философи Жан Жак Руссонинг (1712—1778) ўз таржиман ҳоли тарзида ёзган асари.
21. *Образ* — христиан динидагилар ўз уйларининг бурчагига осиб қўядиган санам.
22. *Малороссия лаҳжаси* — Украина ва Жанубий Россия бир вақтлар Малороссия деб аталарди.
23. *Ундини* — лотинча *unda* — (тўлқин деган сўздан) ўрта аср ривоятларига кўра — сув тангриси ундини фарзанд кўрмоқ ва шу

орқали одам руҳига эга бўлмоқ учун йўловчиларни сув тагига алдаб олиб кириб кетар экан.

24. *Гётенинг Минъонаси* — Гёте (1749—1832)нинг «Виль-Гельм Мейстер» деган асари қаҳрамони.

25. *Контрабандист* — чет эллардан яширинча мол келтириб ва чет элга мол олиб чиқиб сотувчи киши.

26. «*Тинган бўроннинг сўнгги булут парчаси...*» — А. С. Пушкин-нинг «Булут» номли шеърининг биринчи сатри.

27. *Эола арфаси* — ҳаво ҳаракати натижасида овоз чиқарадиган қилли музика асбоби. Шамоллар тангриси Эола номидан чиқкан.

28. *Эпиграмма* — мазах ўткир сўз.

29. *Вист* — қарта ўйинларидан бири.

30. *Gris des perles* (франц.) — гавҳар ранг.

31. *Couleur ruse* (франц.) — тўқ жигар ранг.

32. *A'la toujik* (Франц.) — мужикка ўҳашаш, мужикнамо.

33. «*Mon cher, je hais...*» (франц.) — «Азизим, мен одамларни кўролмайман, акс ҳолда улардан нафрлатанишга мажбур бўлардим, бу ҳолда эса, ҳаёт жирканч бир масхарабозликка айланур эди».

34. «*Moucher, je meprises le femmes...*» (Франц.) — «Азизим, мен хотинларни севмаслик учун улардан нафрат қиласман, акс ҳолда ҳаёт ғоят кулгили бир мелодрамага ўхшаб қолган бўларди».

35. *Скептик* — ҳеч нарсага ишёнмайдиган киши.

36. *Материалист* — материализм тарафдори.

37. *Френология* — калла сугигига қараб, одамнинг психологиясини билиш мумкин, деган сохта илм.

38. *Мефистофель* — Гётенинг «Фауст» номли драматик поэмаси-даги ёвуз руҳ.

39. *Метафизика* — бу жойда мавҳум, қоронғи, равshan бўлмаган маънода.

40. *Цицерон* — қадимги Римда машҳур нотиқ ва давлат арбоби (эрамиздан илгариги 106—43 йиллар).

41. *Рим авгуллари* — қадимги Римда қушларнинг учишига қараб каромат қилувчи коҳинлар. Цицероннинг айтишича, улар учрашиб қолганда, одамларнинг, сoddадиллигидан кулиб, бир-бирларига қараб кўяр эканлар.

42. *Архимед* — қадим замонда ўтган гениал физик ва математик (эрамиздан олдинги 287—212 йиллар); Архимед: «Менга таянч нуқтасини топиб беринглар, ер шарини ағдариб юбораман», — деган экан.

43. *Fievre lente* (франц.) — одамни ҳолсизлантирувчи ва узоқ давом этадиган беззак касали.

44. *Минораларида зерикуб ўтирган казаклар* — Кавказ забт этилмасдан олдин ва забт этилиши даврида казаклар чегарадаги қалъа атрофиға қурилган минораларда қўриқчиликда турад эдилар.

45. *Еп ріоценіque* (франц.) — шаҳардан ташқарига, кўкаламзор жойларга чиқиб ўтказиладиган сайр, зиёфат.

46. *Балка* — чуқур, ўр, жар.

47. *Амазонка* — бу жойда суворий хотинлар кийими.

48. *Mon dieu, un circass ien!*.. (франц.) — «Вой худо, черкас!»

49. *Не сгаңлез ген, madame...* (франц.) — «Қўрқманг хоним, ! мен кавалериянгиздан хавфлироқ эмасман!».

50. *Ресторация* — ресторан.

51. *Полька* — рақслардан бирининг номи.

52. *Фижма* — XVIII аср ва XIX асрнинг бошларида хотинлар

юбкаси қоматни тұла қилиб күрсатиш учун тағига кенг гардиш қўйиң тикиларди.

53. „C'est impayable...“ (франц.) — «Қизиқ экан!»
54. „merci, monsieur“ (франц.) — «Рахмат, афандим».
55. *Перметете...* (франц.) (permette) — Рухсат этинг....
56. pour tazige. — масти киши «мазурка» сүзини бузиб „tazige“ дейди.
57. *Кадриль* — қадымғы рақслардан бирининг номи.
58. „Charmant! de с eux“ (франц.) — «Ҳайратбахш! Қойил!»
59. *Аполлексия* — фалаж.
60. *Эпитафия* — қабр тоши устига ёзилган лавҳа.
61. *Амур қанотлари* — ишқ мұхаббат тангрисининг сиймоси; қанотли ёш гүдаклар шаклида тасвир этилган эди.
62. *Буюк Александр* — Искандар Зулқарнайн
63. *Лорд Байрон, Жорж Гордон* (1788—1824) — буюк инглиз шоири.
64. *Титуляр советник* — чор Россиясида амаллар 14 даражага бўлшиарди, титуляр советник энг паст даражали амаллардан бири эди.
65. vis-a-vis (франц.) — рўнарама-рўпара.
66. *Диалектика* — бу жойда — баҳсада мантиқ қоидаларини ишлатиш.
67. *Логика* — билиш қонунлари ҳақида илм.
68. *Tacco* — Торквато Tacco (1544—1595) — итальян шоири, «Озод этилган Қуддус» деган поэманинг автори: поэма қаҳрамони рицарь Танкред сирли ўрмонга кирганды момақалдироқ гумбури, алана, қоронғилик ва шу кабилар билан учрашади.
69. *Вампир* — 1819 йилда инглиз тилида шу ном билан чиққан повестнинг ёвуз қаҳрамони; повестнинг автори номаълум.
70. „Son coeur et sa fortune...“ (франц.) — «Ўз қалби баҳти ва тақдира...»
71. *Секундант* — дузлда шоҳидлик қилувчи киши.
72. *Вальтер Скотт* (1771—1832) — инглиз ёзувчisi, жуда күп тарихий романтик романлар автори.
73. *Физиологик тажриба* — бу жойда янги касал устидан тажриба ўтказиш маъносида.
74. *Юлий Цезарь* (эрэмиздан илгариги 102—44 йиллар) — машҳур Рим лашкарбошиси ва давлат арбоби. Улдирилиш куни Сенатга кетаётганида останага қоқылиб кетганды эмиш, бу эса ёмон каромат бўлган эмиш.
75. „Finita la comedia!“ (итальянча) — «Комедия тамом бўлди!»
76. *Наполеон Ватерлоодан кейин...* — 1815 йилда Наполеон Ватерлоо деган жой яқинида бўлган жангда мағлубиятга учраган.
77. *Бостон* — карталаридан бирининг номи.
78. *Яшил стол* — эски вақтларда қимор ўйналадиган стол.
79. «*Ва-банк*» — қимор ўйинида ўргадаги пул миқдорига баравар пул тиқувчи ўйинчининг хитоби.
80. *Штосс* — қимор ўйинларидан бири.
81. *Астрология* — қадим замонда юлдузларнинг туришига қараб одамларнинг тақдирини каромат қилувчи сохта илм.
82. *Чихир* — Қавказ ичимлиги, бўза.
83. *Инстинкт* — сезги ҳис.
84. *Фаталист* — тақдирга, ёзмишга кўр-кўронга ишонувчи киши.

МУНДАРИЖА

БИРИНЧИ БҮЛİM 7

ЙККИНЧИ БҮЛİM 69

Л 44

Лермонтов М. Ю.

Замонамиз қаҳрамони. О. Раҳимий таржимаси. Т.,
«Ёш гвардия», 1978.

168 б. (Мактаб кутубхонаси).

Лермонтов М. Ю. Герой нашего времени.

PI

**ЎЗБЕКИСТОН ЛҶСМ МАРКАЗИЙ КОМИТЕТИ
„ЁШ ГВАРДИЯ“ НАШРИЁТИ ЯҚИНДА ҚУЙИДАГИ
КИТОБЛАРНИ БОСМАДАН ЧИҚАРДИ**

А. Раҳмат	Олтин юлдуз кавалерлари
А. Аюпов	Шонли йўл
Назармат	Турналар йўли
Коллектив	Садоқат
У. Салоҳиддинов	Қалб гўзаллиги
Э. Сиддиқов	Бир кафт тупроқ
Ю. Абдуллаев,	Озодлик ороли
М. Лафасов	

На узбекском языке

М. Ю. Лермонтов

ГЕРОЙ НАШЕГО ВРЕМЕНИ

Перевод с издания "Детгиза", 1948 г.
Издательство „Ёш гвардия“—Ташкент—1978

Редактор
A. Шомирзаев

Рассом
P. Халилов

Расмлар редактори
K. Алиев

Техн. редактор
G. Аҳмаджонова

Корректор *M. Ортиқова*

ИБ № 267

Теришга берилди 5/Х-1977. Босишга рухсат этилди 12/I-1978.
Қоғоз № 1 Формати 84×108^{1/39}. Босма листи 5,25 Шартли
босма листи 8,82. Нашр листи 8,8 Тиражи 60000. Заказ 369

Ўзбекистон ЛКСМ Марказий Комитети „Ёш гвардия“ нашриёти
Тошкент, 700129, Навоий кўчаси, 30.
Шартнома № 83 — 76. Баҳоси 40 т.

Ўзбекистон ССР Министрлар Советининг нашриётлар, полиграфия
ва китоб савдоси ишлари бўйича Давлат комитетининг 1-босма-
хонасида босилди. Ҳамза кўчаси, 21. 1978 йил.